

唐詩紀事



# 唐詩紀事 第二冊

明·洪楙校



第一輯

第四十四種

依原刊本排印

貝葉山房張氏藏版

# 唐詩紀事目次

## 第二冊

### 第二十一卷

蕭穎士

李華

崔顥

李嘉祐

王翰

### 第二十二卷

任華

鄒象先

賈至

達述

裴輝卿

解彥融

儲光羲

孫翊

梁知微

沈千運

魏萬

元結

張均

李嶷

萬齊融

宋鼎

崔頌

### 第二十三卷

司馬退之

吳筠

蘇廣文

尉遲斥

王諲

陳希烈

高適

張彪

張子容

李之芳

崔或

孟浩然

岑參

### 第二十四卷

元傑

韋迢

孟彥深

郭受

陶現

張僞

王昌齡

周萬

包融

顏真卿

丁仙芝 李清 韓湜 齊泚 顧朝陽  
韋建

第二十五卷

徐安貞 崔惠童 崔敏童 劉晏 劉潛

薛據 劉慎虛 張巡 張繼 張渭

梁肅 柳渾 孟雲卿

第二十六卷

盧象 閻防 王季友 楊賁 張陵

王之渙 李陽冰 蘇渙 劉長卿 章八元

李穆 韋應物 朱放 孫逖 李紆

畢耀

第二十七卷

于逖 姚係 趙微明 李泌 褚朝陽

蕭昕 張朝 暢當 暢諸 獨孤及

皇甫冉 皇甫曾 李幼卿 趙驂 賈邕

劉丹 張孫錡 房白 元晟 劉太冲

姚發 鄭愕 殷小野 鄔載

第二十八卷

張濯 孫叔向 朱長文 胡令能 鄭丹

李希仲 杜誦 鄭錫 古之奇 秦系

令孤岵 楊凌 劉太真 顧况 薛業

劉希戩 朱絳 元凜 楊志堅 劉方平

李揆 戎昱

第二十九卷

常袞 張衆甫 田澄 柳彬 李彥郴

薛白 元載 張元宗 楊郇伯 高拯

梁鎰 劉長川 姚倫 孫處立 劉復

朱彬 載叔倫 于鵠 王季文

第三十卷

李益 杜羔 耿偉 盧綸 韓翃

錢起 司空曙 苗發 崔峒 李端

冷朝陽

第三十一卷

竇叔向 竇常 竇牟 竇羣 竇庠

竇翬 常建 李約 柳中庸 郭鄭

韋處厚

權德輿

張薦

楊於陵

許孟容

崔邠

馮伉

潘孟陽

武少儀

鄭常

鄭軾

韓濬

王濯

張莒

張叔良

第三十二卷

崔琮

李竦

裴達

于尹躬

顏粲

葉季長

陳通方

嚴公弼

嚴公贇

王表

陸贄

楊炎

元季川

蔣渙

包何

劉商

陸海

元季川

蔣渙

包何

第三十三卷

李吉

武元衡

鄭綱

獨孤授

李季何

李應

盧拱

李觀

裴度

韋同則

陳悅

盧拱

李觀

裴度

韋同則

第三十四卷

韓愈

張藉

史延

丁澤

樊宗師

李道昌

張藉

史延

丁澤

樊宗師

第三十五卷

陸暢

崔元翰

張建封

皇甫湜

李翱

麴信陵

孟郊

盧仝

劉义

楊巨源

陳羽 王履正 彭伉 辛引智 歐陽詹

焦郁 袁高

第三十六卷 黎逢 閻濟美 裴交泰 劉皂 崔玄亮

牛僧孺 李紳 沙傅師 盧羣 劉禹錫

封孟紳

第三十七卷 元稹

第三十八卷 白居易

第三十九卷 白居易 陳潤 章式

第四十卷 范傳正 薛存誠 賈島 馬異 張登

包佶 長孫輔左 李正封 崔護 張又新

陸復禮 柳公權 陸鴻漸 王季則 王公亮

徐收 陳存

唐詩紀事卷第二十一

蕭穎士 李華 崔穎 李嘉祐

王翰

蕭穎士

穎士重陽陪魯山登比城贈別時元有掛冠之意詩云山縣遶古堞悠悠快登望雨餘秋  
天高日盡無隱狀綿連潁川迥杳渺鴉路深彭澤興不淺臨風動歸心賴茲琴堂暇傲倪傾菊  
酒人知歲已登從政復何有遠山十里並一道銜長雲青霞半落日混合疑晴曠漸聞栖林羽  
坐歎清夜月中歡愴有違行子念明發僅能泯寵辱未免傷別離江湖不可忘風雨勞相思明  
時當盛才短伎安所設何日謝百里從君漢之滌又答韋司業垂訪云吻啣食華鹿常欲清冷  
川但悅豐草美甯知牢饌鮮主人有幽意將以充林泉羅網幸免傷蒙君復羈牽高堂列衆賓  
廣坐鳴清絃俯仰轉傷腸徘徊獨憂煎緬懷雲巖路欲往無由緣物各有所好違之傷自然  
神龜在南國緬邈湘川陰遊止蓮葉上歲時嘉樹林毒虫且不近斤斧何由尋錯落負奇  
文煒煌耀丹金江山萬里餘淮海阻且深獨保貞素質不爲寒暑侵一逢聖明代應見通靈心



晉代有儒臣。當年富辭藻。立言寄青史。將以贊王道。遼落緬歲時。辛勤歷江島。且言風波倦。探涉豈爲寶。不遇庾征西。云誰展懷抱。士貧乏知己。安得成所好。彭陽昔游說。願謁南郢都。王果尙未達。况從夷節謨。豈知晉叔向。無罪嬰囚拘。臨難俟解紛。獨知祁大夫。舉讎且不棄。何必論親疎。夫子覺者也。其能遺我乎。關西一公子。年兒獨青春。披褐來上京。翳然聲未振。中郎何爲者。倒屣驚座賓。詞賦豈不佳。盛名亦相因。爲君奏此曲。此曲多苦辛。千載不可誣。孰言今無人。

李華序其文曰。開元天寶間。以文學著於時者。曰蘭陵蕭穎士。字茂挺。年十九。進士擢第。淮南連帥表君爲揚州工曹。沒於汝南旅次。君謂六經之後。有屈原宋玉。文甚雄壯。而不能經厥後。有賈誼。文詞詳正。近於理體。枚乘司馬相如。亦瓌麗才士。然而不近風雅。楊雄用意頗深。班彪識理。張衡。宋曠。曹植。豐贍。王粲。超逸。嵇康。標舉。此外皆金相玉質。所尙或殊。不能備舉。左思詩賦。有雅頌遺風。千寶著論。近乎王化根源。此外皆翫絕無聞。近日陳拾遺。文體最正。此而言。見君述作。君以文章制度爲己任。時人咸以此許之。穎士卒。門人贈文元先生。惟一子存。字伯誠。爲金部員外郎。有功曹文風。惡裴延齡。棄官歸廬山。存子東從事。邕南。以女妻柳淡。字中庸。韓文公少時受存之知。自袁州入爲祭酒。經廬山。過其山居。知諸子凋謝。唯二女在。乃爲

詩曰。中郎有女能傳業。伯道無鬼可保家。今日匡山過舊隱。空將衰淚對烟霞。

穎士以推獎後進爲任。如李陽。李幻。皇甫冉。陸渭等數十人。由獎目皆爲名士。天下推知人。稱蕭功曹。嘗兄事元德秀。而友殷寅。顏真卿。柳芳。陸據。李華。邵軫。趙驥。時人語曰。殷顏柳陸。李蕭邵趙。以能全其交也。李華與齊名。世號蕭李。

### 李華

華字遐叔。舉開元二十三年進士。天寶二年。博學宏詞。皆爲科首。天寶十一年。拜監察御史。除右補闕。祿山亂。輦母而逃。爲盜所得。二京復。坐謫杭州司功參軍。召加司封員外郎。將以司言處之。華曰。焉有墮節奪志者。可以荷君之寵乎。移病請告。李峴領選江南。表爲從事。以風痺廢居楚。

詠史詩云。日照崑崙山。羽人披羽衣。乘龍駕雲霧。欲往心無違。此山在西北。乃是神仙國。靈氣皆自然。求之不可得。何爲漢武帝。精意徧羣山。糜費巨萬計。宮車終不還。蒼蒼茂陵樹。足以戒人間。

天生忠與義。本以佐雍熙。何意李司隸。而當昏亂時。古墳襄城野。斜徑橫秋陂。况不禁樵採。茅莎無了遺。高標尙可仰。精爽今何之。一忤中常侍。啣冤誰見知。常觀黨綱傳。撫卷不勝悲。

文候眈鄭衛。一聽一忘殫。白雪燕姬舞。朱絃趙女彈。淫聲流不返。愒蕩日無端。猷歲受朝時。鳴鐘醮百官。兩牀陳管磬。九奏殊未闌。對此唯恐臥。更能整衣冠。

漢皇修雅樂。乘輿臨太學。三老與五更。天王親割牲。一人調風俗。萬國和且平。單于驟款塞。武庫欲銷兵。文物此朝盛。君臣何穆清。至今壇壇下。如有齋韶聲。

蜀主相諸葛。功高名亦尊。驅馳千萬衆。怒目瞰中原。曹伯任公孫。國亡身不存。社宮久蕪沒。白雁猶飛翻。勿言君臣合。可以濟黎元。爲蜀諒不易。爲曹難復論。

秦滅漢帝興。南山有遺老。危冠掛萬乘。幸得厭征討。當君逐鹿時。臣等已枯槁。寧知市朝變。但覺泉石好。高臥五十年。相看成四皓。帝言翁甚善。見顧何不早。咸稱太子仁。重義亦尊道。側聞驪姬事。申生不自保。整出商山雲。竭來趁灑掃。東宮成羽翼。楚舞傷懷抱。後代無其人。戾園滿秋草。

六國韓最弱。末年尤畏秦。鄭生爲韓計。且欲疲秦人。利物可分社。原情堪滅身。咸陽古城下。萬頃稻苗新。

昂藏獬豸獸。出自太平年。亂代乃潛伏。縱人爲禍愆。常聞斷馬劍。每壯朱雲賢。身死名不滅。寒風墓墓田。精靈如有在。幽憤滿松煙。

沂水春可涉。泮宮映楊葉。麗色異人間。珊瑚搖瓊環。辰禽常獨處。深巷生禾黍。城上飛海雲。城中暗春雨。適來鳴珮者。復是誰家女。泥沾珠綴履。雨濕翠毛簪。電影閉蓮臉。雷聲飛蕙心。自言沂水曲。采蘋兼采棗。歸遲雖可尋。天陰光景促。憐君貞且獨。願許君家宿。徒勞惜衾枕。子不顧雙娥。豔質誠可重。淫風如禮何。周王惑褒姒。城闕成波沓。

巢許在嵩穎。陶唐不得臣。九州上洗耳。一命安能親。縣邈數千祀。丘中誰隱淪。朝遊八卿府。夕是山林人。蒲帛楊仄陋。薜蘿爲縉紳。九重念入夢。三事思降神。且設庭中燎。甯窺泉下鱗。漢時征百越。楊僕將樓船。幕府功未立。江湖已騷然。烏夷非敢亂。政暴地仍偏。得罪因懷璧。防身輒控弦。三軍求裂土。萬里詎聞天。魏闕心猶在。旗門首已懸。如何得良吏。一爲制方圓。  
(詠史十一篇)

寄題趙七侍御餘自于谿行經弋陽至上饒山川幽麗思與雲卿同遊邈不可得因敘時年之素寄懷於篇云。

搖槳曙江流。江清山復重。心愜賞未足。川迴失前峯。凌灘出極浦。曠若天池通。君陽青嵯峨。開折泥元中。九潭魚龍窟。仙成羽人宮。陰奧潛鬼物。精光動烟空。玄猿啼深龍。(千宗反楚越謂竹樹深者爲龍)白鳥戲葱蒙。飛湍鳴金石。激溜鼓雷風。雨濯万木鮮。霞照千山濃。草闋

長餘綠。花淨落幽紅。洛烟見晨釣。山月聞夜春。覆谿窈窕波。滔石涵溶溶。丹丘忽聚散。素壁相奔衝。白日破昏靄。靈山出其東。勢排吳蒼上。氣壓吳越雄。迥頸望雲卿。此恨發吾衷。昔日蕭郊遊。四人纔成童。華與趙七侍御驂。故蕭十功曹。皆苦貧幫弊。同年三人登科。穎士故邵十六軫未冠。進太學。相次與校邵後三人及第也。屬詞慕孔門。人仕希上公。緯卿陷非罪。折我昆吾鋒。郡字緯卿以冤橫貶卒南中。茂挺獨先覺。拔身渡京虹。斯人謝明代。百代墜鷄鴻。蕭天寶未知亂。棄官往江東。殯葬先人逝於江南。世故墜橫流。與君哀路窮。逆胡陷兩京。華與趙受辱見中。相顧無死節。蒙恩逐殊封。華貶杭州司功。趙貶泉州晉江尉。天波洗其瑕。朱衣備朝容。華承恩累遷尙書郎。趙拜補開御史。一別凡十年。豈期復相從。餘生得攜手。遺此兩孱翁。幸遷失鸞羽。後凋惜長松。衰旅難重別。悽悽滿心胸。遇勝悲獨遊。貪奇悵孤逢。禽尙彼何人。胡爲束樊籠。吾師度門教。投弁蹠遐蹤。

## 崔顥

擢進士第。有文無行。終司勳員外郎。初李邕聞其名。虛舍待之。顥至獻詩。首章云。十五嫁王昌。邕叱曰。小兒無禮。不與接而去。

孟門行云。黃雀銜黃花。翩翩傍簷隙。木擬報君恩。如何反彈射。金壘美酒滿座春。平原愛

才多衆寶滿堂盡是忠義士。何意得有讒諛人。諛人翻覆那可道。能令君心不自保。北園新栽桃李枝。根株未固何轉移。成陰結子君自取。若問傍人那得知。

霍將軍云。長安甲第高入雲。誰家居住霍將軍。日晚朝迴擁賓從。路旁揖拜何紛紛。莫言炙手可熱須臾火。盡灰亦滅。莫言貧賤即可欺。人生富貴自有時。一朝天子賜顏色。世上悠悠應始知。

黃鶴樓詩。昔人已乘白雲去。此地空餘黃鶴樓。黃鶴一去不復返。白雲千載空悠悠。晴川歷歷漢陽樹。春草淒淒鸚鵡洲。日暮鄉關何處是。煙波江上使人愁。（世傳太白云。眼前有景道不得。崔顥題詩在上頭。遂作鳳凰臺詩以較勝負。恐不然。）

王家少婦詩云。十五嫁王昌。盈盈入畫堂。自憐年最小。復倚媚爲郎。舞愛前溪綠。歌憐子夜長。閑來門百草。度日不成粧。

商璠云。顥少年爲詩。屬意浮豔。多陷輕薄。晚歲忽變常體。風骨凜然。如殺人遶水上。走馬漁陽歸。錯落金鑱甲。蒙茸貂鼠衣。又秋風吹淺草。獵騎何翩翩。插羽兩相顧。鳴弓新上弦。鮑昭江淹須有慚色。

古游俠呈軍中諸將云。少年負膽氣。好勇復知機。仗劍出門去。孤城逢合圍。殺人潦水上。

走馬漁陽歸。錯落金鑱甲。蒙茸貂鼠衣。還家行且獵。弓矢速如飛。地迴鷹狗疾。草深狐兔肥。腰間帶兩綬。轉盼生光輝。顧謂今日戰。何如隨建威。

贈王威古云。三十羽林將。出身常事邊。秋風吹淺草。獵騎何翩翩。插羽兩相顧。鳴弓新上弦。射糜入深谷。飲馬向寒泉。馬上共傾酒。野中聊割鮮。相看未及醉。雜虜叩幽燕。烽火知不息。胡塵高際天。長驅救東北。戰解城亦全。報國行赴難。古來皆其然。

送單于裴都護云。征馬出翩翩。秋城月正圓。單于莫近塞。都護欲臨邊。漢驛通烟火。胡沙乏井泉。功成須獻捷。未必去經年。

題隱侯八詠樓云。梁日東陽守。爲樓望越中。綠牕明月在。青史古人空。江靜聞山狖。川長數塞鳴。登臨白雲晚。流恨此遺風。

遼西云。燕郊芳歲晚。殘雪凍邊城。四月青草合。遼陽春水生。胡人正牧馬。漢將日徵兵。露重寶刀濕。沙虛金鼓鳴。寒衣着已盡。春服誰與成。寄言洛陽使。爲傳邊戍情。

渭城少年行云。洛陽二月梨花飛。秦地行人春憶歸。揚鞭走馬城南陌。朝逢驛使秦川客。驛使前日發章臺。傳道長安春早來。棠梨宮中燕初至。蒲萄館裏花正開。問念使人歸。吏早三月便達長安道。長安道上春可怡。搖風蕩日曲江邊。萬戶樓臺臨渭水。五陵花柳滿秦川。

李嘉祐

字從一。上元中。嘗爲台州刺史。大曆間。刺袁州。李肇記漠漠水田飛白鷺。陰陰夏木囀黃鸝之句。本嘉祐詩。而集中不見。與嚴維。劉長卿。冷朝陽友善。嘗有詩。四年謫官滯江城。未厭門前鄙水清。誰言宰邑化黎庶。欲別雲山如弟兄。雙鷗爲底無心狎。白髮從他遠鬢生。惆悵閑眠臨極浦。夕陽秋草不勝情。嘉祐蓋嘗謫官。但不知其故。然見元日無衣冠入朝云。白髭空換歲。丹陛不朝天。其坎坷之狀。可少見矣。嘉祐有送從叔陽冰。寄從弟紆。及姪端詩。蓋三子之族也。遊鶴林寺云。野寺江城近。雙旌五馬過。禪心超忍辱。梵語問多羅。松竹閑僧老。雲霞晚日和。寒塘歸路轉。清磬隔微波。

送王牧往吉州謁王使君云。細草綠汀洲。王孫耐薄遊。年華初冠帶。文體舊弓裘。野渡花爭發。春塘水亂流。使君矜小阮。應念倚門愁。

仲夏江陰官舍寄裴明府云。萬里邊江次。孤城對海安。朝霞晴作雨。濕氣曉生寒。苔色侵衣桁。潮痕上井欄。題書招茂宰。畏爾欲辭官。

潤州送蔣侍御收兵歸楊云。冷氣清金虎。兵威壯鐵冠。揚旌川色暝。吹角水風寒。人對輜輶醉。花看睥睨殘。羨歸丞相府。空望舊門欄。



高仲武云。嘉祐袁州人。振藻天朝。大收芳譽。中興高流也。與錢郎別爲一體。往往涉於齊梁。綺美婉麗。蓋吳筠何遜之敵也。至於野渡花爭發。春塘水亂流。朝霞晴作雨。濕氣曉生寒。文華之冠冕也。又禪心超忍辱。梵語問多羅。設使許珣更生。孫綽復在。窮思極筆。未到此境。

和苗員外發秋夜宿直云。久雨南宮夜。仙郎寓直時。漏長丹鳳闕。秋冷白雲司。螢影侵塔亂。鴻聲出苑遲。蕭條人吏散。小謝有新詩。（姚合取寫極元集）

戴叔倫夜發袁州寄李穎川詩。卽嘉祐也。詩云。半夜迴舟入禁鄉。月明山水共蒼蒼。孤猿更發秋風裏。不是愁人亦斷腸。（時李貶於此）

王翰

古長城吟云。長沙少年無遠圖。一生唯羨執金吾。騏驎前殿拜天子。走馬西擊長城胡。胡沙獵獵吹人面。漢虜相逢不相見。遙聞鍾鼓動地來。傳道單于夜猶戰。此時願恩甯顧身。爲君一行摧萬人。壯士揮戈迴白日。單于濺血染朱輪。迴來飲馬長城窟。長城道傍多白骨。問之耆老何代人。云是秦王築城卒。黃昏塞北無人烟。鬼哭啾啾聲沸天。無罪見誅功不賞。孤魂流落此城邊。當昔秦王按劍起。諸侯膝行不敢視。富國強兵二十年。築怨興徭九千里。秦王築城何太愚。天實亡秦非北胡。一朝禍起蕭牆內。渭水咸陽不復都。

翰字子羽。晉陽人。少豪健。恃才。張嘉正。張說爲并州長史。厚禮之。爲駕部員外郎。坐事。貶道州司馬。卒。

明皇送張說巡邊應制云。紫蓋尙書印。朱戟丞相車。登朝身許國。出關將辭家。不憚炎蒸苦。親嘗走馬賒。選徒軍有令。誓卒爾無譁。帝樂風初起。王城日半斜。寵行流聖作。寅饒至台華。騎歷河南樹。旌搖天北沙。榮懷應盡服。嚴殺已先加。業峻靈祇保。功成道路嗟。甯知鑿空使。遠致石榴花。

送張說赴集賢院上賜講賦得筵字云。東堂起集賢。貴得俊神仙。首命台階老。將崇御府圓。送人將玉珮。中使瓊拂筵。和樂薰風解。淇恩時雨連。長材成磊落。短翮強翩跹。徒仰蓬萊地。何階不讓緣。

恩賜樂遊園宴應制云。未極人心暢。何如帝道明。仍嫌醮宴促。復寵樂遊行。陸海披瓊藏。天河直斗城。四關清竅合。數處白雲生。征誦調元氣。歌鍾溢雅聲。空慚堯舜力。至德眷難名。



唐詩紀事卷第二十二

任華

鄒象先

賈至

遠述

裴耀卿

解彥融

儲光羲

孫綽

梁和微

沈千運

魏萬

元結

張均

李崑

萬齊融

宋鼎

崔頌

任華

雜言寄李白。古來文章。有能奔逸氣。聳高格。清人心神。驚人魂魄。我聞當今有李白。大獵賦。鴻猷文。蠟長卿。笑子雲。班張所作。瑣細不入耳。未知卿雲得在。嗤笑限。登廬山。觀瀑布。海風吹不斷。江月照還明。余愛此兩句。登天台。望渤海。雲垂天鵬飛。山壓巨壑背。斯言亦好。至於他作。多不拘常律。振擺超騰。既俊且逸。或醉中操紙。或興來走筆。手下忽然。片雲飛。眼前劃見。孤峯出。而我有時。白日忽欲睡。睡覺欻然起。攘臂。任生知有君。君也知有任生未。中間問道在長安。及余辰止。君已江東訪元丹。邂逅不得見君面。每常把酒背東望。良久見說。往年在翰林。胸

中矛戟何森森。新詩傳在宮人口。佳句不離明主心。身騎天馬多意氣。目送飛鴻對豪貴。承恩召入凡幾迴。待詔歸來仍半醉。權臣妬盛名。羣犬多吠聲。有勅放君歸隱淪。高歌大笑出關去。且向東山爲外臣。諸侯交迓馳朱輪。白璧一雙買交者。黃金百鎰相知人。平生傲岸其志不可測。數十年爲客。未嘗一日低顏色。八詠樓中坦腹眠。五侯門下無心憶。繁花越臺上。細柳吳宮側。綠水青山知有君。白雲明月偏相識。養高簾卷閑。可見不可攀。莊周萬物外。范蠡五湖間。又聞訪道滄海上。丁令王喬時還往。蓬萊經是曾到來。方丈豈唯方一丈。伊余每欲乘輿遠相尋。江湖擁隔勞寸心。今朝忽遇東飛翼。寄此一章表胸臆。儻能報我一片言。但訪任華有人識。

雜言寄杜拾遺云。杜拾遺名甫。第二才甚奇。任生與君別來已多時。何嘗一日不相思。仕拾遺。知不知。昨日有人誦得數篇黃絹詞。吾怪異奇特借問。果然稱是杜二之所爲。勢攫虎豹。氣騰蛟螭。滄海無風似鼓蕩。華嶽平地欲奔馳。曹劉俯寄慚大敵。沈謝遠巡稱小兒。昔在帝城中。盛名君一箇。諸人見所作。無不心膽破。郎官叢裏作狂歌。丞相閣中常醉臥。前年皇帝歸長安。承恩闕步青雲端。積翠好遊花隘。披香寓直月團圓。英才特達承天睞。公卿無不相欽羨。只緣汲黯好直言。遂使安仁却爲掾。如今避地錦城隅。幕下英寮每日相就提玉壺。半醉起舞捋髭鬚。乍低乍昂傍若無。古人制禮但爲防俗士。豈得爲君設之乎。而我不飛不鳴亦何以。只

待朝廷有知己。已曾讀却無限書。拙詩一句兩句在人耳。如今看之忽無益。又不能崎嶇倚朝市。且當事耕稼。豈得便徒爾。南陽葛亮爲朋友。東山謝安作鄰里。閑常把琴弄。悶卽攬鋤起。罌啼二月三月時。花發千山萬山裏。此中幽曠無人知。火急將書憑驛吏。爲報杜拾遺。

高適贈任華云。丈夫結交須結貧。貧者結交交始親。世人不解結交者。唯重黃金不重人。黃金雖多有盡時。結交一成無竭期。君不見管仲與鮑叔。至今留名名不移。

摭言載。華告辭京尹賈大夫書。責其恃才傲物。又與京兆杜中丞書。責其始以文章見知。而終不相顧。上御史嚴大夫牋。以爲失在於倨。闕在於恕。欲其遇士誠於倨。撫下洪以恕。可以長守富貴。與庾中丞書云。公幸以文章見許。以補袞相期。公頃謂李太僕曰。任子文詞。可謂卓絕。負冤以久。何不奏與太僕承。然公之相待。何前緊而後慢耶。華本野人。常思漁釣。尋常杖策歸乎舊山。非有機心。致斯扣繫。但以今之後進。皆屬望於公。公其留意焉。

### 鄒象先

象先尉臨漁。蕭穎士自京邑無成東歸。以象先同年生也。作詩贈之。來年蕭補正字。象先寄詩。重述前事云。六月度關雲。三峯翫山翠。爾時黃綬屈。別後青雲致。蕭答云。桂枝常共擢。茅茨冀同薦。一命何阻脩。載馳各州縣。壯圖悲歲月。明代恥貧賤。回首無津梁。祇令二毛變。

賈至

岳陽樓宴王員外貶長沙云。極浦三春草。高樓萬里心。楚山晴靄碧。湘水暮流深。或謂朝中舊。同爲澤畔吟。停盃試北望。還欲淚沾襟。

侍讌曲云。雲階褰衣裳。丹墀覆綠楊。隔簾粧掩映。向席舞低昂。鳴珮長廊靜。如冰廣殿涼。餘慳劍履散。同輦入昭陽。

馮昭儀當熊云。白羽插彫弓。蜺旌動朔風。平明出金屋。扈輦上林中。逐獸長廊靜。呼鷹御苑空。王孫莫諫獵。賤妾解當熊。

早朝大明宮云。銀燭薰天紫陌長。禁城春色曉蒼蒼。千條弱柳垂青瑣。百轉流鶯繞建章。劍珮聲隨玉墀步。衣冠氣接御爐香。共沐恩波鳳池裏。終朝默默待君王。（王維。杜甫。岑參同和。）

自蜀奉册命往朔方途中作云。胡羯亂中夏。鑾輿或南巡。衣冠陷口戎。狼狽隨風塵。爾公秉大節。臨難不顧身。激昂白刃前。濺血下沾巾。尙書抱忠義。歷險披蒼榛。扈從出劍門。登翼岷江濱。時望揖侍郎。公才標縉紳。亭亭崑山玉。皎皎無緇磷。顧惟乏經濟。扞牧陪從臣。永願雪會稽。一劍清咸秦。太皇時內禪。神器付嗣孫。新命集舊邦。至德被遠人。捧册自南服。奉詔趨北軍。

觀謁心載馳。遠離難重陳。策馬出蜀山。畏途上綠雲。飲啄叢菁間。棲息虎豹羣。嶇崎凌棧危。惴惴慄心神。峭壁上嶽岑。大江下沅沅。皇風扇八極。異類懷深仁。元兇誘熟虜。肘腕生妖氛。明主信英武。威聲嚇四鄰。誓師自朔方。旗幟何繽紛。鐵騎照白日。旄頭拂秋旻。將來盪滄溟。甯止蹴崑崙。古來有迍難。否泰長相因。夏康纘禹績。代祖復漢勳。千後各勤王。驅馳拱紫宸。遇惟太公望。往昔逢周文。語謂三傑才。公業獨殊倫。感此慰行邁。無爲歌苦辛。帝傳位。至讓册。進彙。帝曰。先天誥命。乃父爲之辭。今茲命又爾爲之。兩朝盛典。出卿父子之手。可謂繼美矣。

至。字幼鄰。魯之子也。肅宗時。爲中書舍人。坐小法。貶岳州司馬。在巴陵。有詩寄朝中友人云。江南春草初蠶罷。愁殺江南獨愁客。秦中楊柳也應新。轉憶秦中相憶人。萬里鸞花不相見。登高一望淚沾巾。寶應初。召復故官。大曆中。位右散騎常侍。卒。

李白寄至詩云。賈生西望憶京華。湘浦南遷莫怨嗟。聖主恩深漢文帝。憐君不遣到長沙。

### 韋述

晚度伊水詩云。悠悠涉伊水。伊水清見石。是時春向深。兩岸草如積。迢遞望州嶼。逶迤亘津陌。新樹落疏紅。遙原上新碧。回首瞻洛陽。遽有長山隔。烟霧猶隔家。風塵已爲客。登涉多異趨。往來見行役。雲起早已昏。鳥飛日將夕。光陰逝不借。超然慕疇昔。遠近亦何爲。歸來存竹帛。



送張說上集賢學士應制云。修文中禁啓。改字令名加。台坐徵人傑。書坊應國華。賦詩開  
廣宴。賜酒酌流霞。雲散明金闕。池開照玉沙。掖垣留宿鳥。溫樹落餘花。謬此天光及。啣恩醉日  
斜。

述純厚長者。澹榮利。任史官二十年。典掌圖書。餘四十年。天寶間。爲國子司業。充集賢學  
士。祿山亂。抱國史藏南山。臣賊賊平。流渝州。爲刺史。薛舒所困。不食死。

裴耀卿

耀卿爲宣州刺史日。張九齡經營塗界。以詩寄之。又有江上使風詩。寄耀卿云。江路與天  
連。風帆何淼然。遙林浪出沒。孤舫鳥聯翩。常自千鈞重。深思萬事捐。報恩非狗祿。還逐賣人船。  
耀卿和當塗詩云。茂先實王佐。仲舉信時英。氣視衝天發。人將下榻迎。桂符肅有命。江國  
遠徂征。九派期方越。千鈞或可輕。高帆出風洶。孤嶼入雲平。端邁嗟于役。離憂空自情。飭簪倍  
早歲。接壤廟專城。曠別心彌轡。宏規義轉傾。徒然限飢渴。况乃諷瑤瓊。

再酬使風見示云。茲地五湖隣。難哉萬里人。驚飈翻是託。危浪亦相因。宣室才華子。金閨  
諷議臣。承明有三入。去去速歸輪。

解彥融

雁塔詩云。崢嶸徹倒景。刻峭俯無地。勇進攀有緣。卽嶮恐迷墜。宵然喪五蘊。蠢口懷萬類。實際罔它尋。波羅必可致。南山繚上苑。蒼樹連巖翠。北斗臨帝城。扶宮切太清。食和稗日用。味道懿天明。綠野冷風浹。紫微佳氣品。馴禽演法要。忍草藉經行。本願從茲適。方知物世輕。

此詩開元八年清河傅巖題于雁塔。

儲光羲

古意云。秋風肅天地。太行高崔嵬。猿狖清夜吟。其聲一何哀。寂寥掩圭華。夢寐遊蓬萊。琪樹遠亭亭。玉堂雲中開。洪崖吹簫管。素女飄飄來。雨師旣先後。道路無纖埃。鄙哉楚襄王。獨好雲陽臺。

胚渾本無象。末路多是非。達士志寥廓。所在能忘機。耕鑿時未至。還山聊採薇。虎豹對我蹲。鸞鶴傍我飛。仙人空中來。謁我勿復歸。格擇爲君駕。雲霓爲君衣。西近崑崙墟。可與世人違。王維待光羲不至詩云。重門朝已啓。起坐聽車聲。要欲聞清風。方將出戶迎。晚鍾鳴上苑。疎雨過春城。了自不相顧。臨堂空復情。

光羲。兗州人。登開元進士第。又詔中書試文章。歷監察御史。祿山亂陷焉。賊平貶死。商瑤云。儲公詩格高調逸。削盡常言。趣遠情深。挾風雅之道。得浩然之氣。述華清宮詩云。

山開鴻蒙色。天轉招搖星。又遊茅山詩云。山門入松栢。天路涵空虛。此例數百句。略見荊陽集。不復廣播。常觀儲公政論十五卷。九經分義疏二十卷。言博理當。實可謂經國之才。

新豐道中作云。西下長樂坂。東入新豐道。雨多車馬稀。道上生秋草。太陰蔽皇陸。莫知晚與早。雲雷杳冥冥。川谷漫浩浩。詔書植佳木。二十八有詔重果。無言桃李好。自顧無此容。歸從漢陰老。

泊舟詒潘少府云。行子苦風潮。維舟未能發。宵分卷前幔。臥視清秋月。四澤葭葦深。中州烟火絕。蒼蒼水霧起。落落疎星沒。所遇盡漁商。與言多楚越。其如念極浦。又以思明哲。時潘在後浦。常若千里餘。况之異鄉別。

田家卽事云。蒲葉日已長。杏花日已滋。老農要看此。貴不違天時。迎晨起飯牛。雙駕耕東菑。蚯蚓土中出。田鳥隨我飛。羣合亂啄噪。嗷嗷如道飢。我心多惻隱。願此兩復非。撥食與田鳥。日暮空筐歸。親戚更相誚。我心終不移。

田家雜興三首云。春至鷓鴣鳴。薄言向田墅。不能自力作。僮俛娶鄰女。旣念生子孫。方思廣園圃。閑時相顧笑。喜悅好禾黍。夜夜登嘯臺。南望洞庭渚。白草被霜露。秋山響枯杵。却羨故年時。中情無所取。

梧桐蔭我門。薜荔網我屋。超超兩夫婦。朝出暮還宿。稼穡既自種。牛羊還自牧。日時懶耕鋤。登高望川陸。空山足禽獸。墟落多喬木。白馬誰家兒。聯翩相馳逐。楚山有高士。梁國有遺老。築室既相隣。向田復同道。糧糲常共飯。兒孫日更抱。忘此耕耨勞。媿彼風雨好。螻蛄鳴空澤。鵝鷺傷秋草。日夕寒風來。衣裳苦不早。

同王十三維偶然作四首云。野老本貧賤。冒暑鋤瓜田。一畦未及終。樹下高枕眠。荷蓀者誰子。皤皤來息肩。不復問鄉墟。相見但依然。腹中無一物。高話羲皇年。落日臨層隅。逍遙望晴川。使婦提蠶筐。呼兒傍漁船。悠悠泛綠水。去摘浦中蓮。蓮花豔且美。使我不能還。

仲夏日中時。草木看欲燃。田家惜功力。把鋤來束臯。顧望浮雲陰。往往誤傷苗。歸來悲困極。兄嫂相共饒。無錢可沽酒。何以解劬勞。夜深星漢明。庭宇虛寥寥。高柳三五株。可以獨逍遙。浮雲在虛空。隨風傷卷舒。我心方處順。動作何憂虞。但言嬰世網。不復得閑居。迢遞別東國。超遙來西都。見人乃恭敬。曾不問賢愚。雖若不能言。中心亦難誣。故鄉滿親戚。道遠情日疎。偶欲陳此意。復無南飛鸞。

北山種松栢。南山種蒺藜。出入雖同趣。所向各有宜。孔丘貴仁義。老氏好無爲。我心若虛空。此道將安施。暫過伊闕間。晚晚三伏時。高閣入雲中。芙蓉滿清地。要自非我室。還望南山陲。

孫翹

張曲江在洪州。有郡南江上別孫侍御詩云。雲障天涯盡。川途海縣窮。何言此地僻。忽與故人同。身負邦君弩。情紆御史驄。王程我安駐。離思逐秋風。翹時以監察御史奉使洪州。酬云。受命議封疆。逢君收豫章。於焉審虞芮。復爾共舟航。悵別秋陰盡。懷歸客思長。江臯柱離贈。持此慰他鄉。

梁知微

知微自潭州入朝。張說宴別於岳陽。以詩送之云。遠洩長沙洛。欣逢賈誼才。江山疲應接。風日復晴開。又云。月餘偏地賞。心盡故人杯。其末云。夢見長安陌。朝宗實盛哉。知微奉別燕公詩云。華容佳山水。之子厭承明。符竹迂小郡。江湖被德聲。三年計吏入。路指巴丘城。鳧舟纔結纜。驕駕已相迎。別離他鄉酒。委曲故人情。孤嶼早烟泊。長波晚氣清。辛勤方遠鶖。勝賞屢難并。迴瞻洞庭浦。日暮愁雲生。燕公有送知微渡東海詩云。今日此相送。明年此相待。天上客星迴。知君渡東海。暨送入朝至洞庭山。又作云。巴陵一望洞庭秋。日見孤峯水上浮。聞道神仙不可接。心隨湖水去悠悠。蓋心存魏闕之意也。

知微嗣聖初登進士第

沈千運

山中作詩云。棲隱別無事。所願早離塵。不辭城邑遊。禮樂拘束人。邇來歸山林。庶事皆吾身。何者爲形骸。誰是智與仁。寂寞于閑事。然後知天真。咳唾驚榮華。迂俯相屈伸。如何巢與由。天子不得臣。

贈史修文云。故人阻千里。會面非別期。握手於此地。當歎返成悲。念離宛猶昨。俄已經數期。疇昔皆少年。別來髮如絲。不道舊姓名。相逢知是誰。曩遊盡鷲翥。與君仍布衣。豈曰無其才。命理應有時。別路漸欲少。不覺生涕洟。

感懷弟妹詩云。今日喜氣暖。東風杏花拆。筋力又不如。慚嘆澗中石。神仙杏難準。中壽纔滿百。近世多天傷。喜見髭鬢白。藜杖竹樹間。宛宛舊行跡。豈知園中主。却是園中客。兄弟所存半。空爲亡者惜。冥冥無再期。哀哀望松栢。骨肉能幾人。年老漸疎隔。性情誰免此。而我何不易。唯願得爾輩。相看慰朝夕。平生只已矣。此外盡非逸。

濮上言懷云。聖澤優賢良。草澤無遺匿。人生各有志。在予胡不淑。一生但區區。五十無寸祿。衰退當棄捐。貧賤遭時譴。恹恹去人世。述質日窮逼。不如守田園。歲晏望豐熟。壯年失宜盡。老大無筋力。始愴前計非。方貽後生福。兒童新學稼。小女未能織。顧此煩知己。終日求衣食。

元結篋中集序云。風雅不作。幾及千年。近世作者。更相沿襲。拘限聲病。喜尙形似。且以流易爲辭。不知喪於雅正。吳興沈千運。獨挺於流俗之中。強攘於已溺之後。窮老不惑。五十餘年。凡所爲文。皆與時異。故朋友後世。稍見師効。能似類者。有五六人。於戲。自沈公及二三子。皆以正直而無祿位。皆以忠信而久貧賤。皆以仁謙而至喪亡。兵興于今。六歲。已長逝者。遺文散失。方阻絕者。不見近作。故編於篋中者。凡二十二首云。

王季友代人贈千運云。相逢問姓名。復存別來無子今。有孫山上雙峯長不改。百姓唯有三家村。村南東西車馬道。一宿通舟水浩浩。河中磊磊千里石。河上游泳汎種稻。半坡古塚背我拆。滿田主人舊是客。舉聲酸辛問同年。十人七人歸下泉。分手如何更此地。迴頭不去淚漣然。

張籍過千運舊居詩云。汝北君子宅。我來見頽墉。亂離子孫盡。地屬隣里翁。古木被丘墟。蹊路不相通。舊井蔓草合。牛羊墜其中。居辭天子書。放意任禮躬。一生不自力。家與逆旅同。我如星辰餘。生於綴磨磬。方將旌舊閭。百歲不可封。嗟其未積來。已爲荒林叢。時當無知者。莫能敦此風。浩蕩意無覩。我將安所從。

君抱碧海珠。我懷藍田玉。各稱希代寶。萬里遙相燭。長卿慕閣久。子猷意已深。平生風雅人。暗合江海心。去秋忽乘輿。命駕來東土。謫仙遊梁園。愛子在雛魯。二處一不見。拂衣向江東。五兩挂淮月。扁舟隨海風。南遊吳越徧。高揖二千石。雲上天台山。春逢翰林伯。宣父敬項託。林宗重王生。一長復一少。相看如弟兄。惕然意不盡。更逐西南去。同舟入秦淮。建業龍盤處。楚歌醉吳酒。借問承恩初。宮買長門賦。天迎駟馬車。才高世難容。道廢可推命。安石重携妓。子房空謝病。金陵百萬戶。六代帝王都。虎丘踞西江。鍾山臨北湖。湖山信爲美。王屋人相待。應爲岐路多。不知歲寒在。君遊早晚還。勿久風塵間。此別未遠別。秋期到仙山。右魏萬贈太白詩也。

太白送萬還王屋序云。王屋山人魏萬。自嵩宋淞吳。相送數千里不遇。乘興遊台越。經永嘉。觀謝公石門。後於廣陵相見。美其愛文好古。浪迹方外。因述其行而贈以詩云。

萬後名顯。上元初登第。始見白於廣陵。白曰。爾後必著大名於天下。無忘老夫與明月奴。因盡出其文。命巔集之。

### 元結

春陵行序云。癸卯歲。漫叟授道州刺史。道州舊四萬餘戶。經賊已來。不滿四千。太半不勝賦稅。到官未五十日。承諸使徵求符牒二百餘封。皆曰。失其限者罪至貶削。於戲。若悉應其命。



則州縣破亂。刺史欲焉逃罪。不應命。又卽獲罪戾。必不免也。吾將守官靜以安。又待罪而已。此州是春陵。故作春陵行。以達下情。詩曰。軍國多所須。切責在有司。有司臨郡縣。刑法競欲施。供給豈不憂。徵歛又可悲。州小經亂亡。遺人實困疲。大鄉無十家。大族命單贏。朝食是草根。暮食乃木皮。出言氣欲絕。意速行步遲。追呼尙不忍。况乃鞭撲之。郵亭傳急符。來往跡相追。更無寬大恩。但有迫促期。欲令鬻兒女。言發恐亂隨。悉使索其家。而又無生資。聽彼道路言。恐傷誰復知。去冬山賊來。殺奪幾無遺。所願見王官。撫養以惠慈。奈何重驅逐。不使存活爲。安人天子命。符節我所持。州縣忽亂亡。得澤復是誰。連緩違詔令。蒙責固所宜。前賢重守分。惡以禍福移。亦云貴守官。不愛能適時。顧惟孱弱者。正直當不虧。何人采國風。吾欲獻此辭。

賊退示官吏詩序云。癸卯歲。西原賊入道州。煞掠幾盡而去。明年賊又攻永州。破邵。不犯此州邊鄙。而退。豈力能制敵歟。蓋蒙其傷憐而已。諸使何爲忍苦徵。故作詩一篇。以示官吏。詩云。昔年逢太平。山林二十年。泉源在庭戶。洞壑當門前。井稅有常期。日晏猶得眠。忽然遭世變。數歲親茂旃。今來典斯郡。山夷又紛然。城小賊不屠。人貧傷可憐。是以陷隣境。此州獨見全。使臣將生命。豈不如賤焉。今彼徵歛者。迫之如火煎。誰能絕人命。以作時世賢。思欲委符節。引竿自刺船。將家就魚口。歸老江海邊。

杜子美和元使君春陵行序云。覽道州元使君春陵行。兼賊退後示官吏作二首。志之曰。當天子分憂之地。效漢官良吏之日。今盜賊未息。知民疾苦。得結輩十數公。落落參錯天下。爲邦伯。萬物吐氣。天下少安。可待矣。不意復見比興。體制微婉。頓挫之詞。感而有詩。增諸卷軸。簡知我者。不必寄元也。詩曰。遭亂髮盡白。轉衰病相嬰。沉緜盜賊際。狼狽江漢行。歎時藥力薄。爲客羸瘵成。吾人詩家秀。博采世上名。粲粲元道州。前聖畏後生。觀乎春陵作。歛見俊哲情。復覽賦退篇。結也實國禎。賈誼昔流慟。匡衡常引經。道州憂黎庶。詞氣浩縱橫。兩章對秋月。一字皆華星。致君唐虞際。純朴憶大庭。何時降璽書。用爾爲舟楫。獄訟久衰息。豈唯假甲兵。悽惻念謀求。薄斂近休明。乃知正人意。不苟飛長纓。涼颿振南岳。之子寵若驚。色阻金印大。興含滄溟清。我多長卿病。日久思朝廷。肺枯渴大甚。漂泊公孫城。呼兒具紙筆。隱几臨軒楹。作詩呻吟內。墨淡字欹傾。感彼危苦詞。庶幾知者聽。

蘇源明薦結於肅宗。時思明攻河陽。帝將幸河東。召結詣京師。結上時議三篇。乃攝監察御史。發宛業軍。屯泌陽。全十五城。帝善之。代宗時。侍親歸樊上。後拜道州刺史。民樂其教。還京師。卒。始號猗玕子。後稱浪士。又曰漫郎。更曰聾叟。

張均

九日巴丘登高云。客心驚暮序。賓鴈下襄州。共賞重陽節。言尋戲馬游。湖風愁代柳。江雨暗山樓。且酌東籬菊。聊祛南國憂。

岳州西城云。水國何遼曠。風波遂極天。西江三汜合。南浦二湖連。危堞臨清境。煩愁暫豁然。九圍觀掌內。萬像閱眸前。日去長沙浦。山橫雲夢田。汀葭變秋色。津樹入寒煙。潛穴探靈詭。浮山揖聖仙。至人今不見。迹滅事空傳。

巴丘春作云。日出洞庭水。春山挂斷霞。江潑相映發。卉木其紛華。湘戍南浮闊。荆關北望賒。湖陰窺魍魎。丘勢辨巴蛇。烏戶巢爲館。漁人艇作家。自憐心問景。三歲客長沙。

岳州觀競渡云。畫作飛鳧艇。雙雙競拂流。俄裝出色變。急掉水華浮。土尚三閩俗。江傳二女遊。齊歌迎孟姥。獨舞送陽侯。鼓發南湖汶。標爭西驛樓。並驅常詫速。非畏日光遒。（俄裝字傳疑）

岳州晚景云。晚景寒鷗集。秋聲海鴈歸。水光浮日去。霞彩映江飛。洲白蘆花吐。園紅柿葉稀。長沙卑暑濕。九月未成衣。

送梁六自洞庭山作云。巴陵一望洞庭秋。日見孤峯水上浮。聞道神仙不可接。心隨湖水共悠悠。

奉和燕公山城云。郡館臨清賞。開局坐白雲。訟虛棠戶曉。觀靜竹簷曛。懸榻迎賓下。趨庭學禮聞。風傳琴上意。遙向日華紛。

燕公岳州別均云。離筵非讌喜。別酒正消魂。念汝猶童孺。嗟予隔遠藩。津亭拔心草。江路斷腸猿。他日將何見。愁來獨倚門。

均丞相說之子也。說最衷愛。其情見於岳州別均之作。說爲左相。知官考。均時任中書舍人。特注之曰。父教子忠。古之善訓。祁奚舉子。義不務私。至於潤色王言。彰施帝載。道參墳典。例絕功常。恭聞前烈。尤難其任。豈以嫌疑。敢撓綱紀。考上下均能文。爲大理卿。祿山盜國。爲僞中書令。免死。流合浦。

流合浦嶺外作云。瘴江西去火爲山。炎徼南窮鬼作關。從此更投人境外。生涯應在有無間。

杜子美贈太常張卿云。方丈三韓外。崑崙萬國西。建標天地闊。詣絕古今迷。氣得神仙逾。恩承雨露低。相門清議衆。儒術大名齊。軒冕羅天闕。琳琅識介珪。伶官詩必誦。夔樂典猶稽。健筆凌鸚鵡。鈇鋒整鷓鴣。友于皆挺拔。公望各端倪。通籍踰青瑣。亨衢照紫泥。靈虬傳夕前。歸馬散霜蹄。能事聞重譯。嘉謨及遠黎。弼諧方一展。班序更何躋。適越何顛躓。遊梁竟慘悽。謬知終

畫虎微分是醜雞。萍泛無休日。桃陰想舊蹊。吹噓人所羨。騰躍事仍睽。碧海真難涉。青雲不可梯。顧深慚鍛鍊。方小辱提攜。檻束哀猿叫。林驚夜鵲棲。幾時陪羽獵。應指釣璜溪。（或疑此詩乃贈張垠）

李嶷

淮南秋夜詩云。天淨河漢高。夜閑砧杵發。清秋急如此。離恨應難歇。風亂池上瑩。露光竹門月。君與其遊處。勿作他鄉別。

商瑤云。嶷詩鮮淨有規矩。其少年行三章。辭雖不多。翩翩然俠氣在目也。

少年行云。十八拜林郎。戎衣從漢王。臂鷹金殿側。挾彈王輿傍。馳道春冰起。陪遊出建章。侍獵長揚下。承恩更射飛。塵生馬影滅。箭落鴈行稀。薄暮隨天仗。聯翩入瑣闈。玉劍膝邊橫。金盃馬上傾。朝遊茂陵道。暮宿鳳凰城。豪吏多猜忌。無勞問姓名。

萬齊融

上已綠潭篇云。春潭滉瀼接隋宮。官闕連延潭水東。蘋苔嫩色涵波綠。桃李新花照底紅。垂菱布藻如口鏡。麗日晴天相皎映。素影顚顚對蝶飛。金沙礫礫窺魚詠。佳人祓禊賞韶年。傾國傾城併可憐。拾翠摠來芳樹下。躍青爭遶綠潭邊。公子王孫恣遊翫。沙場水曲情無厭。禽浮

似楫羽觴杯鱗躍疑投水心劍金鞭玉勒騁輕肥。落絮紅塵擁路飛。淥水殘霞催席散。畫樓初月待人歸。

梁肅作越州開元寺僧曇一碑銘云。師與賀賓客知章。李北海。邕。褚諫。議。庭誨。涇陽令萬齊融。爲儒釋之遊。莫逆之友。李華爲潤州鶴林寺徑山大師碑銘云。菩薩戒弟子。故吏部侍郎齊濟。故刑部尙書張均。故潤州刺史徐嶠。故涇陽令萬齊融。道流人望。莫盛於此。以二銘觀之。齊融蓋開元以來江南樂道之士也。于休烈傳云。與會稽賀朝。萬齊融。延陵包融。齊名。齊融止於崑山令。越州人也。

### 宋鼎

鼎明皇時刺襄州云。張丞相九齡與余有孝廉校理之舊。又代余爲荊州。余改漢陽。仍兼按使。巡至荊州。故贈之詩曰。漢上登飛轡。荆南歷舊居。已嘗臨砌橘。更視躍池魚。盛德繼微眇。深衷能卷舒。義申蓬閣際。情坦廟堂初。郡挹文章美。人懷髮理餘。皇恩儻昭亮。豈厭承明廬。九齡有酬宋使君詩云。時來不息意。宿昔謬樞衡。翊聖負明主。妨賢媿友生。罷歸猶右職。侍罪尙南荆。政有留棠舊。風因繼祖成。高軒問疾苦。蒸庶荷仁明。衰廢時所薄。祇言僚故情。

### 崔頌

張曲江在荊州有晨出郡舍林下詩云晨興步北林蕭散一閒襟復見林上月娟娟猶未  
沉片雲自孤遠蓋蔭亦清深無事由來貴方知物外心時頗爲郡司馬和云優閑表政清林薄  
賞秋成江上懸曉月往來虧復盈天雲抗眞意郡閣晦高名坐嘯應無欲甯牽濟物情

唐詩紀事卷第二十二

司馬退之

吳筠

蘇廣文

尉遲斥

王諱

陳希烈

高適

張彪

張子容

李之芳

崔戎

孟浩然

岑參

司馬退之

洗心詩云。不踐名利道。始覺塵土腥。不味稻粱食。始覺神骨清。羅浮奔走外。日月無短明。山瘦松亦勁。鶴老飛更輕。逍遙此中客。翠髮皆長生。草木多古色。鷄犬無新聲。君有出俗志。不貪英雄名。傲然脫冠帶。改換人間情。去矣丹霄步。向曉雲冥冥。退之道士。

吳筠

筠字正節。華陽人。舉進士不第。天寶初。請隸道士籍。玄宗命待詔翰林。高力士善浮屠。乃短筠於帝。筠懇還嵩山。大曆中。死。曾稽刻中弟子私諡宗玄先生。筠見惡於力士而斥。故文章深詆釋氏。所善孔巢父。李白。歌詩略相甲乙。事潘師正。學鍊養術。天寶初。遊會稽。與李白隱刻。



中。赴闕薦白。俱待詔翰林。

覽古十四首云。聖人重開濟。明道欲救時。孔席不暇暖。墨突何嘗緇。興言振頽綱。將以有所維。君臣恣淫惑。風俗日凋衰。三代業遽隕。七雄遂交馳。庶物墜塗炭。區中若棼絲。秦皇燎儒術。方册靡孑遺。大漢歷五葉。斯文復崇推。乃驗經籍道。與世屯同夷。弛張固天意。設教安能持。棟宇代巢穴。其來自三皇。跡生固爲累。經始增百王。瑤臺旣滅夏。瓊室復殞商。覆車世不悟。秦氏興阿房。繼踵迷反正。漢家崇建章。力役弊萬人。瓌奇殫八方。狗志仍未極。促齡已云亡。侈靡竟何在。荆榛生廟堂。

吾觀采芘什。復感青蠅詩。讒佞亂忠孝。古今同所悲。姦邪起譖害。骨肉相殘夷。漢儲殞江充。晉嗣滅驪姬。天性猶可問。君臣固其宜。子胥烹吳鼎。文種斷越鉞。屈原沉湘流。厥戚咸自貽。何不若范蠡。扁舟無還期。

魯侯祈正術。尼父從棄捐。漢主思英雄。賈生被排遷。始皇重韓子。及觀乃不然。漢武喜相如。旣徵復忘賢。遺遠世咸爾。賤今理其然。方知古來主。難以效當年。食其昔未偶。落魄爲狂生。一朝君臣契。雄辯何縱橫。連籌康漢業。憑軾下齊城。旣以智所達。還爲智所烹。豈若終賤貧。酣歌本無營。

晁錯抱遠策。爲君納良規。削彼諸侯權。求用得所宜。姦臣負舊隙。乘釁謀相危。世主竟不辨。身戮宗且夷。漢景稱欽明。濫爵猶如斯。比干與龍逢。殘害何足悲。

絳侯成大績。賞厚位乃尊。一朝對獄吏。榮辱安可論。蘇生佩六印。弈弈爲殃源。主父食五鼎。昭昭成禍根。李斯佐二辟。巨釁鍾其門。霍孟翼三后。伊戚及後昆。天人忌盈滿。茲理固永存。方知得意者。何必乘朱轡。滅景栖遠壑。絃歌對清樽。二疎返海濱。將翊歸林園。蕭灑去物累。此謀誠足敦。

聖人垂大訓。奧義不苟設。天道殃頑兇。神明佑懿哲。斯言猶影響。安得復回穴。鯨腹誕英眷。唐露育昏孽。盜跖何延期。顏生乃短折。魯隱全克讓。禍機遂潛結。楚穆肆巨逆。福柄奚赫烈。田常弑其主。祚國久罔缺。管仲存霸功。世祀成詭說。漢氏方版蕩。羣閹恣邪譎。饗饗陳蕃徒。孜孜抗忠節。誓期區宇靜。爰使兇醜絕。謀協事靡從。俄而返誅滅。古來若茲類。紛擾難盡列。道遐理微茫。誰爲我昭晰。吾將詢上帝。寥廓躋躋徹。已矣勿用言。忘懷庶自悅。（古意）

### 蘇廣文

自商山宿陶令隱居云。開道桃源堪避秦。尋幽數日不逢人。烟霞洞裏無雞犬。風雨林中  
有鬼神。黃公庭下三芝秀。陶令門前五柳春。醉臥白雲閑入夢。不知何物是吾身。

夜歸華川因寄幕府云。山村寥落野人稀。竹裏衡門掩翠微。溪路夜隨明月入。亭臯春伴白雲歸。嵇康懶慢仍耽酒。范蠡逋逃又拂衣。汀畔數鷗閑不起。只應知我已忘機。

春日過田明府遇焦山人云。陶公歸隱白雲溪。買得春泉漑藥畦。夜靜竹間風虎嘯。月明枝上露禽棲。陳倉邑吏驚烽火。太白山人訝鼓鼙。相見只言秦漢事。武陵溪裏草萋萋。

尉遲斥

李林甫嘗開元末。權等人主。幽并人尉遲斥。耿概士也。以頻年不第。投書林甫。皆繫刺之說。斥有暮行潼關之作云。明月飛出海。黃河流上天。又觀內人樓上踏歌曰。芙蓉初出水。桃李忽無言。又塞上曲云。夜夜月爲青塚鏡。年年雪作黑山花。林甫曰。蕭穎士嘗悞吏部王尙書。幾至鞭撲。子詩未方穎士。吾名復異於王。重欲相干。三思可矣。匡知見怒。惶怖趨出。栖屑無依。退歸林墅。

王謹

除夜云。今歲今霄盡。明年明日催。寒隨一夜去。春逐五更來。氣色空中改。容顏暗裏回。風光人不覺。已着後園梅。

元夕觀燈云。暫得金吾夜。通看火樹春。停車傍明月。走馬入紅塵。妓雜歌偏勝。場移舞更

新應須盡記取說向北來人。

謹登開元進士第。

陳希烈

奉和聖製三日詩云。上已迂龍駕。中流泛羽觴。酒因朝太子。詩爲樂賓王。錦纜方舟渡。瓊筵大樂張。風搖垂柳色。花發異林香。野老無公事。朝臣飲歲芳。皇情被羣物。中外洽恩光。

雲生棟梁間云。一片蒼梧意。氤氳生棟梁。下簾山足暗。開戶日添光。偏使衣裳潤。能令枕簟涼。無心伴行雨。何必夢荆王。

希烈宋州人。工文章。開元中。褚無量元行冲卒。希烈與康子元進講禁中。天寶中。爲相國忠忌之。卽薦韋見素代相。罷爲太子太師。失職無賴。祿山盜京師。遂相之。肅宗時。賜死于家。

高適

同顏六少府旅居秋中之作云。人傳君昨悵然時。獨坐深齋落木時。逸氣舊來凌燕雀。高才何得混妍蚩。迹勞黃綬人多嘆。心在青雲世莫知。不見鬼神無正直。從來州縣有瑕疵。

封丘作云。我本漁樵孟諸野。一生自是悠悠者。乍可狂歌草澤中。甯堪作吏風塵下。祇言小邑無所爲。公門百事皆有期。拜迎官長心欲破。鞭撻黎庶令人悲。悲來向家問妻子。舉家盡

笑今如此。生事應須南畝田。世情付與東流水。夢想舊山安在哉。爲銜君命日遲迴。乃知梅福徒爲爾。轉憶陶潛歸去來。

開元二十六年。有從元戎出塞而還者。作燕歌行示子。適感征戍之事。作燕歌行云。漢家烟塵在東北。漢將辭家破殘賊。男兒本自重橫行。天子非常賜顏色。櫜金伐鼓下榆關。旌旆遶迤碣石間。校尉羽書飛瀚海。單于獵火照狼山。山川蕭條極邊土。胡騎憑陵雜風雨。戰士軍前半死生。美人帳下猶歌舞。大漠窮秋草木腓。孤城落日鬪兵稀。身當恩遇常輕敵。力盡關山未解圍。鐵衣遠戍辛勤久。玉筯應啼別離後。少婦城南欲斷腸。征人塞北空回首。邊庭飄飄那可度。絕域倉茫何所有。殺氣三時作陣雲。寒聲一夜傳刁斗。相看白刃血紛紛。死節從來豈顧勳。君不見沙場征戰苦。至今猶憶李將軍。

適字達夫。滄州人。客梁宋間。舉有道科。哥舒翰表爲西河從事。佐翰守潼關。天子西幸。適問道及帝河池。遷侍御史。後代崔光遠爲西川節度使。廣德中。召還爲右散騎常侍。永泰初。卒。適以功名自許。而言浮其術。年五十始爲詩。卽工。以氣質自高。每一篇出。好事者輒傳布。

商璠云。適性落拓。不拘小節。恥預常科。隱跡博徒。才名自遠。然適詩多胸臆。兼有氣骨。故朝野通賞其文。至如燕歌行等篇。甚多佳句。日余所愛者。未知肝膽向誰。是令人却憶平原君。

吟諷不厭矣。

古大梁行云。古城蒼茫多荆榛。驅馬荒城愁殺人。魏王宮館盡禾黍。信陵賓客隨灰塵。憶昔雒都舊朝市。軒車照耀歌鍾起。軍容帶甲三十萬。國步連營一千里。全盛須臾那可論。高臺曲池無復存。遺墟但有狐狸窟。古地空餘草木根。暮天搖落傷懷抱。倚劍悲歌對秋草。俠客猶傳朱亥名。行人尙識夷門道。白壁黃金萬戶侯。寶刀駿馬填山丘。年代淒涼不可問。往來唯有水東流。

行路難云。君不見富家翁。舊時貧賤誰比數。一朝金多結豪富。萬事勝人健如虎。子孫成長滿眼前。妻能管絃妾歌舞。自矜一身忽如此。却笑旁人獨愁苦。東鄰少年安所如。席門窮巷出無車。有才不肯學千謁。何用年年空讀書。

邯鄲少年行云。邯鄲城南遊俠子。自矜生長邯鄲裏。千場縱博家仍富。幾處報讎身不死。宅中歌笑日紛紛。門外車馬長如雲。未知肝膽向誰是。令人却憶平原君。君不見卽今交態薄。黃金用盡還疏索。以茲感歎辭舊遊。更於時事無所求。且與少年飲美酒。往來射獵西山頭。

張彪

北遊遠酬孟雲卿云。忽忽望前事。志願能相垂。衣馬久羸弊。誰能文與才。善道居貧賤。潔

服蒙塵埃。行行無定心。壇坎難歸來。慈母憂疾瘵。家室念栖栖。與君宿姻親。深見中外懷。俟余惜時節。悵望臨高臺。

古別離云。別離無遠近。事歡情亦悲。不聞車輪聲。後會將何時。去日忘寄書。來日垂前期。縱知明當返。一息千萬思。

杜子美寄張十二山人彪詩云。獨臥嵩陽客。三違潁水春。艱難隨老母。慘淡向時人。謝氏登山屐。陶公漉酒巾。羣兒彌宇宙。此物在風塵。歷下辭姜被。關西得孟鄰。且通交契密。晚接道流新。靜者心多妙。先生藝絕倫。草書何太古。詩興不無神。曹植休前輩。張芝更後身。數篇吟可老。一字買堪貧。讀子美詩。則彪蓋潁洛間靜者。天寶末。將母避亂。故子美以詩寄云。

彪雜詩云。富貴多勝事。貧賤無良圖。上德兼濟心。中才不如愚。商者多巧智。農者多膏腴。儒生未遇時。衣食不自如。久與故交別。他榮我窮居。到門懶入門。何況千里餘。君子有褊性。矧乃尋常徒。行行任天地。無爲強親疏。

神仙云。神仙可學無。百歲名大約。天地何蒼茫。人間半哀樂。浮生亮多感。善事翻爲惡。爭先等驅逐。中路苦瘦弱。長老思養壽。後後生笑寂寞。五穀非長年。四氣乃靈藥。列子何必待。吾必滿寥廓。

張子容

長安早春詩云。開國維東井。城池起北辰。咸歌太平日。共樂建寅春。雲靜青山樹。冰開黑水濱。草迎金埒馬。花伴玉樓人。鴻漸看無數。鶯聲聽欲頻。何當桂枝擢。歸及柳條新。

九日陪潤州邵使君登北固山云。五馬向山椒。重陽出麗譙。徐州帶綠水。楚國在青霄。張幕連江樹。開筵接海潮。凌雲詞客語。迴雪舞人嬌。梅福慚仙吏。羊公賞下僚。新豐酒舊美。况是菊花朝。

送孟浩然歸襄陽詩云。東越相逢地。西亭送別津。風濤開解纜。雪海去愁人。鄉在桃林岸。山連楓樹春。因懷故園意。歸與孟家鄰。

孟浩然送張子容赴進士舉詩云。夕暉山照滅。送客出柴門。惆悵野中別。殷勤歧路言。茂林余偃息。喬木爾飛翻。無使谷風誚。須令友道存。

除夜樂城簡孟浩然云。遠客襄陽郡。來過海畔家。罇前柏葉酒。燈發九枝花。妙曲逢盧女。高才得孟家。東山行樂意。非是競繁華。

浩然歲除夜樂城張少府宅云。雲海訪甌閩。風濤泊島濱。何知歲除夕。得見故鄉親。子是乘桴客。君爲失路人。平生復能幾。一別十餘春。



巫山詩云。巫嶺崑峴天際重。佳期宿昔願相從。朝雲暮雨連天暗。神女知來第幾峯。  
子容乃先天二年進士第。曾爲樂城尉。與孟浩然友善。貶樂城尉日。作云。竄謫邊窮海。川原近惡溪。有時聞虎嘯。無夜不猿啼。地暖花常發。山高日易低。故鄉可憶處。遙指斗牛西。

李之芳

大曆中。子美有夏夜李尚書筵送宇文石首赴縣聯句云。愛客尚書貴。之官宅相賢。子美。酒香傾坐側。帆影駐江邊。之芳。翟表郎官瑞。臆看令宰仙。或。雨稀雲葉斷。夜久燭花偏。子美。數語欵紗帽。高文擲彩牋。之芳。興饒行處樂。離惜醉中眠。或。單父長多暇。河陽實少年。子美。客居逢自出。爲別幾悽然。之芳。宇文晁尚書之甥。崔彥司業之孫也。

之芳。太宗子蔣王暉之曾孫。有令譽。安祿山奏爲范陽司馬。祿山反。自拔歸京師。廣德初。使吐蕃。被留二歲。乃得拜禮部尚書。改太子賓客。薨。子美哭之。芳詩云。江雨銘旌濕。湖風井筵秋。又曰。復魄昭丘遠。歸魂素澹偏。蓋死于江湖也。

孟浩然

孟浩然。襄陽人也。骨貌淑清。風神散朗。救患釋紛。以立義。灌園圃以全高。交遊之中。通脫

傾蓋機警無匿。學不攷儒。務掇菁華。文不按古。匠心獨妙。五言詩。天下稱其盡善。閑游祕省。秋月新霽。諸英聯詩。次當浩然。句曰。微雲淡河漢。踈雨滴梧桐。舉座嗟其清絕。咸以之策筆。不復爲綴。丞相范陽張九齡。侍御史京兆王維。尙書侍郎河東裴朮。范陽盧渙。大理評事河東裴摠。華陽太守滎陽鄭倩之。太守河東獨孤册。率與浩然爲忘形交。山南採訪使太守昌黎朝宗。謂浩然閑深詩律。冥諸周行。必詠穆如之頌。因入奏與偕行。先揚于朝。約日引謁。後期。浩然叱曰。業已飲矣。身行樂耳。遑恤其他。遂畢飲不赴。由是聞罷。浩然不之悔也。其好學忘名如此。王士源他時嘗筆讚之曰。導漾炳靈。實生楚英。浩然清發。亦自其名。開元二十八年。王昌齡遊襄陽。時浩然疾發背。且愈。相得歡飲。浩然宴謔食鮮。疾動。終于南國。年五十。有子儀甫。浩然每爲詩。佇興而故作。或遲成行。不爲飾。動求真適。故以誕遊不利。期以放情。故常貧。名劣繫於選部。聚不盈甌。室雖屢空。不給自若也。（王士源序）

傳曰。張九齡爲荊州辟。置于府。罷開元末。病疽背卒。後樊澤爲節度使時。浩然墓碑壞。符載以牋叩澤曰。故處士孟浩然。文質傑美。殞落歲久。門裔陵遲。丘隴頽沒。永懷若人。行路慨然。前公欲更築大墓。闔州搢紳。聞風竦動。而今外迫軍旅。內勞賓客。牽耗歲時。或有未遑。誠令好事者乘而有之。負公夙忘矣。譯乃更爲刻碑。鳳林山南。封寵其墓。初王維過郢州。畫浩然像于

刺史亭。因曰浩然亭。咸通中刻史鄭誠。謂賢者不可斥其名。更曰孟亭。

王維憶孟云詩曰。故人今不見。日夕漢江流。借問襄陽老。江山空蔡州。

皮日休孟亭記云。明皇世章句之風大得建安體論者。推李翰林。杜工部爲尤。介其間能不愧者。惟吾鄉之孟先生也。先生之作。遇景入詠。不拘奇抉異。令齷齪東人口者。涵涵然有干霄之興。若公輸氏當巧而不巧者也。北齊美蕭愨。芙蓉露下落。楊柳月中疏。先生則有微雲澹河漢。疏雨滴梧桐。樂府美王融。日霽沙嶼明。風動甘泉燭。先生則有氣蒸雲夢澤。波動岳陽城。謝朓之詩句精者。有露濕寒塘草。月映清淮流。先生則有荷風送香氣。竹露滴清聲。此與古人爭勝於毫釐也。

明皇以張說之薦。召浩然。令誦所作。乃誦北闕休上書。南山歸弊廬。不才明主棄。多病故人疏。白髮催年老。青陽逼歲除。永懷愁不寐。松月夜牕虛。帝曰。卿不求朕。豈朕棄卿。何不云氣蒸雲夢澤。波動岳陽城。因是故棄。

商璠云。余嘗謂禰衡不遇。趙壹無祿。其過在人。及觀襄陽孟浩然。磬折謙退。才名日高。天下籍甚。竟淪落明代。終於布衣。悲夫。予方知命矣。且浩然詩文。華采芊茸。經縷綿密。半好雅調。全削凡體。至如衆山遙對酒。孤嶼共題詩。無論興象。復兼故實。又波動岳陽城。亦爲高唱也。

建德江宿云。移舟泊煙渚。日暮客愁新。野曠天低樹。江清月近人。

裴司士見尋云。府寮能枉顧。嘉醞復新開。落日池上酌。清風松下來。廚人具鷄黍。稚子摘楊梅。誰道山公醉。猶能騎馬迴。

早寒江上有懷云。木落雁初度。北風江上寒。我家江水上。遙隔楚雲端。鄉淚客中盡。孤帆天際看。迷津欲有問。平海夕漫漫。

永嘉上浦館逢張子容云。逆旅相逢處。江村日暮時。衆山遙對酒。孤嶼共題詩。癖字隣蛟室。人煙接鳥夷。鄉關萬餘里。失路一相悲。

湖上作云。八月湖水平。含虛混太清。氣蒸雲夢澤。波動岳陽城。欲濟無舟楫。端君恥聖明。徒憐垂釣叟。空有羨魚情。

峴山作云。石潭傍隈隩。沙榜曉蝨綠。試垂竹竿釣。果得查頭鱸。

又冬至過友人云。鳥泊隨陽鴈。魚藏縮項鱸。故杜子美憶襄陽云。吾友襄陽孟浩然。新詩句句盡堪傳。至今耆舊無他語。謾釣查頭縮頸鱸。

題鹿門山。清曉因興來。乘流越江峴。沙禽近相識。浦樹遙莫辨。漸到鹿門山。山明翠微淺。崑潭多屈曲。舟楫屢回轉。昔聞龐德公。採藥遂不返。金澗餌芝朮。石牀臥苔鮮。紛吾感耆舊。結

纜事攀踐。隱迹今尙存。高風邈已遠。白雲何時去。丹桂何偃蹇。探討意未窮。迴艇夕陽晚。  
張祐題浩然宅云。高才何必貴。下位不妨賢。孟簡雖持節。襄陽屬浩然。

岑參

送王大昌齡赴江寧詩云。對酒寂不語。悵然悲（一作愁）送君。明時未得用。（未字作不）白首徒攻文。澤國從一官。滄波幾千里。羣公滿闕下。獨去過淮水。舊家富春洛。嘗憶臥江樓。自聞君欲行。頻望南徐州。窮巷獨閉門。寒燈靜深屋。北風吹微雪。抱被肯同宿。君行到京口。正是桃花時。舟中饒孤興。湖上多新詩。潛虬且深蟠。黃鶴（一作鶴）飛未晚。惜君青雲器。努力加殮飯。

奉送李太保兼御史大夫充渭北節度使。卽太尉光弼之弟也。詩云。詔出未央宮。登壇近揔戎。上公周太保。副相漢司空。弓抱關西月。旗飛渭北風。弟兄皆許國。天地荷成功。

宿華陰東郭客舍憶閩防詩云。次舍山郭近。解鞍鳴鍾時。主人炊新粒。行子充夜飢。閩月生首陽。照見華陰祠。茫蒼秋山晦。蕭瑟寒松悲。久從園廬別。遂與朋知辭。（一作相知）舊整蘭杜晚。歸軒今已遲。

春夢詩云。洞庭（一作洞房）昨夜春風起。故人尙隔（一作遙憶美人）湘江水。枕上

片時春夢中行盡江南數千里。

參南陽人。文本之後。登天寶進士第。累爲安西關西節度判官。入爲祠功二外郎。虞庫二正郎。出爲嘉州刺史。副元帥杜鴻漸。表公兼侍御史。列於幕府。使罷寓于蜀。中原多故。卒死於蜀。

商璠云。參詩語奇體峻。意亦新遠。至如長風吹白茅。野火燒枯桑。可謂逸矣。又山風吹空林。颯颯如有人。須稱幽致也。

暮秋山行云。疲馬臥長坂。夕陽下通津。山風吹長林。颯颯如有人。蒼梧霽涼雨。石路無飛塵。千念集暮節。萬籟悲肅辰。鷓鴣昨夜鳴。蕙草色已陳。况在遠行客。自然多苦辛。

至大梁却寄康城主人云。一從棄魚鉤。十載干明王。無由謁天階。却欲歸滄浪。仲秋至東郡。遂見天雨霜。昨夜夢故山。芳蕙色已黃。平明辭鐵兵。薄暮遊大梁。仲秋蕭條景。拔刺飛鷓鴣。四郊陰氣閉。萬里無晶光。長風吹白茅。野火燒枯桑。故人南燕吏。籍籍名皆香。聊似玉壺贈。置之君子堂。

衛尚書赤驃馬歌云。君家赤驃畫不得。一團旋風柳花色。紅纓紫鞵珊瑚鞭。玉鞍錦韉黃金勒。請君鞞出看君騎。尾長牽地如紅絲。白矜諸馬皆不及。却憶百金新買時。香街紫陌鳳城

內行人見者誰不愛。揚鞭驟急白汗流。弄影行驕碧蹄碎。紫髯胡雛金剪刀。平明剪出三驪高。櫪上看時獨意氣。衆中牽出偏雄豪。騎將獵向南山口。城南狐兔不復有。草頭一點疾如飛。却使蒼鷹翻向後。憶昨看君朝未央。鳴珂擁蓋滿路香。始知邊將真富貴。可憐人馬相輝光。男兒意氣得如此。驥馬長鳴北風起。待君東去掃胡塵。爲君一日行千里。

北庭北樓呈幕中諸公云。嘗讀西域傳。漢家得輪臺。古塞千年空。陰山獨崔嵬。二庭近西海。六月秋風來。日暮上北樓。殺氣凝不聞。大荒無鳥飛。但見白龍堆。舊國眇天末。歸心日悠哉。上將新破胡。西郊絕煙埃。邊城寂無事。撫劍空徘徊。幸得趨幕中。託身廁羣才。早知安邊計。未盡平生懷。

玉門關蓋將軍歌云。蓋將軍。眞丈夫。行年三十執全吾。身長七尺頗有鬚。玉門關城逾且孤。黃沙萬里百草枯。南隣犬戎北接胡。將軍到來備不虞。五千甲士膽力麤。軍中無事但歡娛。暖屋繡簾紅地爐。織成壁衣花氍毹。燈前侍婢瀉玉壺。金鑄亂點野醜酥。紫紱金章左右趨。問著卽是蒼頭奴。美人一雙閑且都。朱唇翠眉映月眸。清歌一曲世所無。今日喜聞鳳將雛。可憐絕勝秦羅敷。使君五馬謾踟蹰。野草繡窠紫羅襦。紅牙鏤馬對樽蒲。玉盤纖手撥作盧。衆中誇道不曾輸。櫪上昂昂皆駿駒。桃花叱撥價最殊。騎將獵向城南隅。臘日射殺千年狐。我來寒外

按邊儲爲君取醉酒剩酤。醉爭酒盞相諠呼。却憶咸陽舊酒徒。

武威送劉單判官赴西行營使呈高開府云。熱海亘鐵門。火山赫金方。白草磨天涯。湖沙莽茫茫。夫子佐戎幕。其鋒利如霜。中歲學兵符。不能守文章。功業須及時。立身有行藏。男兒感忠義。萬里忘越鄉。孟夏邊候遲。胡國草未長。馬疾過飛鳥。天窮超夕陽。都護新出師。五月發軍裝。甲兵二百萬。錯落金光揚。揚旗拂岷崙。伐鼓震蒲昌。太白引官軍。天威臨大荒。西望雲似蛇。戎夷知喪亡。渾驅大宛馬。繫取樓蘭王。曾到交河城。風土斷人腸。寒驛遠如點。邊烽互相望。赤亭多飄風。鼓怒不可當。有時無人行。沙石亂飄颻。夜靜天蕭條。鬼哭夾道傍。地上多髑髏。昔是古戰場。置酒高館夕。邊城月蒼蒼。軍中宰肥牛。堂上羅羽觴。紅汨金燭盤。嬌記艷新粧。望若仰青冥。短翮難可翔。蒼然西郊道。握手何慨慷。

天山雪送蕭沼歸京云。天山有雪常不開。千峯萬嶺雪崔嵬。北風夜捲赤亭口。一夜天山雪更厚。能兼漢月照銀山。復逐胡風過鐵關。交河城邊飛鳥絕。輪臺路上馬蹄滑。臙澹寒氛萬里凝。闌干陰崖千丈冰。將軍狐裘臥不暖。都護寶刀凍欲斷。正是天山雪下時。送君走馬歸京師。客中何以贈君別。唯有青青松樹枝。

走馬川行奉送出師西行云。君不見走馬滄海邊。平沙莽莽黃入天。輪臺九月風夜吼。一



川碎石大如斗。隨風滿地石亂走。匈奴草黃馬正肥。金山西見煙塵飛。漢家大將西出師。將軍金甲夜不脫。半夜軍行戈相撥。風頭如刀面如割。馬毛帶雪汗氣蒸。五花連錢旋作冰。幕中草檄硯水凝。虜騎聞之應膽慄。料知短兵不敢接。車師西門佇獻捷。

輪臺歌奉送封大夫出師西征云。輪臺城頭夜吹角。輪臺城北旄頭落。羽書昨夜過梁黎。單于已在金山西。戍樓西望煙塵黑。漢兵屯在輪臺北。上將擁旄西出征。小胡吹笛大軍行。四邊戍鼓雪海湧。三軍大呼陰山動。虜塞兵氣連雲屯。戰場白骨纏草根。劍河風急雪片闊。沙口石凍馬蹄脫。亞和勒王甚苦辛。誓將報主靜邊塵。古來青史誰不見。今見功名勝古人。

白雪歌送武判官云。北風卷地白草折。胡天八月卽飛雪。忽然一夜春風來。千樹萬樹梨花開。散入珠簾濕羅幙。狐裘不暖錦衾薄。將軍雕弓不得控。都護鐵衣冷難著。瀚海闌干千里冰。愁雲慘澹萬里凝。中軍置酒飲歸客。胡兒琵琶與羌笛。紛紛暮雪下轅門。風擊紅旗凍不翻。輪臺東門送君去。去時雪滿天山路。山回路轉不見君。雪上空留馬行處。

田使君美人如蓮花舞北旋歌云。如蓮花舞北旋。世人有眼應未見。高臺滿地鋪氍毹。試舞一曲天下無。此曲胡人傳入漢。諸客見之驚且歎。慢臉嬌娥纖復濃。輕羅金鏤花菴籠。回裙轉袖若飛雪。左旋右旋生旋風。琵琶橫笛和未匝。花門（一作開）山頭黃雲合。忽作出塞入

寒聲。白草。胡沙。寒颯颯。躡身入破。如有神。前見後見。回回新。始知諸曲不可能。採蓮落梅徒聒人。世人學舞。祇是舞。姿態豈能得如此。

參。至德中。任宣議郎。試大理評事。攝監察御史。左拾遺。裴薦。薦參識度清遠。議論雅正。作名早立。時裴所仰。可備獻替之官云。



唐詩紀事卷第二十四

元傑

韋迢

孟彥深

郭受

陶現

張僊

王昌齡

周萬

包融

顏真卿

丁仙芝

李清(十二詠)

韓滉

齊澣

顧朝陽

韋建

元傑

元傑有濱陽果業寺開東嶺洞谷銘并序云。陰陽精氣結爲山嶽者。則爲勝。爲異。爲奧。爲闕。故萬嶺交峙。而嵩華辨其方。羣岳斃靈。而瀛壺拔其類。是知仙居靈宅。其必有黨乎。鳴絃之北趾。果業之東阜。高不百仞。廣纔千畝。層巖石室。幽谷靈洞。殊景異觀。秀絕奇偉。雖瀑流之下。鐘峯懸蹬之躋丹嶠。路遠莫覲。餘不知其倫擬焉。按寺記云。昔有方七。于是山鍊金變形。羽服登仙。故石座丹竈。至今存焉。觀其東嶺削成。石瑩如玉。岡巒峭竦。巖壁重複。捫蘿而昇。如造雲根。縹渺嬋娟。似霞衣可攀。真氣勝而塵累捐。五蓋破而清機閑。蕩然放懷。如羽翼之已生。赤城之可接。噫。境變志遷。若符契之協從也。下臨長川。澄波吐瀾。烟霞夕收。飛鳥不喧。青渺逶迤。流

注無間。西直巨壑。連嶂如屏。林竊朝翠。嚴光晝清。篠蕩臧輝。杉松下冥。虛豁寂寥。海風有聲。綠嶺未極。劃開洞門。黛容崢嶸。詭狀輪囷。疑伏龍怪。鎮舍煙雲。又有古木。倒傍絕壁。盤根網結。掛絡空碧。崩崖傍傾。援逕下灰。羽人幽會。此焉瑤席。搏翠壁而直上。軋崎嶇於紫氛。雙巖屹以中斷。奔屏蹙而成室。涵孕精爽。澄凝氣源。信列仙之攸居。豈塵俗之所止哉。嗚呼。鶴駕一去。鳳簫響絕。荆榛蔽路。危蹬敗滅。跡留人境。而舉世莫知。地聯精利。而羣遊莫至。吁可怪乎。其晦藏也。元和丙申歲秋八月。余以膠菑之困。寓居精舍。再從兄昭肅。時假茲邑。政便於人。務簡多暇。與當寺僧知捷。日探道源。捷亦好古饜奇之士也。因語故實。緬思羽客之玄風。以爲靈跡神蹤。精誠必復。乃操刀持斧。履險道幽。梯絕棧而歷巉巖。排蒙籠而登杳藹。時更一稔。而神居祕躅。粲然皆睹。嗟乎。芝田玄圃。豈遠乎哉。天之與人。氣通則合。客有顧咨而諗予者。或應之曰。天之運否泰相濟。故善利稱德。下民昏墊。人之道行。藏有數。故棘津蓬累。時惟鷹揚。靈物必通。道在斯著。不然。何荒阻千祀。教焉而興歟。乃爲銘曰。鑿石通道兮。援木枝。仰攀洞口兮。踐奇危。奔龍伏虎兮。勢狀奇。林攢峯倚兮。蟠雲螭。下臨陰谷兮。神以慄。嵌巖兮。洞無極。老松蕭瑟兮。生遠風。興雲霈兮。煙霧黑。懸巖排空兮。色噴黛。堅根網絡兮。層霄外。披霓解帶兮。羽翼生。下眺遙江兮。入青黛。世道紛紛兮。何足謂。朝爲榮華兮。夕顛顛。不如幽谷兮。閱仙經。冀接浮丘兮。整煙轡。我窺

丹竈兮坐山腹。衆峯參差兮隱雲族。鑿仙嶺兮望瑤臺。朝霞照海兮錦綺開。信赤松之所昇降。王喬之所往來。道或用晦兮靈物斯潛。殷道未昌兮說築傳巖。紛予感此兮勒銘雲根。山既不朽兮與名長存。

韋迢

杜子美在長沙送韋員外迢牧韶州詩云。炎海韶州牧。風流漢署郎。分符先令望。同舍有輝光。白首多年疾。秋天昨夜涼。洞庭無過鴈。書疏莫相忘。

迢留別杜員外院長詩云。江畔長沙驛。相逢纜客舡。大名詩獨步。小郡海西偏。地濕愁飛鵬。天炎畏跼蹙。去留俱失想。把臂共潸然。

迢早發湘潭寄子美云。北風吹夜雨。江上早來涼。楚岫千峯翠。湘潭一葉黃。故人湖外客。白首尙爲郎。相憶無南鴈。何時有報章。

子美酬云。養拙江湖外。朝廷記憶疏。深漸長者轍。重得故人書。白髮絲難理。新詩錦不如。雖無南過雁。看取北來魚。

子美後送魏司直掌選嶺南兼寄迢云。故人湖外少。春日嶺南長。憑報韶州牧。新詩昨寄將。

孟彥深

字士源。天寶末爲武昌令。元次山居武昌之樊山。新春大雪。彥深以詩問之曰。江山十日雪。雪深江霧濃。起來望樊山。但見羣玉峯。林鶯却不語。野獸翻有蹤。山中應大寒。短褐此以安。皓氣凝書帳。清着釣魚竿。懷君欲進謁。溪滑渡舟難。

次山酬云。積雪閉山路。有人到庭前。云是孟武昌。令獻苦雪篇。長吟未及終。不覺爲悽然。古之賢達者。與世竟何異。不能救時患。諷諭以全意。知公惜春物。豈非愛時和。知公苦陰雪。傷彼災患多。姦凶正驅馳。不合問君子。林鶯與野獸。無乃怨如此。兵興向九歲。稼穡誰能憂。何時不發卒。何日不殺牛。耕者日已少。耕牛日已希。皇天復何忍。更又恐鼈之。自經危亂來。觸物堪傷嘆。見君問何意。只益口中亂。山禽飢不飛。山木凍皆折。懸泉化爲冰。寒爐近不熱。出門望天地。天地皆昏昏。時見雙峯下。雪中生白雲。

次山又有雪中懷孟武昌云。冬來三度雪。農者歡歲稔。我麥根已濡。各得在倉廩。天寒未能起。孺子驚人寢。云有山客來。籃中見冬箠。(生木上)燒柴爲溫酒。煮鱖爲作藩。(尺甚反羹汁)客亦愛杯樽。思君共杯飲。所嗟山路開。時節寒又甚。不能苦相邀。興盡還就枕。

次山作退谷銘曰。干進之客。不得遊之。作杯湖銘曰。爲人厭者。勿泛爲。乃曰。孟士源嘗黜

官無情干進。在武昌不爲人厭。可遊退谷。可泛杯湖。故有招孟武昌詩云。武昌不仕進。武昌人不厭。退谷可正遊。杯湖任來泛。湖上有水鳥。見人不飛鳴。谷中有山獸。往往隨人行。莫將車馬來。令我鳥獸驚。

彥深登天寶二年第。

郭受

受寄子美詩云。新詩海內流傳困。舊德朝中屬望勞。郡邑地卑饒霧雨。江湖天闊足風濤。杜鰲酒熟傍看醉。蓮葉舟輕自學操。春興不知凡幾首。衡陽紙價頓能高。（衡陽出五家紙。又云出五里紙。）

子美酬郭十五判官云。才微歲老尙虛名。臥病江湖春復生。藥裏關心詩摠廢。花枝照眼句還成。只同燕石能星隕。自得隨珠覺夜明。喬口橘洲風浪促。繫帆何惜片時程。

受大曆間衡陽判官也。

陶現

現彭澤之孫也。開元末家崑山。泛遊江湖。自制三舟。與孟彥深。孟雲卿。焦遂。共載吳越之士。號爲水仙。省親南海。獲崑崙奴。名摩訶善遊水。至西塞山下。泊舟吉祥佛舍。見江水深黑。謂



必有怪物。投劍命摩訶。下取久之。支體傑裂。浮於水上。現流涕迴棹。賦詩自敘。不復遊江湖矣。詩云。匡廬舊業是誰主。吳越新居安此生。白髮數莖歸未得。青山一望計還成。鴉翻楓葉夕陽動。鷺立蘆花秋水明。從此捨舟何所詣。酒旗歌扇正相迎。

張傳

辭房相公云。秋風颯颯兩霏霏。秋絕慙惶一布衣。辭君且作隨陽雁。海內無家何處歸。備天寶至德間人。

王昌齡

昌齡字少伯。江寧人。中第。補校書郎。又中博學宏辭科。遷汜水尉。不護細行。世亂還鄉里。爲刺史閻丘曉所殺。工詩。緒密而思清。時謂王江寧。

獨遊詩云。林臥情每閑。獨遊景常晏。時從灞陵下。垂釣往南澗。手攜雙白魚。目送千里雁。悟彼飛有有。適知此罹憂患。放之清冷泉。因得省疎慢。永惟青岑客。迴首白雲間。神超物無違。豈繫名與宦。

齋心詩云。女蘿覆石壁。溪水幽濛濛。紫葛蔓黃花。娟娟寒露中。朝飲花上露。夜臥松下風。雲英化爲水。光彩與我同。日月瀉精魄。寥寥天府空。

篋篋引云。瀘谿郡南夜泊舟。夜聞南岸羌戎謳。其時月黑猿啾啾。微雨霑衣令人愁。有一  
遷客登高樓。不言不寐彈箜篌。彈作薊門桑葉秋。風沙颯颯青塚頭。將軍鐵驄汗血流。深入匈  
奴戰未休。黃旗一點兵馬收。亂殺胡人積如丘。瘡病驅來配邊州。仍披漠北羊羔裘。顏色機枯  
掩而羞。眼眶滴淚深兩眸。還思本鄉食菴牛。欲語不得指咽喉。或有強壯能吶嘔。意說被他邊  
將讎。五世屬蕃漢。主留碧毛氈帳。河曲遊。秦駝五萬部落稠。勅賜飛鳳金兜鍪。爲君百戰如過  
籌。靜掃陰山無鳥投。家藏鐵券特承優。黃金千斤不稱求。九族分離作楚囚。深谿寂寞絃苦幽。  
草木悲感聲颼颼。僕本山東爲國憂。光明殿前論九疇。籠讀兵書盡宜搜。爲君掌上施權謀。洞  
曉山川無與儔。紫宸發詔懷遠柔。搖筆飛箱如奪鈞。鬼神不得知其由。憐愛蒼生北虬蜉。綠河  
屯兵須漸抽。盡遣降來拜御溝。便令海內休戈矛。何用班超定遠侯。史臣書之得已不。

長信秋云。金井梧桐秋葉黃。珠簾不捲夜來霜。熏籠玉枕無顏色。臥聽南宮清漏長。  
奉帚平明秋殿開。且將團扇共徘徊。玉顏不及寒鴉色。猶帶昭陽日影來。

西宮秋怨云。芙蓉不及美人粧。水殿風來珠翠香。誰分含啼掩秋扇。空懸明月侍君王。  
(啼一作情)

西宮春怨云。西宮夜靜百花香。欲落珠簾春恨長。斜抱雲和深見月。朦朧樹色隔朝陽。

青樓怨云。香幃風動花入樓。高調鳴箏緩夜愁。腸斷關山不解說。依依殘月下簾鉤。

送李濯遊江東詩云。清洛日夜漲。微風引孤舟。離觴使千里。遠夢生江樓。楚國橙橘暗。吳門烟雨愁。東南且今古。歸望山雲秋。

商璠云。元嘉已還。四百年內。曹劉陸謝。風骨頓盡。今呂齡克嗣厥跡。至如明堂坐天子。月朝朝諸侯。清樂千於門。皇風被九州。慶雲從東出。泱泱抱日流。又獨飲灞上亭。寒山青門外。長雲驟落日。東來寂已晦。又蒼荻寒滄江。石頭岸邊飲。又長亭酒未酣。千里風動地。又京門望西岳。百里見郊樹。飛雨祠下來。靄然關中暮。又奸雄乃得志。遂使羣心搖。赤風蕩中原。烈火無遺巢。一人計不用。萬里空蕭條。又百泉勢相蕩。巨石皆却立。昏爲蛟龍怒。清見雲雨入。又去時三十萬。獨自還長安。不信沙場苦。君看刀箭瘢。又雲起太華山。雲水玄明滅。東峯始含景。了了見松雲。又檣柝無冬春。柯葉連峯稠。險壁下蒼黑。煙含清江樓。壘沙積爲岡。崩剝雨露幽。石脉盡橫斫。潛潭何時流。斯並驚耳駭目。略舉十句。則中興高作可知矣。予常觀呂齡齋心詩。弔軹道賦。謂其人孤潔恬澹。與物無傷。晚節謗議沸騰。言行相背。及淪落竄謫。竟未滅才名。固知善毀者。不能掩西施之美也。

放歌行云。南渡洛陽津。西望十二樓。明堂坐天子。月朝朝諸侯。清樂動千門。皇風被九州。

慶雲從東來。泱泱抱日流。昇平貴論道。文墨將河求。有詔徵草澤。微誠將獻謀。冠冕如星羅。拜揖曹與周。望塵非吾事。入賦且遲留。幸蒙國士識。因脫負薪裘。今者放歌行。以慰梁甫愁。位榮數計祿。奉養每豐羞。願得金膏遂。飛雲亦可籌。

代扶風主人答云。煞氣凝不流。風悲日彩寒。浮塵起四遠。遊子彌不歡。依然宿扶風。沾酒聊自寬。寸心亦未理。長鋏誰能彈。主人就我飲。對我還慨歎。使泣數行淚。因歌行路難。十五役邊城。三迴討樓蘭。連年不解甲。積日無所殫。將軍降匈奴。國使沒桑乾。去時三十萬。獨自還長安。不信沙場苦。君看刀箭瘢。鄉親悉零落。塚墓亦摧殘。仰攀青松枝。慟哭傷心肝。禽獸悲不去。路旁誰忍看。幸逢休明代。寰宇靜波瀾。老馬思伏櫪。長鳴力已殫。少年與君會。何事發悲端。天子初封禪。賢良刷羽翰。三邊悉如此。否泰亦須觀。

鄭縣宿陶太公館中贈馮六元二云。儒有輕侯王。脫略當世譽。本家藍溪下。非爲漁弋故。無何困躬耕。且欲馳永路。幽居與君近。出谷同所務。昨日辭石門。五年變秋露。雲龍未相感。子謁亦以屢。子爲黃綬羈。子忝蓬山顧。京門望西岳。百里見郊樹。飛雨祠上來。譊然關中暮。馳車鄭城宿。秉燭論永素。山月出華陰。開此河湫霧。清光比故人。豁達展心晤。馮公尙戢翼。元子仍跼步。拂衣易爲高。淪跡難有趣。張范善始終。吾等豈不慕。罷酒當涼風。屈伸備冥數。

小敷谷龍潭祠作詩云。崖谷歟疾流。地中有雷集。百泉勢相蕩。巨石皆却立。跳波沸崢嶸。深處不可挹。昏爲蛟龍怒。清見雲雨入。靈怪崇偏祠。廢興自茲邑。沉淫頃多味。蒼宇遂不葺。吾聞被明典。盛德惟世及。生人載山川。血食報原隰。豈伊駭微險。將以循眈眈。

飛振呂梁。忠信亦我習。波流侵已廣。悔吝在所汲。溪水有清源。褰裳靡沾濕。

過華陰詩云。雲起太華山。山色玄明滅。東峯始含景。了了見松雪。羈人感幽棲。窓映轉奇絕。欣然忌所疲。永望吟不輟。信宿百里餘。山開翫新月。何意昨來心。遇物遂遷別。人生屢如此。何以肆愉悅。(山色一作雲仙)

出榔山口至壘石灣野人室中寄張十一詩云。櫛耨無冬春。柯葉連峯稠。陰壁下蒼黑。煙含清江樓。景開獨公曳。響答隨興酬。且夕望吾友。如何迅孤舟。壘沙積爲岡。崩剝雨露幽。石脉盡橫互。潛潭何時流。既見萬古色。頗盡一物由。水與世人遠。氣還草木收。盈縮理無餘。今往何必憂。榔土羣山高。耆老如中州。孰云議外降。豈是娛官遊。陰火昔所服。丹砂將爾謀。昨臨蘇耽井。復向衡陽求。同疢來相依。脫身當有籌。數月乃離居。風湍成阻脩。野人善竹器。童子能溪謳。寒月波蕩漾。羈鴻去悠悠。(同疢一作問疢)

九江口作詩云。瀟瀟江勢闊。雨聞淅陽秋。驛門是高岸。望盡黃蘆洲。水與五溪合。心期萬

里遊。明時無棄才。謫去隨孤舟。鷺鳥立寒木。丈夫佩吳鉤。何當報君恩。却繫風霜頭。

從軍行二首云。向夕臨大荒。朔風軫歸慮。平沙萬里餘。飛鳥宿何處。虜騎獵長原。翩翩傍河去。邊聲搖白草。海氣生黃霧。百戰起風塵。十年履霜露。雖投定遠筆。未坐將軍樹。早知行路難。悔不理章句。

秋風馬蹄輕。角弓持絃急。去爲龍城戰。正值胡兵襲。軍氣橫大荒。戰酣日將入。長風金鼓動。白露鐵衣濕。四起愁邊聲。南庭時竚立。斷蓬孤自轉。寒鴈飛相及。萬里雲沙漲。平原冰霰澌。惟聞漢州遙。獨向刀環泣。

周萬

送沈芳謁李觀察求仕進詩云。往日長安路。歡遊不借年。爲貪盧女曲。用盡沈郎錢。身老方投刺。途窮始着鞭。猶聞有知己。此去不徒然。（此君曾浪迹長□□□□之）

萬開元末登第。

包融

送國子張主簿詩云。湖岸纜初解。鸞啼別離處。遙見舟中人。時時一回顧。坐悲芳歲晚。花落清軒樹。春夢隨我心。搖揚逐君去。

融潤州延陵人。歷大理司直。二子何吉齊名。世稱二包。孟浩然宴包二融宅詩曰。閑居枕清洛。左右接大野。門庭無雜賓。車轍多長者。是時方盛夏。風物自瀟灑。五月休沐歸。相攜竹林下。開襟成懽趣。對酌不能罷。煙暝棲鳥迷。餘將歸白社。

顏真卿

吳門有清遠道士。同沈恭子遊虎丘詩。其辭自商周歷近代。已二千年來矣。鬼神耶。隱士耶。莫能測也。而辭藻健俊。魯公愛之。刻於巖際。并有鑑作。衛公又次而和之。

清遠道士詩云。我本長殷周。遭罹歷秦漢。四瀆與五岳。名山盡幽竄。及此寰區中。始有近峯翫。近峯何鬱鬱。平湖眇瀾漫。吟挽川之陰。步上山之岸。山川共澄澈。光彩交凌亂。白雲翁欲歸。青松忽消半。客去川鳥靜。人來山鳥散。谷深中見日。崖幽曉非旦。聞子盛遊遨。風流足詞翰。嘉茲好松石。一言常累歎。勿謂餘鬼神。忻君共幽讚。

魯公詩云。不到東西寺。于今五十春。竭來從舊賞。林壑宛相親。吳子多藏日。秦皇厭聖辰。劍池穿萬仞。盤石坐千人。金氣騰爲虎。琴臺化苦神。登壇仰生一。捨宅歎珣珉。中領分雙樹。迴巒絕四鄰。窺臨江海接。崇飾四時新。客有神仙者。於茲雅麗陳。名高清遠峽。文聚斗牛津。跡異心甯間。聲同質豈均。悠然千載後。知我掛光塵。

衛公詩云。茂苑有靈峯。嗟餘未遊觀。藏山在平陸。壤谷有高岸。岡繞數仞牆。巖潛千丈幹。乃知造化意。迴幹資奇翫。鏐騰昔虎踞。劍沒嘗龍煥。潭黛入海底。崑岑聳霄半。層巒未昇日。哀狖甯知旦。綠篠夏凝陰。碧林秋不換。冥搜既窈窕。迥望何蕭散。川曉嵐氣收。江春雜英亂。逸人綴清藻。前哲留篇翰。共扣哀玉音。皆舒文繡段。難追彥回賞。楮彥回見凡人所稱。常過其實。又見虎丘。則逾其所聞。徒起興公歎。一力如再升。含毫星斗爛。

真卿與耿漳水亭詠風聯句。有度琴方解慍。臨水已迎秋之句。

### 丁仙芝

長甯公主舊山池詩云。平陽舊池館。寂寞使人愁。座卷留黃篔簹。簾垂白玉鈎。家閒花自落。門閉水空流。追想吹簫處。應隨仙騎遊。

越裳貢白雉云。聖哲承休運。伊臬列上台。尋思丹徼遠。入貢素羣來。北闕欣初見。南枝願未迴。斂容殘雪靜。矯翼片霜開。馴擾將無懼。飈飛幸不猜。甘從上林裏。飲啄自徘徊。

仙芝潤州曲阿人。登開元進士第。爲餘杭尉。

### 李清

詠石季倫云。金谷繁華石季倫。只能謀富不謀身。當時縱與綠珠去。猶自無窮歌舞人。



清登天寶十二年進士第。

韓偓

晦日呈諸判官云。晦日新晴春日嬌。萬家攀折渡長橋。年年老向江城寺。不覺春風換柳條。

聽樂悵然自述云。萬事傷心對管絃。一身含淚向春煙。黃金用盡教歌舞。留與他人樂少年。

澁字太冲。正元初。加同平章事。江淮轉運使。二年。封晉國公。初。有美名。所與游皆天下豪俊。其詩與孟浩然酬唱云。

齊幹

長門怨云。營營孤思通。寂寂長門夜。妾妬亦知非。君恩那不借。攜琴就玉塔。調悲心未諧。將心寄明月。流影入君懷。

澣字洗心。定州人。開元間。與蘇晉。蘇頌。賈曾。韓休。許景先。孫逖。典詔語爲代言最。杜暹當國。表宋垠爲吏部尙書。澣及蘇晉爲侍郎。世謂臺選。常稱陳希烈。苗晉卿之才。後皆大顯。

顧朝陽

昭君怨云。莫將鈿粉匣。不用鏡花光。一去邊城路。何情更畫粧。影銷胡地月。衣盡漢宮香。妾死非關命。都緣怨斷腸。

朝陽開元間詩人。

韋建

泊舟盱眙云。維舟淮水次。霜降夕流清。夜出潮侵岸。天寒月近城。平沙依鴈宿。候館聽鷄鳴。卿國雲霄外。誰堪礙旅情。

建與蕭穎士最善。



唐詩紀事卷第二十五

徐安貞

崔惠童

崔敏童

劉晏

劉灣

薛據

劉愼虛

張巡

張繼

張謂

梁肅

柳渾

孟雲卿

徐安貞

書襄陽圖云。畫得襄陽郡。依然見昔遊。現山思駐馬。漢水憶回舟。丹壑常含霧。青林不換秋。圖書空咫尺。千里意悠悠。

安貞始名楚璧。應制舉。三登甲科。開元中。爲中書舍人。集賢學士。帝屬文。多令視草。終中書侍郎。在中書省久。李林甫用事。或言計議多所參助云。或云安正天寶後。以林甫之故。避罪衡山岳寺。李北海遊岳識之。因戲曰。峴山思駐馬。漢水憶迴舟。暮雨衣猶濕。春風帆正開。抑能記否。因同載北歸。至長沙。謂守者曰。瀟湘逢故人。若幽谷之覩太陽。不然。委頓巖穴矣。

崔惠童

宴城東莊云。一月人生笑幾回。相逢相識且啣杯。眼看春色如流水。今日飛花昨日開。  
尚明皇晉國公主。

崔敏童

宴城東莊云。一年始有一年春。百歲曾無百歲人。能向花中幾回醉。十千沽酒莫辭貧。  
敏童。惠童。昆弟也。

劉晏

明皇御勤政樓。大張樂。羅列百技。時教坊有王大娘者。戴百尺竿。竿上施木山。狀瀛州方丈。令小兒持絳節。出入於其間。歌舞不輟。時劉宴以神童爲秘書正字。方十歲。帝召之。貴妃置之膝上。爲施粉黛。與之巾櫛。帝問宴。汝爲正字。正得幾字。晏曰。天下字皆正。唯朋字未正。得貴妃復令詠王大娘戴竿。晏應聲曰。樓前百戲競爭新。唯有長竿妙人神。誰謂綺羅翻有力。猶自嫌輕更着人。因命牙笏及黃紋袍賜之。

晏八歲。獻頌泰山行在。帝命張說試之。說曰。國瑞也。卽授太子正字。公卿邀請。旁午。號神童。晏字士安。

字靈源。彭城人。天寶進士。天寶之亂。以侍御史居衡陽。元結送王契佐卿入蜀。序曰。與佐卿去者。有清河崔異。與次山住者。有彭城劉灣。相醉相留。幾日江畔。

出塞曲云。將軍在重圍。音信絕不通。羽書如流星。飛入甘泉宮。倚是并州兒。少年心膽雄。一朝隨召募。百戰爭王公。去年桑乾北。今年桑乾東。死是征人死。功是將軍功。汗馬敗秋月。疲人臥霜風。仍聞左賢王。更欲圍雲中。

卽席賦露中菊云。衆芳春競發。寒菊露偏滋。受氣何曾異。開花獨自遲。晚成猶有分。欲採未過時。勿棄東籬下。看隨秋草衰。

元次山作劉侍御月夜讌會序云。兵興以來。十一年矣。獲與同人。懽醉達旦。詠歌取適。無三焉。乙巳歲。彭城劉靈源。在衡陽逢故人。或有在者。日夕相會。第寬遠遊。始與諸公待月而笑語。競與諸公愛月而懽詠。夜久賦詩言懷。於戲。文章道喪。蓋亦久矣。時之作者。煩雜過多。歌兒舞女。且喜相愛。系之風雅。誰道是耶。諸公嘗欲變時俗之淫靡。爲後生之規範。今夕豈不能道達情性。成一時之美乎。次山詩曰。我從蒼梧來。將耕舊山田。踟躕爲故人。且復停歸船。日夕得相從。轉覺和樂全。惡愛涼風來。明月正滿天。河漢望不見。幾星猶燦然。中夜興欲酣。改坐臨清川。未醉恐天旦。更歌促繁絃。懽娛不可逢。請君莫言旋。

薛據

出青門往南山下別業云。舊居在南山。夙駕自城闕。榛莽相蔽虧。去爾漸超忽。散漫餘雪晴。蒼茫季冬月。寒風吹長林。白日原上沒。懷抱曠莫伸。相知阻胡越。弱年好棲隱。鍊藥在巖窟。及此離垢氛。興來亦因物。末路期赤松。斯言庶不伐。

西陵口觀海云。浙江漫湯湯。近海勢彌廣。在昔胚臞凝。融爲百川長。地形失端倪。天色潛混漾。東南際萬里。極目遠無象。山影乍浮沉。潮波忽來往。孤帆或不見。棹歌猶響像。且暮長風起。客心空振蕩。浦口霞未收。潭心月初上。林嶼幾迴迴。亭臯時偃仰。歲晏訪蓬瀛。真遊非外獎。據與王摩詰杜子美最善。子美有喜薛三據授司議郎詩云。文章開突奧。遷擢潤朝廷。又有寄薛三郎中詩云。與子俱白頭。役役常辛苦。雖爲尙書郎。不及村野人。天未厭戎馬。我輩本常貧。子尙客荊州。我亦滯江濱。聞子心甚壯。所過信席珍。賦詩賓客間。揮灑動八垠。乃知蓋代手。才力老益神。其略如此。

據自永樂主簿陟縣丞。復選宰陟縣。劉長卿詩云。棲鸞往已屈。馴翟今可嗣。此道如不移。雲霄坐應致。縣前漳水綠。郭外晉山翠。日得謝客遊。時堪陶令醉。

高適淇止寄據云。故交負靈奇。逸氣包謇譔。隱軫經濟具。縱橫建安作。

據開元中。白持才名。於吏部參選。請授萬年錄事。諸流外官共見宰。執訴之曰。赤錄事某等清要官。今被進士奪去。某等色人。無措手足矣。遂罷。

商瑤云。據爲人骨鯁。兼有氣魄。其文亦自不傷。不卑不達。故著古興詩云。投珠恐見疑。抱玉但垂泣。道在君不舉。功成歎何及。恐憤頗深。至如寒風吹長林。白日原上沒。又窮冬時短晷。日盡西南天。可謂曠代之佳句也。

據河中寶鼎人。中書舍人。文思曾孫。父元暉。什邡令。開元天寶間。據與第播摠。相繼登科。終禮部侍郎。

省署開文苑。滄浪學釣翁。據之詩也。子美懷據詩。乃云。獨當省署開文苑。兼泛滄浪學釣翁。

據古興云。日中望雙闕。軒蓋揚飛塵。鳴珮初能朝。自言皆近臣。光華滿道路。意氣安可親。歸來宴高堂。廣筵羅八珍。僕妾盡錦綺。歌舞夜達晨。四時自相代。誰能分要津。已看覆前車。未見改後輪。丈夫須兼濟。豈得樂一身。君今皆得志。肯顧憔悴人。

初去郡書情云。肅徒辭汝穎。懷古獨悽然。尙想文王化。猶思巢父賢。時移多讒巧。大道竟誰傳。况是疾風起。悠悠旌旆懸。征鳥無返翼。歸流不停川。已經霜露下。乃驗松柏堅。回首望城



邑。迢迢間雲煙。志士不傷物。小人皆息妍。臧時唯責己。在道非怨天。從此適樂土。東歸知幾年。

劉慎虛

去年上策不見收。今年寄食仍淹留。羨君有酒能共醉。羨君無錢能不憂。如今五侯不待客。羨君不問五侯宅。如今七貴方自尊。羨君不過七貴門。大夫會應有知己。世上悠悠何足論。  
(贈喬林)

青暝南山色。君與緇錫鄰。深路入古寺。亂花隨暮春。紛紛對寂寞。往往落衣巾。松色空照水。經聲時有人。晚心復南望。山遠情獨親。應以修往業。亦唯立此身。深林度空夜。煙月資清真。莫歎文明日。彌年從隱淪。(贈閻防)

九日送人云。海上正搖落。客中遠別離。固舟去未已。遠送新相知。流水意何極。滿樽徒爾爲。從來菊花節。早已醉東籬。

江南曲云。美人何蕩漾。湖上風日長。玉手欲有贈。徘徊雙鳴璫。唱歌隨綠水。怨色起春陽。日暮還家望。煙雲橫洞房。

登廬山峯頂寺云。孤峯留萬象。秋氣何高濤。天際南郡出。林端四湖明。山門二緇叟。振錫聞幽聲。心照有無界。業懸前後生。徒知真機靜。尙與愛網並。方首金門路。未遑參道情。

暮秋楊子江寄孟浩然云。木葉紛紛下。東南日煙霜。山林相曉暮。天海深清蒼。暝色空復久。秋聲亦何長。孤舟兼微月。獨夜仍越鄉。寒笛對京口。故人在襄陽。詠思勢今夕。江漢遙相望。海上云日處。歸且遠。送君東愁悠。滄溟千萬里。日夜一孤舟。曠望絕國所。微茫天際愁。有時近仙境。不定若夢遊。或見青色石。孤山百丈秋。前心方杳眇。此路勞夷遊。離別惜吾道。風波敬皇休。春浮花氣遠。思逐海水流。日莫離歌後。永懷空滄州。

鄭處誨明皇雜錄云。天寶末。劉希夷。王泠然。王昌齡。祖詠。張若虛。張子容。孟浩然。常建。李白。劉慎虛。崔署。杜甫。雖有文章盛名。皆流落不偶。

商璠云。慎虛詩情幽興遠。思苦詞奇。忽有所得。便驚衆聽。頃東南高唱者十數人。然聲律婉態。無出其右。雖氣骨不逮諸公。自永明以來。可傑立江表。至如松色空照水。經聲時有人。又滄溟千萬里。日夜一孤舟。道自白雲靜。春與青溪長。時有落花至。遠隨流水香。開門向溪路。深柳續書堂。幽映每落日。清輝照衣裳。並方外之言也。惜其不永。天年隕碎國寶。

王昌齡宿京江口期慎虛不至詩云。霜天起長望。殘月生海門。風靜夜潮滿。城高寒氣昏。故人聞寂寞。久已乖清言。明發不能寐。徒盈江上鱗。又送慎虛歸取宏詞解云。天清聞海鶴。遊子引鄉盼。聲隨羽儀遠。勢與歸雲便。青桂春再榮。白雲暮來變。邊飛在禮義。豈復淚如霰。

孟浩然九日於龍沙寄劉大慎虛云。龍沙預章北。九日掛帆過。風俗因時見。湖山發興多。客中誰送酒。掉裏自成歌。歌竟乘流去。滔滔任夕波。

張巡

守睢陽日嘗賦詩曰。接戰春來苦。孤城日漸危。合圍倖月暈。分守効魚麗。屢厭黃塵起。時將白羽揮。裹瘡猶出陣。飲血更登陴。忠信應難敵。堅貞自不移。無人報天子。心計欲何施。

又夜聞笛云。茗蕞試一臨。虜騎俯城陰。不辨風塵色。安知天地心。營開星月近。戰苦陣雲深。且夕更樓上。遙聞橫笛吟。

巡謝金吾將軍表云。想峨帽之碧峯。豫遊西蜀。追綠耳於玄圃。保壽南山。逆賊祿山。殺戮黎獻。羶腥闕庭。臣被圍四十七日。凡一千八百餘戰。主辱臣死。當臣效命之時。惡稔罪盈。是賊滅亡之日。

巡祭纛文曰。太一先鋒。蚩尤後殿。蒼龍持弓。白虎捧箭。

祭城隍云。智井鳩翔。危堞龍攫。皆文武雄健。志氣不衰。真忠烈士也。

巡字巡。鄆州人。博通羣書。爲文章。不立彙。以忠義死睢陽。

張繼

閨門卽事云。耕夫占募逐樓船。春草青青萬頃田。試上吳門看郡郭。清明幾處有新煙。  
清明日自西午橋至瓜巖村有懷云。晚霽龍門雨。春生汝穴風。烏啼官路靜。花發毀垣空。  
鳴玉慟時輩。垂絲學老翁。舊遊人不見。惆悵洛城東。

洛陽作云。洛陽天子縣。金谷石崇鄉。草色侵官道。花枝出苑牆。書成休逐客。賦罷遂爲郎。  
貧賤非吾事。西遊思自強。

春夜皇甫冉宅對酒云。流落時相見。悲歡共此情。因樽酒洽。愁爲故人輕。暗滴花垂露。  
斜輝月過城。那知橫吹曲。江外作邊聲。

安公房問法云。流年一日復一日。世事何時是了時。試向東林問禪伯。遣將心地學琉璃。  
高仲武云。張繼員外。累代詞伯。積襲弓箕。其於爲文。不雕不飾。及爾登第。秀發當時。詩體  
清迥。有道者風。如女停襄邑杼。農廢汶陽耕。使者乘軒去。諸侯擁節迎。火燎原猶熱。波搖海未  
平。此興深矣。

繼。字懿孫。襄州人。登天寶進士第。大歷末。檢校祠部員外郎。分掌財賦於洪州。送鄒紹竟  
河南租庸判官云。齊魯傷心地。頻年此用兵。女停襄邑杼。農廢汶陽耕。使者乘輅去。諸侯擁節  
迎。深仁佐君子。薄賦卹黎甿。火燎原猶熱。波搖海未平。應將否泰理。一問魯諸生。

感懷云。調與時人背。心將靜者論。經年帝城裏。不識五侯門。

伉儷歿於洪州。劉長卿哭張員外云。白簡曾連拜。滄州每共思。撫存恰稚齒。歎逝顧身衰。自此辭張劭。何由見戴逵。獨聞山吏部。流涕訪孤兒。

楓橋夜泊云。月落烏啼霜滿天。江楓魚火對愁眠。姑蘇城外寒山寺。夜半鐘聲到客船。  
(此地有夜半鐘。謂之無常鐘。繼志其異耳。歐陽以爲詰病。非也。)

張謂

負薪老翁住北州。北望鄉關生客愁。自言老翁有三子。兩人已向黃沙死。如今少男新長成。明年聞道更徵兵。定知此別必零落。不及相隨同死生。盡將田宅借鄰伍。且復伶俜去鄉土。在生本求多子孫。及有誰知更辛苦。近傳天子尊武臣。強兵直欲靜胡塵。安邊自合有長策。何必流離中國人。(代北州老翁答。)

送盧舉使河源詩云。故人行役向邊州。疋馬今朝不少留。長路關山何日盡。滿堂絲管爲君愁。

同諸公遊雲公禪院云。共許尋鷄足。誰能惜馬蹄。長空淨雲雨。斜日半虹蜺。簷下千峯轉。窗前萬水低。看花尋逕遠。聽鳥入林迷。地與喧卑隔。人將物我齊。不知樵客意。何事武陵溪。

送青龍一公云。事佛輕金印。勤王度玉關。不知從樹下。還許到人間。楚水清蓮淨。吳門白日閑。聖朝須助治。切莫愛東山。

哭護國上人云。昔喜三身靜。今悲萬劫長。不應歸北斗。多是向西方。舍利衆生得。袈裟弟子將。風行殘藥碗。蟲網舊繩床。別起千花塔。空留一草堂。支公何處在。神理竟茫茫。

麓山精舍送莫侍御歸寧云。何處堪留客。香林隱翠微。薛羅通驛騎。松竹掛朝衣。霜引臺鳥集。風驚塔鴈飛。飲茶勝飲酒。聊以送相歸。

乾元中。謂以尙書郎出使夏口沔州牧杜公觴于江城之南湖。謂命李白標之嘉名。白曰。爲郎官湖。云。謂同王徵君湘中有懷云。八月洞庭秋。瀟湘水北流。遠家萬里夢。爲客五更愁。不用開書秩。偏宜上酒樓。故人京洛客。何日復同遊。

玉清公主挽歌云。學鳳年猶少。乘龍日尙賒。幻封千戶邑。忽駕五雲車。地接金人岸。山通玉女家。秋風何太早。吹落楚園花。（代宗之女）

謂登天寶二年進士第。奉使長沙。嘗作長沙風土記云。巨唐八葉。元聖六載。正言待罪湘東。

商璠云。謂代北州老翁。答及湖中對酒行。並在物情之外。衆人未曾說耳。亦何必歷遐遠。

探古跡。然後始爲冥搜。謂湖中對酒行云。夜坐不厭湖上月。晝游不厭湖上山。眼前一罇又長滿。心中萬事如等閑。主人有黍百餘碩。濁醪數斗應不惜。卽今相對不盡歡。別後相思復何益。茱萸灣頭歸路賒。願君且宿黃翁家。風光若此人不醉。參差辜負東園花。

謂大曆間爲禮部侍郎。典七年八年九年貢舉。

梁肅

肅字欽之。世居陸渾。肅復杜佑交薦。辟終右補闕。崔恭序其文。以肅文雖多而無適時之用。故以皇甫士安比之。

肅贊四皓云。秦失其鹿。豪傑並逐。鸞鳳何依。白雲深谷。英英南山。采采紫芝。漢以劍起。吾誰與歸。栖心化元。澹泊無爲。禮物雖至。先生默而。惟彼貞名。確不可轉。儲皇不安。我德用顯。大君是驚。惠位是甯。四公屈身。天下和平。弋者何思。鴻飛冥冥。

柳渾

正元中牡丹多。渾詩云。近來無奈牡丹何。數十千錢買一窠。今朝始得分明見。也共戎葵不校多。（見酉陽雜俎）渾字夷曠。不樂拘檢。爲正元宰相。

孟雲卿

宋郊詩云。徘徊宋郊上。不見平生親。獨立正傷心。悲風來孟津。大方載羣物。生死有常倫。虎豹不相食。哀哉人食人。豈知逢世運。天道亮云云。

又云。太虛流素月。三五何皎明。光耀侵白日。賢愚迷至精。四時更變化。天道有虧盈。常恐今已沒。須臾復更生。

雲卿河南人。元次山送孟校書往南海云。雲卿與次山同州里。以辭學相交。少次山六七歲。聲名滿天下。知已在朝廷。及次山之年。何事不可。勿愛羅浮。往而不歸也。

雲卿鄴城懷古云。朝發箕水南。將尋北燕路。魏家舊城闕。寥落無人住。伊昔天地屯。曹公獨中據。羣臣將北面。白日忽西暮。三臺竟寂寥。萬世難長固。雄豪安在哉。衰草密霜露。崔嵬長河北。尙見應劉墓。古樹藏龍蛇。荒茅伏狐兔。永懷故池館。數子章連句。逸興驅山河。雄辭變雲霧。我行覩遺跡。精爽如相遇。斗酒將酌君。悲風白楊樹。

古挽歌云。草草閭巷喧。塗車儼成位。冥寂何所須。盡我生人意。北去路非遠。此別終天地。臨穴頻撫棺。至哀反無淚。爾形未衰老。爾音猶童稚。骨肉安可離。皇天若容易。房帳卽虛張。庭宇爲哀吹。薤露歌若斯。人生盡如寄。

別離曲云。結髮生別離。相思復相保。何知日已久。五變庭中草。渺渺天海途。悠悠吳江島。



但懼不出門。出門無遠道。遠道行既難。家貧衣服單。嚴風吹積雪。晨起鼻何酸。人生各有戀。豈不懷爾安。分明天上日。生死誓同歡。

傷懷醜故友詩云。悄悄晨鷄翔。浙浙草上霜。人生早艱苦。壽命恐不長。二十學已成。三十名不彰。豈無同門友。貴賤易中腸。驅馬行萬里。悠悠過帝鄉。幸因弦歌末。得上君子堂。衆樂互喧奏。獨余被笙篳。坐中無知音。安得神洋洋。願因高風起。上感白日光。

古離別云。朝日上高臺。離人怨秋草。但見萬里天。不見萬里道。君行本遙遠。昔樂誠難保。宿昔夢同衾。心憂夢顛倒。含酸欲謝訴。轉轉傷懷抱。白髮年已深。征行去何早。寒暄有時謝。顛頓難再好。人皆算年壽。死者何曾老。少壯無會期。水深風浩浩。

高仲武云。孟君詩。祖述沈千運。賊中十首。又漁獵陳拾遺。詞氣傷古。怨者之流。如虎豹不相食。哀哉人食人。方於七哀。路有飢婦人。抱子棄草間。則雲卿深矣。懇雖効之於陳沈。纔能昇堂。猶未入室。然當今古調。無出其右者。一時之英也。余感懇君平生好古。著格律門論及譜二篇。以攝其體統。

雲卿與杜子美元次山最善。

羣物歸大化。六龍頽西荒。(感懷句)安知浮雲外。日月不運行。(苦雨句)孤兒去慈

親。孤客喪主人。莫吟辛苦曲。此曲誰忍聞。可聞不可說。去去無期別。行人念前程。不待參辰沒。  
朝亦常苦飢。暮亦常苦飢。飄飄萬里餘。貧賤多是非。少年莫遠行。遠行多不歸。（悲哉行）右  
張爲取作主客圖。以雲卿爲高古奧逸主。



唐詩紀事卷第二十六

盧象 閻防 王季友 楊賁

張陵 王之渙 李陽冰 蘇渙

劉長卿 章八元 李穆 韋應物

朱放 孫逖 李紱 畢耀

盧象

象題叔微君東谿草堂云。關山十餘里。青壁森相倚。欲識堯時天。東谿白雲是。雷聲轉幽壑。雲氣杏流水。澗影生虫蛇。巖端翳梓杞。大道終不易。君恩曷能已。鶴羨無老時。龜言攝生理。浮年笑六甲。元化潛一指。未暇掃雲梯。空慚阮家子。

又云。今朝共遊者。得性閑未歸。已到仙人家。莫驚鷗鳥飛。水深巖公釣。松挂巢父衣。雲氣轉幽寂。谿流無是非。名理未足羨。腥臊詎所稀。自惟負真意。何歲當食薇。

象自江東止田園移莊慶會。未幾歸汶上。小弟幼妹尤悲其別。賦詩云。謝病始告歸。依然入桑梓。家人皆佇立。相候衡門裏。疇類皆長年。成人舊童子。上堂家慶畢。願與親姻邇。論舊或

餘悲。思存且相喜。田園轉蕪沒。但有寒泉水。衰柳日蕭條。秋光清邑里。入門乍如客。休騎非便止。中飲顧王程。離憂從此始。兩妹日長成。雙髻將及人。已能持寶瑟。自解掩羅巾。念昔別時小。未知疏與親。今來識離恨。掩淚方殷勤。小弟更孩幼。歸來不相識。同居雖慚慣。見人猶默默。宛作越人言。殊鄉甘水食。別此最爲難。淚盡有餘憶。

劉夢得董挺詩集序云。嘗所遊皆青雲之士。聞名如盧杜。(員外象。工部甫。)高韻如包李。(祭酒吉。侍郎紆。)迭以章句。揚於當時。

商璠云。象詩雅而不素。有大體。得國士之風。曩在校書名光祕閣。其如靈越山多秀。新安江甚清。蓋東南之數郡也。

竹里館云。江南水不開。山澤氣潛通。臘月聞山鳥。寒崖見蟄熊。柳林青半合。荻笋亂無叢。回首金陵岸。依依向北風。

送祖詠云。田家宜伏臘。歲晏子言歸。石路雪初下。荒村鷄共飛。東源多煙火。北澗隱寒暉。滿酌野人酒。倦聞隣女機。胡爲困樵採。幾日被朝衣。

贈張筠員外云。公門世業昌。才子冠裴王。出自平津邸。還爲吏部郎。神仙餘氣色。列宿動輝光。夜出南宮靜。朝趨北禁長。時人窺水鑑。明主賜衣裳。翰苑飛鸚鵡。天池待鳳凰。承歡時日

顧未記後時傷。去去圖南遠。微才幸不忘。

趙都護晏別云。結髮候旌麾。元戎復在斯。門開都護府。兵動羽林兒。黠虜多醜覆。謀臣有別離。智同天所授。恩共日相隨。漢使開賓幕。胡笳送酒卮。風霜迎馬首。雨雪事魚麗。上策應無戰。深情屬載馳。不應行萬里。明主寄安危。

象字緯卿。劉夢得紀其文云。公始以章句。振起於開元中。與王維。崔顯。比肩驥首。鼓行於時。妍詞一發。樂府傳貴。由前進士補祕書郎。轉右衛倉曹掾。丞相曲江公。方執文衡。揣摩後進。得公深器之。擢爲左補闕。河南府司錄。司勳員外郎。名盛氣高。少所卑下。爲飛語所中。左遷齊汾鄭三郡司馬。入爲膳部員外郎。大盜起幽陵。入洛師。執公脅之從伍中。謫果州長史。又貶永州司戶。移吉州長史。詔拜主客員外郎。道病留武昌。遂不起。故相崔大傅。時爲右史。方作鄂以文誌其墓。其詞曰。噫。公妙年有聲。振耀當代。翱翔雲路。不虞矰繳。盛名先物。易生疵癘。三至郎省。坐成漕臺。蹭蹬江臯。栖栖沒齒。見知者恨之。

### 閻防

百丈谿新理。芽茨讀書云。浪迹棄人世。還山自幽獨。始傍巢由蹤。吾其獲心曲。荒庭何所有。老樹半空腹。秋蠲鳴北林。暮鳥穿我屋。栖遲樂遵渚。恬曠寡所欲。開卦推盈虛。散帙攻節目。

養閑廢人事。達命知止足。不學東國儒。俟時勞伐輻。

防與薛據在終南山。豐得寺讀書。韋蘇州有城中臥疾。和闔薛二子。屢從邑令飲。詩云。車一作良馬日蕭蕭。胡不住一作在。我廬方來從令飲。臥病獨何如。秋風起漢一作江。臯聞戶望平蕪。卽此恹一作行。音素一作表。焉知中密疏。渴者不思火。寒者不求水。人生羈寓一作旅。時去就當如此。猶希心異跡一作從利心迹異。眷眷存終始。防在開元天寶間。有文稱。岑參浩然韋蘇州有贈章。然不知得罪謫長沙之故也。

商璠云。防爲人好古博雅。其詩警策。語多真素。至如荒庭何所有。老樹半空腹。又若熊楷庭中樹。龍蒸棟裏雲。皎然信也。

秋晚石門禮佛云。輕策凌絕壁。招提謁金仙。舟車無由徑。崖嶠乃屬天。躑躅淹興景。夷猶望新絃。石門變暝色。谷口生人煙。陽鴈叫平楚。湫風急寒川。馳暉苦代謝。浮脆豔貞堅。永欲臥丘壑。息心依梵筵。誓將歷劫願。無以外物牽。

宿岸道人精舍云。早歲參道風。放情已寥豁。重息知心侶。遂果巖中諾。斂跡辭人間。杜門守寂寞。秋風剪蘭蕙。霜氣冷淙壑。山牖見燃燈。竹房聞擣藥。願言捨塵事。所趣非龍蠖。

夕次鹿門山云。龐公嘉遁所。浪跡難追攀。浮舟暝始至。抱杖聊自閑。雙巖開鹿門。百谷集

珠灣噴薄湍上水。春容漂裏山。焦原足險峻。梁壑未成艱。我行自春仲。夏鳥語綿蠻。薰草色已晚。容心殊未還。遠游非避地。訪道愛童顏。安能狗機巧。爭奪錐刀間。

與永樂諸官夜泛黃河云。煙深載酒入。但覺暮川虛。映水見山火。鳴根聞夜漁。愛茲川上趣。忽與世人疏。無假燃官燭。中流有望舒。

孟浩然相中旅泊寄防云。桂水通百粵。扁舟期曉發。荆雲閉三邑。夕望不見家。襄王夢行雨。才子謫長沙。長沙饒瘴癘。胡爲久留滯。久別思歡顏。承歡懷接袂。接袂杳無由。徒增旅泊愁。清猿不可聽。涘月上湘流。

### 王季友

古塞曲云。進軍飛狐北。窮寇勢將變。日落沙塵昏。背河更一戰。駢馬黃金勒。彫弓白羽箭。射殺左賢王。歸奏未央殿。欲言塞下事。天子不召見。東出咸陽門。哀哀淚如霰。

觀于舍人壁畫山水云。野人宿在人家少。朝見此山謂山曉。半壁仍棲嶺上雲。開簾放出湖中鳥。獨坐長松是阿誰。再三招手起來遲。于公大笑向子說。小弟丹青能爾爲。

還山留別長安知己云。出山不見家。還山見家在。山前是門前。此去長樵採。青溪誰招隱。白髮自相待。唯伴澗底松。依依色不改。



宿東溪李十五山亭云。上山下山入溪谷。溪中落日留我宿。柏樹依依當主人。主人不在情亦足。花石出地兩重階。絕頂平天一小齋。本意猶來是山水。何用相逢憶舊懷。

寄韋子春云。出山秋雲曙。山水已再春。食我山中藥。不憶山中人。山中誰余密。白髮惟相親。雀鼠晝夜無。知我廚廩貧。依依北舍松。不厭吾南隣。有情盡棄捐。土石爲同身。

子美爲季友作可歎行云。近者抉眼去其夫。河東女兒身姓柳。丈夫正色動引經。酆城客子王季友。豫章太守高帝孫。引爲賓客敬頗久。時危可拔真豪傑。二人得置君側否。

商璠云。季友詩放蕩。愛奇務險。遠出常情之外。然而白首短褐。良可悲乎。至如觀于舍人西亭壁畫山水云。野人宿在人家少。朝見此山謂山曉。半壁仍栖嶺上雲。開簾放出湖中鳥。甚有新意也。

季友。肅代間詩人也。錢考功起。有贈季友赴洪州幕下詩云。列郡皆用武。南征所從誰。諸侯重才略。見子如瓊枝。乃知季友曾遊江西之幕。

郎士元酬季友半日村別業兼呈李明府云。村映寒原日已斜。煙生密竹早歸鴉。長溪南路當羣岫。半景東鄰照數家。門通小徑連芳草。馬飲東泉踏淺沙。欲待主人林上月。還思潘令縣中花。

岑參潼關使院懷王七季友云。王生今才人。時輩咸所仰。何當見顏色。終日勞夢想。驅車到關下。欲往阻河廣。滿目徒春華。思君罷心想。開門見太華。朝日映高掌。忽覺蓮華峯。別來更如長。無心顧微祿。有意在獨往。不負林中期。終當出塵網。

楊賁

賁時興詩云。貴人昔未貴。咸願顧寒微。及自登樞要。何曾問布衣。平明登紫閣。日晏下彤闈。擾擾路傍子。無勞歌是非。

賁登天寶三年第。

張陵

今日漢家探使回。蟻壘胡丘來未歇。春風渭水不敢流。總作六軍心上血。陵天寶間詩人也。

王之渙

九日送別云。蒨庭蕭索故人稀。何處登高且送歸。今日暫同芳菊酒。明朝應作斷蓬飛。出塞詩云。黃沙直上白雲間。一片孤城萬仞山。箎笛何須怨楊柳。春光不過玉門關。登鶴鵲樓云。白日依山盡。黃河入海流。欲窮千里目。更上一重樓。

之渙。并州人。與兄之咸。之賁。皆有文。天寶間人。樂天作滁州刺史。鄧昉墓誌云。與王昌齡。王之渙。崔國輔。聯唱迭和。名動一時。

送別云。楊柳東門樹。青青夾御河。近來攀折苦。應爲別離多。

李陽冰

陽冰阮客舊居詩云。阮客身何在。僊雲洞口橫。人間不到處。今日此中行。（阮客。縉雲之隱者也。）

陽冰善篆。曾宰當塗。太白依之。

蘇渙

渙有變律詩云。日月東西行。照在大荒北。其中有燭龍。靈怪人莫測。開目爲晨暉。閉目爲夜色。一開復一閉。明晦無休息。居然六合內。曠哉天地德。天地且不言。世人強喧喧。

毒蜂成一窠。高掛惡木枝。行人百步外。目動魂亦飛。長安大道旁。挾彈誰家兒。右手持金丸。引滿無所疑。一中紛下來。勢若風雲隨。身如萬箭攢。宛轉迷所之。徒有疾惡心。柰何不知機。養蠶爲素絲。葉盡蠶不老。傾筐對空林。此意向誰道。一女不得織。萬夫受其寒。一夫不得

意。四海行路難。福亦不在大。口亦不在先。世路險孟門。吾徒當勉旃。

杜子美有聽蘇大侍御誦詩之作。

高仲武云。渙本不平者。善攻白拏。巴人號曰白跣。竇人患之。以比莊躄。後自知非。乃變節從學。鄉賦擢第。遷御史。佐湖南使。崔中丞權幕。崔遇害。渙遂踰嶺。扇動哥舒晃。跋扈交廣。此猶蛟龍見血。本質彰矣。五年作變律詩十九首。上廣州。連率李公。其意可歎。答曰。漢策紀崩。通說詞。皇史錄。祖君彥書檄。此本所以容納。天善惡必書。春秋顯訓。名言渙者。其殆庶幾乎。豈但不棄彫蠹。亦以深懲戒餘子也。

渙以哥舒叛。伏誅。

### 劉長卿

字文房。至監察御史。以檢校祠部員外郎。爲轉運使判官。知淮南鄂岳轉運留後。鄂岳觀察使吳仲孺誣奏。貶潘州南巴尉。會有爲之辨者。除睦州司馬。終隋州刺史。以詩馳聲。上元寶應間。皇甫湜云。詩未有劉長卿一句。已呼宋玉爲老兵矣。語未有駱賓王一字。已罵宋玉爲罪人矣。其名重如此。

李嘉祐入睦州分水路。憶長卿詩云。北闕忤明主。南方隨白雲。汭澗灘草色。應接海鷗羣。建德潮已盡。新安江又分。回看嚴子瀨。朗詠謝安文。雨過暮山碧。猿吟秋日曛。吳洲不可到。刷

鬢爲思君。

高仲武云。長卿員外有吏幹。而犯上。兩度遷謫。皆自取之。詩體雖不新奇。甚能鍊飾。十首已上。語意稍同。於落句尤甚。此奇思銳穿也。然春風吳草綠。古木剡山深。明日滄洲路。歸雲不可尋。又沙鷗驚小吏。明月上高枝。又細雨濕衣。看不見。閑花落地聽無聲。裁長補短。蓋王徽之類歟。又得罪風霜苦。全生天地仁。傷而不怨。亦足以發揮風雅矣。

過張明府別業云。寥寥東郭外。白首一先生。考滿孤琴在。家移五柳成。夕陽臨水釣。春雨向田耕。終日空林下。何人識此情。

餘干旅舍云。遙落暮天迥。青楓霜葉稀。孤城向水閉。獨鳥背人飛。渡口月初上。鄰家漁未歸。鄉心正欲絕。何處搗寒衣。

送鄭公歸廬山云。潯陽數畝宅。歸臥掩柴關。谷口何人在。門前秋草閑。無機買藥罷。不語杖藜還。舊筍成寒竹。空齋向暮山。水流過舍下。雲去到人間。桂樹花應發。因行寄一攀。（自過張明府別業三篇。姚合取爲極元集。）

負譴後題于越亭云。南天愁望絕。亭上柳條新。落日獨歸鳥。孤舟何處人。生涯投嶺徼。世業陷邊塵。江入千峯暮。花連百越春。秦臺憐白首。楚水怨青蘋。草色無征路。鶯聲傍逐臣。獨醒

翻取笑。直道不容身。得罪風霜苦。全生天地仁。青山數行淚。滄海一窮鱗。流落誰相見。空憐鷗鷺親。（楊大年最喜此篇。）

同郭參謀題崔令公庭竹云。不學媚清瀾。能依上將壇。蒙龍佞冕過。青菝卷簾看。得地移根遠。經霜抱節難。開花成鳳實。嫩筍長漁竿。藹藹軍容靜。蕭蕭郡宇寬。細音和角暮。疏影上門寒。阮巷何人在。梁園幾處殘。空餘軒屏側。歲晚對任安。

送朱山人越中賊退後歸山云。越中初戰罷。江上送歸橈。南渡無來信。西陵自落潮。空城垂故柳。舊葉發春苗。閭里稀相見。鶯花共寂寥。

送張扈司直歸越中云。時危身赴難。事往任浮沉。萬里三江客。孤城百戰心。春風吳草綠。古木剡山深。明日滄洲路。歸飛不可尋。

陪鄭中丞園林宴諸姪云。心遠親魚鳥。功成厭鼓鼙。林中阮家醉。池上謝公題。門徑蒼苔合。窗陰綠篠低。夕陽山向背。秋草水東西。舊架懸藤老。疏籬擗槿齊。風塵不可到。唯羨武陵溪。送駱少府云。汀洲芳草綠。日暮更氛氲。舊國無來信。春江獨送君。五言凌白雪。六翮向青雲。空自無機事。沙鷗已可羣。

送李中丞之襄州云。流落征南將。曾驅十萬師。罷歸無舊業。老去戀明時。獨立三朝盛。輕

生一劍知。茫茫江漢上。日暮欲何之。

送嚴士元云。春風倚棹闔閩城。水國猶寒陰復晴。細雨濕衣看不見。閑花落地聽無聲。日斜江上孤帆影。草綠湖南萬里程。東道若逢相識問。青袍今已誤儒生。

章八元

八元題慈恩塔云。十層突兀在虛空。四十門開而面風。却怪鳥飛平地上。自驚人語半天中。迴梯暗踏如穿洞。絕頂初攀似出籠。落日鳳城佳氣合。滿城春樹雨濛濛。或云。元白見其詩云。不謂嚴維。出此弟子。

八元歸桐廬舊居寄嚴長史云。昨辭天子棹歸舟。家在桐廬憶舊丘。三月暖時花競發。兩溪分處水爭流。近聞江老傳鄉語。遙見家山減旅愁。或在醉中逢夜雪。懷賢應向剡川遊。

酬劉長卿月夜云。夜涼河漢白。卷箔出南軒。過月鴻爭遠。辭枝葉暗翻。獨謠聞麗曲。緩步接清言。宣室思前席。行看拜主恩。劉云。貧家唯好月。空愧子猷過。

韋蘇州送八元擢第往上都應制云。決勝文場戰已酣。行應辟命復才堪。旅食不辭遊闕下。春衣未換報江南。天邊宿鳥生歸思。關外晴山滿夕嵐。立馬欲從何處別。都門楊柳正毵毵。高仲武云。八元嘗於郵亭偶題數句。蓋激楚元以辭。家維大異之。遂親指喻。數年克賦擢。

第。至如雪晴山脊見。沙淺浪痕交。得山水狀貌也。

八元。睦州人。登大曆進士第。

八元新安江行詩云。江源南去永。野渡暫維梢。古戍懸魚網。空林露鳥巢。雪晴山脊見。沙淺浪痕交。自笑無媒者。逢人卽解嘲。

寄苗員外云。舊宅平津邸。槐陰接漢宮。鳴騶馳道上。見月直廬中。白雪歌偏麗。青雲官早通。悠悠天一縫。千里恨清風。

李穆

劉長卿之塔也。詩寄劉云。處處雲山無盡時。桐廬南望輕參差。舟人莫道新安近。欲上潺湲行自遲。(時劉在新安郡)劉答云。孤舟相訪至天涯。萬轉雲山路更賒。欲掃柴門迎客遠。青苔黃葉滿貧家。

長卿又送穆詩云。渡口發梅花。山中動泉脉。燕城春草生。君作楊州客。鴈還空渚在。人去落湖翻。臨水獨揮手。殘陽歸掩門。

狎鷗攜稚子。釣魚終老身。慙慙囑歸客。莫話桃源人。

韋應物



周道遙公貧之後。待價生令儀。令儀生鑾。鑾生應物。其詩言天寶時扈從遊幸事。疑爲三衛。永泰中任洛陽丞。京兆府功曹。天曆十四年。自扈縣令制除櫟陽令。以疾辭不就。建中二年。由北部外郎出刺滁州。改刺江州。追赴闕。改左司郎中。正元初。歷蘇州。罷守。寓蘇臺。求定精舍。李肇國史補云。開元後。位卑而著名。李北海（邕）王江寧（昌齡）李館陶。鄭廣文（虔元）魯山（德秀）蕭功曹（穎士）張長史（旭）獨孤常州。及崔比部（□）梁補闕（肅）韋蘇州。其一也。應物仕官本末。似止於蘇。案白傳蘇州答劉禹錫詩云。敢有文章替左司。謂應物也。官稱亦止此。

郡齋雨中與諸文士燕集詩云。兵衛森畫戟。宴寢凝清香。海上風雨至。逍遙池閣涼。煩痾近（一作正）消散。嘉賓復滿堂。自慚居處崇。未覩斯民康。理會是非遣。性達形迹忘。鮮肥屬時禁。蔬果幸見嘗。俯飲一杯酒。仰聆金玉章。神歡體自輕。意欲凌風翔（風一作雲）吳中盛文史。羣彥今汪洋。方知大藩地（一作盛）豈曰財賦強。

應物性高潔。所在焚香掃地而坐。惟願况劉長卿。丘舟秦系。皎然之儔。得廁賓列。與之酬唱。樂天吳郡詩石記。獨書兵衛森畫戟。宴寢凝清香。劉太真與韋書云。願著作來（况也）以足下郡齋燕集相示。是何情致。暢茂適逸如此。宋齊間。沈謝吳何。始精於理意。然緣情體物。備

詩人之旨。後之傳者。甚失其源。惟足下制其橫流。師摯之始。關雎之亂。於足下之文見之矣。

故人重九日求橘戲贈云。憐君獨坐思新橘。始摘猶酸亦未黃。書後欲題三百顆。洞庭須待滿林霜。

樂天與元九書云。近歲韋蘇州歌行才麗之外。頗近興諷。其五言詩又高雅閑澹。自成一體。今之秉筆者。誰能及之。然當蘇州在時。人亦未甚愛重。必待身後。然後貴之。

欲持一瓢酒。遠寄風雨夕。(句)萬籟自生聽。大空常寂寥。還從靜中起。却向靜中銷。

(詠聲)山深松子落。幽人應未眠。(句)舟泊南池雨。簾捲北樓風。(句)右張爲取作主客圖。

應物寄全椒山中道士云。今朝郡齋冷。忽念山中客。澗底束荆薪。歸來煮白石。欲持一瓢酒。遠寄風雨夕。落葉遍空山。何處尋行跡。

應物郡齋雨中燕集顧况和詩云。好鳥集嘉樹。飛雨灑高城。况與數君子。列坐分兩楹。文雅一何麗。林堂含餘清。我公未歸朝。遊子不待情。白雲帝鄉遠。滄江桃葉鳴。拜手欲無言。零淚如酒傾。寸心已摧折。別離方骨驚。安得凌風翰。肅肅賓天京。時况左庭饒。州司士參軍。故寓意於詩。

朱放(一作傲)

剡溪行寄新別云。潺湲寒溪上。自此成離別。回首望歸人。移舟逢暮雪。頻行識草樹。漸老傷年髮。唯有白雲心。爲向東山月。

九日陪劉中丞宴送客云。獨坐三臺妙。重陽百越間。水心觀遠俗。霜氣入秋山。不棄遺簪舊。甯辭落帽還。仍聞西上客。咫尺謁天顏。

九日與楊凝崔淑期登江上山有故不往云。欲從攜手登高去。一到門前意已無。那得更將頭上髮。學他年少插茱萸。

山中聽子規云。幽人自愛山中宿。又近葛洪丹井西。窻中有箇長松樹。半夜子規來上啼。亂後經淮陰岸云。荒村古岸誰家在。野水浮雲處處愁。唯有河邊衰柳樹。蟬聲相送到揚州。

剡山夜月六言云。月在沃州山上。人歸剡縣溪邊。漠漠黃花覆水。時時白鷺驚船。

銅雀妓云。恨唱歌聲咽。愁翻舞袖遲。西陵日欲暮。是妾斷腸時。

經故賀賓客鏡湖道觀云。已得歸鄉裏。逍遙一外臣。那隨游水去。不待鏡湖春。雪裏登山屐。林間灑酒巾。空餘道士觀。誰是學仙人。

放字長通。襄州人。隱居剡溪。嗣唐王臯鎮江西。辟節度參謀。正元中。召爲左拾遺。不就。

送張山人云。知君住處足風煙。古寺荒村在眼前。便欲移家逐君去。唯愁未有買山錢。  
送著公歸越云。誰能愁此別。到越會相逢。長憶雲門寺。門前千萬峯。石床押積雪。山路倒  
枯松。莫學白道士。無人知去蹤。

戴淑倫早行寄放云。山曉旅人去。天高愁氣悲。明河川上沒。芳草露中滋。此別又萬里。少  
年能幾時。心知剡溪路。聊且寄前期。

放答陸澧云。松葉堪爲酒。春來釀幾多。不辭山路遠。踏雪也相過。

毗陵留別云。別離非一處。此處最傷情。白髮將青草。相隨日日生。

遊石澗寺云。聞道幽深石澗寺。不逢流水亦難知。莫道山僧無伴侶。獼猴長在古松枝。

顧況贈放云。野客歸時無四鄰。黔婁別久按常貧。漁樵舊路不堪入。何處空山猶有人。

嚴維贈放云。昔年居漢水。日醉習家池。道勝跡長在。名高身不知。欲依天目住。新自始寧

移。生事曾無長。唯將白接籬。

### 孫逖

逖。河南人。年十五。崔齊公日用試七火爐賦。援翰立成。甫冠。三擢甲科。吏侍王丘。誠竹簾  
賦。降階約拜。待以殊禮。其典誥也。宰相張九齡。倚撫疵瑕。沉吟久之。不能易一字。公除庶子苑

咸（草詔）曰。西掖掌綸。朝推無對。張說命二子。施伯仲之禮。江夏李邕。自陳州入。計繕錄其集。詣公託知己之分。可謂人文之宗師。國風之哲匠也。（已上顏真卿序其文。）逖終刑部侍郎。

和登會稽山云。稽山碧湖上。勢入東溟盡。煙景畫清明。九峯爭隱嶙。望中厭朱紱。俗內探玄牝。野老聽鳴騶。山童擁竹軫。仙花寒未落。古蔓柔堪引。竹澗入山多。松崖向天近。雲從海天去。日就江村隕。能賦丘嘗聞。和歌參不敏。冥搜信沖漠。多士期標準。願奉濯纓心。長謠人招隱。奉和左司員外。自洛使全京中路。先赴長安。逢立春日。贈韋侍郎等諸公云。拜郎登省闕。奉使馳車乘。遙瞻使者星。便是郎官應。臺妙時放言。皇華德彌稱。二陝聽風謠。三秦望形勝。此中睽友益。是日多詩興。寒盡歲陰催。春歸日華證。

忽觀雲間數雁迴。重逢山上花正開。河邊淑氣迎芳草。林下輕風待落梅。秋憲府中高唱入。春卿署裏和聲來。其言東閣招賢地。自有西征謝傅才。

楊子江樓云。楊子何年邑。雄雄作禁關。江連二妃渚。雲近八公山。驛道青桃外。人煙綠嶼間。晚來潮正滿。數處落帆還。

字仲舒。大曆初。李季卿薦爲左補闕。德宗時。終吏侍。李嘉祐有元日無衣冠入朝詩。寄再從弟補闕紆。

獨孤及見元載求正字。元知其所歡迎。謂曰。誰堪制誥。及心知不我與。乃薦紆。時楊炎在閣下。忌及故也。李嘉祐自蘇臺至望亭驛。人家盡空。春物增思。悵然有作。寄從弟紆云。南浦菰蔣覆白蘋。東吳黎庶逐黃巾。野棠自發空流水。江燕初歸不見人。遠樹依依如送客。平田渺渺獨傷春。那堪迴首長沙苑。烽火年年報虜塵。

戴叔倫寄中書李舍人紆云。萍翻蓬自卷。不共本心期。復入重城裏。頻看百草滋。水流歸思遠。花發長年悲。盡日春風起。無人見此時。

### 畢耀

與獨孤常州唱和。嘗贈常州云。洪爐無久停。日月速如飛。忽然衝人身。飲酒不須疑。常州後寄耀云。別時前盟在。寸景莫自擲。心與白日鬪。十無一滿百。寓形薪火內。甘作天地客。與物無疎親。斗酒勝竹帛。

耀與杜子美友善。子美贈畢四耀詩云。才大今詩伯。家貧苦宦卑。又喜耀除監察詩云。大雅何寥闕。斯人尙典刑。交期余潦倒。材力爾精靈。其推重如此。



唐詩紀事卷第二十七

于遯 姚係 趙微明 李泌

褚朝陽 蕭昕 張朝 暢當

暢諸 獨孤及 皇甫冉 皇甫曾

李幼卿 趙驩 賈邕 劉舟

長孫鑄 房白 元晟 劉太冲

姚發 鄭愕 殷少野 鄔載

于遯

獨孤及李白皆有詩贈之。蓋天寶間詩人也。

憶舍弟云。衰門鮮兄弟。兄弟惟兩人。飢寒各流浪。傷感念我身。夏期秋未來。安知無他因。不怨別天長。但願見爾身。茫茫天地間。萬類各有親。安知汝與我。乖異同胡秦。何時對形影。憤懣當共陳。

野外作云。老病無樂事。歲愁悲更長。窮郊日蕭索。生意已蒼黃。小弟髮亦白。兩男俱不強。



有才且未達。况我非賢良。幸有朽鈍姿。野外老風霜。寒鴉噪晚景。喬木思故卿。魏人宅蓬池。結網佇鱸魴。水清魚不來。歲暮空彷徨。

姚係

係送周愿判官歸嶺南云。早蟬望秋鳴。夜吟怨離聲。眇然多異感。值子江山行。由來重義人。感激事縱橫。往復念遐阻。淹留慕平生。晨奔九衢餞。暮始萬里程。山驛風月樹。海門煙霞城。易綃泉源近。拾翠沙潏明。蘭蕙一爲贈。貧交空復情。

京西遇舊識兼送往隴西詩云。蟬鳴一何急。日暮秋風樹。卽此不勝愁。隴陰人更去。相逢與相失。共是亡羊路。

韋蘇州送係還河中詩云。中國旅遊罷。故園生事微。風塵滿路起。行人何處歸。留意芳樹飲。惜別暮春暉。幾日投關郡。河山對掩扉。

送陸渾主簿趙宗儒之任云。山中眇然意。此意乃平生。常日望鳥鳴。遙對洛陽城。故人吏爲隱。懷此若蓬瀛。夕氣冒巖上。晨流瀉岸明。存亡區中事。影響羽人情。溪寂值猿下。雲歸聞鶴聲。及茲春始暮。花葛正明榮。會有攜手日。悠悠去無程。

楊參軍莊送宇文逸云。秋雲冒原隰。野鳥滿林聲。愛此田舍事。稽君車馬程。離堂慘不喧。

脈脈復盈盈。蘭葉一經霜。香綃爲贈輕。燈光耿方寂。蟲思隱餘清。相望忽無際。如含江海情。

五老峯大明觀贈隱者云。雲觀此山北。與君攜手稀。林端涉橫水。洞口入斜暉。頗覺鸞鶴。邈忽爲煙霧。飛故人清和客。默會琴心微。丹術幸可授。青龍當未歸。悠悠平生意。此日復相違。

趙徵明

思歸云。爲別未幾日。去日如三秋。猶疑望可見。日日上高樓。唯是分手處。白蘋滿芳洲。寸心甯死別。不忍生離憂。

回車跛者詩云。既老又不全。始得離邊城。一枝假枯木。步步向南行。去時日一百。來時一月程。常恐道路傍。掩棄狐兔塋。所願死鄉里。到日不願生。聞此哀怨詞。念念不忍聽。惜無異人術。倏忽具爾形。

李泌

奉和聖製重陽賜會卿示所懷云。大唐造昌運。品物荷時成。乘秋逢令節。錫宴歡羣情。俯臨秦山川。高會漢公卿。〔欠一韻〕未追赤松子。且泛黃菊英。庶歌聖人作。海內同休明。

奉和聖製中和節曲江宴百寮云。風俗時有變。中和節惟新。軒車雙闕下。宴會曲江濱。金石何鐸鏘。簪纓亦紛綸。皇恩降自天。品物感知春。慈恩匝寰瀛。歌詠同君臣。〔欠一韻〕

泌字長源。相德宗。以上巳九日皆大宴集。而寒食上巳多同時。欲以二月名節。泌請廢正月晦。以二月朔爲中和節。因賜大臣戚里尺。謂之裁度。里閭釀宜春酒。百官進農書。以示務本。帝乃著令。與上巳九日爲三令節。中外皆賜緡錢燕會。

鄴侯家傳云。泌賦詩譏楊國忠曰。青青東門柳。歲宴復憔悴。國忠訴于明皇。上曰。賦柳爲譏卿。則賦李爲譏朕。可乎。

褚朝陽

五絲詩云。越人傳楚俗。截竹競縈絲。水底深休也。日中還賀之。章施文勝質。列匹美於姬。錦綉侔新段。羔羊寢舊詩。但誇端午節。誰薦屈原詞。把酒時伸奠。汨灘空遠而。

朝陽登天寶進士第

蕭昕

臨風舒錦云。麗錦正云終。襜襜展向風。花開翻覆翠。色亂動搖紅。縷散悠颺裏。文迴照灼中。低垂疑步障。吹起作晴虹。旣與丘遲夢。深知卓氏功。還鄉將制服。從此表亨通。

昕字中明。再中博學宏詞科。初爲哥舒翰掌書記。翰敗。僂道走蜀。肅宗立。奉誥冊至行在。代宗狩陝。昕由武關從帝。德宗出奉天。昕時爲工部尙書。年八十餘。步至奉天。後兼禮部尙書。

知貢舉以太子少師致仕。

張朝

小長干行云。憶昔深閨裏。煙塵不曾識。嫁與長干人。沙頭候風色。三月南風興。思君下江陵。八月秋風起。看君發揚子。去時悲如何。見少別離多。開潭幾人到。妾夢常風波。

又云。昨夜狂風度。吹折江頭樹。森森暗無邊。行人在何處。好乘浮雲往。佳期蘭渚東。鴛鴦綠浦上。翡翠錦屏中。自憐十五餘。顏色桃花紅。那作商人婦。愁水復愁風。二詩太白集中有之。未知誰是。

江行風云。塔貧如珠玉。塔富如埃塵。貧時不忘舊。富罷多寵新。妾本富家女。與君爲偶匹。念汝一何深。中門不曾出。妾有綉衣裳。葳蕤金縷光。念君貧且賤。易此從遠方。遠方三千里。發竟悔不已。日暮情更來。空望去時水。孟夏麥始秀。江上多南風。商賈歸欲盡。君今尙巴東。巴東有巫山。窈窕神女顏。常恐遊此方。果然不知還。

朝。丹朝人。大曆時處士。

楊當

南充謝郡。客遊澧州。留贈宇文中丞云。僕本蕩落人。辱當州郡使。量力頗及早。謝歸今卽

已蕭蕭若凌虛。衿帶領銷靡。車服率然來。涪陽作遊子。鬱鬱寡開顏。默默獨行李。忽逢平生友。一笑方在此。秋情甯風日。楚思浩雲水。爲語弋林者。冥冥鴻遠矣。

韋蘇州寄當詩云。寇賊起東山。英俊方未閑。聞君新應募。籍籍動京關。出身文翰場。高步不可攀。青袍未及解。白羽插腰間。昔爲瓊樹枝。今有風霜顏。秋郊細柳道。走馬一夕還。丈夫當爲國。破敵如摧山。何必事州府。坐使鬢毛班。問以子弟被召從軍。

李端贈當詩并序云。余少尙神仙。且未能去。友人暢當以禪門見導。余心知其是。而未得其門。因寄詩以咨焉。少喜神仙術。年來久蹉跎。壯志爲一累。浮生事漸多。衰顏不相識。歲暮定相過。請問宗居士。君其奈老何。

當河東人。正元初爲太常博士。後以果州刺史卒。與弟諸皆有詩名。

宿潭上云。夜潭有仙舸。與月當水中。嘉賓愛明月。遊子驚秋風。

又云。青蒲野陂水。白露明月天。夜中秋風起。心事坐潸然。

別盧倫云。故交君獨在。又欲與君離。我有新秋淚。泝關秋氣悲。

平阿館赴郡云。晨興平阿館。見月沉江水。溶溶山霧披。蕭蕭沙鷺起。奉恩謬符竹。伏軾省顏鄙。何得施放山。愧迎小郡吏。寥落耕俗地。征途清冥裏。德綏乃吾民。不得將庶矣。禽茲非性。

能多感會衰齒。恭承共理詔。當懼墜諸地。

居山居酬韋蘇州見寄云。孤茅泄煙處。此中山叟居。親雲甯有事。耽酒詎知余。水定鶴翻去。松欹峯儼如。猶煩使君問。更欲結環廬。

登鶴鵲樓云。迥臨飛鳥土。高出世塵間。天勢圍平野。河流入斷山。

偶宴西蜀摩訶池云。珍木鬱清池。風荷左右披。淺觴寧及醉。慢舸不知移。蔭竹簾光冷。照流簪影歌。胡爲獨羈者。雪涕向漣漪。

當詩平淡多佳句。如釣渚亭云。花發多遠意。鳧鴈有閑情。遲暉耿不暮。平江寂無聲。天柱隱所云。荒徑饒松子。深蘿絕鳥聲。陽崖全帶日。寬障偶通耕。山居云。水定鶴翻去。松欹峯儼如。又寒林苞晚橘。風絮露垂楊。湖伴閒漁唱。天邊數鴈行。皆有遠意。

### 楊諸

早春詩云。獻歲春猶淺。園林未盡開。雪和新雨落。風帶舊寒來。聽鳥聞歸鴈。看花識早梅。生涯知幾日。更被一年催。

### 獨孤及

字至之。洛陽人。時號獨孤常州。夏中酬于遯畢耀問病見贈云。救物智所昧。學仙願未從。

行藏兩乖角。蹭蹬風波中。薄宦耻降志。臥疴非養蒙。閉關涉兩旬。羈思浩無窮。鸞鷺何處來。雙舞下碧空。離別隔雲雨。惠然此相逢。把手賀疾間。舉杯欣酒濃。新詩見久要。清論激深衷。高館舒夜簾。開門延微風。火雲赫嵯峨。日暮千萬峯。遙指故山笑。相看撫號鐘。聲和由心清。事感出氣同。出處未易料。且歌緩愁容。願君崇明德。歲暮如青松。

賈員外處見中書賈舍人巴陵詩集。覽之懷舊。代書寄贈云。海岸望青瑣。雲長天漫漫。十年不一展。知有關山難。適逢阮始平。立馬問平安。取公詠懷詩。示我江海瀾。整若歸武庫。森然矛戟寒。眼明遺頭風。心悅忘朝餐。大駕今返正。熊羆扈鳴鑿。公遊鳳凰沼。獻可在筆端。繫越有長纓。封關祇一丸。問然翔寥廓。仰望在羽翰。嘉會不我與。相思歲云殫。惟當袖佳句。持比青琅玕。

題思禪寺上方詩云。谿口聞法鼓。停橈登翠屏。攀雲到金界。合掌問禪扃。鬱律衆山抱。空濛花雨零。老僧指香樓。云是不死亭。耿耿千越路。茫茫春草青。遠山噴百谷。繚繞馳東溟。目極想何在。境照心亦冥。口然諸根空。破結如破瓶。下視三界狹。但聞五嶽腥。山中有良藥。吾欲墮天形。

觀海詩云。北登渤海島。迴首秦東門。誰尸造物功。鑿此天地源。瀕洞吞百谷。周流無四垠。

廓然混茫際。望見天地根。白日自中吐。扶桑如可捫。迢迢蓬萊峯。想像金臺存。秦帝曾經此。登臨異飛翻。揚旌百神會。望日羣仙奔。徐福竟何成。羨門徒空言。唯見石橋足。千里潮水痕。

及與薛華于述。畢耀友善。安定梁肅叙其文曰。天寶中。作者數人。頗節之以禮。洎公爲之。於其操道德爲根本。摠經籍爲冠帶。以易之精義。詩之雅興。春秋之褒貶。屬之爲辭。故其文寬而簡。直而婉。辯而不華。博厚而高明。論人無虛美。比事爲實錄。天下凜然。復覩兩漢之遺風。善乎崔公祐甫之言曰。常州之文。以立憲誠世。褒賢遏惡爲用。故議論最長。其或列于碑頌。流於詠歌。峻如嵩華。盛於江河。若贊堯舜禹湯之命。爲典。爲誥。爲謨。爲訓。人皆許之。而不吾試。論道之位。宜而不陟。惜哉。

### 皇甫冉

字茂政。玄晏先生之後。張曲江深愛之。謂清穎秀拔。有江徐之風。大曆二年。遷右補闕。冉題巫山云。巫峽見巴東。迢迢出半空。雲藏神女館。雨到楚王宮。朝暮泉聲落。寒暄樹色同。清猿不可聽。偏在九秋中。

冉少室昇仙歌云。紅霞紫氣甚氤氳。絳節青童迎少君。忽從林下昇天去。空使詩人禮白雲。



高仲武云。皇甫冉補闕。自擢桂禮闈。遂爲高格。往以世道艱虞。避地江外。每文章一到。朝廷作者變色。於詞場爲先輩。推錢郎爲伯仲。誰家勝負。或逐鹿中原。如菓熟任霜封。籬疎從水渡。又裏露收新稼。迎寒葺舊廬。又燕知社日辭巢去。菊爲重陽冒雨開。可以雄視潘張。平揖沈謝。又巫山詩。終篇皆麗。自晉宋齊梁陳周隋已來。採掇者無數。而補闕獲驪珠。使前賢失步。後輩却立。自非天假。何以迨斯。恨長轡未聘。而芳蘭早凋。悲夫。

送韓司直云。遊吳還適越。來往任風波。復送王孫去。其如春草何。岸明殘雪在。湖滿夕陽多。季子留遺廟。停舟試一過。

宿嚴維宅云。昔聞玄度宅。門向會稽峯。君住東陽下。清風繼舊蹤。初秋臨水月。半夜隔山鐘。世路多離別。良宵詎可逢。

途中送權驛（或作驂）云。淮海風濤起。江關憂思長。同悲鵲繞樹。獨作鴈隨陽。山晚雲和雪。汀寒月滿霜。由來濯纓處。漁父愛滄浪。

西陵寄一公云。西陵遇風處。自古是通津。終日空江上。雲山若待人。汀洲寒事早。魚鳥與同新。南望山陰路。吾心有所親。（姚合取四詩爲極元集）

獨孤至之敍其文云。五言詩之源。生於國風。廣於離騷。著於李蘇。盛於曹劉。其所自遠矣。

當漢魏之間。雖以朴散爲器。作者猶質有餘而文不足。以今揆昔。則有朱絃疎越。大羹遺味之歎。歷千餘歲。至沈詹事。宋考功。始財成六律。彰施五色。使言之而中倫。歌之而成聲。緣情綺靡之功。至是乃備。雖去雅浸遠。其利有過於古者。亦猶路鼓出於上鼓。篆籀生於鳥跡也。沈宋旣沒。而崔司勳。王右丞。維復崛起於開元天寶之間。得其門而入者。當代不過數人。補闕其人

也。  
冉題裴周新園云。東郭訪先生。西郊尋隱路。久爲江南客。自有雲陽樹。已得閑園心。不知公府步。開門白日遠。倚杖青山暮。菓熟任霜封。籬疎從水度。窮年無牽綴。往事惜淪悟。惟見耦耕人。朝朝自來去。

送元盛還潛山云。深山秋事早。君去復何如。裊露收新稼。迎寒葺舊廬。題詩卽招隱。作賦是閑居。別後應相憶。嵇康懶寄書。

秋日東林之作云。閑看秋水心無事。臥對寒林手自裁。廬阜高僧留別。茅山道士寄書來。燕知社日辭巢去。菊爲重陽冒雨開。淺薄將何稱獻納。臨岐終日自遲迴。

送韋使君赴昇州云。中司龍節貴。上客虎符新。地控吳襟帶。才高漢搢紳。泛舟因渡臘。入境便行春。何處歌來暮。長江建業人。

送李錄事赴饒州云。北人南去雪紛紛。鴈叫汀洲不可聞。積水長天隨遠色。荒林極浦足寒雲。山從建業千峯起。江自潯陽九派分。借問督郵纔弱冠。府中年少不如君。

皇甫曾

寄中書王舍人詩云。腰金載筆謁承明。至道安禪得此生。西掖幾年綸綍貴。東山遙夜薜蘿清。風傳漏刻星河曙。月上梧桐雨露清。聖主好文誰爲薦。閉門空賦子虛成。

送孔徵士云。谷口山多處。君歸不可尋。家貧青史在。身老白雲深。掃雪開松徑。疎泉過竹林。餘生負丘壑。相送亦何心。

烏程水樓留別云。悠悠千里去。惜此一樽同。客散高樓上。帆飛細雨中。山程隨遠水。楚思任青楓。共說前期易。滄波處處通。

張芳見訪郊居云。林中雨散早涼生。已有迎秋促織聲。三徑荒蕪羞對客。十年衰老愧稱兄。愁心自惜江籬短。世事方看木槿榮。君若罷官攜手日。尋山莫算白雲程。

雲林邕上人云。春山臨一室。獨坐草淒淒。身寂心成道。花開鳥自啼。細泉松磬裏。反景竹林西。晚與門人別。依依出虎溪。

送中丞還京云。罷戰迴龍節。朝天見鳳池。寒生五湖道。春及萬年枝。邵化多遺愛。胡清已

畏知懷恩偏感別。墮淚向旌麾。

贈霈禪師云。南嶽瀟湘沅。吾師經利涉。身歸沃州老。名與文公接。靜教傳荆吳。道緣止漁獵。觀空色不染。對境心自愜。室中人寂寞。門外山重疊。天台積幽夢。早歲歸負笈。

高仲武云。昔孟陽之與景陽。詩罔慚厥弟。協居六品。載處下流。今侍御之與補闕。文辭亦爾。體制清潔。華不勝文。然寒生五湖道。春及萬年枝。五言之選。其爲士林所尙。宜哉。

曾。字孝常。爲殿中侍御史。天寶中。兄弟踵登進士第。名相上下。時比張氏景陽。孟陽云。

尋陸處士云。幾年人不見。林下掩柴關。留客當清夜。逢君話舊山。隔城寒杵急。帶月早鴻還。南陌雖相近。其如隱者閑。

哭陸處士云。從此無期見。柴扉對雪開。二毛逢世難。萬恨掩泉臺。返照當空久。孤城吊客回。漢家偏訪道。猶畏鶴書來。

送人作使云。上將還專席。雙旌復出秦。關河三晉路。賓從五原人。孤戍雲連海。平沙雪度春。酬恩看玉劍。何處有煙塵。(尋陸處士詩以下三篇。姚合取爲極元集。)

曾與劉長卿友善。曾過長卿碧澗別業詩云。謝客開山後。郊扉出去通。江湖十年別。衰老一樽同。反照寒川滿。平田暮雪空。滄洲自有趣。不復泣途窮。長卿和云。荒村帶晚照。落葉亂紛

紛古路無行客。寒林獨見君。野橋經雨斷。澗水向田分。不爲憐同病。何人到白雲。曾又寄長卿。云。南憶新安郡。千山帶夕陽。斷猿知夜久。秋草助江長。鬢髮應成素。青松獨見霜。愛才稱漢主。題柱待田郎。長卿和云。離別江南北。汀洲葉再黃。路遙雲共水。砧迥月如霜。歲儉攸仁政。姑藏相國親臨邛。年衰憶故鄉。佇君宣室召。漢法倚張綱。

盧綸哭曾云。攀龍與泣麟。哀樂不同塵。九陌宵漢侶。一燈冥寞人。舟沉驚海闊。蘭折怨霜頻。已矣復何見。故山應更春。(時同李包二郎哭曾故云)

李幼卿

近日霜毛一番新。別時芳草兩迴春。不堪花落花開處。况是江南江北人。薄宦龍鐘心懶慢。故山寥落水瀟淪。緣君愛我疵瑕少。願竊仁風寄老身。

幼卿字長夫。隴西人。大曆中。以右庶子領滁州。別業在常州義興。曰玉潭莊。在滁州時。以書託獨孤至之。獨孤以詩寄云。日日思瓊樹。書書話玉潭。知同百口累。曷日辦抽簪。又至之題玉潭云。碧玉徒強名。冰壺難比德。唯當寂照心。可並瀟淪色。幼卿所謂故山寥落水瀟淪者也。

蕭穎士樂聞人善。以推引後進爲己任。如李陽冰。李幼卿。皇甫冉。陸渭輩。由獎目皆爲名士。滁州迨今有庶子泉。以幼卿得名也。

趙驊

送晁補闕歸日本國云。西掖承休澣。東隅返故林。來稱剡子學。歸是越人吟。馬上秋郊遠。舟中曙海陰。知君懷魏闕。萬里獨搖心。

驊字雲卿。擢開元進士第。嘗陷陸山。貶晉江尉。建中初。爲祕書少監。與顏真卿。蕭穎士等善。其子宗儒。

賈邕

蕭夫子赴東府。門人送者十二人。劉太真爲之序云。先師微言既絕者。千有餘載。至夫子而後洵美無度。得夫天和。頃東倭之人。踰海來賓。舉其國裕。願師於夫子。非敢私請。表聞于天。夫子辭以疾而不之從也。退然貧居。述作萬卷。去其浮辭。存平正言。昔左氏失於煩。殺梁失於短。公羊失於俗。而夫子爲其折衷。王公安辟。拒而不應。從官三年。始參謀於洛京。家兄與先鳴者六七人。奉壺開筵。執弟子之禮。於路左。太真以文求進。以無聞見舉。而不慙爲大子羞。春雲輕陰。草色新碧。皎皎疋馬。出于青門。吾徒喟然。瞻望不及。賦詩仰餞者。自相里造。賈邕已下。凡十二人。皆及門之選也。

邕得路字云。子欲適東周。門人盈岐路。高標信難仰。薄宦非始務。綿邈千里途。徘徊四郊

暮。征車日云遠。撫已慙深顧。

邕。天寶九年。李暉侍郎下登第。

劉丹（一作冉）

得適字云。大名掩諸古。獨斷無不適。德遂天下宗。官爲幕中客。驪山浮雲散。霜岸零雨夕。請業非遠期。圓先再生魄。

天寶十六年。陽浚舍人下登第。

長孫鑄

得離字云。大德詎可擬。高梧有長離。素懷經綸具。昭世猶安卑。落日去關外。悠悠隔山陂。我心如浮雲。千里相追隨。

天寶十二年。陽浚舍人下登第。

房白

得還字云。夫子高世跡。時人不可攀。今子亦云幸。謬得承溫顏。良策資入幕。遂行從近關。青春灞亭上。此去何時還。

天寶十三年。陽浚侍郎下登第。

元晟

得引字云。吾見夫子德。誰云習相近。數仞不可窺。言味終難盡。處喧慮常澹。作吏心亦隱。更有嵩少峯。東南爲勝引。

晟。河南府進士。

劉太冲

得淺字云。吾師繼微言。贊黜在墳典。寸祿聊自資。平生官情鮮。透遲東周路。春草深復淺。日遠夫子門。中心曷由展。

天寶十二年陽浚舍人下登第。

姚發

得草字云。天生良史筆。浪跡擅文藻。中夏授參謀。東夷願聞道。行軒翫春日。餞席藉芳草。幸得師季良。欣留篋笥寶。

天寶十二年陽浚舍人下登第。

鄭愕

得往字云。斤溪數畝田。素心擬長往。翳君曲得引。使我纓俗網。風塵豈不勞。道義成心賞。



春郊桃李月。忍此戒征兩。

天寶十二年陽浚舍人下登第。

殷少野

得散字云。官閑幕府下。聊以任縱誕。文學魯仲尼。高標嵇中散。出門時雨潤。對酒春風暖。感激知己恩。別離魂欲斷。

天寶十六年陽浚舍人下登第。

鄜載（不預此會）

得君字云。策名十二載。獨立先斯文。爾來及門者。半已昇青雲。青雲豈無姿。黃鶴素不羣。一辭芸香吏。幾歲滄江濱。散職既不羈。天聰亦昭聞。雖承急賢詔。未謁陶唐君。薄俸還自急。此言那足云。和風媚東郊。具物滋南薰。薰草正可摘。豫章猶未分。宗師忽千里。使我心氛氲。

天寶十三年陽浚侍郎下登第。

穎士留別二三子。得韻字云。二紀尙雌伏。徒然忝先進。英英爾衆賢。名實鬱雙振。殘春惜將別。清洛行不近。相與愛後時。無令狐逸韻。

鄜載有文名。與錢起友善。起同載旅寓關中。起有詩云。文士皆求遇。今人誰至公。靈臺一

寄宿楊柳再春風。更惜忘形友。頻年失志同。羽毛齊燕雀。心事阻鴛鴻。留滯慚歸養。飛鳴恨觸籠。橋懷鄉夢裏。書去客愁中。殘雪送歸鴈。韶光葉斷蓬。吞悲問唐舉。何路出屯蒙。又送鄔三落第還鄉云。鄧客文章絕世稀。常嗟時命與心違。十年失路誰知己。千里思親獨遠歸。雲帆春水將何適。日愛東南暮山碧。關中新月對離樽。江上殘花待歸客。名官無媒自古遲。窮途此別不堪悲。荷衣垂釣且安命。金馬招賢會有時。

劉長卿過鄔三湖上書齋云。何事東林客。忘機一釣竿。酒香開甕老。湖色對門寒。向郭青山送。臨池白鳥看。見君能浪跡。子亦厭微官。



唐詩紀事卷第二十八

張濯

孫叔向

朱長文

胡令能

鄭丹

李希仲

杜誦

鄭錫

古之奇

秦系

令狐岍

楊凌

劉太真

顧况

薛業

劉希戩

朱絳

元凜

楊志堅

劉方平

李揆

戎昱

張濯

題舜廟云。古都遺廟出山濱。萬代千秋仰聖君。蒲版城邊長逝水。蒼梧野外不歸雲。寥寥象設魂應老。寂寂虞篇德已聞。向晚風吹庭下栢。猶疑琴曲韻南薰。

濯登元進士第。

孫叔向

題昭應溫泉云。一道溫泉遶御樓。先皇曾向此中遊。雖然水是無情物。也到宮前咽不流。

送咸安公主云。鹵簿遲遲出國門。漢家公主嫁烏孫。玉顏使向穹廬去。衛霍空承明主恩。咸安德宗女。元和時。追封燕國襄穆公主。

朱長文

吳興送梁補闕歸朝。賦得荻花云。柳家汀州孟冬月。雲寒水清荻花發。一枝持贈朝天人。願比蓬萊殿前雪。

春眺揚州西崗寄於員外云。蕪城西眺極蒼流。漠漠春煙間曙樓。瓜步早湖吞建業。蒜山晴雪照揚州。隋家故事不能向。鶴在山池期我遊。

望中有懷云。龍向洞中啣雨出。鳥從花裏帶香飛。白雲斷處見明月。黃葉落時聞擣衣。宿新安江深度館。寄鄭州王使君云。霜飛十月中。搖落衆山空。孤館閉寒木。大江生夜風。賦詩忙有意。沈約在關東。

送李司直歸浙東幕兼寄鮑將軍云。翩翩書記早曾聞。二十年來願見君。今日朝廷想白髮。同時幾許在青雲。人從北固山邊去。水到西陵渡口分。會作王門曳裾客。爲餘前謝鮑將軍。〔時節度大夫初封東平郡王。〕

長文。大曆間江南詩人。

胡令能

詠綉障云。日暮堂前花藥嬌。爭拈小筆上床描。綉成安向春園裏。引得黃鶯下柳條。  
小兒垂釣云。蓬頭稚子學垂綸。側坐莓苔草映身。路人借問遙招手。恐畏魚驚不應人。  
喜園田韓少府見訪云。忽聞梅福來相訪。笑着荷衣出草堂。兒童不慣見車馬。爭入蘆花深處藏。

令能。圃田隱者。少爲負局鍍釘之業。以所居列子之里。家貧。適茶果。必祭列子。以求聰明。或夢人割其腹。以一卷書內之。遂能吟詠。禪學尤邃。世謂胡釘鉸者也。正元元和間人。

鄭丹

肅宗挽歌云。國以重明受。天從諒闇移。諸侯方北面。白日又西馳。龍影當泉落。鴻名向廟垂。永言青史上。還見載無爲。

玄宗挽歌云。律曆千年會。車書萬里同。固期常戴日。豈意厭觀風。地慘新疆理。城摧舊戰功。山河萬古壯。今夕盡歸空。

高仲武云。鄭丹詩。剪刻婉密。寶應中。獻二帝兩后挽歌三十首。詞旨哀楚。得臣子之致。雖不及事。朝廷嘉之。解褐蘄州錄事參軍。二章其尤者也。

丹大曆間詩人

李希仲

東皇太一詞云。吉日初齋戒。靈巫穆上皇。焚香布瑤席。鳴珮奠椒漿。緩舞花飛滿。清歌水去長。迴波送神曲。雲雨滿瀟湘。

薊北行云。旄頭有精芒。胡騎獵秋草。羽檄南渡河。邊庭用兵早。漢家愛征戰。宿將今已老。辛苦羽林兒。從戎榆關道。一身救邊速。烽火通薊門。前軍飛鳥斷。格鬪塵沙昏。寒日鼓聲急。單于夜將奔。當須徇忠義。身死報國恩。

高仲武云。希仲輕靡。華勝於質。此所謂才力不足。務爲清淺者也。然前軍飛鳥斷。格鬪塵沙昏。亦出寒錄。疊疊不歇。可及中矣。

希仲。趙郡人。天寶初。宰假師。范陽。趙戎。挈家避亂。入江淮。

杜誦

誦哭長孫侍御云。道爲謀猷重。名因賦頌雄。禮闈曾擢桂。憲府旣乘驄。流水生涯盡。浮雲世事空。惟應舊松柏。蕭颯九原中。

高仲武云。誦詩平調。不失文流。如流水生涯盡。浮雲世事空。得生人始終之理。故編於集。

誦大曆間詩人也。

鄭錫

邯鄲少年行云霞鞍金口驅豹袖紫豹裘家住叢臺下門前漳水流喚人呈楚舞借客試吳鈎見說秦兵至甘心赴國讎。

李嘉祐與錫遊春詩云東門垂柳長回首獨心傷日暝臨芳草天晴憶故鄉映花鶯上下過水蝶悠颺借問同行客今朝淚幾行李端司空曙皆錫友也。

錫登寶應進士第寶曆間爲禮部員外郎（事見李翱所撰李長史墓銘）

古之奇

秦人謠云微生祖龍代却思堯舜道何人仕帝庭拔殺指佞草姦臣弄民柄天子恣衷抱上下一相蒙馬鹿遂顛倒中國旣版蕩骨肉安可保人生貴年壽吾恨死不早。

李端送之奇赴涇州幕云疇昔十年兄相逢五校營今宵舉盃酒隴月見軍城（時從馬僕射辟）

之奇登寶應進士第

秦系



系呈韋蘇州詩云。久臥雲間已息機。青袍忽著狎鷗飛。詩興到來無一事。郡中今有謝元暉。

系字公緒。會稽人。隱泉州南安九日山。張建封聞系不可致。就加校書郎。自號東海釣客。與劉長卿善。權德輿曰。長卿自以爲五言長城。系用偏師攻之矣。韋答系曰。知掩山扉三十秋。魚鬚翠碧葉床頭。莫道謝公方在郡。五言今日爲君休。蓋系以五言得名久矣。年八十餘卒。南安人。號其峯爲高士峯。

系將移耶溪舊居。留呈嚴長史陳校書允初云。鷄犬漁舟裏。長謔任興行。卽令邀客醉。已被遠山迎。書笈將非重。荷衣着甚輕。謝安無箇事。忽起爲蒼生。

山中贈張評事時授右衛佐云。終年常避喧。自注五千言。流水閑過院。春風與閉門。山茶邀土客。桂實落前軒。何事教予起。微言不足論。

系家剡山。向盈一紀。大曆五年。人或以其文聞於留守薛公。無何奏系右衛率府倉參軍。意所不欲。以疾辭免。因將命者獻詩云。由來那敢議輕肥。散髮行歌自採薇。逋客未能忘野興。辟書令遣脫荷衣。家中匹婦空相笑。池上羣鷗盡欲飛。更乞大賢容小隱。蓋看愚谷有光輝。

系曾與鮑員外同舉場。因其見尋呈情云。少小爲儒不自強。如今復嬾見侯王。覽鏡自知

身漸老。買山將作計偏長。荒涼鳥獸同三逕。撩亂琴書共一床。猶有郎官來問病。時人莫道我  
徉狂。

山中寄錢起苗發云。空山歲計是胡麻。窮海無梁泛一槎。幼子唯能覓黎粟。逸妻相共老  
煙霞。高吟麗句驚巢鶴。閑閉春風看落花。借問省中何水部。今人幾箇屬詩家。

令狐峒

儒服學從政。遂爲塵事嬰。銜命東復西。孰堪異鄉情。懷祿且懷恩。策名敢逃名。羨彼農畝  
人。白首親友并。江山入秋氣。草木彫晚榮。方塘寒露凝。旅館涼飈生。懿交守東吳。夢想聞頌聲。  
雲水方浩浩。離憂何時平。

右令狐峒寄韋蘇州詩。

峒德棻五世孫。天寶末第進士。宰相楊炎。故出杜鴻漸門下。其子封求洪文生以託峒。峒  
曰。必得公手書。得書卽奏之。炎具奏所以然。德宗曰。姦人也。自禮侍貶衡州別駕。峒介懷人。  
人以爲怨。

韋蘇州答峒詩云。一凶乃一吉。一是復一非。孰能逃斯理。亮在識其微。三黜故無愠。高賢  
當庶幾。但以親交戀。音容邈難希。况惜別離久。俱忻蕃守歸。朝晏方陪廁。山川又乖違。吳門昌

海霧。峽路凌連磯。同會在京國。相望涕沾衣。明時重英才。當復別彤闈。白王雖塵垢。拂拭還光輝。

峒。再謫三衢。遇田敦爲牧。乃門生也。方相見。敦曰。吾今日方見座主。乃分半俸奉之。

楊凌

淮陽爲郡暇。坐惜流芳歇。散懷累榭風。清暑澄潭月。陪燕辭三楚。戒途綿百越。非當遠別離。雅奏何由發。右楊凌詩。韋應物刺滁州。凌時以協律客滁州。既別。韋寄詩云。吏散山閣掩。鳥鳴山郡中。遠念長江別。俯覺坐隅空。舟泊南池雨。簾捲北樓風。併罷芳罇燕。爲愴昨時同。故凌以前詩謝之。

凌明妃怨云。漢國明妃去不還。馬馳絃管向陰山。匣中縱有菱花鏡。羞對單于照舊顏。凌字恭履。最善文章。大曆中。與兄憑。凝。踵進士第。時號三楊。凌終侍御史。子敬之。

劉太真

寵至乃不驚。罪乃非無由。奔迸歷畏途。緬邈赴偏陬。牧此彫弊疇。屬當賦歛秋。夙興諒無補。旬暇焉敢休。前日懷友生。獨登城上樓。迢迢西北望。遠思不可收。今日車騎來。曠然銷人憂。晨迎東齋飯。晚度南溪遊。以我碧流水。泊君青翰舟。莫將遷客程。不爲勝景留。飛扎謝三守。斯

篇希見酬。

右劉太真詩。太真刺信州時。顧十二左遷過上饒。出韋蘇州房杭州韋睦州三使君詩。太真繼焉。

太真。宣州人。師蕭穎士。蕭云。太真吾入室者也。正元四年。德宗詔羣臣宴曲江。自爲詩。羣臣皆和。帝白第之。以太真李紆等爲上。鮑防于邵等次之。張蒙等爲下。與擇者四十二人。

韋蘇州答太真詩云。瓊樹凌霜雪。葱蒨如芳春。英賢雖出守。本自王階人。宿昔陪郎署。出入迎清塵。孰云俱列郡。比德豈爲隣。其見重如此。

顧况

况。字通翁。姑蘇人。至德進士。性談諧。與柳渾。李泌爲方外友。德宗時。渾輔政。以祕書郎召及泌。相自謂當得達官。久之。遷著作郎。况坐詩語調謔。貶饒州司戶。居於茅山。以壽終。皇甫湜爲况文集序云。偏於逸歌長句。駿發踔厲。往往若穿天心。出月脇。意外驚人語。非尋常所能及。最爲快也。其爲人類其詞章云。

况志尙疎逸。近於方外。時宰招以好官。况以詩答云。四海如今已太平。相公何用喚狂生。此生還似籠中鶴。東望瀛州叫一聲。（上柳相公）

子規詩云。棲霞山中子規鳥。口邊血出啼不了。山僧夜後初入定。聞似不聞山月曉。

露青竹杖歌云。鮮于仲通正當年。章仇兼瓊在蜀川。約束蜀兒探馬鞭。蜀兒探鞭不敢眠。橫截斜度飛鳥邊。繩橋夜上層崖巔。頭插白雲跨飛泉。探得馬鞭長且堅。浮漚丁子珠聯聯。灰  
 裘蠟揩光爛然。章仇兼瓊持上天。上天雨露何其偏。飛龍閑廐馬數千。朝飲吳江夕秣燕。紅塵  
 撲轡汗滋驪。師子麒麟聊比肩。曲江昆明洗刷牽。四蹄躡浪頭枿天。蛟龍稽顙河伯虔。拓羯胡  
 鷓脚手鮮。陳閔韓幹丹青妍。欲貌未貌眼欲穿。金鞍王勒錦連乾。騎入桃花楊柳煙。十二樓中  
 奏管絃。樓中美人奪神仙。爭愛大家把此鞭。祿山入關關破年。忽見楊州北邸前。祇有人還千  
 一錢。亭亭筆直無皴節。磨將形相一條鐵。市頭終是無人別。江海賤臣不拘綈。垂綃挂影西窗  
 缺。稚子覓衣挑仰穴。家僮拾薪幾桮折。玉潤猶霑玉壘雪。碧鮮似染蓑弘血。蜀帝詞邊子規咽。  
 相如橋上文君絕。往年策馬降至尊。七盤九折橫劍門。穆王八駿超崑崙。安用冉冉孤生根。聖  
 人不貴難得貨。金玉珊瑚誰買恩。

况攻小筆。嘗求知新亭監人詰之。曰。余要貌海中山耳。仍辟畫省。王默爲副。任職半年。解  
 後。落筆有奇趣。山中作云。野人愛向山中宿。况在葛洪丹井西。庭前有箇長松樹。半夜子規來  
 上啼。况又有汀洲渺渺江籬短。疑是疑非兩斷腸。(句)巫峽朝雲暮不歸。洞庭春水晴空滿。

(句)顏垣化爲陂。陸地堪乘舟。(句)大姑山盡小孤出。月照洞庭行客船。(句)

右張爲取作主客圖。

代佳人贈別云。萬里行人欲渡溪。千行珠淚滴爲泥。已成殘夢隨君去。猶有驚烏半夜啼。  
秋題葉道士山房云。水邊垂柳赤欄橋。洞裏仙人吹玉簫。近得麻姑書信否。潯陽向上不通潮。

金鑑玉珮歌云。贈君金鑑太霄之玉珮。金鎖禹步之流珠。五嶽真君之祕錄。九天文人之寶書。東井沐浴辰已畢。先進洞房上奔日。借問君從何處來。黃姑織女機邊出。

悲歌三首并序云。情思發動。聖所不免也。故師乙陳其宜。延陵審其音。理亂之所經。王化之所興。信無逃聲。豈徒文彩之麗。遂作歌以悲之云。邊城路。今人犁田昔人墓。岸上沙。昔時江水今人家。今人昔人共長歎。四氣相催節迴換。明月皎皎入華池。白雲離離渡青漢。我欲昇天。天隔霄。我欲渡水。水無橋。我欲上山。山路險。我欲吸井。井泉遙。越人翠被。今何夕。獨立沙邊江草碧。紫燕西飛欲寄書。白雲何處蓬萊客。

新繫青絲百尺繩。心在君家轆轤上。我心皎潔君不知。轆轤一轉一惆悵。何處春風吹曉幕。江南淥水通朱閣。美人二八顏如花。泣向春風聽春鳥。別時多。見時少。愁人一夜不得眠。瑤

井玉繩相對曉。

軒轅黃帝初得仙。鼎湖一去三千年。周流三十六洞天。洞中日月星辰聯。騎龍倒景遊八極。軒轅弓劍無人識。東海青童寄消息。

八月五日歌云。四月八日明皇出。摩耶夫人降千佛。八月五日佳氣新。昭成太后出聖人。開元九年燕公說。奉詔聽置千秋節。丹青廟裏貯姚宋。花萼樓中宴岐薛。清樂靈香幾處聞。鸞歌鳳吹動祥雲。已於武庫見靈鳥。仍向晉山逢老君。率土溥天無不樂。河清海晏窮寥廓。梨園弟子傳法曲。張果先生進仙藥。玉座淒涼遊帝京。悲翁回首望承明。雲韶九奏杳然遠。唯有五陵松柏聲。

洞庭秋日云。青草湖邊日影低。黃茅嶂裏鷓鴣啼。丈夫飄蕩今如此。一曲狂歌楚水西。

薛業

洪州客舍寄柳博士芳詩云。去年燕巢主人屋。今年花發路傍枝。年年爲客不到舍。舊國存亡那得知。胡塵一起天下亂。何處春風無別離。

晚秋贈張折衝詩云。都尉今無事。時清但閉關。夜霜戎馬瘦。秋草射鵰閑。位以穿楊得名。因折桂還。馮唐真不遇。嘆息鬢毛斑。

獨孤常州送薛處士業遊廬山序云。薛侯敦於詩。困於學。敏於行。時然後言。言而寡尤。口弗言祿。祿亦不及。識其真者。以爲永嘆。而薛侯居之澹如。君子哉。若人也。拂纓上之塵。西遊廬山。趙補闕驊。王侍御定。張評事有略。各以文爲贈。余亦持片言。用代疏麻瑤華之贈。

劉希戩

彈琴詩云。碧山本岑寂。素琴何清幽。彈爲風入松。崖谷颯以秋。庭鶴舞白雪。泉魚躍洪流。余欲娛世人。明月難暗投。感歎未終曲。淚下不可收。嗚呼鐘子期。零落歸山丘。死而有知。魂兮從我遊。

朱絳

春女怨云。獨坐紗窗刺綉遲。紫荊枝上囀黃鸝。欲知無限傷春意。併在停針不語時。

顧陶取此書爲類選。

元凜

九日對酒云。嘉辰復遇登高臺。良朋笑語傾金壘。煙攤秋色正堪翫。風惹菊香無限來。未保亂離今日後。且謀歡恰玉山頽。誰知靖節當時事。空學狂歌倒戴迴。

中秋夜不見月云。蟾輪何事色全微。賺得佳人出綉幃。四野霧凝空寂寞。九霄雲鎖絕光



禪吟詩得句翻停筆。翫處臨樽却掩扉。公子倚欄猶悵望。懶將紅燭草堂歸。

楊志堅

顏魯公爲臨川內史。邑有楊志堅者。嗜學而貧。妻厭之。一日告離。志堅以詩送之。曰。平生志業在琴詩。頭上如今有二絲。漁父尙知谿谷暗。山妻不信出身遲。荆釵任意撩新鬢。明鏡從他別畫眉。今日便同行路客。相逢卽是下山時。持詩詣州。請公牒求別醮。顏公案其妻曰。王獻之廩旣虛。豈遵黃卷。朱叟之妻必去。寧見錦衣。污辱鄉閭。敗傷風俗。若無褒貶。僥倖者多。遂箠之後。無棄其夫者。

劉方平

秋夜汎舟云。林塘夜汎舟。蟲響荻颼颼。萬影皆因月。千聲各爲秋。歲華空復晚。鄉思不堪愁。西北浮雲外。伊川何處流。

皇甫冉寄方平詩云。十年不出蹊林中。一朝結束甘從戎。嚴子持竿心寂歷。寥落荒籬遮舊宅。又曰。與君從來同語默。豈是悠悠但相識。天伴三秋空復情。袖中一字無由得。

方平春怨云。紗窗落日漸黃昏。金屋無人見淚痕。寂寞空庭春又晚。梨花滿地不開門。方平汎舟思鄉云。西北浮雲外。伊川何處流。蓋洛中人也。皇甫冉之京留別方平詩云。邇

遲越二陵。迴首但蒼茫。喬木清宿雨。故關愁夕陽。再嘗爲河南從事。自是遷左拾遺。留別於河南也。

方平與元魯山善。不仕。蓋邢襄公政會之後也。蕭穎士云。山東茂異。有河南劉方平。

### 李揆

揆與饒州刺史封漸仲容叔霽連句。揆筆力適媚。有免相踐蓬閣。臥痾淮海濱。偶逢潘川守。宛是潘陽親。又云。共仰新侯伯。同瞻舊宰臣。又云。鄉路轅思北。家林巷喜雨。（出江鄰幾雜志）

前定錄云。有巫者告揆曰。公當爲拾遺。遺以一書。緘之云。得此官卽開。後明皇召試。紫絲盛露囊賦。果得拾遺。啓緘卽此賦也。

### 戎昱

憲宗朝。北狄頻寇邊。大臣奏議。古者和親有五利。而無千金之費。帝曰。此間有士子能爲詩。而姓名稍僻是誰。宰相對以包子虛。冷朝陽。皆非也。帝遂吟曰。山上青松陌上塵。雲泥豈合得相親。世路盡嫌良馬瘦。唯君豈合臥龍貧。千金未必能移性。一諾從來許殺身。莫道書生無感激。寸心還是報恩人。侍臣對曰。此是戎昱詩也。京兆尹李巒擬以女嫁昱。令其改姓。昱固辭。

焉。帝悅曰。朕又記得詠史一篇云。漢家青史內。計拙是和親。社稷因明主。安危託婦人。豈能將玉貌。便欲靜胡塵。地下千年骨。誰爲輔佐臣。帝笑曰。魏絳之功。何其儒也。大臣遂息和戎之論矣。

塞上曲云。樓上畫角哀。卽知兵心苦。試問左右人。無言淚如雨。何意值明時。終年事鞞鼓。長安秋夕云。八月更漏長。愁人起常早。閉門寂無事。滿地生秋草。昨霄西窗夢。先入荆門道。遠客歸去來。在家貧亦好。

昱在零陵。于襄陽聞有妓善歌。取之。昱以詩遣行曰。寶鈿香娥翡翠裙。粧成掩泣欲行雲。慙慙好取襄王意。莫向陽臺夢使君。于遂遣還。昱登進士第。衛伯玉鎮荆南。辟爲從事。後爲辰虔二州刺史。

昱贈別張駙馬云。上元年中長安陌。見君朝下欲歸宅。飛龍騎馬三十疋。玉勒彫鞍照初日。數里衣香遙撲人。長衢雨歇無纖塵。從奴斜抱勅賜錦。雙雙蹙出金麒麟。女子愛塔皇后弟。獨步明時負權勢。一身扈蹕承殊澤。甲第朱門聳高戟。鳳凰樓上伴吹簫。鸚鵡杯中醉留客。秦去否來何足論。宮中晏駕人事翻。一朝負譴辭丹闕。五年待罪湘江源。冠冕淒涼幾遷改。眼看桑田變成海。華堂金屋別賜人。細眼黃頭揔何在。清宮相見寸心悲。懶欲今時問昔時。看君風

骨殊未歇。不用愁來雙淚垂。（肅宗、張皇后弟清潛，尚太甯，延和二郡公主。代宗立，廢后爲庶人。清潛皆放淚。）

寶應中過滑州洛陽。後同王季友作苦哉行詩云：妾家清河邊，七葉承貂蟬。身爲最小女，偏得渾家憐。親戚不相識，幽閨十五年。有時最遠出，祇到中門前。前年狂胡來，懼死翻生全。今秋官軍至，豈意遭戈鋌。匈奴爲先鋒，長鼻黃髮拳。彎弓獵生人，百步牛羊羶。脫身落虎口，不及歸黃泉。苦哉難重陳，暗哭蒼蒼天。

採蓮曲云：雖聽採蓮曲，詎識採蓮心。漾楫愛花遠，回船愁浪深。煙生極浦色，日落半江陰。同侶憐波靜，看粧墮玉簪。潞陽女兒花滿頭，麴麴同泛木蘭舟。秋風日暮南湖裏，爭唱菱歌不肯休。



唐詩紀事卷第二十九

常 袞 張衆甫 田 澄 柳 榭

李彥遠 薛 昇 元 載 張元宗

楊郇伯 高 拯 梁 鐸 劉長川

姚 倫 孫處立 劉 復 朱 彬

戴叔倫 于 鵠 王李文

常 袞

晚秋集賢院卽事寄徐薛二侍郎云。穆穆上清宮。沉沉中祕書。金鋪深內殿。石磴盡寒渠。花樹臺斜倚。宮煙閣半虛。縹囊鋪錦綉。翠軸卷瓊琚。墨潤冰文藟。香消蠹字魚。翻黃桐葉老。吐白桂花初。舊德雙遊處。聯芳千載餘。北朝榮庾薛。西漢盛嚴徐。侍講親華展。徵詩步綺疎。綴簾金翡翠。賜硯玉蟾蜍。移秩東南遠。離憂歲月餘。承明期重入。江海意何如。

袞京兆人。爲中書舍人。文采瞻蔚。長於應用。譽重一時。相代宗。用人非文詞者。擯不用。世謂之轡伯。

衰晚秋集賢卽事詩司空曙和云。藹藹鳳凰宮。蘭臺玉樹通。夜霜凝樹羽。曉日照和風。官亞三台貴。儒開百氏宗。司言陳禹拜。侍講發堯聰。香卷青蒲內。鈇力綠字中。綴籤從太史。鏘佩揖羣公。池接天泉碧。林文御果紅。寒龜登故葉。秋蝶戀疎叢。顏謝微文並。鍾裴直事同。離羣驚海鶴。屬思怨江楓。地遠招蘇外。山長越絕東。慚當折匠後。下曲奏難工。

獨孤及和云。漢家金馬署。帝座紫微郎。圖籍凌羣玉。歌詩冠柏梁。陰陰萬年樹。肅肅五經堂。揮翰忘朝食。研精待夕陽。晴空露盤迴。秋月鎖窗涼。遠興生班鬢。高情寄縹囊。歲蓬雙鷺驚。夙昔並翱翔。汲冢同刊謬。蓬山共補亡。羗池摧羽翮。流落限江湘。禁省一分袂。晏天三雨霜。石渠遺跡滿。水國暮雲長。早晚朝宣室。歸時道路光。

錢起和云。文星垂太虛。辭伯綜羣書。綵筆下鴛掖。襟衣來石渠。典墳探奧旨。造化觀權輿。述聖魯宣父。通經漢仲舒。窗明宜縹帶。地肅近丹除。清晝刪詩暇。高秋作賦初。露盤侵漢簪。宮柳度鶉疎。靜對連雲閣。晴聞過闕車。舊僚云出矣。晚秋復何如。海嶠瞻歸路。江城夢直廬。含毫思兩鳳。望遠寄雙魚。定笑巴歌拙。還參麗曲餘。

張衆甫

鶴詩云。馴狎經時久。樛樵短翮存。不隨淮海變。空媿稻糧恩。獨立秋天淨。單棲夕露繁。欲

飛還斂翼。誰敢望乘軒。

戴叔倫酬衆甫詩云。野人無本意。散木任天材。分向空山老。何言上苑來。迢遙千里道。依倚九層臺。出處寧知命。輪轅豈自媒。更慚張處士。相與別蒿萊。

衆甫送李觀之宣州謁袁中丞詩云。古渡大江濱。西南拒要津。自當舟楫路。應濟往來人。翻浪驚飛鳥。迴風起綠蘋。君看波上客。晚歲獨垂綸。

高仲武云。衆甫婉媚綺錯。巧用文字。工於興喻。只如不隨淮海變。空媿稻梁恩。盡陳謝之源。又自當舟楫路。應濟往來人。得諷興之要。形容體裁。率皆如此。文流之佳士也。

衆甫字子初。清河人。年過耳順。方脫章甫冠。惠文爲太常寺太祝。尉河南壽安縣。罷秩僑居雲陽。時以緣情比興。疏導心術。志之所之。輒詣絕境。待拜監察御史。爲淮寧軍從事。建中三年卒。〔權載之誌其墓。〕

### 田澄

成都爲客作云。蜀郡將知遠。城南萬里橋。衣緣鄉淚溼。貌以客愁銷。地富魚爲米。山芳桂是樵。旅遊唯得酒。今日過明朝。

澄。大曆天寶間人。杜子美贈獻納使起居田舍人詩。卽澄也。末句云。楊雄更有河東賦。惟



待吹噓送上天。蓋澄以舍人奉使入蜀。肅宗時人也。

柳郴

郴與李端盧綸友善。有賊平後送客還鄉詩云。他鄉生白髮。舊國有青山。最有思致。尤長於短句。如贈別云。江浦程千里。離樽淚數行。無論吳與楚。俱是客他鄉。又云。何處最悲辛。長亭臨古津。往來舟楫路。前後別離人。

李彥遠

探桑云。探桑畏日高。不待春眠足。攀條有餘愁。那矜貌如玉。千金豈不贈。五馬空踟躕。何以變貞性。幽篁雪中綠。

彥遠。大曆正元間詩人。

薛昇

勅贈康尚書美人云。天門喜氣曉氛氳。聖主臨軒召冠軍。欲令從此行霖雨。先賜巫山一片雲。康尚書日知也。德宗時。斬李惟岳。以功擢爲深趙節度。遷奉誠軍。陟晉絳昇。德宗時河東詩人也。

元載

王忠嗣鎮北京。以女韞秀歸元載。歲久而見輕。韞秀勸之遊學。元乃遊秦。爲詩別韞秀曰。年來誰不厭龍鍾。雖在侯門似不容。看取海山寒翠樹。苦遭霜霰到秦封。妻請潛行曰。路掃飢寒跡。天哀志氣人。休零別離淚。携手入西秦。

元到京。屢陳時務。深符上旨。肅宗擢拜中書。王寄諸姨妹詩曰。相國已隨麟閣貴。家風第一右丞詩。笄年解笑鳴機婦。恥見蘇秦富貴時。元肅代兩朝宰相。貴盛無比。復爲一篇以喻之。曰。楚竹燕歌動畫梁。春蘭重換舞衣裳。公孫開館招嘉客。知道浮雲不久長。

元貪恠被誅。上令王氏入宮。歎曰。二十年太原節度使女。十六年宰相妻。誰能爲長信昭陽之事。死亦幸矣。京兆答斃。

大曆五年春。載早朝。有獻文章者。公令左右收之。其人苦欲公讀。公云。候入中書。當爲看。其人言若不能讀。自誦畢。因亦不見。詩曰。城東城西舊行處。城裏花飛亂如絮。海燕銜泥欲下來。屋裏無人却飛去。載後破家。妻子被殺。其一云。城南路長無宿處。荻花紛紛如柳絮。海燕銜泥欲作巢。空室無人却飛去。

張元宗

登景雲寺閣云。胡馬飲河洛。我家從此遷。今來獨垂淚。三十六峯前。

望終南山云。紅塵白日長安路。馬足車輪不暫閑。唯有茂陵多病客。每來高處望南川。

楊郾伯

妓人出家云。盡出花鈿與四鄰。雲鬢剪落厭殘春。暫驚風燭難留世。便是蓮花不染身。貝葉欲翻迷錦字。梵聲初學悞梁塵。從今艷色歸空後。湘浦應無解佩人。竇常逢中立春寄懷郾伯云。浪跡終年客。驚心此地春。風前獨去馬。澤畔耦耕人。老大交情重。悲哀物外親。子雲今在宅。應見柳條新。

高拯

拯及第後贈試官云。公子求賢未識真。欲將毛遂比常倫。當時不及三千客。今日何如十九人。

拯大曆十三年進士。試官。薛邕也。

梁鐙

七夕泛舟云。雲端有靈匹。掩映拂粧臺。夜久應搖珮。天高響不來。片歡秋始展。殘夢曉翻催。却怨填河鵲。留橋又不迴。

詠木老人云。刻木牽絲作老翁。鷄皮鶴髮與真同。須臾弄罷寂無事。還似人生一夢中。

（明皇遷西內曾詠此詩）

古意云。妾家巫峽陽。羅幌寢銀床。曉日臨窗久。春風引夢長。落釵乃在鬢。微汗欲消香。縱使蒙籠覺。魂遊逐楚王。

錢起秋夜與鎰文宴云。車到閑林下。杯香蕙草時。好風能自至。明月不須期。秋水翻河影。晴霜脆柳絲。微官是底物。許日廢言詩。

明皇雜錄云。李輔國矯制。遷明皇西宮。力士竄嶺表。帝戚戚不樂。日一蔬食。吟詩云。刻木牽絲作老翁。至一夢中。不知明皇作。或詠鎰詩也。

劉長川

寶劍篇云。寶劍不可得。相逢幾許難。今朝一度見。亦色照人寒。匣裏星文動。環邊月影殘。自然神鬼伏。無事莫空彈。

將赴東都上李相公云。四海兵初偃。平津閣正開。誰知火爐下。還有不燃灰。

長川。肅代時詩人也。

姚倫

感秋云。試向疎林望。方知節候殊。亂聲千葉下。寒影一巢孤。不蔽秋天雁。驚飛夜月烏。霜

風與春日幾度遣榮枯。

倫過章秀才洛陽客舍云。達人心自適。旅舍當閑居。不出來時徑。重看讀了書。晚山嵐色近。斜日樹陰疎。盡是忘言客。聽君誦子虛。

高仲武云。姚子詩。雖未洪深。去凡已遠。屬興比事。不失文流。如亂聲千葉下。寒影一巢孤。亦篇之秀也。

倫終楊州大都府曹參軍。

孫處立

詠黃鸞云。欲轉聲猶澁。輕飛羽未調。高風不借便。何處得遷喬。

處立江甯人。長安中。爲左拾遺。善屬文。嘗恨天下無書。以廣新聞。神龍初。桓彥範等用事。處立遺書論時事得失。不得用。乃去官還鄉。以病卒。

劉復

寺居清晨云。高枕對曉月。衣中清且涼。露華朝未晞。滴瀝含虛光。隔竹聞汲井。開扉見焚香。幽心感衰病。結念依法王。青冥早雲飛。杳眇空鳥翔。此情皆有釋。悠然知所忘。

經禁城云。日沒路且長。遊子欲涕零。荒城無人路。秋草飛寒螢。東南古丘墟。莽蒼馳郊壩。

黃雲晦斷岸。枯井臨崩亭。昔人竟何之。窮泉獨冥冥。蒼苔沒碑版。朽骨無精靈。俛仰寄世間。忽如流波萍。金石非汝壽。浮生等臊腥。不如學神仙。服石求丹經。

遊仙云。稅駕倚扶桑。逍遙望九州。二老佐軒轅。移戈戮蚩尤。功成棄之去。乘龍上天遊。天上見玉皇。壽與天地休。俯視崑崙宮。五城十二樓。王母何窈渺。玉質清且柔。揚袂折瓊芳。寄我天東頭。相思千萬歲。大運浩悠悠。安用知吾道。日月不能周。寄音青鳥翼。謝爾碧海流。

送王倫詩云。春天日未曛。楚客酣送君。翩翩孤黃鶴。萬里滄洲雲。四方各有心。豈得常顧羣。山連巴湘遠。水與荆吳分。清光日阻脩。尺素安可論。相思寄夢寐。瑤草空氣氤。

出三城別幕中三判官詩云。翔禽託高柯。倦客念主人。恩義有所知。四海同一身。况皆曠大姿。翰音見良辰。陳規佐武略。高統據要津。常願投素誠。今果得所申。金壘列四座。廣廈無氛塵。留連徂暑中。觀望歷數旬。河山險以固。士卒勇且仁。飾裝去未歸。相追越城闌。貴無青玉案。緘佩永不泯。

復登大曆進士第。嘗爲水部外郎。爲石洪父平墓銘。

朱彬

丹陽作云。暫入新豐市。猶聞舊酒香。抱琴沾一醉。盡日臥垂陽。

彬大曆正元間詩人。

戴叔倫

字幼公潤州人師事蕭穎士爲門人冠劉晏管鹽鐵表主管湖南至雲安楊惠琳反馳客劫之曰歸我金幣可緩死叔倫曰身可殺財不可得乃捨之累遷至容管經略德宗嘗賦中和節詩遣使者寵賜代還卒。

早行寄朱山人放云山曉旅人去天高秋風悲明河川上沒芳草露中衰此別又萬里少年能幾時心知剡溪路聊且寄前期。

和汴州李相公勉人日喜春云年來日日春光好今日風光好更新獨獻葵羹憐應節遍傳金勝喜逢人煙添柳色看猶淺鳥踏梅花落已頻東閣此時聞一曲翻令和者不勝春。

高仲武云叔倫爲人溫雅善舉止無賢不肖見皆盡心在租庸幕數年夕惕靡怠吏部尙書劉公與詞部員外張繼書云博訪選材揖對賓客如戴叔倫其見推稱如此詩體雖不中越格然解字經山火公田沒海潮亦指事造形之工者其骨氣稍輕故詩亦少。

吳明府自遠來留宿云出門逢故友衣服滿塵埃歲月不可問山川何處來倚城容弊宅散職寄靈臺自此留君醉相懽得幾迴。

除夜宿石頭驛云。旅館誰相問。寒燈獨可親。一年將盡夜。萬里未歸人。寥落悲前事。支離笑此身。愁顏與衰鬢。明日去逢春。

客舍與故人偶集云。天秋月又滿。城闕夜千里。還作江南會。翻疑夢裏逢。風枝驚暗鵲。露草覆寒蛩。羈旅長堪醉。相留畏曉鐘。

送友人東歸云。萬里楊柳色。出關逢故人。輕煙拂流水。落日照行塵。積夢江湖闊。憶家兄弟貧。徘徊瀟水上。不語自傷春。（姚合取爲拯元集）

送謝夷甫宰鄆縣云。君去方爲縣。干戈尙未銷。邑中殘老小。亂後少官僚。廨宇經山火。公田沒海潮。致時應變俗。新政滿餘姚。

干鶴

鶴野田行云。日沒出古城。野田何茫茫。寒狐上孤塚。獵火燒白楊。昔人未爲泉下客。若到此中還斷腸。

題鄰居云。僻巷鄰家少。茅簷喜並居。蒸梨常共竈。澆蕪亦同渠。傳屐朝尋藥。分燈夜讀書。雖然在城市。還得似樵漁。

寄盧僦員外秋衣詞云。寄遠空以心。心誠亦難知。篋中有秋帛。裁作遠客衣。縫製雖女工。



尺度手自特。容貌當日中。長短不復疑。針線密且堅。遊客作麈尾。意欲都無言。澣濯耐歲時。殷勤託行人。傳語慎勿遺。別來年已老。亦聞鬢成絲。縱然更相逢。握手唯是悲。所寄莫復棄。願見長相思。

買山吟云。買得幽山入漢陽。檜籬疎處種枕榔。唯有獼猴來往熟。弄人拋果滿書堂。

山中寄樊尚書云。却憶東溪日。同袍事魯儒。僧房閑共宿。酒肆醉相扶。江上雙旌貴。山中病客孤。無媒還有計。春谷種桑榆。

鵠大曆正元間詩人也。爲諸府從事。居江湖間。有卜居漢陽及荆南陪樊尚書賞花詩。其自述曰。三十無名客。空山獨臥秋。豈以詩窮者耶。老大看花猶未足。松江正遇一枝紅。日斜人散東風急。吹向誰家明月中。（襄陽席上作）送死多於生。幾人得終老。（句）右張爲取主客圖。

張籍傷鵠詩云。野性疏時俗。再命乃從軍。氣高終不合。去如鏡上塵。

鵠送客遊邊云。若到并州北。誰人不憶家。寒深無去伴。路盡有平沙。磧冷唯逢鴈。天春不見花。莫隨邊將意。垂老事輕卑。

江南曲云。偶向江邊採白蘋。還隨女伴賽江神。衆中不敢分明語。暗擲金錢卜遠人。（韋

莊取爲又玄集）

張籍贈王建云。于君去後交遊少。東野無來篋笥貧。賴有白頭王建在。眼前猶是詠詩人。

王季文

季文。字宗素。池陽人。少厭名利。居九華。遇異人。授九仙飛化之術。曰。子當先決科於詞籍。後策名於真列。冥注使然。不可移也。登咸通中進士第。授祕書郎。尋謝病歸九華。日一浴於山之龍潭。寒暑不渝。季文九華山謠云。九華崢嶸占南陸。蓮花擢本山半腹。翠屏橫截萬里天。瀑水落深千丈玉。雲梯石磴入杳冥。俯看四極如中庭。丹崖壓下廬霍勢。白日隱出牛斗星。杉松一歲抽數尺。瓊草寅緣秀層壁。南風拂曉煙霧開。滿山葱蒨鋪鮮碧。雷霆往往從地發。龍臥豹藏安可別。峻極遙看夏吳蒼。挺生豈得無才傑。神仙憚險莫敢登。馭風駕鶴循丘陵。陽鳥不見峯頂樹。大火尙結晶中冰。靈光爽氣曠復旭。晴天倒影西江淥。具區彭蠡夾兩傍。正可別作一嶽當少陽。



唐詩紀事卷第三十

李益

杜羔

諸葛覺

韋執中

耿偉

盧綸

韓翃

錢起

司空曙

苗發

崔峒

李端

冷朝陽

李益

益，姑臧人，字君虞。大曆四年登第。其受降城聞笛詩，教坊樂人取爲聲樂度曲。又有寫征人歌，早行詩，爲圖畫者。迴樂峯前沙似雪之詩是也。益有心疾，不見用。及爲幽州劉濟營田副使，獻詩有感恩知有地，不上望京樓之句。左遷右庶子。年且老，門人趙宗儒自宰相罷免，年七十餘。益曰：此吾爲東府所送進士也。聞者憐益之困，後遷禮部尙書，致仕卒。

益錄其從軍詩贈左補闕盧景亮自序云：吾自兵間故，爲文多軍旅之思。或軍中酒酣，塞上兵寢，投劍秉筆，散懷於斯。文率皆出乎慷慨意氣，武毅果厲。本其涼國，則世將之後，乃西州之遺民歟。亦其坎軻當世發憤之所致也。（其詩皆建中、正元間作。）

夜上受降城聞笛詩云。迴樂峯前沙似雪。受降城下月如霜。不知何處吹蘆管。一夜征人盡望鄉。（烽。烽火臺也。）

征人歌云。胡風凍合鸛鶻泉。牧馬千羣逐暖川。塞外征行無盡日。年年移帳雪中天。

曉角詩云。邊霜一夜落平蕪。吹角當城片月孤。無數塞鴻飛不度。秋風卷入小單于。

從軍北征云。天山雪後海風寒。橫笛偏吹行路難。磧裏征人三十萬。一時迴向月明看。

獻劉濟云。草綠古燕州。鶯聲引獨遊。鴈歸天北畔。春盡海西頭。向日花偏落。馳年水自流。感恩知有地。不上望京樓。

從軍有苦樂行。（時從司空異公北征作云。）勞者且莫歌。我欲歌送觴。行軍有苦樂。此曲樂未央。僕居在隴上。隴水斷人腸。東過秦官路。宮樹入咸陽。時逢漢帝出。諫獵至長楊。詎馳遊俠窟。非結少年場。一旦承嘉惠。輕身重恩光。秉筆參帷帟。從軍至朔方。邊馬多陰風。草木自淒涼。斷絕西海去。出沒胡沙長。參差引鴈翼。隱隱騰軍裝。劍文夜如水。馬汗凍成霜。使氣五都少。矜功六郡良。山河起目前。睚眦死路傍。北逐馳種虜。西臨復舊疆。昔還賦餘資。今出乃贏糧。一矢致夏服。我弓不再張。寄言丈夫雄。苦樂身自當。（馳一作馳。）

來從寶車騎云。（自朔方行作）束髮逢世屯。懷恩抱明義。讀書良不武。學劍慙非智。遂

別魯諸生。求從寶車騎。追兵起邊急。絡馬黃金轡。出入燕南陲。由來重意氣。自經臯蘭戰。入破樓煩地。西北護三邊。東南留一尉。時過如雲雨。參差不自意。將軍失恩澤。萬事從比異。置酒高臺上。簿暮秋風至。長戟與我歸。歸來同棄置。自酌還自飲。非名又非利。歌出易水寒。琴下雍門淚。出逢平樂舊。言在天階侍。問我從軍苦。自陳少年貴。丈夫交四海。徒論身自致。漢將不封侯。蘇卿還遠使。令我終此曲。此曲誠不易。貴人難識心。何由知忌諱。

夜發中軍云。邊馬櫪上驚。雄劍匣中鳴。半夜軍書至。匈奴寇六城。中堅分暗陣。太一起神兵。出沒風雲合。蒼皇豺虎爭。今日邊庭戰。緣賞不緣名。

五城道中云。金鐃隨玉節。落日河邊路。沙鳴後騎來。鴈起前軍度。五城鳴斥堠。三秦新召募。天寒自登道。寒濁陰山霧。仍聞舊兵老。尙在烏蘭戍。笳簫漢思繁。旌旗邊色故。寢興倦弓甲。勸役傷風露。來遠賞不行。鋒交勳乃茂。未知朔方道。何年罷兵賦。

塞下曲云。蕃門部落能結束。朝朝馳獵河南曲。一作朝馳暮獵異河曲。燕歌未斷塞鴻飛。牧馬羣嘶邊草綠。秦築長城城已摧。漢武北上單于臺。古來征戰虜不盡。至今還復天兵來。黃河東流流九折。沙場埋恨何時絕。蔡琰沒去造胡笳。蘇武歸來持漢節。爲報如今都護雄。匈奴且莫下雲中。請書塞北陰山石。願比燕然車騎功。

大曆十才子。唐書不見人數。盧綸。錢起。郎士元。司空曉。李端。李益。苗發。皇甫曾。耿偉。李嘉祐。又云。吉頊。夏侯審亦是。或云。錢起。盧綸。司空曉。皇甫曾。李嘉祐。吉中孚。苗發。郎士元。李益。耿偉。李端。二李皆出於姑臧。庶子爲文章。李益尙書爲門戶。李益一日赴嘉會。尙書曰。今日兩箇坐頭。皆是李益。

紅樓下聯句云。佛刹接重城。紅樓切太清。紫雲連照耀。丹檻望崢嶸。(廣宣) 檳棟烟虹入。軒窗日月平。參差五陵晚。分背入川明。(李益) 絃韻風初過。蓮枝浪欲傾。敬瞻疑涌見。圍繞學無生。(杜羔)

蘭陵僻居聯句云。潘岳閑居賦。陶潛獨酌謠。二賢成往事。三徑是今朝。(廣宣) 生幸逢唐運。昌時奉帝堯。進思諧啓沃。退混卽漁樵。(李益) 蠶簡封延閣。彫欄闕上霄。相從清曠地。秋露挹蘭苕。(杜羔)

天津橋南山中各題一句云。野坐分苔石。(益) 山行遶菊叢。(韋執中) 雲衣惹不破。(諸葛覺) 秋色望來空。

閑庭草色能留馬。當路楊花不避人。(句) 笳簫漢恩繁。旌旗邊色故。(句) 馬汗凍成霜。(向) 右張爲取爲主客圖。以益爲清奇雅正主。

耿偉

元日早朝云。九陌朝臣滿。三朝候鼓賒。遠珂時接韻。攢炬偶成花。紫貝爲高闕。黃龍建大牙。參差萬戟合。左右八貂斜。羽扇紛朱檻。金爐隔翠華。微風傳曙漏。曉日上春霞。環珮聲重疊。蠻夷服等差。樂和天易感。山固壽無涯。渥澤千年聖。車書四海家。盛明多在位。誰得守蓬麻。

贈苗員外云。爲郎日賦詩。小謝少年時。業懣儒門後。心多道者期。曉迴長樂殿。新出永明祠。行樂西園暮。春風動柳絲。

許州書情寄韓張二舍人云。謫宦軍城老更悲。近來頻夢到丹墀。乍燃乍滅心中火。唯鑷唯多鬢上絲。繞院綠苔聞鴈處。滿庭黃葉閉門時。故人高步雲衢上。肯念前程杏未期。

贈嚴維云。許詢清論重。寂寞住山陰。野客棲寒寺。閑門當古林。海田秋熟早。湖水夜漁深。世上窮通理。誰能奈此心。

贈郎公云。來自西天竺。持經奉紫微。年深梵語變。行苦俗人歸。月上安禪久。苔生出院稀。梁間有馴鴿。不去爲無機。

早朝云。鍾鼓餘聲裏。千官向紫微。冒寒人語少。乘月燭來稀。清漏聞馳道。紅霞映鑿闈。猶看嘶馬處。未啓掖垣扉。



秋日云。迢迢照入閭巷。憂來與誰語。古道無人行。秋風動禾黍。

書情逢故人云。因君知此事。流恨已忘機。客久多人識。年高衆病歸。連雲潮色遠。度雪鴈聲稀。又說家林盡。悽傷淚滿衣。

沙上鴈云。衡陽多道里。弱羽復哀音。還塞知何日。驚弦亂此心。夜陰前侶遠。秋冷後湖深。獨立沙汀意。寧知霜霰侵。

贈張將軍云。寥落邊城暮。重門返照間。鼓鼙驚雨暗。士馬過秋閑。慣守臨邊郡。曾營近海山。關西舊業在。夜夜夢中還。

醞暢當云。同遊漆沮後。已是十年餘。幾度曾相夢。何時定得書。月高城影盡。霜重柳條疎。且對樽中酒。千般想未如。(書情逢故人以下四篇。姚合取爲極元集。)

偉寶應元年進士。爲左拾遺。詩有家貧僮僕慢。官罷友朋疎。世多傳之。

盧綸

綸字允言。河中人。大曆進士。與吉中孚。韓翃。錢起。司空曙。苗發。崔峒。夏侯審。李端。皆能詩。號大曆十才子。

春日登樓云。花正濃時人正愁。逢花却欲替花羞。年來笑伴皆歸去。今日晴明獨上樓。

長安春望云。東風吹雨過青山。却望千門草色閑。家在夢中何日到。春歸江上幾人還。川原繚繚浮雲外。宮闕參差落照間。誰念爲儒多失意。獨將衰鬢客秦關。

正元中。吉中孚爲翰林學士。薦綸于朝。會丁家艱。而中孚卒。大曆中。李端。錢起。韓翃。能爲五言詩詞。情健麗。綸作尤工。至正元末。錢李諸公周落。綸爲懷舊詩五十韻。敘其事曰。吾與吉侍郎中孚。司空郎中曙。苗員外發。崔補闕峒。耿拾遺偉。李校書端。風塵追遊。向三十載。數公皆負當時盛稱。榮耀未幾。俱沉泉下。傷悼之際。常暢博士。追感前事。賦詩五十韻。見寄。輒有所酬。以申悲舊。兼寄夏侯審侍郎。其歷言諸子云。侍郎文章宗。傑出淮楚靈。掌賦若吹籟。司言如建瓴。郎中善餘慶。雅韻與琴清。鬱鬱松帶雪。蕭蕭鴻入冥。員外真貴儒。弱冠被華纓。月香飄桂實。乳溜瀝瓊英。補闕思冲融。巾拂藝亦精。彩蝶戲芳圃。瑞雲滋翠屏。拾遺興難侔。逸調曠無程。九醞貯瀾潔。三花寒轉聲。校書才智雄。舉世一娉婷。嗜野鬼神變。屬辭鸞鳳驚。羞眉曳長裾。總轡奉和鈴。共賦瑤臺雪。同觀金谷筍。倚天方比劍。沉水忽如瓶。君持玉盤珠。寫我懷袖盈。讀罷涕交頤。願言躋百齡。綸之才思。皆此類也。

綸。德宗時。爲戶部郎中。舅韋渠牟。表其才。召見禁中。帝有所作。輒庶和。異日問渠牟。盧綸李益何在。答曰。綸從渾瑊在河中驛。召之。會卒。文宗尤愛其詩。問宰相。綸文章幾何。亦有子否。

李德裕對綸四子皆擢進士第。在臺閣。帝遣中人悉索家箴。得詩五百篇。以聞。

綸春詞云。北苑羅裙帶。塵衢錦綉鞋。醉眠芳樹下。半被落花埋。

得嶺南故人書云。瘴海寄雙魚。中霄達我居。兩行燈下淚。一紙嶺南書。地說炎蒸極。人稱老病餘。慇懃祝賈誼。莫共酒盃疎。

題興善寺後池云。隔牕棲白鶴。似與鏡湖鄰。日照何年樹。花逢幾番人。岸沙青有路。苔逕綠無塵。願得容依止。僧中老此身。

山下古木云。高林已蕭索。夜雨復秋風。墜葉鳴荒竹。斜根擁斷蓬。半侵山影裏。長在水聲中。此地何人到。雲門去亦通。

送李端云。故關衰草遍。離別自堪悲。路出寒雲外。人歸暮雪時。少孤爲客慣。多難識君遲。掩淚空相向。風塵何所期。（寄嶺南故人以下四篇。姚合取爲極元集。）

臘月觀咸甯王部曲娑勒擒豹歌云。山頭曠曠日將出。山下獵圍照初日。前林有獸未識名。將軍促騎無人聲。潛形踈伏草不動。雙鵬旋轉羣鷄鳴。陰方質子纔三十。譯語受詞蕃語揖。捨鞍解甲疾如風。人忽虎蹲獸人立。歛然扼頰批其頤。爪牙委地涎淋漓。旣蘇復吼拗（於教切）仍怒。果叶英謀生致之。拖自深叢目如電。萬夫失容千馬戰。傳呼拜賀聲相連。殺氣騰陵

陰滿川。始知縛虎如縛鼠。敗虜降羌在眼前。祝爾嘉詞身無苦。獻看將隨犀象舞。苑中流水禁  
中山。期爾攬搏開天顏。非熊之兆慶無極。願紀雄名傳百蠻。

送張侍郎還蜀歌云。秦家御史漢家郎。親傳兩印征殊方。功成走馬朝天子。伏檻談邊若  
流水。曉離仙署趨紫微。夜接高儒讀青史。瀘南五將望君還。願以天書示百蠻。曲棧重江初過  
雨。前旌後騎不同山。迎車拜舞多耆老。舊卒新營遍青草。塞口雲生火煥遲。烟中鶴唳軍行早。  
黃花川下水交橫。遠應孤霞蜀國晴。筇竹筍長椒瘴起。荔支花發杜鵑紅。回首岷峨半夜黑。傳  
觴接膝何由得。空令豪士仰威名。無復貧交恃顏色。垂楊不動雨紛紛。錦帳胡瓶爭送君。須臾  
醉起簫笳發。空見紅旌入白雲。

韓翃

字君平。南陽人。命以駕部外郎。知制誥。時有兩韓翃。德宗曰。與詩人韓翃。終中書舍人。  
翃別韋丘曹歸池州云。南陵八月天。暮色遠峯前。楚竹青陽路。吳江赤馬船。贏金上客貴。  
佩玉主人賢。終日應相逐。西歸定幾年。

侯希逸鎮青溜。翃爲從事。罷府閑居。十年。李勉鎮夷門。辟爲幕屬。時已遲暮。不得意。多家  
居。一日。夜將半。客叩門急。賀曰。員外除駕部侍郎知制誥。翃愕然曰。誤矣。客曰。邸報。制誥闕人

中書兩進名不從。又請之曰：與韓翃時有同姓名者，爲江淮刺史。又具二人同進，御批曰：春城無處不開花，寒食東風御柳斜。日暮漢官傳蠟燭，青煙散入五侯家。又批曰：與此韓翃。客曰：此員外詩耶？翃曰：是也，是不誤矣。時建中初也。

奉送王相公綰赴幽州巡邊云：黃閣開帷幄，丹墀侍冕旒。位高湯左相，權擢漢諸侯。不改周南化，仍分趙北憂。雙旌過易水，千騎入幽州。塞草連天暮，邊風動地秋。無因隨遠道，結束佩吳鉤。

南部新書云：昇平公主宅卽席，李端擅場。送王相之幽鎮，翃擅場。送劉相巡江淮，錢起擅場。

德宗西幸，有神智驄如意驄二馬，謂之功臣。一日有進瑞鞭者，上曰：朕有二駿，今得此，可爲三絕。因吟翃觀調馬詩云：鴛鴦赭目齒新齊，晚日花開放碧蹄。玉勒乍迴初噴沫，金鞭欲下不成嘶。高仲武云：韓員外意放經史，興致繁富，一篇一詠，朝野珍之。多士之選也。至如星河秋一鴈，砧杵夜千家。又容衣筒布細，山舍荔支繁。又疏簾看雪卷，深戶映花關。方之前載，則芙蓉出水，未足多也。其比興深於劉員外，筓節減於皇甫冉也。

少年行云：千點爛熳噴玉蕊，青絲結尾繡纏踪。鳴鞭曉出銅臺路，葉葉春衣楊柳風。

羽林云。駿馬牽來御柳中。鳴鞭欲向渭橋東。紅蹄亂踏青城雪。花領驕嘶上苑風。

題薦福衡岳禪師房云。春城乞食還。高論此中閑。僧臘塔前樹。禪心江上山。疏簾看雪捲。深戶映花關。晚送門人去。鍾聲杳藹間。

送孫革及第東歸云。過淮芳草歇。千里又東歸。野水吳山出。家林越鳥飛。荷香隨去棹。梅雨點行衣。無數滄洲客。如君達者稀。少年行以下四章。姚合取爲極元集。

送故人歸魯云。魯客多歸興。居人愴別情。雨餘衫袖冷。風急馬蹄輕。秋草靈光殿。寒雲曲阜城。知君拜親後。少婦下機迎。韋莊又元集。

世傳翊有寵姬柳氏。翊成名。從辟淄青。置之都下。數歲。寄詩曰。章臺柳。顏色青青今在否。縱使長條似舊垂。也應攀折他人手。柳答曰。楊柳枝。芳菲節。可恨年年贈離別。一葉隨風息。報秋。縱使君來豈堪折。後果爲蕃將沙吒利所劫。翊會入中書。道逢之。謂永訣矣。是日臨淄大校。置酒。疑翊不樂。具告之。有虞候將許俊。以義烈自許。卽詐取得之。以授韓希逸。聞之曰。似我往日所爲也。俊復能之。翊後爲夷門幕府。後生共目爲惡詩。輕之。

李義山有韓翊舍人卽事云。萱草含丹粉。荷花抱綠房。鳥應悲蜀帝。蟬是怨齊王。通內藏珠府。應官解玉坊。橋南荀令過。十里送花香。

錢起

起具興人。天寶進士。與郎士元齊名。時語曰。前有沈宋。後有錢郎。終考功郎中。

天寶十年。試湘靈鼓瑟詩云。善鼓雲和瑟。常聞帝子靈。馮夷徒自舞。楚客不堪聽。苦調凌金石。清音入杳冥。蒼梧來怨慕。白芷動芳馨。流水傳湘浦。悲風過洞庭。曲終人不見。江上數峯青。起從鄉薦居江湖客舍。聞吟於庭中曰。曲終人不見。江上數峯青。視之無所見矣。明年崔曄試湘靈鼓瑟詩。起卽用爲末句。人以爲鬼謠。

奉送劉相公催運云。國用資戎事。臣勞爲主憂。將徵任士貢。更發濟川舟。擁傳星還去。過池鳳不留。唯高飲水節。稍餞別家愁。落葉淮邊雨。孤山海上秋。遙知謝公興。微月上江樓。時以此詩爲擅場。

高仲武云。詩格清奇。理致清澹。粵從登第。挺冠詞林。文宗右丞。許以高格。右丞沒後。員外爲雄。投齊宋之浮游。削梁陳之靡曼。迴然獨立。莫之與京。且如烏道掛疏雨。人家殘夕陽。又牛羊山上少。煙火隔林深。又長樂鍾聲花外盡。龍池柳色雨中深。皆特出意表。標準古今。又窮達戀明主。耕桑亦近郊。則禮義克全。忠孝兼著。足可以引長名流。爲後措式。

送僧歸日東云。上國緣隨去。東途若夢行。浮雲滄海遠。去世法舟輕。水月通禪觀。魚龍聽

梵聲唯憐惠燈影。萬里眼中明。

送僧自吳遊蜀云。隨緣忽西去。何日返東林。世路無期別。空明不住心。人煙一鉢少。山雪獨行深。天外猿聲夜。誰聞清梵音。

送張管書記云。邊事多勞役。儒衣逐鼓鼙。日寒關樹外。峯盡塞雲西。河廣蓬難度。天遙雁漸低。班超封定遠。之子去思齊。

送征雁云。秋空萬里靜。嘹唳獨南征。風急翻霜冷。雪開見月驚。塞長憐去翼。影滅有餘聲。悵望遙天外。鄉愁滿目生。

寄郎士元云。龍節知無事。江城不掩扉。詩傳過客遠。書別故人稀。坐嘯看潮遠。行春送雁歸。望舒三五夜。思盡謝玄暉。

宿洞口館云。野竹通溪冷。秋蟬入戶鳴。亂來人不到。寒草上塔生。

裴迪書齋望月云。夜來詩酒意。月上謝公樓。影閉重關靜。寒生獨樹秋。鵲驚隨葉散。螢遠入煙流。今夕遙天末。清暉幾處愁。

送彈琴李長史赴洪州云。抱琴爲傲吏。孤棹復南行。幾度秋江水。皆添白雪聲。佳期來客夢。幽興緩王程。佐牧無勞問。心平政自平。（寄郎士元以四章。姚合取爲極元集。）



起還藍田王維贈別云。草色日向好。桃源人去稀。手持平子賦。目送老萊衣。每候山櫻發。時同海燕歸。今年寒食酒。應得返柴扉。起答詩云。卑栖却得性。每與白雲歸。徇祿仍懷橘。看山免採薇。一作別山昨日春露已濡衣。採蕨頻盈夢。看花空厭歸。暮禽先去馬。新月待開扉。霄漢時迴首。知音青瑣闈。

王維春夜竹亭贈起歸藍田詩云。夜靜羣動息。時聞隔林犬。却憶山中時。人家澗西遠。羨君明發去。采蕨輕軒冕。

起答云。山月隨客來。主人興不淺。今宵竹林下。誰覺花源遠。惆悵鷓鴣啼。孤雲還絕巘。

贈闕下裴舍人云。二月黃鸝飛上林。春城紫禁曉陰陰。長樂鍾聲花外盡。龍池柳色雨中深。陽和不散窮途恨。霄漢長懷捧日心。獻賦十年猶未遇。羞將白髮對華簪。

東臯早春寄郎校書云。祿微賴學稼。歲起歸衡茅。窮達戀明主。耕桑亦近郊。夜來靈山雪。陽氣動林梢。萌薰暖初吐。春鳩鳴欲巢。蓬萊時入夢。知子憶平交。

題玉山村叟壁云。谷口好泉石。居人能陸況。牛羊上山小。煙火隔雲深。一徑入溪色。數家連竹陰。藏虹辭晚雨。驚雉落殘禽。涉趣皆流日。將歸必在林。却思黃綬事。辜負紫芝心。

逃暑太子李舍人別業云。下馬失炎暑。重門深綠簾。宮臣禮嘉客。林表開蘭室。茲夕興難

盡澄曠照墨場。東陵晚來好。目極趣何長。鳥路掛疏雨。人家殘夕陽。城隅擁歸騎。留醉戀羣芳。  
和張僕射塞下曲云。月黑鴈飛高。單于夜遁逃。欲將輕騎逐。大雪滿弓刀。

司空曙

和耿拾遺元日早朝云。元朔爭朝闕。奔流若會溟。路塵和簿霧。騎火接低星。漏促雙魚鑰。  
車喧百子鈴。冕旒當翠殿。幢戟滿彤庭。表歲方編瑞。乘春卽宥刑。諸侯陳禹玉。司曆獻堯蓂。壽  
酒三觴退。簫韶九奏停。太陽開物象。沛澤及生靈。南陌祥光紫。東方晚氣青。自憐楊子賤。歸草  
太元經。

立秋日云。律變新秋至。簫條自此初。花酣蓮報謝。葉在柳呈疏。淡月多雲映。清風似雨餘。  
捲簾涼暗度。却扇暑先除。草靜多飜燕。波澄乍露魚。今朝散騎省。作賦興何如。

酬張芬有赦後見贈云。紫鳳朝啣五色書。陽春忽報網羅除。已將心變寒灰後。豈料光生  
腐草餘。建水風煙收客淚。杜陵花竹夢郊居。勞君故有詩人贈。欲報瓊瑤恨不如。

晦日益州北池陪宴云。臨泛從公日。仙舟翠幕張。七橋通碧澗。雙樹接花塘。玉燭收寒氣。  
金波隱夕光。野聞歌管思。水靜綺羅香。遊騎縈林遠。飛撓截岸長。郊原懷瀟產。波濤寫江黃。常  
侍傳花詔。偏裨同羽觴。豈令南峴首。千載播餘芳。

曙字文初。廣平人。登進士第。從韋臯於劍南。正元中。爲水部郎中。終虞部。

耿偉就宿。因傷故人云。舊時聞笛淚。此夜重霑衣。方恨同懷少。那堪相見稀。竹煙疑澗壑。林雪似芳菲。多謝勞車馬。應憐獨掩扉。

經廢寶光寺云。黃葉前朝寺。無僧寒殿開。池晴龜出曝。松暝鶴飛迴。古砌碑橫草。陰廊畫雜苔。禪宮亦銷歇。塵世靜堪哀。

春日野望寄錢起員外云。草長花落樹。羸病強尋春。無復少年意。空餘華髮新。青原晴見水。白社靜逢人。寄謝南宮客。軒車不見親。

喜外弟盧綸見宿云。靜夜無四隣。荒居舊業貧。雨中黃葉樹。煙下白頭人。似我獨沉久。媿君相見頻。平生自有分。況是蔡家親。

送王閏云。相送臨寒水。蒼然望故關。江蕪連夢澤。楚雪入商山。話我他年舊。看君此日閑。因將自悲淚。一灑別離顏。

新蟬云。今朝蟬忽鳴。羈客若爲情。漸覺一年謝。能令萬感生。微風初滿樹。落日稍沉城。爲問同懷者。淒涼聽幾聲。

望水云。高樓晴見水。楚色靄相和。野極空如練。天遙不辨波。永無人跡到。時有鳥行過。况

是蒼茫外。殘陽照最多。

哭麴象云。憶昨秋風起。君曾歎逐臣。何言芳草日。自作九泉人。（耿就宿以下七篇。姚合取爲極元集。）

苗發

送司空曙之蘇州詩云。盤門吳舊地。蟬盡草秋時。歸國人皆久。移家君獨遲。廣陵經水宿。建鄴有僧期。若到西霞寺。應看江總碑。

送孫德諭罷官往黔州（孫父曾牧此州。因寄家也。）云。中歲分符典石城。兩朝趁陞謁承明。闕下昨陳歸老疎。天南今切去鄉情。親知握手三秋別。几杖扶身萬里行。伯道暮年無嗣子。欲將家事託門生。

發晉卿子終都官員外郎。

崔峒

寄上禮部李侍郎云。吳楚相逢處。江湖共泛時。任風舟去遠。待月酒行遲。白髮常同歎。青雲本異期。貴來君却少。愁去我先悲。王佩明朝盛。蒼苔陋巷滋。追尋恨無路。唯有夢相思。

江上書懷云。骨肉天涯別。江山日落時。淚流襟上血。髮白鏡中絲。胡越書難到。存亡夢豈

知登高迴首罷。形影自相隨。

喜逢妻弟鄭損因送入京詩云。亂後自江城。相逢喜復驚。爲經多載別。欲問小時名。對酒悲前事。論文畏後生。遙知盈卷軸。紙貴在江城。

詠門上畫小松上元王杜三相公云。昔聞生澗底。今見起毫端。衆草此時沒。何人知歲寒。豈能裨棟宇。且貴出門闌。只在丹青意。凌雲也不難。

題崇福寺禪師院云。僧家竟何事。掃地與焚香。清磬度山翠。閑雲來竹房。身心塵外遠。歲月坐中長。向晚禪堂閉。無人空夕陽。

峒有初入集賢院贈李獻任詩。峒與李初同官於常山。又有拜拾遺酬丘二十二見贈詩云。江海久垂綸。朝衣忽掛身。丹墀方謁帝。白髮免羞人。才愧文章士。名當諫諍臣。空餘薦賢分。不敢負交親。

嚴維送峒使往睦州云。如今相府共英髦。獨往南州肯苦勞。水水近聞漁浦出。雪雲初卷定山高。木蘭花映桐廬縣。青省舟隨白鷺濤。使者應須訪廉吏。府中唯有范功曹。

高仲武云。峒詩文彩煥發。意思雅淡。如清磬度山翠。閑雲來竹房。又流水聲中視公事。寒山影裏見人家。此亦披沙鍊金。時時見寶也。

峒登進士第。爲拾遺。入集賢爲學士。後終州刺史。或云終元武令。文藝傳云。終右補闕。峒寄李明府云。松堂寂寂對煙霞。五柳門前集晚鴉。流水聲中視公事。寒山影裏見人家。觀風共美新爲政。計日還應更觸邪。可惜陶潛無限酒。不逢籬菊正開花。

李端

古別離詩云。水國葉黃時。洞庭霜落夜。行舟問商賈。宿在楓林下。此地送君還。茫茫似夢間。後期知幾日。前路轉多山。巫峽通湘浦。迢迢隔雲雨。天晴見海橋。月落聞津鼓。人老自多愁。水深難急流。清霄歌一曲。白首對汀洲。

贈郭駙馬詩云。（郭令公子曖尙昇平公主。此詩席上成。）青春都尉最風流。二十功成便拜侯。金距鬪鷄過上苑。玉鞭駙馬出長楸。薰香笏令偏憐小。傅粉何郎不解愁。日暮吹簫楊柳陌。路人遙指鳳凰樓。

又云。方塘似鏡草芊芊。初月如鉤未上弦。新開金埒看調馬。舊賜銅山許鑄錢。楊柳入樓吹玉笛。芙蓉出水妬花鈿。今朝都尉如相願。願脫長裙學少年。

端。趙州人。始郭曖尙昇平公主。賢明有才思。尤多招士。端等多從曖遊。曖進官。大集客。端賦詩最工。錢起曰。素爲之。請賦起姓。又工於前。客乃服。

端賦巫山高云。巫山十二峯。皆在碧虛中。回合雲藏日。霏微雨帶風。猿聲寒過水。樹色暮連空。愁向高唐望。清秋見楚宮。

蜀路有飛泉。亭中詩板百餘篇。後薛能佐李福於蜀道過此題云。賈椽曾空去。題詩豈易哉。悉去諸板。唯留端巫山高一篇而已。

贈苗發員外云。朱戶敞高扉。青槐凝落暉。八龍承慶重。二虎遞朝歸。坐竹人聲絕。橫琴鳥語稀。花慚潘岳貌。年稱老萊衣。葉暗新櫻熟。絲長粉蝶飛。應憐魯儒賤。空與故山違。

茂陵山行陪韋金部云。宿雨朝來嶽。空山天氣清。盤雲雙鶴下。隔水一蟬鳴。古道黃花落。平蕪赤燒生。茂陵雖有病。猶得伴君行。

雲際中峯云。自得中峯住。深林亦閉關。經秋無客到。入夜有僧還。暗澗泉聲小。荒崗樹影閑。高亭不可望。星月滿空山。

蕪城懷古云。風吹城上樹。草口口邊路。城裏月明時。精靈自來去。（贈苗發以下四篇。姚合取爲極元集。）

冷朝陽

登靈善寺塔云。飛閣青霞裏。先秋獨早涼。天花映窗近。月桂拂簷香。華岳三峯小。黃河一

帶長。空間指歸路。烟處有垂楊。

中秋與空上人同宿華嚴寺云。掃榻相逢宿。論詩舊梵宮。鍾聲迎鼓盡。月色過山窮。庭簇安禪草。牕飛帶火虫。一宵何惜別。迴首隔秋風。

立春詩云。王律傳佳節。青陽應北辰。土牛呈歲稔。綵燕表年春。臘盡星迴次。寒餘月建寅。風光何處好。雲物望中新。流水初銷凍。潛魚欲振鱗。梅花將柳色。偏思越鄉人。

潞州節度薛嵩有青衣善彈阮咸琴。手紋隱起如紅線。因以名之。一日辭去。朝陽爲詞曰。採菱歌怨木蘭舟。送客魂銷百尺樓。還似洛妃乘霧去。碧天無際水東流。

李嘉祐送朝陽登第歸江甯云。高第猶佳句。諸生似者稀。長安帶酒別。建業候潮歸。稚子歡迎棹。鄰人爲掃扉。含情過舊浦。鷗鳥亦依依。

朝陽登大厓進士第。爲薛嵩口錢起送朝陽擢第後歸金陵觀省詩云。萊子晝歸今始好。潘園景色夏偏濃。夕陽流水吟詩去。明月青山出竹逢。兄弟相親初讓果。鄉人爭賀舊登龍。佳期少別俄千里。雲樹愁看過幾重。



唐詩紀事

四九四

唐詩紀事卷第三十一

竇叔向	竇常	竇牟	竇羣
竇庠	竇羣	常逢	李約
柳中庸	郭助	韋處厚	權德輿
張薦	楊於陵	許孟容	崔邠
馮伉	潘孟陽	武少儀	鄭常
鄭轅	韓濬	王濯	張莒
張叔良			

竇叔向（五子常、牟、庠、羣）

叔向字遺直京兆人代宗時常袞爲相用爲左拾遺內供奉及貶亦出爲漂水令四子登第羣以處士隱毗陵韋夏卿薦之朝德宗擢爲左拾遺代武元衡爲中丞薦呂溫羊士諤爲御史李吉甫以二人躁險持不下羣怨吉甫伺吉甫陰事幾爲憲宗所誅羣與兄常牟弟庠羣皆爲郎工詞章爲聯珠集行於時義取昆弟若五星然

常字中行。登第。隱居二十年。終國子祭酒。

牟字貽周。終國子司業。

庠字冑卿。終婺州刺史。

鞏字友封。元積節度武昌。辟爲御史中丞。充副使。雅裕有名于時。平居與人言。若不出口。

世號嘯喙翁。卒於武昌。

叔向寒食賜恩火云。恩光及小臣。華燭忽驚春。電影隨中使。星輝拂路人。幸因榆柳暖。一

照草茅貧。

端午日恩賜百索云。仙宮長命縷。端午降殊私。事盛蛟龍見。恩深犬馬知。餘生儻可續。終

冀答明時。

酬李袁州嘉祐云。少年輕會復輕離。老大關心總是悲。強說前程聊自慰。未知携携定何

時。公才屈指登黃閣。匪服胡顏上赤墀。想到長安誦佳句。滿朝誰不念瓊枝。蓋嘉祐以詩送叔向。并寄其弟紆云。白歎未需黃紙詔。那堪遠送赤墀人。老爲僑客徧相戀。素是詩家倍益親。妻兒共載無懸思。鴛鴦同行不負身。馮爾將書通令弟。惟論華髮愧頭巾。故叔向詩有瓊枝之句。

常任武陵寒食日次松滋渡先寄劉員外云店花榆夾曉風前雲際離離上峽船江轉數  
程淹驛騎楚曾三戶少人煙看春又遇清明節算老重經癸巳年幸得住山當郡舍在朝常詠  
十居篇。

常初登第常道茂云二十年後出官後五度奏官勅皆不下卽攝職久之至大曆十四年  
及第卽二十年矣。

北固晚眺云小園芒種後梅天風雨涼露蠶開晚簇江燕遶危檣山趾北來固潮頭西北  
長年年此登眺人事幾銷亡。

途中立春寄楊郇伯云浪迹終年客驚心此地春風前猶去馬澤畔耦耕人老大交情重  
悲涼外物親子雲今在宅應見柳條新。

七夕寄懷云露盤花水望三星髮髭虛無降匹靈斜漢沒時人不寐幾條蛛網下風庭。

竇牟

元日嘉州大禮寄四學士六舍人云有事郊壇畢無私日月臨歲華春更早天瑞雪猶深  
玉輦回時令金門降德音翰飛鴛別侶叢栢桂爲林粉澤資鴻筆薰和本素琴禮成戎器下恩  
徹鬼方沉麟爵來稱紀官師退絕箴道風黃閣靜祥景紫垣陰壽酒朝時獻農書直夜尋國香

焜翠幄。庭燎艷紅衾。漢魏文章盛。堯湯雨露霏。密辭投水石。精義出沙金。宸扈親惟敬。鈞衡近  
匪侵。長駟千里駿。清唳九霄禽。慶賜迎新服。齊莊棄舊簪。忽思班女怨。遙聽越人吟。末路甘貧  
病。流年苦滯淫。夢中清瑣闥。歸處碧山岑。竊抃聞韶落。觀光想魅任。大哉寰海晏。不算子牟心。  
牟秋夕閑居對雨贈別盧坦云。燕燕辭巢蟬螿枝。窮居積雨壞藩籬。夜長簷溜寒無寢。日  
晏廚煙濕未炊。悟主一言那可學。從軍五百竟徒爲。故人駿馬朝天使。洛下秋聲忍要知。

竇羣

黔中書懷云。萬事非京國。千山擁麗譙。佩刀看日曬。賜馬傍江調。言語多重譯。壺觴每獨  
謠。汨流如着翅。不敢問歸橈。

竇庠

陪留守韓僕射巡內至上陽宮感歎云。愁煙漠漠草離離。太液鈞陳處處疑。薄暮毀垣春  
雨裏。殘花猶發萬年枝。

竇羣

代隣叟云。年來七十罷耕桑。就煖支羸強下床。滿眼兒孫身外事。閑梳白髮對斜陽。  
永寧小園寄接近校書云。故里心期柰別何。手移芳樹憶庭柯。東臯黍熟君應醉。梨葉初

紅白露多

寄南遊弟兄云。書來未報幾時還。知在三湖五嶺間。獨立衡門秋水闊。寒鴉飛去日嶺山。自京將赴黔南云。風雨荊州二月天。問人初雇峽中船。西南一望雲和水。猶道黔南有四千。

南遊感興云。傷心欲問當時事。唯見江流去不迴。日暮東風春草綠。鷓鴣飛上越王臺。放魚云。金錢贖得免刀痕。問道禽魚亦感恩。好去長江千萬里。不須辛苦上龍門。(武昌時也。)

宮人斜云。離宮路遠北原斜。生死恩深不到家。雲雨今歸何處去。黃鸝飛上野棠花。新營別墅寄兄云。懶性如今成野人。行藏由興不由身。莫驚此度歸來晚。買得山居正值春。

樂天與微之書云。君興有餘力。且與僕悉索還往詩中。取其尤長者。如張十八古樂府。李二十新歌行。(紳也。)  
盧楊二祕書律詩。(貞與巨源。)  
竇七。(鞏也。)  
元八絕句。博考精掇。編而次之。號元白往還詩集。衆君子得擬議於此者。莫不踊躍歡喜。以爲盛事。

常建

清晨入古寺。初日明高林。竹徑通幽處。禪房花木深。山光悅鳥性。潭影空人心。萬籟此都寂。但餘鍾磬音。（題破後禪山寺院。）

江上調玉琴。一絃清一心。泠泠七弦遍。萬木澄幽陰。能使江月白。又令江水深。始知梧桐枝。可以徽黃金。（江上琴興。）

夢太白西峯云。夢寐昇九崖。杳靄逢元君。貴我太白岑。寥寥辭垢氛。結宇在星漢。宴林閉氤氛。簷楹覆餘翠。巾鳥生片雲。時往溪谷間。孤亭晝仍曛。松峯引天影。石瀨清霞文。括日緩舟趣。霽心投鳥羣。春風又搖擢。潭鳥花紛紛。

宿王昌齡隱居云。青溪深不測。隱處惟孤雲。松際露微月。清光猶爲君。茅亭宿花鳥。藥院滋苔紋。余亦謝時去。西山鸞鶴羣。

歐陽永叔云。吾嘗愛建竹逕通幽處。禪房花木深。欲効其語作一聯。久不可得。始知造意者。爲難工也。來青州得一山齋。不意平生想見而不能道以言者。乃爲己有。於是益欲希其髣髴。竟爾莫獲一言。

丹陽殷璠撰河岳英靈集。首列建詩。愛其山光悅鳥性。潭影空人心。

商璠云。高才而無貴位。誠哉是言也。龔劉楨死於文學。左思終於記室。鮑昭卒於參軍。今

常建亦滿於一尉。悲夫。建詩似初發通莊。却尋野逕。百里之外。方歸大道。所以其旨遠。其興僻。佳句輒來。惟論意表。至如松際露微月。清光猶爲君。又山光悅鳥性。潭影空人心。此例數十句。並可稱爲警策。一篇盡善者。戰餘落日黃。軍敗鼓聲死。今與山鬼隣。殘兵哭遼水。思旣邈苦。詞又警絕。潘岳雖云。能叙悲怨。未見如此章句也。

昭君墓云。漢宮豈不死。異域猶傷沒。萬里馱黃金。蛾眉爲枯骨。迴軍夜出塞。立馬起不發。憤恨丹青人。墳上哭明月。

弔王將軍墓云。嫖姚北伐時。深入強千里。戰餘落日黃。軍敗鼓聲死。識聞漢飛將。可奪單于馬。今與山鬼隣。殘兵哭遼水。

送李十一尉臨溪云。泠泠花下琴。君唱渡江吟。天際一帆影。預懸離別心。以言神仙尉。因致瑤華音。迴軫撫商調。越溪潄碧林。

李約

汧公勉之子也。爲兵部外郎。與主客外郎張諗同官。每單床靜言。連日不寐。故約贈韋徵君况詩曰。我有心中事。不向韋三說。秋夜洛陽城。明日照張八。

歲日感懷云。曙氣變東風。蟾壺夜漏窮。新春幾人老。舊曆四時空。身賤悲添歲。家貧喜過



冬稱觴。唯有感歡慶在兒童。

觀祈雨云。桑條無葉。土生烟。簫管迎龍水。廟前朱門幾處看歌舞。猶恐春陰咽管絃。

過華清宮云。君王遊樂萬機輕。一曲霓裳四海兵。玉輦昇天人已盡。故宮猶有樹長生。

從軍行云。看圖閑教陣。盡地靜論邊。烏壘天西戍。鷹姿塞上川。路長難算月。書遠每題年。

無復生還望。翻思未別前。

柵濠三面闢。箭盡舉烽頻。營柳和煙暮。圍榆帶雪春。邊城多老將。積路少歸人。殺盡金河卒。年年添塞塵。候火起鵬城。塵沙擁戰聲。游軍藏虜帳。降騎說蕃情。霜落彪池淺。秋深太白明。嫖姚方虎視。不覺說添兵。

約。雅度簡遠。有山林之致。在潤州。得古鐵一片。擊之清越。又養一猴。名山公。月夜泛江。登金山鼓琴。援必嘯和。曾佐庶人李錡幕。至金陵。屢譜招隱寺。檇致。一日庶人宴寺中。明日謂曰。子嘗稱招隱之致。昨日遊宴。何殊州中。約曰。某所嘗者。疏野耳。若遠山將翠幕遮。古松用綵物裹。羶腥瀉鹿跑泉。音樂亂山鳥聲。此則實不如在叔父大廳也。性又嗜茶。能自煎。曰。茶須緩火炙。活火煎。活火。炭火有焰者。曾奉使行陝州。硤石縣東。愛渠水清流。旬日忘發。梁武造寺。令蕭子雲飛白大書一蕭字。約自江淮竭產。致歸洛中。匣於小亭。號曰蕭齋。

約城南訪裴氏昆季云。相思起中夜。夙駕訪柴荆。早霧桑柘隱。曉光溪澗明。村蹊蒿棘間。往往斷新耕。貧野煙火微。盡無鳥鶯聲。田頭逢餉人。道君南山行。南山千里峯。盡是相思情。野老無拜揖。村童多裸形。相呼看車馬。顏色喜相驚。荒圃鷄豚樂。雨牆禾莠生。欲君知我來。壁上空書名。

### 柳中庸

江行詩云。繁陰乍隱洲。落葉初飛浦。蕭蕭客舟帆。暮入寒江雨。

夜渡江云。夜渚帶浮煙。蒼茫晦遠天。舟輕不覺動。纜急始知牽。聽笛遙尋岸。聞香暗識蓮。唯看去帆影。常恐客心懸。

李端司馬於瓜州寄中庸云。懷人同不寐。清夜起論文。月魄正出海。雁行斜上雲。寒潮來灑灑。秋葉下紛紛。便送江東去。徘徊只待君。

又江上別中庸云。秦人江上見。握手便沾衣。

中庸子厚之族。御史并之弟也。與弟中行。皆名有文。咸爲官。早死。

段成式酉陽雜俎。載中庸善易。嘗詣普寂公。公曰。筮吾心所在也。柳曰。和尚心在前簷。第七題。復問之。在某處。寂曰。萬物無逃於數也。吾將馳矣。嘗試測之。柳久之。矍然曰。至矣。寂然不

勳吾無得而知矣。

郭勳（鄜）

寒食寄李補闕云。蘭陵士女蒲晴川。郊外紛紛拜古埏。萬井闔閭皆禁火。九原松柏自生煙。人間後事悲前事。鏡裏今年老去年。介子終知祿不及。王孫誰豈一和憐。

李公垂云。常州建元寺。在郡東郭。松扉竹院。各在崗阜。每歲寒食。里人洒掃經過之所。大曆中詩人郭鄴賦寒食詩。當時以爲絕唱。嘗在兒童卽聞此詩。因和云。江城物候傷心地。遠寺經過禁火辰。芳草壠邊迴首客。野花叢裏斷腸人。紫荊繁艷空門盡。紅藥深開古殿春。嘆惜光陰催白髮。莫悲風月獨沾巾。

皇甫冉送鄴詩云。纔見吳州百草春。已聞燕鴈一聲新。秋風何處催年急。偏逐山行水宿人。

鄴大曆正元詩人也。

韋處厚

盛山十二詩。韓退之序云。韋侯昔以考功顯曹。盛山僻郡。奪所宜處。納之惡地。以枉其材。韋侯將怨且不釋矣。或曰不然。夫得利則躍躍以喜。不得利則戚戚以泣。若不可生者。豈韋侯

之謂哉。韋侯讀六藝之文，探周公孔子意，又妙能爲辭章，可謂儒者。夫儒者之於患難，苟非其自取之，其拒而不受於懷也。若築河堤以障屋雷，其容而口之也。若水之於海，冰之於夏日，其玩而忘之，以文辭也。若奏金石，以破蟋蟀之鳴，虫飛之聲，况一不快於考功盛山，一出入息之間哉。未幾，果有以韋侯所爲十二詩遺余者，其意方且呂入溪谷，上巖石，追逐雲月，不是日爲事，讀而詠歌之，令人欲棄百事往而與之游，不知其出於巴東，以屬胸臆也。于時應而和者，凡十人。及此，韋侯爲中書舍人，侍講六經，禁中和者，通判元司馬，積爲宰相，洋州許使君，康佐爲京兆，忠州白使君，易居爲中書舍人，李使君景儉爲諫議大夫，黔州嚴中丞，謨爲祕書少監，溫司馬造爲起居舍人，皆集闕下。於是盛山之十二詩，與其和者，大行於時，聯爲大卷，家有之焉。慕而爲者，將日益多，則分爲別卷。韋侯俾予題其首。

隱月岫云，初映鈎如線，終銜鏡似鈎，遠澄秋水色，高倚曉河流。  
流杯渠云，激曲縈飛箭，浮溝泛滿卮，將來山太守，草向習家池。

竹巖云，不資冬日秀，爲作暑天寒，先植誠非鳳，來翔定是鸞。

繡衣石榻云，（爲溫侍御置）巖巖雪中嶠，磊落標方峭，勿爲枕蒼山，還當礎清廟。

宿雲亭云，雨合飛危砌，天開卷曉窗，齊平聯郭柳，帶繞抱城江。

梅谿云。夾岸凝輕素。交枝漾淺淪。味調方薦實。膳近又先春。  
桃塢云。噴日舒紅景。通蹊茂綠陰。終期王母摘。不羨武陵深。  
胡盧沼云。疏鑿徒爲巧。圓窪目可澄。倒花紛錯秀。鑑月靜涵冰。  
茶嶺云。願洛吳商絕。蒙山蜀信稀。千叢因此始。含露紫英肥。  
盤石磴云。繚繞緣雲上。璘玢玳玉聯。高高曾幾折。極目瞰秋鳶。  
琵琶臺云。褊地難層口。因崖遂削成。淺深嵐嶂色。盡向此中呈。  
上士餅泉云。(爲柳律師置) 綆汲豈無井。巖巖貴非浚。願洗塵垢餘。一兩根莖潤。

權德輿

三雜詩云。婉彼羸氏女。吹簫偶蕭史。彩鸞駕非煙。綽約兩仙子。神期諒交感。相顧乃如此。  
豈比成都人。琴心中夜起。

陽臺巫山上。風雨忽晴曠。朝雲與遊龍。變化千萬狀。魂交復目斷。縹緲難比况。蘭澤不可親。凝情坐惆悵。淇水春正深。上宮蘭葉齊。光風兩搖蕩。鳴珮山中閨。一顧授橫波。千金呈瓠犀。徒然路傍子。怳怳復悽悽。

侍御從舅初免職歸東山。寄以詩云。靡靡南軒蕙。迎風轉芬滋。落落幽澗松。百尺無附枝。

世物自多故。達人心中不羈。偶陳幕中畫。未負林間期。感恩從慰薦。循性難熟維。野鶴無俗質。孤雲多異姿。清泠松霞沓。照灼巖花遲。終當稅塵駕。來就東山嬉。

江行四首云。曉風搖五兩。殘月映石壁。稍稍曙光開。片帆在空碧。（右曉）

孤舟漾暖景。獨鶴下秋空。安流日正晝。淨綠天無風。（右書）

古樹夕陽盡。空江暮靄收。寂寞叩船坐。獨生千里愁。（右晚）

猿聲到枕上。愁夢紛難理。寂寂深夜寒。清霜落秋水。（右夜）

德輿字載之。元和中爲相。其文雅正。瞻緝動止無外飾。其醞藉風流。自然可慕。

楊嗣復序其文集曰。正中元。奉詔考定賢良。草澤之士。昇名七十七人。及爲禮部侍郎。擢

進士第者七十有二。鸞鳳杞梓。舉集其門。登輔相之位者。前後十人。

載之送陳秀才應舉序云。陳侯工詩賦。長波清瀾。浩浩不窮。屯田柳郎中。爲予誦其佳句。

曰。地偏雲自起。日暮山更深。及獲其卷。又有過於是者。（不知陳氏之名。今載於此。）

和潘孟陽迴文絕句云。酒杯春醉好。飛雲晚庭閒。久憶同前賞。中林對遠山。

張薦

德宗時。薦作祕書監。權載之以離合詩贈之云。黃葉從風散。暗嗟時節換。忽見鬢邊霜。勿

辭林下觴躬行君子道。辜負芳名早。帳殿漢官儀。巾車塞垣草。交情劇斷金。文律每招尋。始知蓬山下。如見古人心。

薦和云。移居既同里。多幸陪君子。引雅重當朝。弓旌早見招。植根瓊林圃。直夜金闈步。勸深子玉銘。力競相如賦。開闢向春闈。日復想光儀。格言信難繼。木石強爲詞。

薦和潘孟陽迴文絕句云。遲遲日氣暖。漫漫雪天春。知君欲醉飲。思見此交親。  
薦字孝舉。唐史有傳。

崔邠

和權載之離合詩云。脈脈羨作期。月夜吟麗詞。諫垣則隨步。東觀方承顧。林雪消艷陽。簡冊漏華光。坐更芝蘭室。千載各芬芳。節苦文俱盛。卽時仍並命。翩翩紫霄中。羽翮相輝映。  
字處仁。時爲中書舍人。唐史有傳。

楊於陵

和權載之離合詩云。校德盡珪璋。才臣時所揚。放情寄文律。芳茂經邦術。王猷符發揮。十載契心期。晝遊有嘉話。書法無隱辭。信茲酬和美。言與芝蘭比。昨來恣吟繹。日覺祛蒙鄙。  
時爲中書舍人。唐史有傳。

許孟容

答權載之離合詩云。史才司祕府。文哲今超古。亦有擅風騷。六聯文墨曹。聖賢三代意。工藝千金字。化識從臣謠。人推仙閣吏。如發崑園時。口誦靈真詞。孫簡下威鳳。糸霜瓊玉枝。

時爲給事中。唐史有傳。

馮伉

和權載之離合詩云。車馬退朝後。聿懷在文友。動詞宗伯雄。重美良史功。亦曾吟鮑謝。二妙尤增價。雨霜鴻唳天。匝樹烏鳴夜。簟思客縱橫。早擅希代名。息心欲焚硯。自覩陪羣英。

時爲給事中。唐史有傳。

潘孟揚

和權載之離合詩云。詠歌有離合。永夜觀酬答。笥中操綵牋。竹簡何足編。意深俱妙絕。心契交情結。計彼官接聯。言初並清切。翔集本和隨。羽儀良在斯。煙雲競文藻。因喜翫新詩。

春日雪以迴文絕句呈張薦權德輿云。春梅雜落雪。發樹幾花開。真須盡興飲。仁里願同來。

時未四十。爲戶部侍郎。唐史有傳。



武少儀

和權載之離合詩云。少年慕時彥。小晤文多變。木鐸比羣英。八方流德聲。雷陳美交契。雨雪音塵繼。恩顧各飛翔。因詩觀瑰麗。傳野絕遺賢。人希有盛遷。早歛風與雅。日詠贈酬篇。  
時爲國子司業。

鄭常

寄邢逸人云。羨君無外事。日與世情稀。地僻人難別。溪深鳥自飛。儒衣荷葉老。野飯藥苗肥。疇昔江湖意。如今憶共歸。

謫居漁陽至白沙阻雨題驛云。漁陽知近遠。見說過溢城。雲雨經春客。江山幾日程。終隨驚鳥去。祇待海潮生。前路逢漁父。多慚問姓名。

送頭陀上人自廬山歸東溪云。僧家無住着。早晚出東林。行道非真相。頭陀是苦心。持齋山果熟。倚錫野雲深。溪寺誰相待。香花與梵音。

高仲武云。常省靜婉靡。雖未洪深。已入文流。翻翻然有士風。故錄之。

鄭轅

清明賜新火詩云。改火清明後。優恩賜近臣。漏殘舟禁晚。燧發白榆新。瑞彩來雙闕。神光

煥四隣。氣回侯第暖。煙散帝城春。利用調羹鼎。餘輝燭縉紳。皇明如照隱。願及聚螢人。  
韓。大曆九年進士。

韓濬

清明賜新火詩云。玉騎傳紅燭。天廚賜近臣。火隨黃道見。煙繞白榆新。榮耀分他室。恩光共此辰。更調金鼎膳。還暖玉堂人。灼灼千門映。輝輝萬井春。應憐聚螢者。瞻望獨無隣。  
李端送濬及第歸江東觀省詩云。登龍兼折桂。歸去當高車。舊楚楓猶暗。前隋柳已疎。月中逢漢客。浪裏得鄉書。見說江邊住。知君不厭魚。

濬。大曆九年進士。

王濯

清明賜新火詩云。御火傳香殿。華光及侍臣。星流中使馬。燭耀九衢人。轉影連金屋。分輝麗錦茵。焰迎紅藥發。煙染綠條春。助律和風早。添爐暖氣新。誰憐一寒士。猶望照東隣。  
濯。大曆九年進士第。

張莒

元日望含元殿御扇開詩云。萬國來朝歲。千秋覲聖君。輦迎仙仗出。扇匝御香焚。俯對朝

容近。先知曙色分。冕旒開處見。鍾磬合時聞。影動承朝日。花攢似塵雲。蒲葵那可比。徒用隔炎氛。

柳子厚先友碑云。莒常山人。登大曆九年第。大中時官吏部外郎。

張叔良

長至日上公獻壽詩云。鳳闕晴鍾動。鷄人曉漏長。九重初啓鑰。三事正稱觴。日至龍顏近。天旋聖曆昌。休光連雪淨。瑞氣雜爐香。化被君恩洽。恩霑士庶康。不因稽舊典。誰得紀朝章。

叔良。登廣德二年進士第。

唐詩紀事卷第二十二

崔琮

李竦

裴達

干尹躬

顏粲

葉季良

陳通方

嚴公弼

嚴公贇

王表

陸贄

楊炎

元季川

蔣煥

包何

陸海

劉商（胡笳十八拍）

崔琮

長至上公獻壽詩云。應曆三陽首。朝天萬國同。斗邊看子月。台上候祥風。五夜鏡初曉。千門日正融。王塔文物盛。仙仗武貔雄。率舞皆羣辟。稱觴卽上公。南山爲聖壽。長對未央宮。

琮登大曆二年進士第。

李竦

長至上公獻壽詩云。候曉金門闕。乘時寶曆長。羽儀瞻上宰。雲物麗初陽。漢禮方傳佩。堯年正捧觴。日行臨觀闕。帝錫洽珪璋。盛美超三代。洪休降百祥。自憐朝不坐。空此詠無彊。

竦登大曆二年進士第。官于京師。朱泚亂。竦與關播盧杞皆踰垣走。追及帝咸陽。

裴茂

南至日太史登台書雲物詩云。圓丘才展禮。佳氣近初分。太史新簪筆。高臺紀彩雲。煙空和縹緲。曉色共氛氳。道泰資賢輔。年豐荷聖君。恭惟司國瑞。兼用察人文。應念懷鈇客。終朝望碧雲。

達登大曆進士第。

于尹躬

南至日太史登台書雲物詩云。至日行時令。登臺約禮文。官稱伯趙氏。色辨五方雲。晝漏聽初發。陽光望漸分。用天爲歲備。持簡出人羣。惠愛周微物。生靈荷聖君。常當有嘉瑞。郁郁復紛紛。

尹躬大曆進士。元和間爲中書舍人。坐其弟皋漢以賊獲罪。左授洋州刺史。制云。雖無從坐之法。合當失教之責。

顏榮

吳宮教美人戰云。有客陳兵畫。功成欲霸吳。玉顏承將略。金鈿指軍符。轉佩風雲暗。鳴鞞

錦綉趨。雪花頻落粉。香汗盡流珠。掩笑誰欺令。嚴刑必用誅。至今孫子術。猶可靜邊隅。  
粲登建中進士第。

葉季良

吳宮教美人戰詩云。強吳矜霸略。講武在深宮。盡出嬌娥妓。先觀上將風。揮戈羅袖卷。撥甲汗粧紅。掩笑分旗下。含羞入隊中。鼓停行未正。刑舉令纔崇。自可威鄰國。何勞逞戰功。  
季良登正元進士第。

陳通方

通方金谷園懷古云。緩步洛城下。軫懷金谷園。昔人隨水逝。舊樹逐春繁。冉冉搖風弱。菲菲裊露翻。歌臺豈易見。舞袖乍如存。戲蝶香中起。流鶯暗處喧。徒聞施錦帳。此地擁行軒。

通方登正元進士第。與王播同年。播年五十六。通方甚少。困期集撫播背曰。王老奉贈一第。言其日暮途遠。及第同贈官也。播恨之。後通方丁家艱。辛苦萬狀。播捷三科。爲正郎。判鹽鐵。通方窮悴。求卽不甚給之。時李虛中爲副使。通方以詩求爲汲引。云。應念路傍憔悴翼。昔年喬木幸同遷。播不得已。薦爲江西院官。

嚴公弼

題漢州西湖云。西湖創置自房公。心匠縱橫造化同。見說鳳池推獨步。高名何事滯川中。  
公弼公貺。嚴震之子。震梓州人。建中中爲鳳州刺史。治行爲山南第一。封助國公。公弼襲封。

嚴公貺

題漢州西湖云。鳳沼才難盡。餘思鑿西湖。珍木羅脩岸。冰光映坐隅。琴臺今寂寞。竹島尙  
縈紆。猶蘊濟川志。芳名終不渝。

柳子厚序送公貺下第歸興元觀省云。相國馮翊公。極人臣之尊。分天子之憂。殿邦坤隅。  
柄是文武。而子之伯仲。皆脫略貴美。服勤儒素。故繼登上科。以及於子。是可舉嚴氏之教。誦乎  
他門。使有矜式也。子何患賈之不售耶。

王表

大曆十四年侍郎潘炎。試花發上林苑表詩云。御苑春何早。繁花已繡林。笑迎明主仗。香  
拂美人簪。地接樓臺近。天垂雨露深。清光來戲蝶。夕景動棲禽。欲託凌雲勢。先開捧日心。方知  
桃李樹。從此別成陰。

清明日登城春望寄大夫使君詩云。春城閑望愛晴天。何處風光不眼前。寒食花開千樹

雪。清明日出萬家煙。興來促席唯同舍。醉後狂歌盡少年。聞說鶯啼却惆悵。詩成不見謝臨川。  
元稹叙詩寄樂天詩云。有人以陳子昂感遇詩相示。吟翫激烈。卽日爲寄思玄子詩二十首。故鄭京兆於僕爲外。諸翁深賜憐獎。因以獻京兆翁。深相駭異。祕書少監王表在座。顧謂表曰。使此兒五十不死。其志義何如哉。惜吾輩不見其成就。因召諸子。訓責泣下。僕亦竊不自得。由是勇於爲文。又久之。得杜甫詩數百首。愛其浩蕩津涯。處處皆到。始病沈宋之不存寄興。而訝子昂之未暇旁備矣。不數年。與詩人楊巨源友善。日課爲詩。性復僻嬾。人事常日閑。則有作。識足下時。有詩數百篇矣。

表。大曆十四年潘炎下登第時。謂榜有六異。朱遂爲朱滔太子。表爲李納羣。彼軍呼爲附馬。趙博宣爲易定押衙。袁同直入番爲阿師。竇常二十年稱前進士。其一奚陟也。或曰六差。

### 陸贄

太曆八年。試禁中春松云。陰陰清禁裏。蒼翠滿春松。雨露恩偏近。陽和色更濃。高枝分曉月。虛吹雜宵鍾。香助爐煙遠。形疑蓋影重。願符千載壽。不羨五株封。幸得回天春。全勝老碧峯。  
錢起喜贄擢第還蘇州云。鄉路歸何早。雲間喜擅名。思親盧橘熟。帶雨客帆輕。夜火臨津驛。晨鍾隔浦城。華亭養仙羽。計日再飛鳴。



楊炎

流崖州至鬼門關作云。一去一萬里。千知千不還。崖州何處在。生度鬼門關。

元載末年。納薛瑤英爲姬。處以金絲帳。却麈褥。衣以龍綃衣。載以瑤英體輕不勝重衣。於異國求此服也。唯賈至與炎雅。與載善。往往時見其歌舞。至贈詩曰。舞怯銖衣重。笑疑桃臉開。方知漢成帝。空築避風臺。炎亦贈歌云。雪面淡眉天上女。鳳簫鸞翅欲飛去。玉山翹翠步無塵。楚腰如柳不勝春。

炎字公南。常袞長於除書。炎善德音。自開元後。言制詔者。稱常楊。元載與炎同郡。炎又出也。故擢炎禮部侍郎。德宗時位宰相。

元季川

泉上雨後作云。風雨蕩繁暑。雷息佳霽初。衆風帶雲雨。清風入我廬。颯颯涼颺來。臨窺愜所圖。綠蘿長新蔓。裊裊垂坐隅。流水復簷下。丹砂發清蕖。養葛爲我衣。種芋爲我蔬。誰是畹與畦。彌漫連野蕪。

山中晚興云。河漢降玄霜。昨來節物殊。媿無神仙姿。亦有陰陽俱。靈鳥望不見。慨然悲高梧。華葉隨風揚。珍條雜榛蕪。爲君寒谷吟。歎息知何如。

季川大曆正元間詩人也。一曰季川名融。元次山之弟也。次山作處規云。季川曰。旣復不言。旣有意乎。（旣兄之別稱也。）

蔣渙

和徐侍郎書叢篠韵云。中禁夕沉沉。幽篁別作林。色連鷄樹近。影落鳳池深。爲重凌霜節。能虛應物心。年年承雨露。長對紫庭陰。

渙。儀鳳宰相。智周之孫。與兄洵。皆第進士。渙永泰初。歷鴻臚卿。日本使嘗遺金帛不納。唯取牋一番。以貽其副云。終吏部尙書。洵終尙書左丞。

包何

江上田家云。近海川原薄。人家本自稀。忝苗期臘酒。霜葉是寒衣。市井誰相識。漁樵夜始歸。不須騎馬問。恐是狎鷗飛。

同諸公尋李方真不遇云。聞說到揚州。吹簫有舊遊。人來多不見。莫是上迷樓。

和苗員外寓直寄臺中舍弟云。朝列稱多士。君家有二難。正爲臺裏柏。芳作省中蘭。兵直分曹闕。晨趨接武歡。每憐雙闕下。鴈序入鴛鸞。

闕下芙蓉云。一人理國致昇平。萬物呈祥助聖明。天上河從闕下過。江南花向殿前生。慶

雲垂蔭關難落。淇露爲珠滿不傾。更對樂懸張宴處。歌工欲奏採蓮聲。

賦得秤送雲孺卿云。願以金鍾秤。因君贈別離。鈎懸新月吐。衡舉衆星隨。掌握須平執。錙銖必盡知。由來投分定。莫被弄權移。

何字幼嗣。融之子也。大曆中爲起居舍人。

劉商

秋夜聽嚴紳巴童唱竹枝歌云。巴人遠從荆山客。回首荆山楚雲隔。思歸夜唱竹枝歌。庭槐葉落秋風多。曲中歷歷敍鄉思。鄉思綿綿楚詞古。身騎吳牛不畏虎。手提篋筥欺風雨。猿啼日暮江岸邊。綠蕪連山水連天。來時十三今十五。一成新衣已再補。鴻鴈南飛報隣伍。在家歡樂辭家苦。天晴露白鍾漏遲。淚痕滿面看竹枝。曲終寒竹風裊裊。西風落日東風曉。

移居深山謝別親故云。不食黃精不採薇。葛苗爲帶草爲衣。孤雲更入深山去。人絕音書鴈自飛。

商。高情放游。戲爲山水木石。自張瓌貶後。惆悵賦詩曰。苔石蒼蒼臨澗水。溪風烏鳥動松枝。世間唯有張通會。流向衡陽那得知。

商。彭城人。居長安。劉禹錫作高陵令。劉仁師遺愛碑云。武德名臣。刑部尙書德威三代孫。

大曆中詩人商之猶子。其名重如此。商終於檢校禮部郎中。汴州觀察判官。

胡笳銅雀妓云。魏主矜娥眉。美人美於玉。高臺無晝夜。歌舞竟未足。盛色如轉圓。夕陽落深谷。仍令身歿後。尙縱平生慾。紅粉淚縱橫。調絃向空屋。舉頭君不在。唯見西陵木。玉輦豈再來。嬌豔爲誰綠。那堪秋風裏。更舞陽春曲。曲罷情不勝。闌干向西哭。臺邊生野草。來去冒羅縠。况復陵寢間。雙雙見麋鹿。

古意云。連曙寢衣冷。開門霜露凝。風吹昨夜淚。一片枕前冰。

滑州送人先歸云。河水冰銷旅鴈飛。寒衣未足又春衣。自憐飄蕩經年客。送別千迴獨未歸。

### 陸海

陸餘慶與陳子昂盧藏用爲方外十友。孫海工於五言。爲賀賓客所賞。自省郎典潮州。但賦詩自通。

題奉國寺云。新秋夜何爽。露下風轉淒。一磬竹窗外。千燈花塔西。  
題龍門寺云。窗燈林靄裏。門磬水聲中。更與龍華會。爐煙滿夕風。

孫長源有才思。嘗爲諷刺云。忽然一曲稱君心。破却中人百家產。又云。城外平人驅欲盡。

唐詩紀事

帳中猶打袞花毬。

五二一

唐詩紀事卷第三十二終

唐詩紀事卷第二十二

李吉甫

武元衡

鄭綱

獨孤良弼

獨孤授

李季何

李應

盧拱

李觀

裴度

韋同則

陳峴

李吉甫

九日小園獨謔贈門下武相公云。小園休沐暇。暫與故山期。樹杪懸丹棗。苔陰落紫梨。舞  
影新菊徧。繞格古藤垂。受露紅蘭晚。迎霜白薤肥。上公留鳳沼。冠劍俟清祠。應命端居者。長慚  
補袞詩。

武元衡

九日致齋禁省和中書李相公云。齋沐限中禁。家山傳勝遊。露寒潘省夜。木落庾園秋。蘭  
菊回幽步。壺觴絕舊儔。位高天祿閣。詞異半牢愁。孤思琴先覺。馳暉水共流。明朝不相見。清祝  
在圓丘。

唐次云。都門去馬嘶。灞水東流淺。青槐驛路長。白日離亭晚。望望煙景微。草木行人遠。

早秋西亭宴徐員外詩云。鼎鉉辭台坐。廳幢領益州。曲池連月曉。橫笛滿城秋。有美皇華使。曾同白社遊。今來重相見。偏覺艷歌愁。

元衡字伯蒼。元和二年爲相。代高崇文鎮蜀。八年召還。途經百牢關。題石洞詩云。昔佩兵符去。今持相印還。天光臨井絡。春物度巴山。鳥道青冥外。風泉洞壑間。何慚班定遠。辛苦玉門關。

送柳侍御裴起居云。沱江水綠波。喧鳥去喬柯。南浦別離處。東風蘭麝多。長亭春婉婉。層漢路蹉跎。會有歸朝日。班超奈老何。

又云。望鄉臺上秦人去。學射山中杜魄哀。落日河橋千騎別。春風寂寞旆旌迴。

酬嚴司空荆南見寄云。金貂再入三公府。玉帳連封萬戶侯。簾捲青山巫峽曉。雲凝碧岫洛宮秋。劉琨坐嘯風清寒。謝眺裁詩月滿樓。白雪調高歌不得。美人南國翠娥愁。

送張諫議赴闕云。詔書前日下丹霄。頭戴儒冠脫皂貂。笛怨柳營煙漠漠。雲愁江館雨蕭蕭。鷓鴣得路爭先翥。松桂凌霜貴後彫。歸去朝端如有問。玉關門外老班超。(三詩韋莊又元集)

元衡喜爲五言。好事者傳之。被之管絃。嘗夏夜作詩云。夜久喧暫息。池臺惟月明。無因駐

清景日出事還生。明日遇害。初八年。元衡自蜀再輔政。時太微犯上。相歷執法占者言。今之三相皆不利。始輕末重。月餘。李絳以足疾免。明年十月。李吉甫以暴疾卒。至是。元衡爲盜所害。年五十八。始元衡與吉甫齊年。又同日爲宰相。及出鎮。分領楊益。及吉甫再入。元衡亦還。吉甫先一年。以元衡生月卒。元衡後一年。以吉甫生月卒。吉凶之數。若符會焉。先是。長安謠曰。打麥麥打三三三。旣而旋其袖曰。舞了也。解者謂。打麥者。打麥時也。麥打者。謂暗中突擊也。三三三。謂六月三日也。舞了也。謂元衡之卒也。

元衡卒。劉禹錫作佳人怨二章云。寶馬鳴珂踏曉塵。魚文文首犯華茵。適來行哭里門外。昨夜華堂歌舞人。秉燭朝天遂不回。路人彈指望高臺。墻東便是傷心地。夜夜秋螢飛去來。

### 鄭綱

奉和武相公省中宿齋酬李相公見寄云。高閣安仁省。名園廣武廬。沐蘭朝太一。種竹詠華胥。禁靜疎鍾徹。庭開爽韻虛。洪鈞齊萬物。縹帙整羣書。寒露滋新菊。秋風落故蕖。同懷不同賞。幽意竟何如。

綱字文明。善屬文。所交皆天下名士。憲宗初。拜相。默默居位四年。罷爲太子賓客。太和中以太子太傅致仕。卒。綱守道寡欲。所居不爲烜赫事。以篤實稱。



細九日懷邵二詩云。十歲此辰同醉友。登高各處已三年。又懷林十二云。情人共惆悵。良友不同游。其重友如此。又有九月十五日東亭望月詩云。紫閣道流今不見。紅樓禪客早曾聞。

獨狐良弼

上已接清明遊宴詩云。上已歡初罷。清明賞又追。閏年侵舊曆。令節併芳時。細雨鶯飛重。春風酒醞遲。尋花迷白雪。看柳折清絲。淑氣如相待。天和意爲誰。吁嗟名未立。空詠宴遊詩。

良弼。正元間進士也。爲左司郎中。又有良史者。登進士第。

獨狐綬

投珠於泉詩云。至道歸淳化。明珠必棄捐。天真來照乘。成性却沉泉。不是靈蛇吐。非緣合浦還。岸傍隨月落。波底共星懸。致遠終無脛。懷貪遂息肩。欲知恭儉德。所寶在惟賢。

德宗多召學術之士。躬自考試。又制科宣政殿。如稱旨。卽翹足高吟。偏示宰臣曰。此皆朕門生也。獨狐綬所司試。馴象賦。及其本上。上吟其句曰。化之式孚。則必受乎來。獻物或違性。斯用感於至仁。上以綬爲知去就。故特書第三。先是。代宗朝。越人獻象三十有二。上悉放之於山之南。而綬不辱其受獻。不傷其放棄。故賞其知去就焉。

綬舉博學宏詞。吏部考當乙科。子邵覆之。置甲科。人咨其公。

李季何

立春日曉望三素雲詩云。鶴駕青春曙。飛仙駕五雲。浮雲初縹緲。承蓋下氤氳。薄影隨風度。殊容向日分。羽毛紛共遠。環珮杳猶聞。靜合煙霞色。遙將鸞鶴羣。年年瞻此節。應許從元君。

季何登正元十一年進士第。

李應

立春日曉望三素雲詩云。玄鳥初來日。靈仙望裏分。冰容朝上界。玉輦擁朝雲。碧落流輕艷。紅霓間綵文。帶煙時縹緲。向斗更氤氳。髣髴隨風馭。超遙出曉霧。茲辰三見後。希得從元君。

應登正元十一年進士第。

盧拱

中元日觀法事云。四孟逢秋序。三元得氣中。雲迎碧落步。章奏玉皇宮。壇滴槐花露。香飄柏子風。羽衣凌縹緲。瑤轂輾虛空。久慕宸霞客。常悲習蓼虫。青囊如可授。從此訪鴻蒙。

姚合送盧拱祕書遊魏詩云。官閑身自在。詩儉語分明。車馬應回晚。煙花滿去塵。

楊巨源寄中州盧拱使君云。領郡仍開總虎貔。致身還是見男兒。小船隔水催桃葉。大鼓當風舞柘枝。酒坐微酣諸客倒。毬場慢撥幾人隨。從來樂事憎詩苦。莫放窗中遠岫知。

元禎自唐歸京。拱時爲祕書郎。以詩贈樂天。兼以遺禎。禎和云。新識蓬山傑。深交翰苑材。連投珠作貫。獨和玉成堆。劇敵徒相軋。羸師亦自媒。

李觀

字元賓。以文馳聲。正元中。卒於校書郎。陸希聲序其文曰。退之窮老不休。終不能爲元賓之辭。使元賓後退之死。亦不能及退之之質。退之大革流弊。落落有老成風。元賓則不古不今。卓然自作一體。激揚發越。若絲竹中有金石聲。每篇得意處。如健馬在御。蹠蹠不能止。其所長如此。

觀贈馮宿云。寒城上秦原。遊子意飄飄。黑雲蔽萬里。獵火從中燒。陰空蒸長煙。殺氣獨不銷。冰交石可裂。風疾山如搖。時無青松心。顧我獨不凋。

宿裴友書齋云。臥君山窗下。山鳥與我言。清風何颼颼。松栢中夜繁。久遊失歸趣。宿此似故園。林煙還近郊。谿月落古原。稚子不待曉。花間出柴門。

正元八年。宏詞試。中和節。詔賜公卿尺詩云。淑節韶光媚。皇明寵錫崇。具寮須玉尺。成器幸良工。豈止尋常用。將傳度量同。人何不取利。物亦賴其功。紫翰宣殊造。丹誠厲匪躬。奉之無失墜。恩澤自天中。

裴度

至日登樂遊園云。陰律隨寒改。陽和應節生。祥雲觀魏闕。瑞氣映秦城。驗炭論時政。書雲受歲盈。影移長日至。霧斂遠霄清。景暖仙梅動。風柔御柳傾。那堪封得意。空對物華情。

公出討淮西。過女儿山下。刻石題詩。後果尅期平賊。其詩云。待平賊壘報天子。莫指仙山示武夫。由是淮蔡底平。民安生業。白居易作詩二百言。繼公篇之末。何處盡功業。何處題詩篇。麒麟高閣上。女儿小山下。爾後多少時。四朝二十年。賊骨化爲土。賊壘犁爲田。一從賊壘平。陳蔡民晏然。驟軍成牛戶。鬼火變人煙。生子已嫁娶。種桑亦絲綿。皆云公之德。欲報無由緣。公今在何處。守都鎮三川。舊宅留永樂。新居開進賢。今公在何官。被袞引貂蟬。戰袍破猶在。髀肉生欲圓。

傍水閑行詩云。閑餘何事覺身輕。暫脫朝衣傍水行。鷗鳥亦知人意靜。固來相近不相驚。公赴敵淮西。題名華嶽廟之闕門。大順中。戶部侍郎司空圖。以一絕紀之曰。岳前大隊赴淮西。從此中原息戰碑。石闕莫教苔蘚上。分明認取晉公題。

公正元中。作鑄劍戟爲農器。賦其首云。皇帝之嗣位三十載。寰海鏡清。方隅底平。駢域中盡歸力穡。示天下不復用兵。其後作相。立殊勳。致太平。已見於文矣。

公題南莊云。野人不識中書令。喚作陶家與謝家。樂天有詩云。陶廬僻陋那堪比。謝墅幽微不足攀。何似嵩峯三十六。長隨巾甫作家山。

樂天求馬。裴贈以馬。因戲云。君若有心求逸足。我還留意在名姝。引妾換馬之事。樂天答云。安石風流無奈何。欲將赤驥換青娥。不辭便送東山去。臨老何人與唱歌。

正元八年。公試宏詞。有司以中和節。詔賜公卿尺。爲題。公詩曰。陽和行慶賜。尺度及羣公。荷寵承佳節。傾心立大中。短長思合制。遠近貴收同。共仰財成德。將酬分寸功。作程施有政。垂範播無窮。願續南山壽。千春奉聖躬。

中書卽事云。有意効承平。無功益聖明。灰心緣忍事。霜鬢爲論兵。道直身還在。恩深命轉輕。鹽梅非擬議。葵藿是平生。白日長懸照。蒼蠅謾發聲。嵩陽舊田地。終使謝歸耕。

唐趙璘云。晉公正元中。作鑄劍戟爲農器賦云。觀其氣概。已有立殊勳致太平之意。進士李爲。作淚及輕薄暗小四賦。李賀作樂府。多屬意花草蜂蝶之間。二子終不遠大文字之作。可以定相命優劣矣。

章同則

仲月賞花云。梅花似雪柳含烟。南地風光臘月前。把酒且須判却醉。風流何必待歌筵。

同則建中時詩人也。有韋同正者。登建中四年第。

陳蠹

蠹。肅代間人。賦長安十五詠。自序云。蠹生長江淮間。以詩句從賦。僅十餘年矣。今我后撫運。澤及四夷。蠹復得爲太平人。其華清宮詩。有夢裏換春秋之句。

唐詩紀事卷第三十三終



唐詩紀事卷第三十四

韓愈 張籍 史延 丁澤

樊宗師 李道昌

韓愈

司空圖云。金之精麤。效其聲皆可辨也。豈清於磬而渾於鍾哉。然則作者爲文。爲詩。才格亦可見。豈當善於彼。不善於此耶。愚觀文人之爲詩。詩人之爲文。始皆繫其所尙。所尙既專。則搜研愈至。故能銜其功於不朽。亦猶力巨而闢者。所持之器各異。而皆能濟勝。以爲勁敵也。愚嘗覽韓吏部歌詩累百首。其驅駕氣勢。若掀雷挾電。撐挾於天地之根。物狀其變。不得鼓舞。而狗其呼吸也。其次皇甫祠部文集外所作。亦爲適逸。非無意於深密。蓋或未遑耳。今於華下方得柳詩。味其探搜之致。亦深遠矣。俾其窮而克壽。抗精極意。則固非瑣瑣者。輕可擬議其優劣。又嘗觀杜子美祭太尉房公文。李太白佛寺碑贊。宏拔清厲。乃其歌詩也。張曲江五言沈鬱。亦其文筆也。豈相傷哉。噫。後之學者褊淺。片詞隻句。未能自辨。已側目相詆訾矣。痛哉。因題柳集之末。庶俾後之詮評者。罔惑偏說。以蓋其全工。



洛邑得休告。華山窮絕陁。倚巖睨海眼。引袖拂天星。日駕此迴轡。金神所司刑。泉紳拖脩白。石劍攢高青。磴蘿漣翠局。梯巖颯伶俜。悔狂已咋指。垂誠仍鐫銘。退之答張徹詩也。李肇載登華事。信有之。沈顏遺策書。謂退之託此以悲世人。登高而不知止。且示誡焉。皇甫湜作韓先生墓志云。昌慶四年八月。昌黎韓先生既以不免。吏部侍郎書諭湜曰。死能令我躬所以不隨世磨滅者。惟子以爲囑。其年十二月丙子。遂薨。明年。其孤昶。使奉功緒之錄。繼詩以至。三月癸酉。葬河陽。乃哭而敘其墓。其詳將揭之於神道碑云。先生諱愈。字退之。後魏安桓王茂六代孫。祖朝散大夫桂州長史諱儼。素父祕書郎贈尚書左僕射諱仲卿。先生七歲好學。言出成文。及冠。恣爲書以傳聖人之道。人始未信。既發不掩。聲震業光。衆方驚爆。而萃排之。乘危將顛。不懈益張。卒大信於天下。先生之作。無圓無方。至是歸工。扶經之心。執聖之權。尚友作者。跋邪舛異。以扶孔氏存皇之極。人知人罪。非我計。茹古涵今。無有端涯。渾渾灑灑。不可窺梭。反其醜放豪曲。快字凌紙。怪發鯨鏗。春麗。驚耀天下。然而栗密窈眇。章妥句適。精能之至。入神出天。嗚呼。極矣。後人無以加之矣。姬氏以來。一人而已矣。始先生以進士仕。歷官二十有七。其爲御史尚書郎中中書舍人。前後三貶。皆以疏陳治事。廷議不隨爲罪。常懷佛老法。潰聖人之隄。乃唱而築之。及爲刑部侍郎。遂章言憲宗迎佛骨非是。任爲身恥。上怒天子。先生處之安然。就貶八

千里海上。嗚呼。古所謂非苟知之。亦允蹈之者耶。吳元濟反。吏兵久遁無功。國涸將疑。衆懼恟恟。先生以右庶子兼御史中丞行軍司馬。宰相軍出潼關。請先乘邊至汴。咸說都統師乘遂和。卒擒元濟。王庭浚反。圍牛元翼於深。救兵十萬。望不敢前。詔擇庭臣往諭。衆慄縮。先生勇行。元稹言於上曰。韓愈可惜。稹宗悔。馳詔無徑入。先生曰。止君之仁。死臣之義。遂至賊營。麾其衆責之。賊慙汗伏地。乃出元翼。春秋美臧孫辰。告糴于齊。以爲急病。校其難易。孰爲宜。褒嗚呼。先生真古所謂大臣者耶。選拜京兆尹。劾禁軍帖旱糴。獻鬻倖臣之鏗。再爲吏部侍郎。薨年五十七。贈禮部尙書。先生與人洞郎軒闕。不施戟級。族姻友舊。不自立者。必待我然後衣食嫁娶喪葬。平居雖寢食未嘗去書。怠以爲枕。食以飴口。講評孜孜。以磨諸生。恐不貌美。游以談笑嘯歌。使皆醉義忘歸。嗚呼。可謂樂易君子鉅人者矣。夫人高平郡君范陽盧氏。孤前進士昶。堦左拾遺李漢。堦集賢校理燮宗懿。次女許嫁陳氏。三女未笄。銘曰。維天有道。在我先生。萬頸胥延。坐禱以行。令望絕耶。痼此四方。惟聖有文。乖微歲千。先生起之。焯役于前。曠義滂仁。耿照克天。有如先生。而合且年。按我章書。經紀大環。吟不時施。昌極後昆。噫嘻永歸。知心之悲。一鬻王夏反。嗙其禁反。

喚起窗前曙。催歸日未西。無心花裏鳥。更與盡情啼。乃二禽名也。喚起聲如絡緯。圓轉清

亮偏鳴於春曉。江南謂之春喚。催歸子規也。

謹按公生於代宗大曆三年戊申。

德宗正元八年壬申是歲。公登第。年二十五。

十一年乙亥。上宰相三書。時趙璘賈耽盧邁爲相。是歲欲相延齡。陽城諫止。五月東歸。作感二鳥賦。其末云。幸年歲之未暮。庶無羨於斯類。時年二十八。

十三年丁丑。從董晉辟爲汴宋穎毫觀察推官。

十五年己卯二月。晉公薨。公隨晉喪歸。旣出四日。宣武軍亂。殺行軍司馬陸長源。公作汴州亂二章云。汴州城門朝不開。天狗墮地聲如雷。健兒爭誘殺晉後。連屋累棟燒成灰。諸侯咫尺不能救。孤士何者自輿衰。又曰。母從子走者爲誰。大夫夫人留後兒。長源也。昨日乘車騎大馬。坐者爲趨乘者下。廟堂不肯用干戈。嗚呼奈汝母子何。

十六年庚辰。依徐州武甯軍節度張建封。

十九年癸未。拜監察御史。上書論宮市。貶連州陽山令。時有送浮屠文暢孟東野序。

二十年甲申。移江陵法曹參軍。途中作詩寄三翰林。未幾以四門博士召。

二十一年乙酉正月。德宗崩。順宗立。改元永正。韋叔誼王叔文等用事。又謀奪中官兵制。

天下之命。是年八月。皇太子卽位。帝自稱太上皇。貶叔誼叔文等。公作永正行云。君不見太皇諒陰未出命。小人乘時偷國柄。北軍百萬虎與貔。天子日將非他師。一朝奪印付私黨。凜凜朝士何能爲。孤鴻鳥噪爭署置。睽閃跳跟相嫉妬。夜作詔書朝拜官。超資越序曾無難。公然白日受賄賂。火齊磊落堆金盤。元臣故老不敢語。畫臥涕泣何汎濶。董賢三公誰復惜。侯景九錫行可歎。國家功高德且厚。天位未許庸夫干。嗣皇卓犖信英主。文如太宗武高祖。膺圖受禪登明堂。其流幽州歛死羽。四門肅穆賢俊登。數召匪親豈其朋。郎官清要爲世稱。荒郡迫野嗟可矜。湖波連天日和騰。蠻俗生梗瘴癘蒸。江氛嶺袂昏若凝。一蛇兩頭見未曾。怪鳥爭鳴令人憎。蠱虫羣飛夜撲燈。雄虺毒螫墮股肱。食中置藥肝心崩。左右使令詐難憑。慎勿浪信當兢兢。吾常同僚情可勝。具書自見非妄徵。嗟爾旣往宜爲懲。是歲又作五箴。(年二十八)

憲宗元和元年丙戌。權知國子博士。作釋言。

二年丁亥。是歲作元和聖德詩。

三年分司東都。始宰相鄭公索公文。公獻之。有譖公者。遂作釋言。至是不自安。乃求分司。

四年。是歲眞爲國子博士。改分司都官員外郎。

五年。爲河南令。是歲效玉州子月蝕詩。

六年入拜職方員外郎。時有送窮文。寄盧仝詩。坐論華陰。令柳澗事。復爲博士。作進學解。執政奇其才。改比部郎中。史館修撰。轉考功郎中。修撰如故。數月。以考功知制誥。論討蔡事。與裴度議合。月滿。遷中書舍人。賜緋魚袋。後卒。以謗語。改太子右庶子。自六年至十一年也。

十二年丁酉。裴度軍慰淮西。奏公行軍司馬。有從軍泊途中諸篇。其間次潼關寄張十二君詩云。荆山已去華山來。日照潼關四扇開。刺史莫辭迎侯遠。相公新破蔡州迴。又次潼關上。都統相公云。暫辭堂印執兵權。盡管諸軍破賊年。冠蓋相望催入相。待將功德格皇天。又桃林夜賀晉公云。西來騎火照山紅。夜宿桃林臘月中。來把命珪兼相印。一時重疊賞元功。數篇皆有奧旨。元濟使平。遷刑部侍郎。

十四年正月。表乞燒佛骨。入貶潮州刺史。有次藍關示姪孫洵詩云。一封朝奏九重天。夕貶潮陽路八千。欲爲聖明除弊事。豈將衰朽計殘年。雲橫秦嶺家何在。雪擁藍關馬不前。知汝遠來應有意。好收吾骨瘞江邊。是歲十月。量移袁州刺史。酬張韶州詩云。明時遠逐事何如。遇赦移官罪未除。北望詎令隨塞鴈。南遷纔免葬江魚。將經貴郡須留客。先惠高文謝起予。暫欲繫船韶石下。上賓虞舜整冠裾。又留別張使君云。來往再逢梅柳新。別離一醉綺羅春。久欽江總文才妙。自歎虞鱗骨口口。鳴笛急吹催落日。清歌緩送感行人。已知奏課當徵拜。那復淹

留詠白蘋。

十五年庚子。至袁州。是歲正月。憲宗崩。穆宗立。召爲國子祭酒。長慶元年辛丑。口兵部侍郎。七月。成德軍大將王廷湊殺田洪正。以（下闕）

二年。公奉命宣撫鎮州。時裴度爲幽鎮招撫使。公有行次承天營。酬裴公詩云。竄逢三年海上歸。逢公復此着征衣。旋吟佳句還鞭馬。恨不身先去鳥飛。是歲四月。廷湊解深州之圍。牛元翼奔歸京師。六月。裴度罷。（三月和六月罷）李逢吉爲相。始公有和裴公感恩言志詩云。文武功成後。居爲百辟師。林園窮勝事。鍾鼓樂清時。擺落遺高論。雕鏤出小詩。自然無不可。范蠡爾其誰。又和裴公回朝見寄云。盡瘁年將久。公今始暫閑。事隨憂共減。詩與酒俱還。放意機衡外。收身矢石間。秋臺風日迥。正好看前山。時牛李黨熾。裴介其間。累遭謗論。故公詩有高蹈之語。是歲拜京兆尹。

三年。罷京兆尹。爲兵部侍郎。尋拜吏部侍郎。

四年甲辰。有南溪始泛詩。是歲公以病罷吏侍。故有餘年諒無幾。休日愴已晚。自是病使然。非由取高寧。又有足弱不能步。自宜收朝蹟之句。十二月二日。卒於靖安里。年五十七。

張籍

短歌行云。青天蕩蕩高且虛。上有白日無根株。流光暫出還入地。使我年少不須臾。與君相逢勿寂寞。衰老不復如今樂。玉卮盛酒置君前。再拜願君千萬年。

節婦吟寄東平李司空云。君知妾有夫。贈妾雙明珠。感君纏綿意。繫在紅羅襦。妾家高樓連花起。良人執戟光明裏。知君用心如日月。事夫誓擬同生死。還君明珠雙淚垂。何不相逢未嫁時。

白紵歌云。皎皎白紵白且鮮。將作春衣稱少年。裁縫長短不能定。自持刀尺向姑前。復恐蘭膏污纖指。常遣傍人收墮珥。衣裳着時寒食下。還把玉鞭鞭白馬。

將軍行云。彈箏峽東有胡塵。天子擇日拜將軍。蓬萊殿前賜六纛。還領禁兵爲部曲。當朝受詔不辭家。夜向咸陽原上宿。戰車彭旌旌陽動。三十六軍聲上隴。隴頭戰勝夜亦行。分兵處處收舊城。胡兒殺盡陰磧暮。擾擾唯有牛羊聲。邊人親戚曾戰歿。今逐官軍收舊骨。磧西行見萬里空。樂府獨奏將軍功。

白頭吟云。請君膝上琴。彈我白頭吟。憶昔君前嬌笑語。兩情宛轉如縈素。宮中爲我起高樓。更開花池種芳樹。春天百草秋始衰。棄我不待白頭時。羅襦玉珥色未暗。今朝已道不相宜。揚州青銅作明鏡。暗中特持不見影。人心迴玄目無窮。眼前好惡那能定。君恩已去若再返。菖

蒲花青月長滿。

籍樂府詞清麗深婉。五言律詩亦平澹可喜。七言詩則質多文少。人才各自有宜。不可強文飾也。文昌有謝裴司空馬詩云。乍離華廡移蹄澁。初到貧家舉眼驚。此馬乃是一遲鈍。不能行。而多驚。詩人之微而顯。亦少其比。

寒食內宴云。朝光瑞氣滿宮樓。彩繡魚龍四面稠。廊下御廚分冷食。殿前香騎逐飛毬。千官盡醉猶教坐。百戲皆呈未放休。共喜拜恩侵夜出。金吾不敢問行由。

籍宿江上詩云。楚驛南渡口。夜深來客稀。月明見潮上。江靜覺鷗飛。旅次今已遠。此行殊未歸。離家久無信。又聽搗寒衣。或云。劉長卿餘干旅舍云。搖落暮天迥。丹楓霜葉稀。孤城向水閉。獨鳥背人飛。渡口月初上。鄰家漁未歸。鄉心正欲絕。何處搗征衣。概相類也。

籍字文昌。和州人。歷水部外郎。終主客郎中。

籍答鄱陽客云。江臯歲暮相逢地。黃葉霜前半夏枝。子夜吟詩向松桂。心中萬事喜君知。乃知藥名詩。自元和間。已爲之矣。

蕃漢斷消息。死生長別離。(句)長於送人處。憶得別家時。(句)流光漸出還入地。使我年少不須臾。(句)採樵莫採松與栢。生口口且堅。與爾作屋成家宅。(句)



右張爲取爲主客圖。

退之送東野序云。唐有天下。陳子昂。蘇元明。元結。李白。杜甫。李觀。皆以其所能鳴。其存而在下者。孟郊。東野。始以其詩鳴。其高出晉魏。不懈而及於古。其他淺淫乎漢氏矣。從吾遊者。李翱。張籍。其尤也。三子者之鳴。信善鳴矣。抑不知天將和其聲。使鳴國家之盛耶。抑將窮餓其身。思愁其心腸。而使自鳴其不幸耶。三子者之命。則存乎天矣。其在上也。奚以喜。其在下也。奚以悲。

籍詩善敘事。如拜豐陵云。歲朝園寢。遣公卿。學省班中亦攝行。身逐陵官。齊再拜。手持木鐸。叩三聲。寒更報點來三殿。曉炬分行照栢城。却下龍門看漸遠。口峯高處日初晴。

送令狐尙書東都留守云。朝廷重寄在關東。共說從前選上公。勳業新成大梁鎮。恩榮使賞洛陽宮。行口壘出天橋上。巡禮常過紫殿中。每領羣官拜章表。口開門仗日曠曠。

田司空入朝云。西來將相望兼雄。不與諸軍觀禮同。早變山東知順命。新收濟上立殊功。朝官敍謁趨門外。恩使宣迎滿路中。間闔曉開銅漏盡。身當受冊大明宮。

送汀州源使君云。曾成趙北歸官計。因拜王門最好官。爲郡整辭雙鳳闕。全家遠過九龍灘。山鄉只有輸蕉戶。水鎮應多養鴨欄。地僻尋常來客少。刺桐花發共誰看。

送李僕射愬赴鎮鳳翔云。由來勳業屬英雄。兄弟連雲列位同。先入賊城擒惡首。盡封筭管。元公旌幢獨繼家聲外。竹帛新添國史中。天子欲收秦隴地。故交移鎮古扶風。

送裴相公鎮太原云。盛德雄名遠近知。功高先乞守藩維。銜恩暫遣分龍節。署勅還同在風池。天子親臨樓上送。朝官齊出道邊辭。明年塞北諸蕃落。應赴生祠請立碑。

白樂天讀籍詩集云。張公何爲者。業文三十春。尤攻樂府詞。舉代少其人。姚合讀籍詩有詩云。妙絕江南曲。淒涼怨女詩。古風無敵手。新語是人知。

史 延

清明賜新火云。上苑連侯第。清明及暮春。九天初改火。萬井屬良辰。頌賜恩踰洽。承時慶亦均。翠煙和柳嫩。紅焰出花新。寵命尊三老。祥光燭萬人。太平當此日。空腹賀陶鈞。

大曆九年留守蔣渙試進士於東都延登第。

丁 澤

龜負圖詩云。天意將垂象。神龜出負圖。五方行有配。八卦義寧孤。作瑞旌君德。披文叶帝謨。乘流喜得路。逢聖幸存軀。蓮葉池通泛。桃花水自浮。還尋九江去。安肯曳泥途。

澤大曆十年試龜負圖詩爲東都第一。

樊宗師

蜀綿州越王樓詩序云綿之城帝猖獗。掀明威。瀾石碛。馳涪瀨。左陵。凌紅稜。躡天地。送行  
癸壬。且掬跼。踢于西北。蟠紅口。青越王。正故爲樓。重軒疊。飛門牕。蒙傘。塞塞子。始登。謂日月昏  
曉。可窺其背。雷電合。風雲遇。霜辛露酸。星辰介行。鬼神變化。草木頭繡。髻銜囊。芟。皆可察極。旣  
縈視其江帶。又極視其土崗。斷暴遠近。山嶮嶮。若闔之東皇。天原開。見荆山。我其黃河。矚然爲  
曲直。淚雨落。不可掩。因口其心曰。無害若其日。果星星過歸。尙悲不能解。重爲詩以釋。蓋不可  
顧。謂郡中諸君。能無有意綴以華艷。其念蓄云。

危樓倚天門。如闔星辰宮。攘題薄龍怪。洄洄繞雷風。徂秋試登臨。大謁屯喬空。不見西北  
路。考懷益雕窮。石瀨薄濺濺。土山杳穹穹。昔人創爲道。所適醜顏紅。今我茲之來。猶梭成歲功。  
輟田植科畝。游圃歌芳叢。

地財無叢厚。人室安取豐。旣乏富庶能。千萬慙文翁。

宗師字紹述。襄陽節度使澤之子。韓退之誌其墓曰。爲文必出於己。不襲蹈前人一言一  
句。何其難也。必出於仁義。其富若生蓄萬物。必具海瀕地負。放恣縱橫。無所統紀。然而不煩於  
繩削而自合也。嗚呼。紹述於斯術。其可謂至於斯極者矣。

李道昌

道昌。唐大曆十三年。爲蘇州觀察使。一日郡城外虎丘山有鬼題詩二首。隱于石壁之上。云。青松多悲風。蕭蕭聲且哀。南山接幽壟。幽壟空崔嵬。白日徒昭昭。不照長夜臺。雖知生者樂。魂魄安能迴。况復念所親。慟哭心肝摧。慟哭更何言。哀哉復哀哉。又曰。神仙不可學。形化空遊魂。白日非我朝。青松爲我門。雖復隔幽顯。猶如念子孫。何以遣悲惋。萬物歸其根。寄語世上人。莫厭臨芳纒。莊生問枯骨。王樂成虛言。道昌異其事。遂具奏聞。淮勅令致祭。道昌爲其文曰。嗚呼。萬古丘陵。化無再出。君若何人。能閑詩筆。何代而亡。謫人子姪。曾作何官。是誰仙室。寂寞夜臺。悲乎白日。不向紙上。石中隱出。桃源三月。深草垂楊。黃鸝百轉。猿聲斷腸。不題姓字。寧辨賢良。嗚呼哀哉。嘆昔先賢。空傳經史。終無再還。青松嶺上。嵯峨碧山。大唐正業。已記詩言。痛復痛分。何處賓。悲復悲。兮萬古墳。能作詩兮動天地。聲悲怨兮淚霑山。感我皇兮列清酌。願當生兮事明君。是時祭後。經數日。再有詩一絕于石。云。幽冥雖異路。平昔忝攻文。欲知潛味處。山北兩孤墳。後於寺山之地。果有二墳。極高大。荆榛藁茂。詢諸耆艾。竟不知何姓氏。至今猶存。皮日休和云。念爾風雅魂。幽咽猶能文。空令傷魂鳥。啼破山邊墳。陸龜蒙和云。靈氣猶不死。尙能成綺文。如何孤窆裏。猶自讀三墳。



唐詩紀事卷第三十五

陸暢 崔元翰 張建封 皇甫湜

李勣 麴信陵 孟郊 盧仝

劉叉 楊巨源 陳羽 王履正

彭伉 辛弦智 歐陽詹 焦郁

袁高

陸暢

暢字達天。吳郡人。韋臯雅所厚禮。天寶時。李白爲蜀道難。以斥嚴武。暢更爲蜀道易。以美臯。鄭注亂以前。少尹與注計事。斬注首。嘗吟對雪落句云。天人寧底巧。剪水作花飛。

又山齋翫月云。野情平生唯好月。新晴半夜視嬋娟。起來白壁書牕破。教漏清光落枕前。

又經崔諫議林亭云。蟬噪入雲樹。風開無主花。初爲江西王仲舒從事。拂衣去。後遇雲陽公主。下降百僚。舉暢爲僕相。詩皆頃刻而成。詠籬曰。勞將素手捲蝦鬚。瓊室流光更綴珠。玉漏報來過半夜。可憐潘岳立蜘蛛。詠行障曰。碧玉爲竿丁字成。鴛鴦繡帶短長聲。強遮天上花顏。

色不隔雲中笑語聲。

詔作催粧五言曰。雲安公主貴。出嫁五侯家。天母親調粉。日兄憐賜花。催鋪柏子帳。待障七香車。借問粧成未。東方欲曉霞。內人以其吳音捷才。以詩嘲之云。十二層樓倚翠空。鳳鸞相對立梧桐。雙成走報監門衛。莫使吳歛人漢宮。（或曰宋若蘭姊妹作）陸酬曰。粉面仙郎遣世朝。偶逢神女學吹簫。須教翡翠聞王母。不柰烏鴛噪鵲橋。六宮大哈。別賜宮錦。楞伽瓶唾盂各一。

暢謁韋臯。作蜀道易詩云。蜀道易。易於履平地。臯大喜。臯薨。朝廷欲繩其既往之事。復閱先進兵器。上皆刻定秦二字。不相與者。因造成罪名。暢上疏理之曰。臣在蜀日。見造所進兵器。定秦者。匠名也。由此得釋。段成式云。暢。江東人。語多差誤。人以爲劇語。初娶董溪女。每旦婢進澡豆。暢輒沃水服之。或曰。君爲貴門女婿。幾多樂事。陸曰。貴門苦禮法。俾子食辣麩。殆不可過。張籍贈暢云。共踏長安街裏塵。吳州獨作未歸身。背門舊宅今誰住。君過西塘與問人。趙麟儀質瑣陋成名。後以辭能爲僨相。能詩曰。第一莫教蛛太過。緣人衣帶上人頭。又火爐床上平身立。便與夫人作鏡臺。或曰。暢羨而能罵。

崔元翰

名鵬以字行。舉進士。年五十矣。禮侍于邵。以其文口異等。曰。後當司詔令。竇參秉政。引知制誥。其訓詞溫厚。有典誥風。以剛褊。能爲比部郎中卒。晚年方取應。成爲首捷。京兆解頭。禮部狀頭。宏詞勅制科。三等勅頭。權德輿謂其文如黃鐘玉磬。琮璧琬琰。奏於懸間。列在西序。其章者。雖漢廷諸公。無以加也。然清剛而不能容物。介特寡徒。晚達中廢。斯亦命之所賦也。

清明臥病不得遊開元寺詩云。山色入層城。鐘聲臨複岫。乘間息邊事。探異憐春候。曲閣下重塔。迴廊遙對霤。石間花遍落。草上雲時覆。晴火見樵人。飲泉逢野獸。道情親法侶。時望登朝右。執憲糾姦邪。刊書正訛謬。茂才當時選。公子生人秀。贈答纒篇草。歡娛重用舊。垂簾獨衰疾。擊缶酬金奏。

奉和聖製重陽日百寮曲江宴示懷詩云。偶聖覲昌期。受恩慙弱質。幸逢良宴會。況是清秋日。遠岫對壺觴。沉瀾映辮紱。魚烹備豐膳。象鳳調鳴律。薄劣廁英髦。歡娛忘衰疾。平皇行鳴下。曲渚雉鳧出。沙岸菊開花。霜枝果垂實。天文見成象。帝念資勤恤。探道得玄珠。齋心居特室。豈如橫汾唱。其事徒嬌逸。

張建封

字本立。南陽人。少喜文章。尙氣節。正元四年。拜御史大夫。徐泗濠節度使。十三年來朝。帝



不待日。召見延英殿。朝會赴大夫班。以示殊寵。建封賦朝天行以獻。遠鎮帝賦詩餞之。又賜所持鞭曰。卿節誼歲寒。故用此爲况。建封又賦詩自警勵。十六年卒。許孟容韓愈皆奏置幕府。

權載之叙其文曰。公贊勳伐表。丘隴銘器。叙事放言詣理。皆與作者方駕。而歌詩特優。有仲宣之氣質。越石之清拔。如雪濤溟漲。浩漾無際。而天球夜光。往往在焉。其入覲也。獻朝天行一篇。因喜氣以攄肝膈。覽其詞者。見公之心焉。其還鎮也。德宗皇帝紆天文以送別。洪恩異倫。輝動中朝。至於內庭錫宴。君唱臣和。皆酌六義之英。而爲一時之盛。夫文之病也。或牽拘而不能騁。或犇放而不自還。公則財成心匠。揮斥細故。英華感慨。卓爾其闕大。析理研幾。泊然其精微。全才逸氣。與勳力和直。盡在是矣。

皇甫湜

湜爲出世行云。生當爲大丈夫。斷羈羅。出泥塗。四散號呶。擾傲無隅。埋之深淵。飄然上浮。騎龍披青雲。汎覽遊八區。經泰山。絕大海。一長吁。西摩月鏡。東弄日珠。上括天之門。直指帝所居。羣仙來迎塞天衢。鳳凰鸞鳥粲金輿。音聲嘈嘈滿太虛。旨飲食兮照庖廚。食之不飮。飮不盡。使人不陋復不恐。旦且狎玉皇。夜夜御天姝。當御者幾人。百千爲醜。宛宛舒舒。忽不自知。支消體化膏露明。湛然無色茵席濡。俄而散漫。裴然虛無。翕然復搏。搏久而蘇。精神如太陽。霍然照

清邵四支爲琅玕。五藏爲瑤瑱。顏如芙蓉。頂爲醍醐。與天地相終始。浩漫爲歡娛。下顧人間。濁糞蠅蛆。

湜不善詩。退之和公安陸渾二篇。可以想見其怪奇。退之詩曰。皇甫作詩止睡昏。辭誇出眞。遂上焚。要余和。增怪又煩。雖欲悔舌不可捫。言其語怪而好譏罵也。

湜字持正。睦州新安人。擢第爲陸渾尉。仕至工部郎中。下急使酒。數忤同省。求分司東都留守。裴度辟爲判官。

樂天哭皇甫七郎中云。志業過玄晏。詞華似禰衡。多才非福祿。薄命是聰明。不得人間壽。還留身後名。涉江文一首。便可敵公卿。（持正文甚多。涉江歌一篇尤奇。）

### 李翱

翱刺史郎州。贈藥山高僧。惟儼詩云。練得身形似鶴形。千株松下兩函經。我來問道無餘說。雲在青霄水在瓶。再贈詩曰。選得幽居愜野情。終年無送亦無迎。有時直上孤峯頂。月下披雲嘯一聲。

唐時文人李習之。不能爲詩。韓吏部集有習之兩句云。前之巨灼灼。此去信悠悠。殊無可取。鄭州嘗掘地得刺史李翱戲贈詩云。縣君愛博渠。遶水姿行遊。鄙性樂山野。掘地便成溝。兩

岸植芳草。中間漾清流。所尚既不同。搏鑿各自修。從他後人見。景趣誰爲幽。此自一李翱。非習之也。唐書習之傳。亦不記爲鄭州。王深甫編次習之集。乃收入此詩。

翱在潭州席上。有舞柘枝者。顏色憂悴。殷堯藩侍御當筵贈詩曰。姑蘇太守青娥女。流落長沙舞柘枝。滿坐繡衣皆不識。可憐紅臉淚雙垂。翱詰其事。乃姑蘇臺韋中丞愛姬所生之女也。夏卿之裔。正卿之姪。曰。妾以昆弟天折。委身樂部。恥辱先人。言訖涕咽。情不能堪。亞相爲之呼嘆。且曰。吾輩族姻舊。速命更其舞服。飾以桂襦。延與韓夫人相見。夫人吏部之子。顧其言語清楚。宛有冠蓋風儀。遂於賓榻中選士而嫁之。舒元輿侍郎聞之。自京馳詩曰。湘江舞罷忽成悲。便脫蠻靴出絳幃。誰是蔡邕琴酒客。魏公懷舊嫁文姬。

習之爲郎州刺史。入爲禮部郎中。出刺廬州。入爲中書舍人。歷遷桂管湖南觀察。山南東道節度。其與僧惟儼詩。及其女識盧儲登第事。皆習之也。然習之學韓愈者。其與樂山僧詩。是非未可知也。歸妹於楊嗣復。歸女於盧求。鄭亞。杜審權。故携畋讓能。皆習之之甥。皆爲宰相云。其在鄭州者。非習之也。

## 蜀信陵

信陵正元元年進士。爲舒州望江令。卒。有吳門送客詩云。亂山吳苑外。臨水讓王祠。素是

傷情處。春非送客時。不須愁落日。且願駐青絲。千里會應到。一罇誰共持。

信陵移居洞庭詩云。重林將疊嶂。此處可逃秦。水隔人間世。花開洞裏春。荷鋤分地利。縱酒樂天真。萬事更何有。吾今已外身。

白樂天感遇詩云。我聞望江縣。勅令撫惻嫠。在官有仁政。名不聞京師。身歿欲歸葬。百姓遮路岐。攀轅不得去。留葬此江湄。至今道有名。男女涕皆垂。無人立碑碣。唯有邑人知。

### 孟郊

李翱薦郊於張建封云。茲有平昌孟郊。正士也。伏聞執事舊知之。郊爲五言詩。自前漢李都尉。蘇屬國。及建安諸子。南朝二謝。郊能兼其體而有之。李觀薦郊於梁肅。補闕書曰。郊之五言詩。其有高處。在古無上。其有平處。下顧南謝。韓愈送郊詩曰。在詩三百首。杳默成池音。彼二子。皆言知也。豈欺天下之人哉。郊窮餓不得安養其親。周天下無所遇。作詩曰。食齋腸亦苦。強歌聲無歡。出門卽有礙。誰謂天地寬。其窮也甚矣。凡賢人奇士。自以所負不苟合于世。是以雖見之。難得而知也。見而不能知其賢。如勿見而已矣。知其賢而不能見。如勿知其賢而已矣。用而不能盡其才。如勿用而已矣。盡其才而容讒人之所聞者。如勿盡其才而已矣。故見賢而能知。知而能用。用而能盡其才。而不容讒人之所聞者。天下一人而已矣。郊下第詩曰。棄置復棄

置情如刀劍傷。又再下第詩曰。兩度長安陌。空將淚見花。而後及第有詩曰。昔人齷齪不足嗟。今朝曠蕩恩無涯。青春得意馬蹄疾。一日看盡長安花。一日之間。花卽看盡。何其速也。果不達。韋莊奏請追贈十餘人。其一孟郊。字東野。尙古風詩。與李光韓退之爲友。貞元十二年及第。佐徐州張建封幕。卒。私諡曰貞耀先生。

賈島詩曰。身歿聲名在。多應萬古傳。寡妻無子息。破宅帶林泉。塚近登山道。詩隨過海船。故人相弔處。斜日下寒天。

郊字東野。湖州人。年五十。擢調溧陽尉。鄭餘慶爲東都留守。表爲水陸運判官。鎮興元。表爲參謀。卒。

馮之答郊詩云。規模背時利。文字覷天巧。人皆餘酒肉。子獨不得飽。纔春思已亂。始秋悲。又攪朝餐動。及午夜諷常至。明名聲暫羶腥。腸肚鎮煎炒。古心雖自鞭。世路終難拗。弱拒喜張臂。猛擊閑縮爪。見倒誰肯扶。從噴我須齮。張爲取郊青山輟爲塵。白日無閑人。食齋腸亦苦。強歌聲無歡。欲知萬里情。曉臥半床月。等句。以爲清奇僻苦。主遊子吟云。慈母手中線。遊子身上衣。臨行密密縫。意恐遲遲歸。誰將寸草心。報得三春輝。

烈女操云。梧桐相待老。鴛鴦會雙死。正女貴徇夫。捨生亦如此。波瀾誓不起。妾心井中水。

天寒色蒼蒼。北風叫枯桑。厚冰無裂文。短日有冷光。敲石不得火。壯陰奪正陽。苦調更何言。久吟成此章。此郊苦寒吟也。或曰。郊烏善言貧。此詩與烏詩云。臥聞西牀琴。凍拆兩三絃。鬢邊雖有絲。不堪織寒衣。正相侔矣。

楚怨云。秋入楚江水。獨照汨羅魂。手把芰荷泣。意愁珠淚翻。九門不可入。一犬吠千門。塘下行云。塘邊日欲斜。年少早還家。徒將白羽扇。調妾木蘭花。不是城頭樹。那棧來去鷗。臨池曲云。池中春荷葉。如帶紫菱成。角蓮子大。羅裙蟬鬢倚。迎風雙雙伯勞飛。向東。

偷詩之作。餓犬齶枯骨。自喫饑饉涎。今文與古文。各各稱可憐。亦如嬰兒食。餒桃口旋旋。惟有一點味。豈見逃景延。繩床猶坐翁。默吟有所傳。終當罷文字。別著逍遙篇。從來文字淨。君子不以賢。

贈別崔純亮云。食齋腸亦苦。強歌聲無歡。出門卽有礙。誰謂天地寬。有礙非遐方。長安大道傍。小人智慮險。平地生太行。鏡破不改光。蘭死不改香。始知君子心。交久道益彰。君心與我懷。離別俱迴遑。譬如浸蘗泉。流苦日已長。忍泣目易衰。忍髮形易傷。項籍豈不壯。賈生豈不良。當其失意時。涕泗各滿裳。古人勸加殮。此殮難自強。一卮九祝嘏。一嗟十斷腸。况是兒女怨。怨氣凌彼蒼。彼蒼若有知。白日下清霜。今朝始驚呼。白日空茫茫。

落第云。曉月難爲光。愁人難爲腸。誰言春物榮。獨見花上霜。鵬鴉失勢病。鷓鴣假翼翔。棄置復棄置。情如刀劍傷。

再下第云。一夕九起嗟。夢短不到家。兩度長安陌。空將淚見花。

盧仝

有所思云。當時我醉美人家。美人顏色嬌如花。今日美人棄我去。青樓珠箔天之涯。娟娟常娥月。三五二八盈又缺。翠眉蟬鬢生別離。一望不見心斷絕。心斷絕。幾千里。夢中醉臥巫山雲。覺來淚滴湘江水。兩岸花木深。美人不見愁人心。含愁更奏綠綺琴。調高絃絕無知音。美人兮。美人。不知爲暮雨兮爲朝雲。相思一夜梅花發。忽到窗前疑是君。

樓上女曲云。誰家女兒樓上頭。指揮婢子掛簾鉤。林花撩亂心之愁。卷却羅袖彈空篴。箜篌歷亂五六絃。羅袖掩面啼向天。相思絃斷情不斷。落花紛紛心欲穿。心欲穿。憑欄杆。相憶柳條綠。相思錦帳寒。直緣感君恩愛。迴顧使我雙淚常珊珊。我有嬌態待君笑。我有嬌娥待君掃。鶯花爛漫君不來。及至君來花已老。心腸寸斷誰得知。玉階蠶歷生青草。

秋夢行云。客行一夜秋風起。客夢南遊渡湘水。湘水泠泠徹底清。二妃怨處無限情。娥皇不語啓嬌鬢。女英目成轉心慳。長眉入鬢何連娟。肌膚白玉秀且鮮。徘徊共詠東方日。沉吟再

南南風絃。聲斷續。思綿綿。中含幽意。兩不宣。慙慙纖手。擎破夢。中霄寂寞。心悽然。心悽然。腸亦絕。寐不寐。兮玉枕寒。夜深夜。兮霜似雪。鏡中不見雙翠眉。臺前空掛纖纖月。纖纖月。盈復缺。娟娟似眉意難訣。願此眉兮如此月。萬里萬里光不滅。

全居東都退之爲河南令。愛其詩。厚禮之。自號玉川子。嘗爲月蝕詩。譏切元和朋黨。

月蝕詩云。新天子卽位五年。歲次庚寅。斗柄插子。律調黃鍾。森森萬木。夜殭立。寒氣與蟄。頑無風。爛銀盤。從海底。出來照我草屋東。天色紺滑。凝不流。冰光交貫。寒曠曠。初疑白蓮花。浮出龍王宮。八月十五夜。此並不可雙。此時怪事發。有物吞食來。輪如壯士斧。斫壞桂似雪山風。拉摧百鍊鏡。照見膽。平地埋寒灰。火龍珠飛出。腦却入蚌蛤胎。摧輪破壁。眼看盡。當天一搭如焙煤。磨縱滅跡。須臾間。便似萬古不可開。不料至神物。有此大狼狽。星如撥沙出。爭頭事光大。如婢娃暗燈。揜(烏啟切)。葵如玳瑁。今夜吐嚼長如虹。孔隲千道窮。戶列玉川子。涕泗下。中庭獨自行。念此日月者。太陰太陽精。皇天要識物。日月乃化生。走天汲汲勞。四體與夫作。眼行光明。此眼不自保。天公行道何由行。吾見陰陽家有說。望日蝕。月月光滅。朔月掩。日日虧。缺兩眼不相攻。此說吾不容。又孔子師老子。云五色令人目盲。吾恐天似人。好色卽喪明。幸且非春晴。萬物不嬌榮。青山破瓦色。綠水冰崢嶸。花枯無女豔。鳥死沉歌聲。頑冬何所好。偏使一目盲。



傳說古老說。月蝕蝦蟇精。徑圍千里入汝腹。汝此癡骸阿誰生。何從海窟來。便解緣青冥。恐是  
睚眦間。揜塞所化成。黃帝有四日。帝舜重暉明。二帝懸四日。四海生光輝。吾不遇二帝。混漭不  
可知。何故童子坐。受虫豸欺。長嗟白兔擣靈藥。恰似有意防姦非。藥成滿臼不中度。委任白  
兔夫何爲。憶昔堯爲天。十日燒九州。金鑠水銀流。王焰（炒）丹砂焦。六合烘爲窰。堯心增百  
憂。帝見堯心憂。勃然發怒決洪流。立擬波殺九呂妖。天高日走沃不及。但見萬國赤子鱗鱗生  
魚頭。此時九御導九日。爭持節幡麾幡旒。駕車六九五十四頭。蛟螭虬。掣電九火輻。汝若蝕開  
齟齬輪。御辮執索相願鈎。推蕩轟轟入汝喉。紅鱗燄鳥燒口快。翎鬣倒側聲醜。鄒。撐腸拄肚。礪  
如山丘。白可飽死更不偷。不獨填飢坑。亦解堯心憂。恨汝當食藏頭壓腦不肯食。不當食張唇  
哆。嗜食不休。食天之眼養逆命。安得天帝請汝劉。嗚呼。人養虎。被虎齧。天昏暮。得瘖疾。蝦蟇敢  
將天眼睛。乃知恩非類。一一自作孽。吾見患眼人。必索良工訣。想天不異人。愛眼固應一。安得  
嫦娥氏。來習扁鵲術。手操春喉戈。去此睛上物。初見猶朦朧。既久如抹漆。但恐功張成。便此不  
吐出。王川子又涕泗下。心禱再拜額。榻沙土中地上蟻虱。臣全告訴帝。天皇。臣心有鐵一寸。可  
剗妖菑癡腸。上天不爲臣立梯磴。臣血肉身無由飛上天楊。天光先封辭。付與赤心風。越排闥  
闔入紫宮。密邇玉几前。擘圻奏上臣。全頑愚胸。敢死橫干天。代天謀其長。東方蒼龍角插戟。虎

拽風當。必開明堂。統領三百六十鱗蟲。坐理東方宮。月蝕不救援。安用東方龍。南方火鳥赤潑血。項長尾短飛跋躐。頭戴丹冠高達拚。月蝕烏宮十二度。烏爲居停主人不覺察。貪向何人家。行赤口毒舌。毒虫頭上喫却月不啄殺。虛貶鬼眼明口窳。（上音挾下音血）烏罪不可雪。西方攫虎立崎崎。（音几）斧爲牙。鑿爲齒。偷犧牲。食封豕。大蟆一巒。固當軟美。似見不見。是何道理。爪牙根天不念天。天若准擬北方寒。龜被蛇縛。藏頭人怒。如入獄。蛇筋束緊束破。寒龜夏龜一種味。且當以其肉克臙。死殼沒信處。唯堪支床脚。不堪鑽灼與天下。歲星主福德。官爵奉董秦。忍使黔婁生。覆尸無衣巾。天失眠不口。歲星胡其仁。熒惑矍鑠翁。執法大不中。月明無罪過。不糺食月虫。年年十月朝。太微支盧謫。罰何災兇。土星與土性相背。反養福德生禍害。到人頭上死破敗。今夜月蝕安可會。太白真將軍。怒激鋒鏑生。常（州與太宗御名同）州陣斬。酈定進。項骨脆甚春蔓菁。天唯兩眼失一眼。將軍何處行。天兵辰星任廷尉。天律自主持。人命在盆底。固應樂見天盲時。天若不肯信。試喚臯陶鬼。一問。一如今宜三台文昌宮。作天上紀綱。環天二十八宿。磊磊尙書郎。整頓排班行。劍握他人將。一四太陽側。一四天帝旁。操斧代大匠。兩手不怕傷。弧矢引滿反射人。天狼呀啄明煌煌。癡牛與駮女。不肯勤農桑。徒勞含淫思。且夕遙相望。蚩尤簸箕弄句朔。始槌天鼓鳴璫琅。枉天能蛇行。眉目森森張。天狗下舐地。血流何滂。

滂。譎險萬萬黨。構架何可當。昧目齊成就。害我光明王。請留北斗相北極。指揮萬國懸中央。此外盡掃除。堆積如山崗。贖我父母光。當時帝星沒。星雨如坵漿。似天會事發。叱喝誅姦強。何故中道廢。自遺今日殃。善善惡惡郭公所以亡。願天神聖心。無信他人忠。玉川子辭訖。風色緊格。近月黑暗邊。似有動劍戟。須臾癡蟆精。兩吻自決抑。初露半箇壁。漸吐滿輪魄。衆星盡原赦。一蟆獨誅磔。腹肚忽脫落。依舊掛穹碧。光彩未蘇來。慘淡一片白。奈何萬里光。受此吞吐厄。再得見天眼。感荷天地力。或問玉川子。孔子修春秋。二百四十年。月蝕盡不收。今子咄咄辭。固合孔意不。玉川子笑答。或請聽逗遛。孔子父母魯。諱魯不諱周。書外書大惡。故月蝕不見收。余命唐天口。食唐土。唐禮過三。唐樂過五。小猶不說。大不可數。災沴無有大小瘡。安得引衰周研覈。其可否。日分晝。月分夜。辨寒暑。一主刑。一主德。政乃舉。孰爲人面上。一目偏可去。願天完兩目。照見萬方土。更不替萬萬古。

與馬異結交詩。天地日月如等閑。虛空四十無往還。唯有一片心。脾胃。巉巖崢嶸元鬱律。刀劍爲峯。萼平地放着。高如崑崙山。天不容。地不受。日月不敢偷照耀。神農畫八卦。鑿破天心胸。女媧本是伏羲婦。恐天怒。擣鍊五色石。引日月之斜。五星之縷。把天補。補了不肯歸。登家。走向日中放老鸚。月裏栽桂養蝦蟆。天公發怒罰龍蛇。此龍此蛇得死炳。神農合藥救死病。天怪

神農黨龍蛇。罰神農爲牛頭。合載元氣車。不知藥中有毒藥。藥煞元氣。天不覺。爾來天地不神。聖日月之光無正定。不知元氣本不死。忽聞空中喚馬異。馬異若不是祥瑞。空中敢道不容易。昨日同不同。異自異。是謂大同而小異。今日同自同。異不異。是謂同不往兮異不至。直當中兮動天地。白玉璞裏斷出相思心。黃金礦裏鑄出相思淚。忽聞空中崩崖倒谷聲。絕勝明珠千萬斛。買得西施南越一雙婢。嬌饒惱殺人。凝脂爲腰翡翠裙。唯解畫眉朱點唇。自從獲得君。敲金攪玉凌浮雲。却退顧一雙婢子何足云。平生結交苦少人。憶君眼前如見君。青雲欲開白日沒。天眼不見此奇骨。此骨縱橫奇又奇。千歲萬歲枯松枝。半半殆。歷山谷盤根。盤節成蛟螭。忽雷霹靂卒風暴雨撼不動。欲動不動。千變萬化。慙是鱗皴皮。此奇怪物不可欺。盧全一見馬異文章。酌得馬異胸中事。風姿骨木恰如此。是不是。一字。

劉 又

寒上逢盧全云。直到桑乾北。逢君夜不眠。上樓腰脚健。懷字眼精穿。斗柄寒垂地。河源涼徹天。羈魂泣相向。何事有詩篇。

自問云。自問彭城子。何人接汝顛。酒腸寬似海。詩膽大於天。斷劍徒勞匣。枯琴無復絃。相逢不得合。賴是向秋泉。

又節士也。少放肆。爲俠行。因酒殺人亡命。會赦出。更折節讀書。能爲歌詩。然恃故時所負。不能俛仰貴人。聞韓愈接天下士。步謁之。作冰柱雪車二詩。出盧孟右。樊宗師見。爲獨拜。後以爭語不能下賓客。因持愈金數斤去。曰。此諛墓中人得耳。不若與劉君爲壽。愈不能止。歸齊魯。不知所終。

楊巨源

春日獻聖壽無疆詞云。代是文明晝。春當宴喜時。爐煙添柳重。宮漏出花遲。漢典方寬律。周官正探詩。碧霄吹鳳吹。紅日在龍旗。造化膺神契。陽和沃聖慈。每因隨百獸。率舞奉丹墀。  
(梁正明三年。薛廷珪以宮漏出花遲爲詩題。)

張弘靖三世掌書命在台。坐巨源詩曰。伊陟無聞祖。韋賢不到孫。時稱其能。與張氏說家門。巨源在元和時。詩韻不爲新語。體律務實。功夫頗深。且暮吟詠不輟。年老頭搖。人言吟詩所致。

早春卽事呈劉員外云。明朝晴暖卽相隨。肯信春光被雨欺。且任文書堆案上。免令杯酒負花時。馬啼經歷須應遍。鶯語丁寧已怪遲。更待雜芳成艷錦。鄴中爭唱仲宣詩。

送章孝標校書歸杭州因寄白舍人云。曾過靈隱江邊寺。獨宿東樓看海門。潮色銀河鋪

碧落日光金柱出紅盆。不妨公事資高臥。無限詩情要細論。若訪郡人徐孺子。應須騎馬到沙林。

巨源以三刀夢益州。一箭取遼城得名。故樂天詩云。早聞一箭取遼城。相識雖深有故情。清句三朝誰是敵。白鬚四海半爲兄。貧家雉草時時入。瘦馬尋花處處行。不用更教詩過好。折君官職是虛名。巨源後拜省郎。樂天復以詩賀云。文昌新入有光輝。紫界宮墻白粉闌。曉日鷄人傳漏箭。春風侍女護朝衣。雪飄歌句高難和。鶴拂煙霄光口飛。官職聲名俱入手。近來詩客似君稀。

巨源字景口口中時爲河中少尹。

何事慰朝夕。不踰詩酒情。山河空道路。蕃漢共刀兵。禮樂新朝市。園林舊弟兄。向風一點淚。寒晚暮江平。（張爲取此作爲主客圖。）

送裴中丞出使云。一清淮向假朝綱。金印初迎細柳黃。辭闕天威和雨露。出關春色避風霜。龍韜何必陳三略。虎旅由來肅萬方。宣諭生靈真重任。回軒應問石渠郎。

送絳州盧使君云。應將清靜結心期。又共陽和到郡時。絳老問年須算字。庾公逢月要題詩。朱欄迢遞因高勝。粉蝶清明欲下遲。他日徵還作霖雨。不須求賽敬亭祠。

送司徒童子云。衛多君子曾多儒。七歲開天笑舞雩。光彩春風初轉蕙。性靈秋水不藏珠。兩經在口知名小。百拜垂髫稟氣殊。况復元侯旌爾善。桂林枝上得鸚雛。

送人過衛州云。憶昔征南府內遊。君家東閣最淹留。縱橫聯句長侵曉。次第看花直到秋。論舊舉盃先下淚。傷離臨水更登樓。相思前路幾回首。舊眼青山過衛州。

寄昭應王丞云。武皇金輅輾香塵。每歲朝元及此辰。光動泉心初浴日。氣蒸山腹總成春。謳歌已入雲韶曲。詞賦方歸侍從臣。瑞鶴朝朝猶望幸。天教赤縣有詩人。

寄江州白司馬云。江州司馬平安否。惠遠東林住得無。溢浦曾聞似衣帶。廬峯見說勝香爐。題詩歲晏離鴻斷。望闕天遙病鶴孤。莫謾勾牽雨花社。青雲依舊是前途。

古意贈王常侍云。繡戶紗窻北里深。香風暗動鳳簪。組紉長在佳人手。刀尺空搖寒女心。欲學齊謳逐雲管。還思楚練拂霜砧。東家少婦當機織。應念無衣雪滿林。

贈張將軍云。關西諸將掛容光。獨立營門劍有霜。知愛魯連歸海上。肯令王粲在平陽。天晴紅幟當山滿。日暮清笳入塞長。年少高功人最美。漢壇煙樹日蒼蒼。

贈李傅云。知因公望掩能文。誓激明誠在致君。曾罷雙旌瞻白日。猶將一劍許黃雲。搖窗竹色留僧語。入院松聲共鶴聞。莫被此心生晚計。鎮南人憶杜將軍。

述舊紀勳寄太原李光顏侍中云。玉舍含悽見鴈行。北垣新詔拜龍驤。弟兄間世眞飛將。貔虎歸時似故鄉。鼓角因風飄朔氣。旌旄映水發秋光。河源收地心猶壯。笑向西風萬里霜。

又云。倚天孤劍截雲孤。報國縱橫見丈夫。五載登壇眞宰相。六重分闢正司徒。曾聞轉戰平堅寇。共說題詩壓腐儒。料敵知機在方寸。不勞心力講陰符。

上裴中丞云。六年西掖弘湯誥。三捷東堂總漢科。政引風霜成物色。語回天地到陽和。清威更助朝端重。聖澤曾隨筆下多。應笑白鬚揚執戟。可憐春日老如何。

和人與人分惠賜冰云。天水藏來玉墮空。先頒密署幾人同。映盤皎潔非關露。當扇清涼不在風。瑩質方從綸閣內。凝輝更備錦帷中。麗詞珍貺難雙有。迢遞金輿殿角東。

觀打毬有作云。親掃毬場如砥平。龍驤驟馬曉光晴。入門百拜瞻雄勢。動地三軍唱好聲。玉勒回時霑赤汗。花驥分處拂紅纓。欲令四海氛煙靜。杖底纖塵不敢生。

贈隣家老將云。白首羽林郎。丁年戍朔方。陰天瞻磧路。秋日渡遼陽。大漠寒山黑。孤城夜月黃。十年依幕食。萬里帶金瘡。拂雪陳師祭。衝風立教場。箭飛瓊羽合。旌動火雲張。虎翼分營勢。魚鱗擁陣行。誓心清塞色。鬪血雜沙光。戰地晴輝薄。軍門曉氣長。寇深爭暗襲。關迥勒春防。身賤竟何訴。天高徒自傷。功成封寵將。力盡到貧鄉。雀老方悲海。鷹衰却念霜。空餘孤劍在。開



匣一雷裳。

酬崔博士云。自知頑叟更何能。唯學雕虫謬見稱。長被有情邀唱和。近來無力更祇承。青松樹杪三千鶴。白玉壺中一片冰。今日爲君書壁右。孤城莫怕世人憎。

酬盧員外云。謝傅旌旗控上游。盧郎嶮俎借前籌。舜城風土臨清廟。魏國山川在口樓。雲寺當時接高步。水亭今日又同遊。滿筵舊有笙歌在。獨有羊曇最淚流。

酬于駙馬云。綺陌塵香曙色分。碧山如畫又逢君。蛟藏秋月一片水。驥驟晴空千尺雲。戚里舊知何駙馬。詩家今得鮑參軍。陽和本是煙霄曲。願向花間次第聞。

又云。芳時碧落心應斷。今日清詞事不同。瑤草秋殘仙圃在。綵雲天遠鳳樓空。晴花曾送金羈影。涼葉還生玉箏風。長得聞詩慳自足。會看春露濕蘭叢。

酬裴舍人見寄云。誰道重遷是舊班。自將霄漢比鄉關。二妃樓下宜臨水。五老祠西好看山。再葺吾廬心已足。每來公府路常閑。詩陪亞相逾三紀。石笥煙霞不共攀。

酬崔駙馬惠賸百張兼貽四韻云。百張雲樣亂花開。七字文頭艷錦回。浮碧空從天上得。殷紅應自日邊來。捧持價重凌口葉。封裹香深笑海苔。滿篋清光應照眼。欲隨凡韻輒徘徊。

元微之憶楊十二詩云。楊子愛言詩。春天好詠時。戀花從馬滯。聯句放盃遲。日映含煙竹。

風牽臥柳絲。南山更多興。須作白雲期。

五源善敘事。胡二十以戶部口度支。乃賀以詩曰。雄拜和承聖主恩。於是有雄拜之日。

陳羽

羽湘妃云。二妃怨處雲沉沉。二妃怨處湘江深。商人酒滴廟前草。蕭颯風生班竹林。

雪詩云。千門萬戶雪花浮。點點無聲落硯溝。全似玉塵消更積。半成冰片約還流。光含曙色清天苑。輕逐微風繞御樓。平地已霑盈尺潤。年豐須荷富人侯。

宴楊駙馬山亭云。垂楊拂岸草茸茸。綉戶窗前花影重。鱸下玉盤紅縷細。酒開金甕綠醅醲。中朝駙馬何平叔。南國詞人陸士龍。落日泛舟同醉處。回潭百丈映千峯。

贈子云。或棹孤舟或杖藜。尋常適意釣長溪。草堂竹徑在何處。落日孤煙寒渚西。

題夫差廟云。姑蘇臺上千年木。刻作夫差廟裏神。冠蓋寂寥塵滿坐。不知簫鼓樂何人。

韓退之有落葉送羽云。誰云少年別。流淚各霑衣。羽與退之同年登第。

羽夜別溫商梓州云。鳳凰城裏花時別。元武江邊月下逢。客舍莫辭先買酒。相門曾忝舊登龍。迎風騷屑千家竹。隔水悠揚午夜鐘。明日又行西蜀去。不堪天際遠山重。

春園卽事云。水隔羣物外。夜深風起頻。霜中千樹橘。月下五湖人。聽鶴忽忘寢。見山如得

鄰。明年還到此。共看洞庭春。

送戴端公赴容州云。分命諸侯重。葳蕤繡服香。八蠻治險路。千騎踏繁霜。山斷旌旗出。天晴劍佩光。還將小戴禮。遠去化南方。

送友人及第歸江東云。五陵春色泛花枝。心醉花前遠別離。落第恥爲關上客。成名空羨里中兒。都門雨歇愁分處。山店殘燈夢到時。家住洞庭多釣伴。同來相賀話相思。

小江驛送陸侍御歸湖上山云。鶴唳天邊秋水空。荻花蘆葉起西風。今夜渡頭何處宿。會稽山在月明中。

王履

異方霑瑞氣。千呂見青雲。表聖與中國。來王謁大君。迎祥殊大樂。叶慶賴橫汾。自是明時起。非將觸石分。映霄難辨色。從吹作成文。須使流千載。垂芳在典墳。（青雲千呂）

履貞元七年青雲千呂詩登第

彭伉

聖布中區化。符祥異域雲。含春初應呂。暈碧已成文。東起隨風煖。西流共日曛。升時嘉異月。爲慶等凝汾。輕與晴煙比。高將曉霧分。飄飄如可致。願此翊明君。

右伉正元七年杜黃裳下試青雲干呂詩登第。伉宜春人。既登第。伉妻族有湛賁者。猶爲郡吏。伉妻卽湛姨也。妻族賀伉。坐皆名士。伉居客右。一坐盡傾。而賁飯於後閣。其妻責之曰。男子不能自勵。窘辱如此。復何顏。賁感其言。力學。一舉擢第。正元十二年第。伉方郊遊。聞之。失聲墜驢。袁人諺曰。湛郎及第。彭伉落驢。至今袁州之西。有落驢橋。

### 辛弘智

弘智國子監進士。賦詩曰。君爲河邊草。逢春心剩生。妾如臺上鏡。得照始分明。同房常定宗。改始字爲轉字。遂爭之。皆云。我作乃下牒。見博士羅道琮判云。昔五言定表。以理切稱奇。今一言競詩。取詞多爲主。詩歸弘智。轉還定宗。以狀牒知。任爲公驗。

### 歐陽詹

字行周。泉州人。初見拔於常袞。後見知於退之。元賓。終於四門助教。李貽孫序其文曰。君之文。周詳切於情。故事叙重複。宜其掌代文柄。以變風雅。一命而卒。天其絕乎。子價早死。孫澥。銅雀妓云。蕭條登古臺。迴首黃金屋。落葉不歸林。高陵永爲谷。粧容徒自麗。舞態閱誰目。惆悵總帷前。歌聲苦於哭。

晨裝行云。村店月西入。山林鳥鷓聲。旅裝徹夜席。束囊事晨征。寂寂人尙眠。悠悠天未明。

豈無偃息心。所務前有程。

蜀中將歸留辭韋相公云。寧體卽雲構。方前恆玉食。貧居豈及此。要欲懷歸憶。在夢關山遠。如流歲華逼。明晨首鄉路。迢遞孤飛翼。

翫月詩序云。月可翫。翫月古也。謝賦鮑詩。眺之庭前。亮之樓中。皆翫月也。貞元十二年。歐陽君子陳可封。遊在秦。寓于永崇里華陽觀。子與鄉人安陽邵楚蓑。濟南林蘊。潁川陳詡。亦旅長安。秋八月十五夜。詣陳之居。修厥翫事。月之爲翫。冬則繁霜大寒。夏則蒸雲大熱。雲蔽月。霜侵人。蔽與侵。俱害乎翫。秋之於時。後夏先冬。八月於秋。季始孟終。十五於夜。又月之中。稽於天道。則寒暑均。取於月數。則蟾兔圓。况埃擻不流。太空悠悠。嬋娟徘徊。桂華上浮。昇東林。入西林。肌骨與之疏涼。神氣與之清冷。四君子悅而相謂曰。斯古人所以爲翫也。旣得古人所翫之意。宜襲古人所翫之作。月詩云。八月十五夕。舊嘉蟾兔光。斯從古人好。其下今霄堂。素魄皓孤凝。芳輝紛四揚。徘徊林上頭。泛灩天中央。皓露助流華。輕風佐浮涼。清冷到肌骨。潔白盈衣裳。惜此苦宜翫。攬之非可將。含情顧廣庭。願至沉西方。

途中寄太原所思詩云。鷗鳥漸覺遠。迴頭長路塵。高城已不見。况復城中人。去意自未甘。居情諒猶辛。萬里東北晉。千里西南秦。一履不出門。一車無停輪。流萍與匏繫。早晚期相親。或

曰。詹遊太原。悅一妓。將別。約至都相迎。故有早晚期相親之句。妓思之不已。得疾且甚。乃以其髮藏之。謂女弟曰。歐陽生至。可以爲信。又作詩曰。自從別後減容光。半是思郎半恨郎。欲識傷來雲髻樣。爲奴開取縷金箱。絕筆而逝。及詹至。如其言。示之。詹啓函一慟而卒。孟簡賦詩哭之。序云。穆玄道訪予。常嘆其事。玄道頗惜之。

焦郁

白雲向空垂云。白雲昇遠岫。搖拽入晴空。乘化隨舒卷。無心任始終。欲銷仍帶日。將斷更因風。勢薄飛難定。天高色易窮。影收元氣表。光滅太虛中。儻若從龍去。還施濟物功。

春雪詩云。散漫天涯色。承春四望平。不分殘照影。何處斷腸聲。繚繞光經塞。霏微勢逐城。因風低未斂。帶雨重還輕。干呂知時泰。如膏候歲成。小儒叨盛世。無以答皇明。

袁高

字公碩。滄洲人。恕己之孫。慷慨有節尚。爲給事中。德宗將起盧杞。刺饒州。詔出高。執不下。帝慰曰。朕唯卿言切。至已如奏。憲宗時卒。贈禮書。

禹貢通遠俗。所圖在安人。后王失其本。職吏不敢陳。亦有姦佞者。因茲欲求伸。動生千金費。日使萬姓貧。我來顧渚源。得與茶事親。忙輟耕農耒。探探實苦辛。一夫且當役。盡室皆同臻。

捫葛上欹壁。蓬頭入荒榛。終朝不盈掬。手足皆鱗皴。悲嗟遍空山。草木爲不春。陰嶺芽未吐。使者牒已頻。心爭造化力。先走銀臺均。選納無晝夜。搗聲昏繼晨。衆工何枯槁。俯視彌傷神。皇帝尙巡狩。東郊路多堙。周迴遶天涯。所獻愈艱勤。况減兵革困。重茲困疲民。未知供御餘。誰合分此珍。顧省忝邦守。又慙復因循。茫茫滄海間。丹憤何由申。

右高所賦茶山詩也。案唐制。潮州造貢茶最多。謂之顧渚貢焙。歲造一萬八千四百斤。大曆後。始有進奉。建中二年。高刺史進三千六百串。并詩。此一章刻石在貢焙。故杜鴻漸與楊祭酒書云。顧渚中山紫笋茶兩片。此物但恨帝未得嘗。實所嘆息。一片上太夫人。一片充昆弟同歡。開成三年。以貢不如法。停刺史裴充官。

唐詩紀事卷第二十六

黎逢

閻濟美

裴交泰

劉皂

黎逢

小苑東望官池柳色詩云。上林新柳變。小苑暮天晴。始望和煙密。遙憐拂水輕。色承陽氣暖。陰帶御溝清。不厭隨風弱。仍宜向日明。垂絲遍閣樹。飛絮觸簾旌。漸到依依處。思聞出谷鶯。

韋蘇州任京兆工曹。日有答貢士黎逢詩云。彌月曠不接。公門但驅馳。蘭草忽有贈。持用慰所思。不見心微密。况當相見時。

逢氣貌山野。及第年初場後至。便於簾前設席。主司異之。請其生疏。必謂文詞稱是。專令人伺之。句句來報。初問云。何人徘徊。曰。亦是常言。既而將及數聯。莫不驚嘆。遂擢第。

逢登大曆十二年進士第。

閻濟美

濟美大曆九年春下第。將出關。獻坐主張謂詩六韻。曰。睿譔王臣直。文明雅量全。望鑑金自躍。應物鏡何偏。南國幽沉盡。東堂禮樂宣。轉令遊藝士。更惜至公年。芳樹歡新景。青雲泣暮



天唯愁鳳池拜孤賤更誰憐。謂覽之間失第之因。具以實告。謂深有遺才之嘆。乃曰。所投六韻。必展後效。明年濟美自江東繼薦。就試東都。謂復主文。雜文已過。繼欲帖經。濟美辭以不能。謂曰。禮闈故事。亦許作詩贖帖。遂命天津橋望洛城殘雪題。濟美曰。新霽洛城端。千家積雪寒。未收清禁色。徧向上陽殘。旣而日勢已晚。詩未就。謂云。只據見在將來。一覽稱賞。遂唱過。盧景莊謂曰。前足下試蜡日。祈天宗賦。以魯丘對衛賜。則子貢也。乃作駟字。誤矣。方悔之。明日謂曰。天寒急景。諸君文卷不成。未可以呈宰相。請重錄送納。旣而索舊卷。則駟字上朱點在焉。易卷之意。蓋有在也。到闕。謂揖濟美曰。前日春間遺才。所投六韻。不敢暫忘。幸副素懷矣。濟美紀其事曰。前朝公相。許與定分。一面不忘。美哉。

濟美。正元末。歷福建觀察。爲治簡易。以工部尙書卒。

濟美。元和初。刺華州。劾華陰令柳澗。賊罪。韓愈使過華。上疏理澗。留中不下。詔御史按得澗賊狀。以愈妄論。復爲國子博士。

裴交泰

長門怨云。自閉長門經幾秋。羅衣濕盡淚還流。一種蛾眉明月夜。南宮歌吹北宮愁。

范攄曰。近日舉場詩尤新。章孝標對月云。長安一夜千家月。幾處笙歌幾處愁。有類乎裴

交泰。

交泰。正元間詩人。

劉皂

長門怨云。宮殿沉沉月色分。昭陽宮漏不堪聞。珊瑚枕上千行淚。不是思君是恨君。

皂。正元間人也。

萬行。韋莊載皂長門怨云。淚滴長門秋夜長。愁心和雨到昭陽。淚痕不學君恩斷。拭却千行更

唐詩紀事卷第三十六終

唐詩紀事

五七五



唐詩紀事卷第三十七

元稹

稹爲御史奉使東川於褒城題黃明府詩其序云昔年曾於解縣飲酒余爲觥錄事嘗於  
賢明府廳有一人至頻犯語令連飛十數觥不勝因逸去醒後問人前虞卿黃丞也此後絕不  
復知元和四年三月奉使東川十六日至褒城驛遂巡有黃明府見迎瞻其形容髣髴似識問  
其前衛卽曩日逃席黃丞也說向前事黃生惘然而悟因饋酒一罇籩舟請余同載余不免其  
意與之盡歡徧問褒陽山水則褒姒所奔之城在其左諸葛所征之路次其石感今懷古作贈  
黃明府詩曰昔年曾痛飲黃令困飛觥席上當時走馬前今日迎依稀迷姓字積漸識平生故  
友身皆遠他鄉眼暫明便邀連榻坐兼共別舡行酒思臨風亂霜稜識地平不看深淺酌貪  
古今情迤邐七盤路坡拖數大城花疑褒女笑棧息武侯征一種埤幽石空聞千載名出本事  
詩

稹聞西蜀薛濤有辭辯及爲監察使蜀以御史推鞠難得見焉嚴司空潛知其意每遣薛  
往泊登翰林以詩寄曰錦江滑膩峨眉秀生出文君與薛濤言語巧偷鸚鵡舌文章分得鳳凰

毛紛紛辭客多停筆。箇箇君侯欲夢刀。別後相思隔煙水。菖蒲花發五雲高。後廉問浙東。乃有劉探春。自淮甸而來。容華莫比。元贈詩曰。新粧巧樣盡雙蛾。裏慢常州透額羅。正面偷偷光滑笏。暖行經踏皺紋波。言辭雅措風流足。舉止低回秀媚多。更有惱人腸斷處。選詞能唱望夫歌。望夫歌者。卽羅噴之曲也。元云。在浙河七年。因醉題東武。其詩曰。役役行人事。紛紛碎簿書。功夫兩術盡。留滯七年餘。病痛梅花發。親情海岸疏。因循未歸得。不是憶鱸魚。盧侍郎簡求戲曰。丞相雖不爲鱸魚。爲好鏡湖春色耳。謂探春也。

公先安京兆韋氏。字蕙叢。韋逝爲詩悼之曰。曾經滄海難爲水。除却巫山不是雲。出本事傳。

稹。元和四年。爲御史鞠獄梓潼。樂天昆仲。送至城西而別。後旬日。昆仲與李侍郎建。閑遊曲江。及慈恩寺。飲酣作詩曰。花時同醉破春愁。醉折花枝作酒籌。忽憶故人天際去。計程今日到梁州。後旬日得元書。果以是日至褒。仍寄詩曰。夢見兄弟曲江頭。也到慈恩院院遊。驛吏喚人排馬去。忽驚身在古梁州。千里魂交合若符契。自有感夢記。備叙其事。

稹以明經制策入仕。其一篇自述曰。延英引對碧衣郎。江硯宣毫各別床。天子下簾親考試。宮人手裏過茶湯。是時貴族並應制科。用爲男子榮進。

連昌宮辭云。連昌宮中滿宮竹。歲久無人森自束。又有牆頭千葉桃。風動落花紅蔌蔌。宮邊老人爲余泣。小年選進因曾入。上皇正在望僊樓。太真同憑欄竿立。樓上樓前盡珠翠。炫轉煒煌照天地。歸來如夢復如癡。何暇備言宮裏事。初過寒食一百六。店食無煙宮樹綠。夜半高樓絃索鳴。賀老琵琶定場屋。力士傳呼覓念奴。念奴潛伴諸郎宿。須臾覓得又連催。特勅街中許燃燭。春嬌滿眼睡紅消。掠削雲鬢旋粧束。飛上九天歌一聲。二十五郎吹管逐。逡巡大遍梁州徹。色色龜茲轟綠續。李摹擊箏傍宮牆。偷得新翻數般曲。平明大駕發行宮。萬人鼓舞途路中。百官隊伍避岐薛。楊氏諸姨車鬪風。明年十月東都破。御路猶存祿山過。驅令供頓不敢藏。萬姓無聲淚潛墮。兩京定後六七年。卻尋家舍行宮前。莊園燒盡有枯井。行宮門闔樹宛然。爾後相傳六皇帝。不到離宮門久閉。往來年少說長安。玄武樓前華萼廢。去年因勅使斫竹。偶值門開暫相逐。荆榛櫛比塞池塘。狐鬼驕癡綠樹木。舞榭欹傾基尙存。文牕窈窕紗猶綠。塵埋粉壁舊花鈿。烏啄風箏碎珠玉。上皇偏愛臨砌花。依然御榻臨街斜。蛇出燕巢盤鬪拱。菌生香案正當衙。寢殿相連端正樓。太真梳洗樓上頭。晨光未出簾影黑。至今反掛珊瑚鈎。指向傍人因慟哭。却出宮門淚相續。自從此後還閉門。夜夜狐狸上門屋。我聞此語心骨悲。太平誰致亂者誰。翁言野父何分別。耳聞眼見爲君說。姚崇宋璟作相公。勸諫上皇言語切。燹理陰陽禾黍豐。

調和中外無兵戎。長官清平太守好。棟選皆言由相公。開元欲末姚宋死。朝廷漸漸由妃子。祿山宮裏養作兒。虢國門前鬧如市。弄權宰相不說名。依稀憶得楊與李。廟諱顛倒四海搖。五十年來作瘡痂。今皇神聖丞相明。詔書纔下吳蜀平。官軍又取淮西賊。此賊亦除天下寧。年年耕種宮前道。今年不遣子孫耕。老翁此意深望幸。努力廟謀休用兵。

穆宗時。嬪御多誦穡歌。宮中號爲元才子。後荆南監軍崔峻歸朝。出稭連昌宮詞等百餘篇。奏御。穆宗大悅。卽日拜祠部郎中。知制誥。穡上令狐文公書云。某始自御史府。謫官於外。十餘年矣。閑誕無事。遂用力於詩章。日益月滋。有詩千餘首。其間感物寓意。可備矇眊之風。遠者有之。詞直氣蘼。罪戾是懼。固不敢陳露於人。惟盃酒光景間。屢爲小碎篇章。以自吟暢。然以爲律體卑下。格力不揚。苟無姿態。則陷流俗。常然欲得思深語近。韻律調新。屬對無差。而風情自遠。然而病未能也。江湖間多有新進小生。不知天下文有宗主。妄相倣倣。而又從而失之。遂至有褊淺之調。皆目爲元和詩體。某又與同門生白居易友善。居易雅能爲詩。就中愛驅駕文字。窮極聲韻。或爲千言。或爲五百言律詩。以相投寄。小生自審。不能有以過之。往往戲排舊韻。別創新詞。名爲次韻。蓋欲以難相挑耳。江湖間爲詩者。或相倣倣。或力不足。則至於顛倒語言。重複首尾。韻同意等。不異於篇。亦目爲元和詩體。而司文者考變異之由。往往歸咎於某。嘗以爲

雕蟲小事不足自明也。

樂天在洛。大和中。積拜左丞相。自越過洛。以二詩別樂天云。君應怪我留連久。我欲與君辭別難。白頭徒侶漸稀少。明日恐君無此歡。又云。自識君來三度別。這回白盡老髭鬚。戀君不去君須會。知得後迴相見無。未幾死于鄂。樂天哭之曰。始以詩交。終以詩訣。絃筆相絕。其今日乎。

屈指正元舊朝事。幾人同見大和春。（感興句）兒歌楊柳葉。妾拂石榴花。（句）遠路事無限。相逢惟一言。月色照榮辱。長安千萬門。（逢白公句）

右張爲取作主客圖。積序言寄樂天云。九歲學賦詩。長者往往驚其可怪。年十五六。粗識聲病。時貞元十年已後。德皇帝春秋高。理務因人。寢不欲文法吏。生天下罪過。外關節將。動十餘年。不許相朝。死於其地。不易者十八九。而又將豪卒。愾之處。因喪負衆。橫相賊殺。告變駱驛。使者迭窺。旋以狀聞。天子曰。某色將某能。遏亂。亂衆寧附。願爲其師。名爲衆情。其實逼詐。因而可之者。又十八九。前置介倖。因緣交授者。亦十四五。由是諸侯。敢爲自意。有羅列兒孩。以自固者。有開導蠻夷。以自重者。甚者視一境如一室。刑殺其下。不啻六畜。厚加剝奪。名爲進奉。其實貢入之數。百一焉。京城之中。停第邸店。以曲巷斷侯甸之內。水陸腴沃。以鄉里計。其餘奴婢資



財。生生之備。稱是朝廷大臣。以謹慎不言爲朴雅。以時進見者。不過一二親信。直臣議士。往往抑塞禁省之間。或繕完階墜。豪家大帥。乘輦相扇。延及老幼。土木妖熾。習俗不怪。上不欲令有司備宮園中。小碎須求。往往持幣帛以易餅餌。吏緣其端。剽奪百貨。勢不可禁。僕時孩駭。不慣聞見。獨於書傳中初習。理亂萌漸。心體悸震。若不可活。思欲發之久矣。適有人以陳子昂感遇詩相示。吟翫激烈。卽日爲寄思玄子詩二十首。故鄧京兆於僕。爲外諸父。深賜憐獎。因以所賦呈獻。京兆翁深相駭異。祕書少監王表在坐。顧謂表曰。使此兒五十不死。其志義何如哉。惜吾輩不見其成就。因名諸子訓責泣下。僕亦竊不自怠。由是勇於爲文。又久之。得杜甫詩數百首。愛其浩蕩津涯。處處臻到。始病沈宋之不存寄興。而訝子昂之未暇旁備矣。不數年。與詩人楊巨源友善。日課爲詩。性復僻懶。人事常有閑暇。閑則有作。識足下時。有詩數百篇矣。習慣性靈。遂成病蔽。每公私感憤。道義激揚。朋友切磨。古今成敗。日月遷逝。光景舒慘。山川勝勢。風雲景色。當花對酒。樂罷哀餘。通滯屈伸。悲歡合散。至於疾恙其身。悼懷昔遊。凡所對遇。有常者。則欲賦詩。又不幸年三十二時。有罪譴棄。今三十七矣。三十六年間。是丈夫心力壯時。常在閑處。無所役用。性不近道。未能淡然忘懷。又復懶於他欲。全盛之氣。注射語言。雜揉精粗。遂成多文。然亦未嘗繕寫。適值河東李明府景儉。在江陵時。癖好僕詩章。謂能爲解。欲得盡取觀覽。僕因撰

成卷軸。其中有旨意可觀。而詞近古往者。爲古諷。意亦可觀。而流在樂府者。爲樂諷。詞雖近古。而止於吟寫情性者。爲古體。詞實樂流而止於模象物色者。爲新題樂府。聲勢沿順。屬對穩切者。爲律詩。仍以七言五言爲兩體。其中有稍存寄興。與諷爲流者。爲律諷。不幸少有伉儷之悲。撫存感往。成數十詩。取潘子悼亡爲題。又有以于教化者。近昵婦人。暈淡眉目。綰約頭鬢。衣服脩廣之度。及匹配色澤。尤極怪艷。因爲艷詩百餘首。詞有今古。又兩體。自十六時至是。元和七年矣。有詩八百首。色類相從。共成十體。凡二十卷。自笑冗辭。亦不復致之於行李。昨來京師。偶在箱篋。及通行。盡置足下。僅亦有說。僕聞上士立德。其次立事。不遇立言。凡人急位。其次急利。下急食。僕天與不厚。旣乏全然之德。命與不遇。未遭可爲之事。性與不惠。復無垂範之言。兀兀狂癡。行近四十。微名取位。不過於第八品。而冒憲已六七年。授通之初。有習通之熟者。曰地濕。墊卑褊。人士稀少。近歲荒札。死亡過半。邑無吏。市無貨。百姓茹草木。刺史以下。計粒而食。大有虎豹蛇虺之患。小有螻蚋浮塵蜘蛛之類。皆能鑽嚙肌膚。使人瘡疥。夏多陰霖。秋爲痢瘡。地無醫平。藥石萬里。病者有百死一生之慮。夫何以僕之命不厚也。如此。智不足也。又如此。其所詣之憂險也。又復如此。則安能保持萬全。與足下必復京。盃以須他日。立言立事之驗耶。但恐一旦與急食相扶。而終使足下受天下不如己之誚。是用悉所爲文。留穢箱篋。比夫格奕。樽里

之戲。猶曰愈於飽食。僕所爲又不愈於格奕樗里之戲乎。昨行巴南道中。又有詩五十一首。文書中得七年已後所爲。向二百篇。繁亂冗雜。不復置之執事。前所寄思玄子者。小歲爲文。不能自足其意。貴其起予之始。且志京兆公見遇之由。今亦寫爲古諷之一。移諸左右。僕少時授吹噓之術。於鄭先生。病懶不就。今在閑處。思欲怡神保和。以求其內。異日亦不復費詞於無用之文矣。省視之煩。庶亦已於是乎。

琵琶歌（寄管兒兼管鉄山。此後並新題樂府）琵琶宮調八十一。旋宮三調彈不出。玄宗偏許賀懷智。段師此藝還相匹。自後流傳指撥衰。崑崙善才徒爾爲。鴻聲少得似雷吼。（去聲）口絃不敢彈羊皮。人間奇事會相續。但有卞和無有玉。段師弟子數十人。李家管兒稱上足。管兒不作供奉兒。拋在東都雙鬢絲。逢人便請送盃蓋。看盡工夫人不知。李家兄弟皆愛酒。我是酒徒爲密友。著作曾邀連夜宿。中輟清溪華新絲。平明船在管兒行。盡日聽彈無限曲。曲名無限知者鮮。霓裳羽衣偏宛轉。涼州大遍最毫嘈。綠腰散序多籠撚。我聞此曲深賞奇。賞著奇處驚管兒。管兒爲我雙淚垂。自彈此曲長長悲。淚垂捍撥朱絃濕。冰泉鳴咽流鶯澁。因茲彈作雨霖鈴。風雨蕭條鬼神泣。一彈旣罷又一彈。珠幢夜靜風珊珊。低徊慢弄關山思。坐對燕然秋月寒。月寒一聲深殿聲。驟彈曲破音繁併。百歲金鈴旋（去聲）玉盤。醉客滿船皆暫醒。自茲

聽後六七年。管兒在洛我朝天。游想慈恩杏園裏。夢寐仁風花樹前。去年御史留東臺。公私蹙促顏不開。今春制獄正撩亂。晝夜推囚心似灰。暫輟歸時尋著作。著作南園花拆萼。煙支耀眼桃正紅。雪片滿溪梅已落。是夕青春值三五。花枝向月雲含吐。著作施罇命管兒。管兒久別今方覩。管兒還爲彈綠腰。綠腰依舊聲迢迢。猿鳴雪岫來三峽。鶴唳晴空開九霄。逡巡彈得綠腰徹。霜刀破竹無殘節。幽關鶻虜胡鴈悲。斷絃書騷層冰裂。我爲含涕歎奇絕。許作是歌始終說。蘇奇思寡塵事多。許來寒暑又經過。如今左降在閑處。始爲管兒歌此歌。此歌寄管兒。管兒憂爾衰。爾衰之後繼者誰。繼之無乃在鐵山。鐵山已近曹穆間。(二善才)性靈甚好功猶淺。急處未得臻幽閑。努力鐵山勤學取。莫遣後來無所祖。

何滿子歌。(張胡南坐爲唐有態作)何滿能歌能宛轉。天寶年中世稱罕。嬰刑繫在囹圄間。下調哀音歌憤懣。黎園弟子奏玄宗。一唱承恩羈網緩。便將何滿爲曲名。御譜親題樂府纂。魚家入內本領絕。葉氏有年聲氣短。白口徒煩記得詞。點拍纔成已夸誕。我居湖外拜君侯。正值灰飛伸春瑄。廣宴江亭爲我開。紅粧遲日花枝暖。此時有態踏華筵。未吐芳詞口夷坦。翠蛾轉盼搖雀釵。碧袖歌垂翻鶴卵。定面凝眸一聲發。雲停塵下何勞算。迢迢擊磬遠玲玲。一一貫珠勻款款。犯羽含商移調態。留情度意拋絃管。湘妃寶瑟上水來。秦女玉簫空外滿。纏綿疊

破最慙勤。整頓衣裳事閑散。水含遠溜咽還通。鸞泥晚花啼漸懶。歛黛吞聲若自冤。鄭袖見捐西子浣。陰山鳴鴈曉斷行。巫峽哀猿夜呼伴。古者諸侯饗外賓。鹿鳴三奏陳圭瓚。何如有態一曲終。牙籌記令紅螺盞。

五絃彈云。趙壁五絃彈徵調。徵聲巖絕何清峭。辭雄皓鶴警露啼。失子哀猿繞林嘯。風入春松正凌亂。鴛含曉舌憐驕妙。嗚嗚暗溜咽冰泉。殺殺霜刀澁寒鞘。促節頻催漸繁撥。珠幢斗絕金鈴掉。千靷鳴鏑發胡弓。萬片清求擊虞廟。衆樂雖同第一部。德宗皇帝常備召。句休節假暫歸來。一聲狂殺長安少。主第侯家最難見。按（蘇雷反）歌按曲皆承詔。水晶簾外散貴嬪。璫瑁筵心伴中要。臣有五賢非此絃。或在拘囚或屠釣。一賢得進勝累百。兩賢得進同周邵。三賢仕漢滅暴強。四賢鎮岳寧邊徼。五賢並用調五常。五常既序三光曜。趙璧五絃非此賢。九九何勞設庭燎。

放言五首云。近來逢酒便高歌。醉舞詩狂漸欲磨。五斗解醒猶恨少。十分飛盞未慊多。眼前讎敵都休問。身外功名一任他。死是等閑生也得。擬將何事奈吾何。

莫將心事厭長沙。雲到何方不是家。酒熟餽糟學漁父。飯來開口似神鴉。竹枝待鳳千莖直。柳樹迎風一向斜。總被天公霑雨露。等頭成長盡生涯。

霆轟電熒數聲頻。不奈狂夫不籍身。縱使被雷燒作燼。寧殊埋骨颺爲塵。得成蝴蝶尋花樹。儻化江魚掉錦鱗。必若乖龍在諸處。何須警動自來人。

安得心源處處安。何勞終日望林巒。玉英惟向火中冷。蓮葉元來水上乾。甯戚飯牛圖底事。陸通歌鳳也無端。孫登不語啓期樂。各自當情各自歡。

三十年來世上行。也曾狂走趁浮名。兩迴左降須知命。數度登朝何處榮。乞我杯中松葉滿。遮渠肘上柳枝生。他時定葬燒缸地。賣與人家得酒盛。

和樂天過秘閣書省舊廳云。聞君西省重徘徊。秘閣書房次第開。壁記欲題三編合。史人驚問十年來。經排蠹簡憐初撥。芸長陳根識舊栽。司馬見詩心最苦。滿身蚊蚋笑煙埃。

和樂天贈楊秘書云。昔與楊郎在帝城。搜天幹地覓詩情。曾因並句甘稱小。不爲論年便喚兄。刮骨直穿由苦鬪。夢腸翻出暫閑行。因君投贈還相和。老去那能竟底名。

琵琶云。學語胡兒撼土鈴。甘州破裏最星星。使君自恨常多事。不得工夫夜夜聽。

內狀詩寄楊白二員外。(時知制誥)天門暗闕玉銜鉤。晝送中樞曉禁清。彤管內人書細膩。金奩御印篆分明。銜街不避將軍令。跋勅兼題宰相名。南省郎中誰得詔。與君將向世間行。

酬樂天餘思不盡加爲六譜之作。律呂同聲。我愛身。文章君是一伶倫。衆推賈誼爲才子。帝喜相如作侍臣。樂天先有秦中吟。及百節判。皆爲書肆書賈。題其卷云。白才子文章。及樂天知制誥詞云。覽其詞賦喜與相如。並一處時。次韻千言會報答。樂天曾寄予千字律詩數首。予皆用本韻酬和。後來遂以成風耳。直詞三道共經綸。樂天與予同應制科。其求千輩功直詞策以盡經邦之術。其事已具之字詩謹中爾。元詩駁雜真難辯。後輩好僞作子詩。傳流諸處。身到會稽。以有人寫宮詞百篇。及雜詩兩卷。皆云。是余所撰。及口勘驗。無一篇是者。白撲流傳用轉新。樂天於翰林中書。取口詔批答同等。撰爲口式。禁中號曰白撲。每有新入學士求訪。實重過於六典也。蔡女圖書雖在口。蔡琰口誦家書四百餘篇。干公門戶豈生塵。樂天嘗贈予詩云。詩心如肺石。動必達窮民。東川八十家。冤憤一言中。因感無兒之嘆。故余自有此句。商瞿未老猶希冀。莫把籛金便付人。

寄湖西李大夫四首云。柳眼梅心漸欲春。白頭西望憶何人。金陵太守曾相伴。共踏銀臺一路塵。

藥珠深處少人知。網索西臨太液池。口殿曉開天語後。步廊騎馬笑相隨。網索在太液上。學士候對歇於此。

禁林同直話交情。無夜無曾不到明。最憶西樓人靜後。玉晨鐘磬兩三聲。（玉晨觀在紫宸殿後面也。）

由來鵬化便圖南。浙右雖雄我未甘。早渡西江好歸去。莫拋舟楫滯春潭。

徽之善紀事。如臺中鞠獄贈周兄詩云。鬧裝轡頭繻。靜拭腰帶班。鶴子繡線鞞。狗兒金油（去）鑽。又坐臥摩錦褥。捧擁纈絲髻。爵俸西歸詩。邀我上華筵。橫頭坐賓位。那知我年少。深解酒中事。能唱犯聲歌。偏精變籌義。含詞徒殘拍。促舞遞繁吹。叫噪擲投盤。生獐攝觥使。寄吳士短云。子時最年少。專務酒中職。未解媿生獐。偏矜任狂直。曲庇挑根蓋。橫講揜雲式。亂布圖分明。惟新問讒慝。耻作最先吐。羞言未朝食。酬東川季和公云。昔附赤霄羽。葳蕤遊紫垣。闕班香案上。奏語玉晨尊。酬白學士云。並入紅闌署。偏親白王規。又鬥班雲洶湧。開扇雉參差。又麵梨通蒂朽。（無味）火米帶芒炊。（不精）芽筍錢筒束。鱸魚箭羽髻。又病賽烏稱鬼。坐占瓦代龜。（南人賽烏鬼）紀懷贈李六云。昔冠諸生首。初因三道徵。公卿碧墀會。名姓白麻稱。答胡靈之云。矮馬馳鬣鞞。駉（弗）牛獸而纓。一船席外語。三榼拍心精。傳盞加分數。橫波鄭日成。葉奴歌淅淅。（鹽）媚子侮卿卿。又還坐帷更草。枝盤漸廢觥。又柳愛凌寒軟。梅憐上番驚。又雨催魚火焰。風引（去）竹枝聲。店臥戲呈諸公。籌筭隨宜放。投盤止罰唯。紅娘留醉打。（舞



引紅娘。拋打曲名。觥使及醒差。酒中觥使。席上古職。又槍書如在手。籌筋色目。那復敢葳口。酬樂天東南行云。科試銓衡局。銜參典校廚。書判同年校正同省。月中分桂樹。天上識菖蒲。又白麻雲色賦。墨詔電先徂。又祖竹聚新筍。孫枝壓舊梧。又酬樂天待漏入閣云。未勘銀臺契。先挑浴殿關。沃心因特召。承旨絕常班。承旨。在學士上。颺閃才人袖。宮官傳詔。嘔鴛軟轡。宮花低作帳。雲從積成山。密視樞機草。偷瞻咫尺顏。恩垂天語近。對久滯聲閑。丹陛曾同立。金鑾恨獨攀。樂天舍人徽之翰林。筆無鴻業潤。視愧紫文殷。河水通天瀛洲接世間。謫仙名籍在。何不重來還。神麴酒云。七月調神麴。三春釀祿醪。雕鷲荆玉盞。烘透內丘瓶。戴光弓詩云。潞府筋角勁。戴光因合成。閑吟云。暉淡州烟白。籬篩日脚紅。江喧過雲雨。船泊打頭風。底子收魚市。鴉兒噪荻叢。不堪堤上立。滿眼是蚊虫。狂醉云。岷亭今日顛狂醉。舞引紅娘亂打人。亞枝紅云。平陽地上亞枝紅。桃花平在池上。悵望出郵是事同。還向萬莖深竹裏。一枝渾臥碧流中。

稭在鄂州。周復爲從事。常命酬唱。復嘗笏見稭曰。某偶以大人往還。獲一第。其實不能詩。賦稭曰。質實如是。賢於能詩遠矣。

一云。徽之守浙東。樂天守蘇臺。遞簡唱和。內一聯云。有月多同賞。無杯不共持。兩地暗合。唐詩紀事卷第三十七終

# 唐詩紀事卷第三十八

白居易

張爲以居易爲廣大教化主。取其讀史詩云：含沙射人影，雖病人不知。巧言詭人罪，至死不疑。撥蜂殺愛子，掩鼻戮寵姬。弘恭陷蕭望，趙高謀李斯。陰德旣必報，陽禍豈虛施。人事雖可罔，天道終難欺。明卽有刑辟，幽卽有神祇。苟免勿私喜，鬼得而誅之。又取秦中吟云：厚地植桑麻，所用濟生民。生民理布帛，所求活一身。身外充征賦，上以奉君親。國家定兩稅，本意在憂人。厥初防其溢，明勅內外臣。稅外加一物，皆以枉發論。奈何歲月久，貪吏得因循。役我以求寵，斂桑無冬春。織絹未盈疋，纒絲未盈斤。里胥迫我納，不許暫逡巡。歲暮天地閉，陰風生破村。夜深烟火盡，霰雪白紛紛。幼者形不蔽，老者體無溫。悲喘與寒氣，併入鼻頭辛。昨日輸殘稅，因窺官庫門。繒帛如山積，絲絮如雲屯。號爲羨餘物，隨日獻至尊。奪我身上暖，買爾眼前恩。進入瓊林庫，歲久化爲塵。又取寓意云：豫章生深山，七年而後知。挺高二百尺，本末皆十圍。天子建明堂，此材獨中規。匠人執斤墨，探度將有期。孟冬草木枯，烈火燎于陂。口風吹猛焰，從根燒到枝。養培二十年，方成棟樑姿。一朝爲灰燼，柯葉無子遺。地雖生爾材，天不與爾時。不如糞上芝，猶

有人掇之。已矣勿重陳。重陳令人悲。勿悲焚燒苦。但悲採用遲。又取赫赫京內史。弈弈中書郎。昨傳徵拜日。恩私顧殊常。貂冠水蒼玉。紫綬黃金章。佩服身未暖。已聞竄炎荒。親戚不得別。吞聲泣路旁。賓客亦已散。門前雀羅張。富貴來未久。倏如瓦溝霜。權勢言尤速。譬若石火光。不如守貧賤。貧賤可久長。傳語宦遊子。且來歸故鄉。又取得意減別恨。半酬還遠程之句。又人吏留不得。直入故山雲之句。又長生不似無生理。休向青山學鍊丹之句。又白髮鏘不盡。根在愁腸中之句。又與薛濤云。峨眉山勢接雲霓。欲逐劉郎北路迷。若似剡中容易到。春風猶隔武陵溪。（已上皆主客圖）

序洛詩序云。序洛詩樂。天自敍在洛之樂也。予歷覽古今歌詩。自風騷之後。蘇李以還。李陵蘇武爲五言詩。次及鮑謝徒。迄于李杜輩。其間詞人聞知者累百。詩章流傳者鉅萬。觀其所自。多因讒冤譴逐。征戍行旅。凍餒病老。存歿別離。情發於中。文形於外。故憤憂怨傷之作。通計今十八九焉。世所謂文士多數奇。詩人尤命薄。於斯見矣。又知理安之世少。離亂之時多。亦明矣。予不佞喜文嗜詩。自幼及老。著詩數千首。以其多矣。故章句在人口。姓字落詩流。雖才不逮古人。然所作不啻數千首。作一數奇命薄之士。亦有餘矣。今壽過耳順。幸無病苦。官至三品。免罹飢寒。此一樂也。大和二年。詔受刑部侍郎。明年就領河南尹事。又三年。病免。歸履道里。

弟。再受賓客分司。自三年春。至八年夏。至洛。凡五周年。作詩四百三十二首。除喪明哭子十數篇外。其他皆寄懷於酒。或取意於琴。閑適有餘。酣樂不暇。苦詞無一字。憂歎無一聲。豈牽強所能致耶。蓋亦發中而形外耳。斯樂也。實本之於省分知足。濟之以家給身閑。文之以觴詠絃歌。飾之以山水風月。此而不適。何往而適哉。茲又以重吾樂也。予嘗云。治世之音安以樂。閑居之詩泰以適。苟非理世。安得閑居。故集洛詩別爲序引。不獨記東都履道里。有閑居泰適之叟。亦欲知皇唐大和歲。有理世安樂之音。集而序之。以候夫探詩者。甲寅歲七月十日云爾。

元微之長慶集序云。憲宗皇帝册召天下士。樂天對詔稱旨。又登甲科。未幾。入翰林掌制誥。比上書言得失。因爲賀雨詩。秦中吟等數十章。指言天下事。時人比之風騷焉。予始與樂天同校祕書。前後多以詩章相贈答。會予譴掾江陵。樂天猶詩翰林。寄予百韻律詩。及雜體。前後數十章。是後各佐江通。復相酬寄。巴蜀江楚間。泊長安中少年。遞相倣效。競作新詞。自謂爲元和詩。而樂天秦中吟。賀雨諷諭等篇。時人罕能知者。然而二十年閒。禁省觀寺。郵候牆壁之上。無不書。王公妾婦。牛童馬走之口。無不道。至於繕寫模勒。銜賣於市井。或持之以交酒茗者。處處皆是。其甚者。有至於盜竊名姓。苟求自售。雜亂閒廁。無可奈何。予嘗於平水市中。一鏡湖傍。草市名。見村校諸童。競習詩。召而問之。皆對曰。先生教我樂天微之詩。固亦不知子之爲微

之也。又云。雞林賈人求市頗切。自云。本國宰相每以百金換一篇。其甚僞者。宰相輒能辨別之。自篇章以來。未有如是流傳之廣者。長慶四年。樂天自杭州刺史。以右庶子詔還。予時刺會稽。因得盡徵其文。手自排纘。成五十卷。凡二千一百九十一首。前輩多以前集中集爲名。予以爲陛下明年秋。當改元長慶。於是因號曰白氏長慶集。大凡人之文。各有所長。樂天之長。可以爲多矣。夫以諷諭之詩。長於激。閒適之詩。長於遣。感傷之詩。長於切。五字律詩。百言而上。長於贍。五字七言。百言而下。長於情。賦贊箴戒之類。長於當。碑記敘事制誥。長於實。啓奏表狀。長於直。書檄詞策。剖判。長於盡。總而言之。不亦多乎哉。至於樂天之官族景行。與予之交分淺深。非敍文之要也。故不書。

與元九書云。夫文尙矣。三才各有文。天之文。三光首之。地之文。五材首之。人之文。六經首之。就六經言。詩又首之。何者。聖人感人心。而天下和平。感人心者。莫先乎情。莫始乎言。莫切乎聲。莫深乎義。詩者。根情。苗文。華聲。實義。上自賢聖。下至愚騷。微及豚魚。幽及鬼神。羣分而氣同。形異而情一。未有聲入而不應。情交而不感者。聖人知其然。因其言。經之以六藝。緣其聲。緯之以五音。五音韻義。有類。韻協則言順。言順則聲易入。類舉則情見。情見則感易交。於是乎孕大含深。貫微洞密。上下通而一氣。秦憂樂合而百志熙。五帝三皇。所以直道而行。垂拱而理者。揭

此以爲大柄。決此以爲大竇也。故聞元首明股肱良之歌。則知虞道昌矣。聞五子洛汭之歌。則知夏政荒矣。言者無罪。聞者作戒。言者聞者。莫不兩盡其心焉。泊周衰秦興。採詩官廢。上不以詩補察時政。下不以歌洩導人情。乃至於詔成之風動。救失之道缺。于時六義始刊矣。國風變爲騷辭。五言始於蘇李。蘇李騷人。皆不遇者。各繫其志。發而爲文。故河梁之句。止於傷別。澤畔之吟。歸於怨思。彷徨抑鬱。不暇及他耳。然去詩未遠。梗概尙存。故興離別。則引雙鳧一雁爲喻。諷君子小人。則引香草惡鳥爲比。雖義類不具。猶得風人之什二三焉。于時六義始缺矣。晉宋以還。得者蓋寡。以康樂之奧博。多溺於山水。以淵明之高古。偏放於田園。江鮑之流。又狹於此。如梁鴻五噫之例者。百無一二焉。於時六義寢微矣。陵夷至於梁陳閒。率不過嘲風雪弄花草而已。噫。風雪花草之物。三百篇中。豈捨之乎。顧所用何如耳。設如北風其涼。假風以刺威虐也。雨雪霏霏。以愍征役也。棠棣之華。感華以諷兄弟也。采采芣苢。美草以樂有子也。皆興發於此。而義歸於彼。反是者可乎哉。然則餘霞散成綺。澄江淨如練。離花先委露。別葉乍辭風之什。麗則麗矣。吾不知其所諷焉。故僕所謂嘲風雪弄花草而已。于時六義盡去矣。唐興二百年。其閒詩人不可勝數。所可舉者。陳子昂有感遇詩二十首。鮑參軍有感興詩十五首。又詩之豪者。世稱李杜之作。才已奇矣。人不逮矣。索其風雅比興。十無一焉。杜詩最多。可傳者千餘篇。至於貫穿

今古。觀縷格律。盡工盡善。又過於李。然撮其新安吏。石壕吏。潼關吏。塞廬子。留花門之章。朱門酒肉臭。路有凍死骨之句。亦不過三四十首。杜尙如此。况不逮杜者乎。僕嘗痛詩道崩壞。忽忽憤發。或食輟哺。夜輟寢。不量材力。欲扶起之。嗟乎。事有大謬者。又不可一二而言。然亦不能不羸陳于左右。僕始生六七月時。乳母抱弄於書屏下。有指無字之字。示僕者。僕雖口未能言。心已默識。後有問此二字者。雖百十其試。而指之不差。則僕宿昔之緣。已在文字中矣。及五六歲。便學爲詩。九歲諳識聲韻。十五六始知有進士。苦節讀書。二十已來。晝課賦。夜課書。閒又課詩。不遑寢息矣。以至於口舌成瘡。手肘成胝。既壯而膚革不豐盈。未老而齒髮早衰白。警警然如飛蠅垂珠。在眸子中也。動以萬數。蓋以苦學力文所致。又自悲矣。家貧多故。二十七方從鄉試。既第之後。雖專於科試。亦不廢詩。及授校書郎。時已盈三四百首。或出示交友。如足下輩。見皆謂之工。其實未窺作者之域耳。自登朝來。年齒漸長。閱事漸多。每與人言。多詢時務。每讀書史。多求理道。始知文章合爲時而著。歌詩合爲事而作。是時皇帝初卽位。宰府有正人。屢降璽書。訪人急病。僕當此日。擢在翰林。身是諫官。手請諫紙。啓奏之外。有可以救濟人病。裨補時闕。而難於指言者。輒詠歌之。欲稍稍遞進。聞於上。上以廣宸聰。副憂勤。次以酬恩獎。塞言責。下以復吾平生之志。豈圖志未就而悔已生。言未聞而謗已成矣。又請爲左右終言之。凡聞僕賀雨詩。

而衆口籍籍。已謂非宜矣。聞僕哭孔戡詩。衆面脈脈。盡不悅矣。聞秦中吟。則權豪貴近者。相目而變色矣。聞樂遊園寄足下詩。則執政柄者。扼腕矣。聞宿紫閣村詩。則握軍要者。切齒矣。大率如此。不可徧舉。不相與者。號爲沽名。號爲詆訐。號爲訕謗。苟相與者。則如牛僧孺之戒焉。乃至骨肉妻孥。皆以我爲非也。其不我非者。舉世不過三兩人。有鄧魴者。見僕詩而喜。無何而魴死。有唐衢者。見僕詩而泣。未幾而衢死。其餘則足下。又十年來困躓若此。嗚呼。豈六義四始之風。天將破壞。不可支持耶。抑又不知天之意。不欲使下人之病苦。聞於上耶。不然。何有志於詩者。不利若此之甚也。然僕又自思。關東一男子耳。除讀書屬文外。其他懵然無知。乃至書畫棋博。可以接羣居之歡者。一無通曉。卽其愚拙可知矣。初應進士時。中朝無總麻之親。達官無半面之舊。築蹇步於利足之途。張空拳於戰文之場。十年之間。三登科第。名入衆耳。迹升清貴。出交賢俊。入侍冕旒。始得名於文章。終得罪於文章。亦其宜也。日者又聞親友閒說禮吏部舉選人。多以僕私試賦判傳爲準的。其餘詩句。亦往往在人口中。僕慙然自愧。不之信也。及再來長安。又聞有軍使高霞寓者。欲聘娼妓。妓大誇曰。我誦得白學士長恨歌。豈同他妓哉。由是增價。又足下書云。到通州日。見江館柱閒。有題僕詩者。復何人哉。又昨過漢南日。適遇主人集衆樂。娛他賓。諸妓見僕來。指而相顧曰。此是秦中吟長恨歌主耳。自長安抵江西。三四千里。凡鄉校佛。



寺。逆旅行舟之中。往往有題僕詩者。士庶僧徒。媼婦處女之口。每每有詠僕詩者。此誠彫蟲之戲。不足爲多。今時俗所重。正在此耳。雖前賢如淵雲者。前輩如李杜者。亦未能忘情於其間。古人云。名者公器。不可以多取。僕是何者。竊時之名已多。既竊時名。又欲竊時之富貴。使己爲造物者。肯兼與之乎。今之連窮理固然也。况詩人多塞。如陳子昂。杜甫。各授一拾遺。而連剝至死。李白。孟浩然。輩不及一命。窮悴終身。近日孟郊。六十終試。協律。張籍。五十未離。一太祝。彼何人哉。彼何人哉。况僕之才。又不逮彼。今雖謫在遠郡。而官品至第五。月俸四五萬。寒有衣。飢有食。給身之外。施及家人。亦可謂不負白氏之子矣。微之微之。勿念我哉。僕數月來。檢討囊篋中。得新舊詩。各以類分。分爲卷首。自拾遺來。凡所適所感。關於美刺興比者。又自武德訖元和。因事立題。題爲新樂府者。共一百五十首。謂之諷諭詩。又或退公獨處。或移病閒居。知足保和。吟詠性情者。一百首。謂之閒適詩。又有事物牽於外。情理動於內。隨感遇而形於歎詠者。一百首。謂之感傷詩。又有五言七言長句絕句。自一百韻至兩韻者。四百餘首。謂之雜律詩。凡爲十五卷。約八百首。異時相見。當盡致於執事。微之。古人云。窮則獨善其身。達則兼濟天下。僕雖不肖。常師此語。大夫夫所守者道。所待者時。時之來也。爲雲龍。爲風鵬。勃然突然。陳力以出。時之不來也。爲霧豹。爲冥鴻。窮兮寥兮。奉身而退。進退出處。何往而不自得哉。故僕志在兼濟。行在獨善。

奉而始終之。則爲道。言而發明之。則爲詩。謂之諷諭詩。兼濟之志也。謂之閒適詩。獨善之義也。故覽僕詩。知僕之道焉。其餘雜律詩。或誘於一時一物。發於一笑一吟。率然成章。非平生所尙者。但以親朋合散之際。取其釋恨佐懽。今銓次之間。未能刪去。他時有爲我編集斯文者。略之可也。微之。夫貴耳賤目。榮古陋今。人之大情也。僕不能遠徵古舊。如近歲韋蘇州歌行。清麗之外。頗近興諷。其五言詩。又高雅閒澹。自成一家之體。今之秉筆。誰能及之。然當蘇州在時。人亦未甚愛重。必待身後。然後人貴之。今僕之詩。人所愛者。悉不過雜律詩。與長恨歌已下耳。時之所重。僕之所輕。至於諷諭者。意激而言質。閒適者。思澹而詞迂。以質合迂。宜人之不愛也。今所愛者。並世而生。獨足下耳。然千百年後。安知復無如足下者。出而知愛我詩哉。故自八九年來。與足下小通。則以詩相戒。小窮。則以詩相勉。索居。則以詩相慰。同處。則以詩相娛。知吾最要率以詩也。如今年春。遊城南時。與足下馬上相戲。因各誦新艷小律。不雜他篇。自皇子陂歸昭國里。迭吟遞唱。不絕聲者。二十里餘。樊李在傍。無所措口。知我者以爲詩仙。不知我者以爲詩魔。何則。勞心。靈役。聲氣。連朝接夕。不自知其苦。非魔而何。偶同人當美景。或花時宴罷。或月夜酒酣。一詠一吟。不知老之將至。雖驂鸞遊蓬瀛者。之適無以加於此焉。又非仙而何。微之。微之。此吾所以與足下外形骸。脫蹤蹟。傲軒鼎。輕人寰者。又以此也。當此之時。足下興有餘力。且與

僕悉索還往中詩。取其尤長者。如張十八古樂府。李二十新歌行。盧楊一裕書律詩。竇七元八絕句。博取精掇。編而次之。號元白往還詩集。衆君子得擬議於此者。莫不踴躍欣喜。以爲盛事。嗟乎。言未終而足下左轉。不數月而僕又繼行。心期索然。何日成就。又可爲之歎息。又僕嘗語足下。凡人爲文。私於自是。不忍於割截。或失於繁多。其間妍媸。益又自惑。必待交友有公鑒無姑息者。討論而削奪之。然後繁簡當否。得其中矣。况僕與足下。爲文尤患其多。已尙病之。况他人乎。今且各纂詩筆。粗爲卷弟。待與足下相見日。各出所有。終前志焉。又不知相遇是何年。相見在何地。溘然而至。則如之何。微之微之。知我心哉。潯陽臘月。江風苦寒。歲莫鮮懽。夜長無睡。引筆鋪紙。悄然燈前。有念則書。言無次第。勿以繁雜爲倦。且以代一夕之話也。微之微之。知我心哉。

唐詩紀事卷第二十九

白居易

韋式

崔玄亮

牛僧孺

李紳

沈傅師

盧羣

劉禹錫

封孟紳

陳潤

白居易

按樂天生於代宗大曆七年壬子（正月二十日）大和七年樂天尹河南元日對酒詩云今朝吳與洛相憶一欣然夢得君知否俱過本命年又詩云何事同生壬子歲老於崔相及劉郎序云余注云余與蘇州劉郎中同生壬子歲今年六十三退之生於大曆三年戊申微之生於德宗建中元年庚申卒於大和五年時年五十三少樂天八歲

德宗正元十六年己卯中書舍人高郢下及第第四人省試性習相近遠賦玉水記方流詩時年二十八樂天送侯權秀才序云正元十五年予與侯生俱爲宣城守所貢明年春予中春官第（傳云年二十七李商隱銘云年二十六）

十七年庚辰試中書判拔萃補校書郎樂天泛渭賦序云右丞相高公之掌貢舉也予以

鄉貢進士舉及第。左丞相鄭公（珣瑜）之領選部也。予以書判拔萃。選登科。十九年。天子並命二公對掌鈞軸。（是年齊抗罷。崔損薨。二公入相。）憲宗元和元年丙戌。四月。以賢良方正對策。乙等。冬十二月。尉蓋屋爲集賢校理。賦長恨歌于蓋屋。是月召入翰林爲學士。遷左拾遺。（元和二年爲拾遺。）樂天曲江感秋詩云。元和二年秋。我年三十七。長慶二年秋。我年五十一。序云。元和二年三年四年。予每歲有曲江感秋詩。是時。予爲左拾遺翰林學士。

賀雨詩。元和三年冬作。

諷諭樂府詞。元和四年作。（凡九千二百五十言。分爲五十首。）秦中吟等詩。皆拾遺時。拾遺歲滿當遷。憲宗聽自擇官。樂天請如姜公輔以學士兼京兆戶曹參軍。以便親養。詔可。

五年。以母喪解還。有渭上等詩。泊效陶淵明詩十六首。

七年。拜左贊善大夫。居昭國里。酬張十八訪宿云。昔我爲近臣。君常稀到門。今我官職冷。唯君來往頻。又寄元八云。進入閣前拜。退就廊下食。歸來昭國里。人臥馬馱鞍。却坐至日午。起坐心浩然。又十年贈杓直云。已年四十四。又爲五品官。蓋爲贊善大夫。首尾四年。

十年秋。或言居易母墮井死。賦新井詩。出爲刺史。王涯言其不可。乃貶江州司馬。（論盜殺武元衡事。宰相嫌其出位。故也。）

樂天東南行一百韻。其間云。博望移門籍。潯陽佐郡符。注云。十年春。微之移佐通州。其年秋。予出佐潯陽。十一年秋。賦琵琶行。時年四十五矣。詩云。行年四十五。兩鬢半蒼蒼。清瘦詩成癖。麴豪酒放狂。老來尤委命。安處卽爲鄉。或擬廬山下。來春結草堂。

十二年。裴度平淮西。

十三年冬。移刺忠州。三遊洞庭。序云。平淮西之明年冬。予自江州司馬授忠州刺史。微之自通州司馬授號州長史。又明年春。各祇命之郡。與知退偕行。三月十一日。參會於夷陵。又賦詩云。澧水店頭春盡日。十年送君馬上謫通川。夷陵峽口明月夜。此處逢君是偶然。一別五年方見面。相携三宿未回航。是也。

十五年正月。德宗崩。穆宗立。召爲司馬員外郎。是年寒食夜詩云。四十九年身老日。一百五夜月明天。抱膝思量何事左。癡男騃女喚鞦韆。又初除尙書郎。口刺史。緋詩云。頭白喜拋黃草峽。眼明驚拆紫泥書。使留朱紱還銓閣。却着青袍侍玉除。是歲下峽。自商山路還朝。有商山路詩云。萬里路長在。六年身始歸。所經多舊館。大半主人非。自十年至是六年矣。

明年除主客郎中知制誥。長慶元年。以詩贈王十一李七元九王舍人云。紫垣曹局聯華地。白鬢郎官老醜時。莫怪不如君氣味。此中來校十年遲。時元微之亦以中人之薦。入

爲舍人。是年除中書舍人。有絲綸閣下文章靜等詩。

長慶二年七月。自舍人旬外。出守杭州。時河比復。亂謀趙國急。樂天論事不合。乃旬外遷。次藍溪詩云。旣居可言地。願助朝廷理。伏閣三上章。慙愚不稱旨。聖人存大體。優貸容不死。鳳詔停舍人。魚書除刺史。

長慶三年二月五日。杭州花下作云。二月五日花如雪。五十二人頭似霜。聞有酒時須笑樂。不關身事莫思量。

長慶四年。以太子左庶子分司東都。是歲正月。穆宗崩。恭宗立。三年爲刺史。無政在人口。唯向郡城中。題詩千餘首。慙爲甘棠詠。豈有思人不。三年爲刺史。飲冰復食蘗。唯向天竺山。取得兩片石。此砥有千金。無乃傷清白。三月作錢塘湖石記時。猶在杭州。則分司當在秋時。洛中詩云。五年職翰林。四年蒞潁陽。一年巴郡守。半年南宮郎。二年直綸閣。三年刺史堂。凡此十五載。有詩十餘章。

寶曆元年三月。除守蘇州。是年七月。有吳郡詩石記。明年病免。華嚴經社石記云。寶曆二年九月二十五日。前蘇州刺史白居易記。是歲十二月。恭帝崩。文宗立。

樂天欲去郡。有自詠五章。其一云。官舍非我廬。官園非我樹。洛中有小宅。渭上有別墅。旣

無婚嫁累。幸有歸休處。歸去誠已遲。猶勝不歸去。又宿滎陽詩云。生長在滎陽。少小辭鄉曲。迢迢四十載。復到滎陽宿。去時年十二。今年五十六。（時文宗大和元年也。）

文宗大和元年。以祕書監召。十月上旬。誕聖之日。樂天以祕書監與沙門義林。道士楊洪元。發閭酬難。是歲遷刑部侍郎。微之於浙東。就拜尙書。樂天詩云。我爲憲部入南宮。君作尙書鎮浙東。老去一時成白首。別來七度換春風。是也。

二年歲暮詠懷云。窮冬月末兩三日。半百年過六七時。龍尾趁朝無氣力。牛頭參道有心期。榮華外物終須悟。老病傍人豈得知。猶被妻兒教漸退。莫求致仕且分司。

時二李黨事興。樂天畏禍求退。故詠懷云。人間禍福恐難料。世上風波老不禁。萬一差池似前事。又應追悔不抽簪。

二年春。移病還東都。是年夏。得請爲太子賓客分司。（見池上篇序。自是不出東吳矣。）將至東都。先寄令狐留守云。東都添箇狂賓客。先報壺觴風月知。歸履道宅詩云。往時多暫住。今日是長歸。（自是劉白令狐斐相唱和甚多。）

四年作自嘲詩云。五十八翁方有後。靜思堪喜亦堪嗟。自後何處難忘酒。不如來飲酒詩篇。皆東都作也。五年拜河南尹。樂天詩云。六十河南尹。前途足可知。老應無處避。病不與人期。



是年六十矣。

七年復以賓客分司。

序洛詩云。大和二年。詔授刑部侍郎。明年病免歸洛。旋以賓客分司。居二年。就領河南尹事。又三年。病免。歸履道里第。再授賓客分司。

開成元年。起爲同州刺史。不拜。改太子少傅。

二年三月。河南尹李待價。襖於洛濱。啓留守裴令公。公召居易。劉禹錫等。一十五人。宴舟中。樂天賦三月草萋萋。黃鶯歇。又啼之作。

四年賦病中詩。序云。開成已未歲。余蒲柳之年。六十有八。冬十月甲寅。始得風痺之疾。因成十五首。題爲病中詩。且貽所知。兼用自廣。

五年春。盡獨吟云。病共樂天和。伴住春隨樊子。一時歸。是年文宗崩。武宗立。樂天妓樊素也。善歌楊柳枝。人多以曲名。名之樂天病。去之。夢得詩云。春盡絮飛留不得。隨風好去落誰家。

辛酉會昌元年。年七十。以刑部尙書致仕。

達哉樂天行云。分司東都十三年。七旬纔滿冠已掛。又香山寫真贊序云。會昌二年。罷太

子少傅爲白衣居士。寫真香山寺藏經臺。又初致仕。贈留守牛丞相。時年七十一。則樂天七十致仕矣。致仕詩云。南北東西無所羈。掛冠自在勝分司。探花嘗酒多先到。拜表行香盡不知。炮笋烹魚飽殮後。擁袍枕臂醉眠時。報君一語君應笑。兼亦無心羨保釐。又醉中吟。一生就酒客。五度棄官人。〔注云。蘇州荆侍。河南尹。同州刺史。太子少傅。皆以病免。〕

五年爲東都九老會。時年七十四。

六年八月。薨東都。贈右僕射。時年七十五。樂天寄王起李紳詩云云。予與山南王僕射淮南李僕射。仕歷五朝。年踰三紀。海內年輩。今唯三人。故詩云。故交海內只三人。二坐富廊一臥雲。時會昌六年也。微之卒於大和六年。明年崔元亮卒。會昌二年。劉夢得卒。樂天之卒最後。

### 韋式

樂天分司東洛。朝賢悉會。興化亭送別。酒酣各請一字至七字詩。以題爲韻。

王起賦花詩云。花點綴分葩。露初裊。月未斜。一枝曲水。千樹山家。戲蝶未成夢。

嬌鶯語更誇。既見東園成徑。何殊西子同車。漸覺風飄輕似雪。能令醉者亂如麻。

李紳賦月詩云。月光輝皎潔。耀乾坤。靜空闊。圓滿中秋。翫爭詩哲。玉兔鑄難穿。

桂枝人共折。萬象照乃無私。瓊臺豈遮君謁。抱琴對彈別鶴聲。不得知音聞不切。

令狐楚賦山詩云。山聳峻。回環。滄海上。白雲間。商老深尋。謝公遠攀。古巖泉滴滴。

幽谷鳥關關。樹鳥西連隴。寒猿聲南徹。荆蠻。世人只向簪裾老。芳草空餘麋鹿閑。

元稹賦茶詩云。茶香葉嫩芽。慕詩客。愛僧家。碾雕白玉。羅織紅紗。銚煎黃蘖色。

琬轉麴塵花。夜後邀陪明月。晨前命對朝霞。洗盡古今人不倦。將知醉亂豈堪誇。

魏扶賦愁詩云。愁洵野。深秋。生枕上。起眉頭。閨閣危坐。風塵遠遊。巴猿啼不住。

谷水咽還流。送客泊舫入浦。思鄉望月登樓。煙波早晚長羈旅。絃管終年樂五侯。

韋式郎中賦竹詩云。竹臨池似玉。裊露靜和煙綠。抱節寧改。貞心自束。渭曲偏

種多。王家看不足。仙仗正驚龍化。美實當隨鳳熟。唯愁吹作別離聲。回龍駕。驂舞陣速。

張籍司業賦花詩云。花落早。開賒。對酒客。興詩家。能迴游騎。每駐行車。宛宛清

風起。茸茸麗日斜。且願相留懽洽。惟愁虛乘光華。明年攀折知不遠。對此誰能更嘆嗟。

范堯佐道士賦書字詩云。書憑鴈寄魚。出王屋。入匡廬。文生益智。道著清虛。葛

洪一萬卷。惠子五車餘。銀鈎屈曲索靜。題橋司馬相如。別後莫睽千里信。數封緘送到閑

居。

居易賦詩字詩云。詩綺美。壤奇。明月夜。落花時。能助懽笑。亦傷別離。調清金石

怨吟苦鬼神悲。天下只應我愛。世間惟有君知。自從都尉別蘇句。使到司空送白辭。

### 崔元亮

元亮爲散騎常侍。後以太子賓客。分司東都。歸洛和樂天詩云。病餘歸到洛陽頭。拭目開眉見白侯。鳳詔恐君今歲去。龍門欠我舊時遊。（自到未遊龍門）幾人樽下酒歌詠。數盞燈前共獻酬。相對憶劉劉在遠。寒霄耿耿夢長洲。（夢得詩云。幾年侍從作朝臣。却向青雲索得身。朝士忽爲方外士。主人仍是眼中人。）

元亮在洛。與白樂天相從。醉吟之樂。曾有詩云。其相呼喚醉歸來。樂天答云。居士忘筌默坐。先生枕麴昏昏睡。早晚相從入醉鄉。醉鄉此去無多地。

元亮字晦叔。磁州人。大和中。爲諫議大夫。鄭注誣宋申錫。捕逮倉卒。內外震駭。元亮率諫官。叩延英苦諫。帝感悟。由是名重朝廷。頃之移疾歸東都。召爲號州刺史。卒。

元亮與元微之白樂天。皆正元初同年生也。元亮名最後。自詠云。人間不會雲間事。應笑蓬萊最後仙。後白刺杭州。元爲浙東廉使。刺越。而崔刺湖州。白以詩戲之曰。越國封疆吞碧海。杭城樓閣入青天。吳與卑小君應屈。爲是蓬萊最後仙。三郡有唱和詩。謂之三州唱和集。

樂天誌元亮墓云。公晚年。師六祖。以無相爲心地。易簀之夕。大怖將至。如入三昧。恬然自

安於遺疏之末。手筆題云。慙榮慙悴。石敲火。卽空卽色。眼生花。許時爲客。今歸去。大曆元年是我家。諸子中芻言。罕言登進士第。

元微之酬歐舒少府寄同年科第云。前年科第偏年少。未解知羞最愛狂。九陌爭馳好鞍馬。八人同看綵衣裳。注云。同年科第宏詞。呂二吳王十一。一起拔萃。白二十二。居易。平判。李十一。復禮。呂四頻。歌舒。大垣。崔十一。八元亮。逮不肖八人。皆奉榮養。

元亮在湖州寄三癖詩。劉夢得言癖。在詩與琴酒。夢得和之。并序云。柳吳興亭臯隴首之句。王融書之白團扇。故夢得詩曰。視事畫屏中。自稱三癖翁。鳧絃汛春渚。旌旆拂晴虹。酒對青山月。琴韻白蘋風。會書團扇上。知君文字工。

牛僧孺

樂天夢得有除夜詩。僧孺和云。惜歲歲今盡。少年應不知。淒涼數流輩。歡喜見孫兒。暗減一身力。潛添蒲鬢絲。莫愁花笑老。花自幾多時。

元和三年。宣政殿試賢良方正。能直言極諫科。十人登科。其後僧孺李宗閔王起賈餗四人。皆相次拜相。先是白居易在翰林。爲考校官。後僧孺罷相。出鎮揚州。居易在洛中。有詩送云。北闕至東京。風光十六程。坐移丞相閣。春入武陵城。紅旆擁雙節。白髮無一莖。萬人開路看。

百吏立班迎。關外君彌重。樽前我亦榮。何須身自得。將相是門生。

公始至京。致琴書滿漚間。先以所業謁韓文公。皇甫員外。二公披卷。卷首有說樂一章。未闕其詞。遽曰。且以拍板爲什麼。對曰。樂句。二公相顧大喜。曰。期高文必矣。公因謀所居。二公良久曰。可於客戶坊稅一廟院。公如所教。二公復誨之曰。某日可遊青就寺。薄暮而歸。二公其日聯轡至彼。因大書其門曰。韓愈皇甫湜同謁。幾官先輩不遇。翌日。輦轂名士咸往觀焉。奇章之名。由是赫然矣。或云。僧孺登第。與同輩登政事堂。宰相曰。掃廳奉候。

樂天在香山時。僧孺在廣陵。有詩曰。唯羨東都白居士。年年香積問禪師。樂天答云。支許徒思遊白日。夔龍未放下青天。應須且爲蒼生住。猶去懸車十四年。（時僧孺年五十七。）

樂天求箏於維揚。僧孺先有詩曰。但愁封寄去。魔物或驚禪。樂天云。會教魔女弄。不動是禪心。樂天云。思黯自誇前後服。鍾乳三千兩。而歌舞之妓甚多。乃譴予衰老。故答思黯詩云。鍾乳三千兩。金釵十二行。如他心似火。欺我鬢如霜。愚老資歌笑。銷愁仰酒漿。眼看狂不得。狂得且須狂。奇章又有詩云。不是道公狂不得。恨公逢我不教狂。

公赴舉之秋。嘗投贄於劉補闕。禹錫對客展卷飛筆。塗竄其文。歷二十餘歲。劉轉汝州。公鎮海南。枉道駐旌信宿。酒酣賦詩。劉方悟往年改公文卷。僧孺詩曰。粉署爲郎四十春。今來名

輩更無人。休論世上昇沉事。且開樽前見在身。珠玉會應成咳唾。山川猶覺露精神。莫嫌持酒輕言語。曾把文章謁後塵。禹錫和云。昔年曾忝漢朝臣。晚歲空飲老病身。初見相如成賦日。後爲丞相掃門人。追思往事咨嗟久。幸喜清光笑語頻。猶有當時舊冠劍。待公三日拂埃塵。牛公吟和詩。前意稍解。曰。三日之事。何敢當焉。○宰相三朝後主印。可以昇降百司也。○於是移宴竟夕。方整前驅也。劉乃戒其子咸久永雍曰。吾成人之志。豈料爲非。汝輩進修。守中爲上。

僧孺周秦行紀云。余正元中。舉進士。落第。歸宛葉間。至伊闕南道。鳴臯山下。將宿大安民舍。會暮不至。更十餘里。一道甚異。夜月始出。忽聞有異香。因而進行。不知狀遠。見火明。意爲莊家。更驅之一宅。庭門若富家。有黃衣人曰。郎君何氏何至。余曰。僧孺姓牛。應進士落第。往大安民舍。誤道來此。黃衣入告。少時出曰。請郎君入拜殿下。簾下語曰。妾漢文帝母薄太后。此是妾廟。太后遣軸簾。使上殿召坐。食頃。太后命高祖戚夫人。元帝王嬙。余皆拜。乃亦就坐。太后迎唐朝太真楊妃。齊潘妃。余拜。旣命饌。太后問曰。今天子誰。余對曰。今皇帝名适。代宗長子。太后曰。沈婆兒作天子也。大奇。命酒各賦詩。余應教作詩曰。香風引上大羅天。月地花宮拜洞仙。具道人間惆悵事。不知今夕是何年。太后曰。秀才遠來。今日誰伴。戚夫人先起辭曰。如意成長。潘妃曰。東昏侯。誓不負他。綠珠曰。石衛尉嚴忌。太后曰。太真今朝先帝貴妃。重言其他。太后目王昭

君昭君不對。低眉羞恨。俄歸休。餘爲左右送入昭君院。旦侍人告起。太后戚夫人昭君等皆泣別。使朱衣人送至大安民里。余衣上香。經十餘年不歇云。

李紳

紳初以古風求知於呂溫。溫見齊煦。誦其憫農詩曰。春種一粒粟。秋收萬顆子。四海無閑田。農夫猶餓死。鋤禾日當午。汗滴禾下土。誰知盤中飧。粒粒皆辛苦。又曰。此人必爲卿相。果如其言。

奉酬樂天立秋日有懷見寄云。深夜星漢靜。秋風初報涼。篔簹塔漸瀝響。露葉參差光。冰口半升魄。銅壺微滴長。薄帷乍飄卷。襟帶輕搖揚。北除魂夢清。斜月滿軒房。屣履步前楹。劍戟森在行。重城宵正分。號鼓牙相望。獨坐有所思。夫君鸞鳳章。天津落星河。一葦安可航。龍泉白玉首。魚服黃金裝。報國未知効。維鷄徒在梁。徘徊顧戎旆。頽氣生東方。衰葉滿欄草。班毛盈鏡霜。羸牛未脫轅。老馬強騰驤。吟君白雪唱。慚愧巴人腸。

樂天贈紳詩云。一篇長恨有風情。十首秦吟近正聲。剛被老元偷格律。苦教短李復歌行。注云。元九往江陵。余以詩一軸贈行。自是格變。李二十嘗自負歌行。近見余樂府五十首。默然心伏。樂天藏書東都聖善寺。號白氏文集。紳有詩以美之云。寄玉蓮花藏。絨珠貝葉局。院閑容



客讀講倦許僧聽。部列雕金榜。題名刻石銘。永添鴻寶集。莫雜小乘經。

紳字公垂。中書令敬玄曾孫。號短李。穆宗召爲翰林學士。與李德裕元稹同時。號三俊。武宗時爲相。居位四年。出鎮南卒。

紳江南暮春寄家云。洛陽城見迎梅雪。魚口橋逢送雪梅。劍外寺前芳草合。鏡湖亭上野  
花開。江鴻斷續翻雲去。海燕差池拂水迴。料得心知近寒食。潛聽喜鵲望歸來。

開成間紳集其詩。爲追昔遊。蓋嘆逝感時。發於悽恨而作也。或長句。或五言。或雜言。或歌  
或吟。或樂府。齊梁不一其辭。乃由牽思所屬爾。赴梁漢。歸諫垣。升翰苑。感恩遇。歌帝京風物。遭  
讒邪播越。歷荆楚。涉湘沅。逾嶺嶠。抵荒陬。止高安。移九江。泛五湖。過鍾陵。沂荆江。守滌陽。轉壽  
春。改賓客。當洛陽。歷會稽。過梅里。遭讒邪。再爲賓客。分務歸東周。擢川守。鎮大梁。詞有所懷。興  
生於怨。故或隱或顯。不常其言。冀知音於異而已。南梁行云。江城鬱鬱春草長。悠悠漢水浮清  
光。雜英飛盡空畫景。綠楊重陰官舍靜。此時醉客縱橫書。公言可薦承明廬。元和十四年。蒙  
故山南節度僕射崔公奏。觀察判官蒙以書見委。常戲拙口。青天詔下寵光至。頰籍金閨徵  
石渠。是歲五月。蒙恩除左拾遺。秣歸山路。烟嵐隔。山木幽深。晚花折。澗底紅光奪火燃。搖  
風扇毒愁行客。駱谷中多毒木。名山琵琶。其花明艷。而與杜鵑花相雜。樵者識之。言內草木

殺人。杜鵑啼咽花亦殷。聲悲絕艷連空山。斜陽瞥影淺深木。雲雨翻迷巖谷間。山雞錦質矜  
毛羽。透出穿蘿命儔侶。喬木幽谿上下同。雄雌不惑飛棲處。望秦峯洵過商顏。浪疊波堆萬族  
山。行盡杳冥青嶂外。九重鍾漏紫霄間。元和列侍明光殿。諫草初焚市朝變。北闕趨臣半隙塵。  
南梁吟嘯皆飛霰。追思感歎却昏迷。霜鬢愁吟到曉雞。故篋歲深開斷簡。秋堂月曉掩遺桂。鳴  
鳴曉角霞輝粲。撫劍長楹一長歎。芻狗無由學聖賢。空持感激終昏旦。

憶春日太液池東亭候對云。宮器曉報瑞煙開。三鳥靈禽拂水迴。橋轉綵虹當綺殿。檻浮  
花鷓近蓬萊。草承步輦王孫長。桃艷仙顏阿母栽。簪筆此時方侍從。却思金馬笑鄒枚。

憶夜直金鑾奉詔承旨詩云。月當銀漢玉繩低。深聽簫韶碧落齊。門壓紫垣高綺樹。閣連  
青鎖近丹梯。墨宣外渥催飛詔。草定新恩促換題。明日獨歸花路近。可憐人世隔雲泥。

過荆門詩云。荆江水闊煙波轉。荆門路遠山葱蒨。帆勢侵雲滅又明。山程背日昏還見。青  
青麥鵲啼飛鷓。寂寞野徑棠梨花。行行駢馬萬里遠。漸入煙嵐危棧賒。林中有鳥飛幽谷。月上  
千窗一聲哭。腸斷思歸不可聞。人言恨魄來巴蜀。我聽此鳥祝我魂。之死莫學聲囓冤。縱馬羽  
族莫棲息。直上青雲呼帝閣。此時山月如銜鏡。崑樹參差玄輝映。皎潔深看入澗泉。分明細見  
樵人逕。陰森鬼廟當郵亭。雞豚日宰聞臙腥。愚夫禍福自迷惑。魍魎憑何通百靈。日低山晚問

行客已酌椒漿拜荒陌。惆悵忠直徒自持。誰登山頭望夫石。

涉沅湘詩云。屈原死處瀟湘陰。滄浪淼淼雲沉沉。蛟龍長怒虎長嘯。山水脩脩波浪深。煙橫日落驚鴻起。山映雲霞森千里。鴻叫離離入莫天。霞消漠漠深雲水。水虛江暗揚波濤。龍窟動盪風騷騷。行人愁望待明月。星漢沉浮魅鬼號。屈原爾爲懷忠沒。水府通天化靈物。何不駢雷擊電除姦邪。空作沈泉抱冤骨。舉盃灑酒召爾魂。月影滉漾開乾坤。波白水黑山隱見。汨羅之上遙昏昏。風帆候晚看五兩。戍鼓戛戛遠山響。潮滿江津猿鳥啼。荆夫楚語飛蠻漿。瀟湘弔浦無人居。風驚水暗惟鮫魚。行來擊棹獨長歎。問爾精魂何所如。

悲善才詩。余守郡日。有客遊者。善彈琵琶。聞其所傳。乃善才所授。頃在內庭日。別承恩顧。賜宴曲江。勅善才等二十人備樂。自余經播遷。善才已沒。因追感前事。爲悲善才。

穆王夜幸蓬池曲。金鑾殿門高秉燭。東頭弟子曹善才。琵琶請奏新翻曲。翠娥列坐層城女。笙歌參差齊笑語。天顏靜聽朱絃彈。衆樂寂然無敢舉。銜花金鳳當承撥。轉腕攏絃促揮霍。抹花翻鳳天上來。徘徊滿殿飛春雪。抽絃度曲新聲發。金鈴玉佩相嗟切。流鶯子母飛上林。仙鶴雌雄唳明月。此時奉詔侍金鑾。別殿承恩許占看。三月曲江春草綠。九霄天樂下雲端。紫髯供奉前屈膝。盡彈妙曲當春日。寒泉注射隴水開。胡鴈翻飛湖天沒。日曛塵暗車馬散。爲惜新

聲有餘歎。明年冠劍閉橋山。萬里孤臣投海畔。籠禽鰓翮尙迴飛。白首生從五嶺歸。聞道善才成朽骨。空餘弟子奉宣徽。南譙寂寞三春晚。有客彈絃獨悽怨。靜聽深奏楚月光。憶惜初聞曲江宴。心悲不覺淚闌干。更爲調絃反復彈。秋吹動搖神女佩。月珠敲擊水精盤。自憐淮海同泥滓。恨魄凝心未能死。惆悵追懷萬事空。誰聞感慨徒爲爾。

憶過潤州時。元和二年。余以進士爲鎮海軍書奏從事。秋七月。兵亂。余以不從書奏。飛檄之詐。遭庶人李暴怒。腰領不殊者再三。後軍平。尙書李公欲具事以聞。余以本乃誓節。非欲求榮。罷所奏。詩云。昔年從宦干戈地。黃綬青春一魯儒。弓犯控玄招武族。劍當抽匣問狂夫。帛書投筆魚封腹。立髮衝冠探虎鬚。談笑謝金何所貴。不爲偷買用兵符。

元微之和樂天東南行云。李多嘲蠅蜓。竇數集蜘蛛。注云。李二十多詠物之作。竇七頗改官銜。屢有蜘蛛之喜。

樂天詩曰。悶勸迺辛酒。閑吟短李詩。迺辛。辛丘度也。丘度之子。一日自云。辛氏子來見。紳曰。小子每憶白二十二丈詩。悶勸疇昔酒。閑吟二十丈詩。紳笑曰。辛大有此狂兒。吾敢不存舊。

沈傅師（子詢）

傅師次潭州。酬唐待御姚員外遊道林嶽麓寺題示云。承明年老輒自輪。訖得湘守東南。

奔爲開。楚國富山水。青嶂邈迤。僧家園舍。香珎筆皆眷舊。謙抑自忘。臺省尊不令。執簡候亭館。直許携手遊山樊。忽驚列岫曉來逼。朔雪洗盡煙嵐昏。碧波迴燠三山轉。丹檻繚郭干艘屯。華燧蹀躞絢沙步。大旆綵錯輝松門。樛枝競鶖龍蛇勢。折幹不滅風霆痕。相重古殿倚崑腹。別引新徑縈雲根。日傷平楚虞帝魂。情多思遠聊開樽。危絃細管逐歌飄。畫鼓繡靴隨節翻。鏘金七言凌老杜。入木八法蟠高軒。嗟余潦倒久不知。忍復感激諭元元。

傅師字子言。既濟之子。材行有餘。權德輿門生。七十人推爲顏子。終吏侍。

子詢字誠之。亦能文。咸通中爲昭義節度使。詢清粹端美。神仙中人也。制除山北。節旄京城。咸誦曹唐遊仙詩贈之。云。玉詔新除沈侍郎。便分茅土領東方。不知今夜遊何處。侍從皆騎白鳳凰。

李德裕觀察浙西。有招隱山觀玉藥花詩云。玉藥天中樹。金閨昔共窺。落英閑舞雲。密葉作低帷。內署沈大夫所居閣前。有此花。落空中回旋久之。方集庭砌。大夫草詔之暇。常邀余同玩。舊賞煙霄遠。前歡歲月移。今來想顏色。還似憶瓊枝。

傅師和云。曾對金鑾直。同依玉樹陰。雪英飛舞近。煙葉動搖深。素萼年年密。衰容日日侵。勞君想華髮。僅欲不勝簪。

盧 群

唐淮西節度使吳少誠。不奉詔。令羣使蔡州詰之。羣諭以君臣之分。忠順之義。少誠乃從命。羣又與唱和賦詩。自言以反側。常蒙隔在恩外。羣於筵中醉而歌曰。祥瑞不在鳳凰麒麟。太平須得邊將忠臣。衛霍眞誠奉主。貔虎十萬一身。江河潛注息浪。蠻貊款塞無塵。但得百寮師長肝膽。不用三軍羅綺金銀。少誠大悅。羣以奉使稱旨。遷祕書監。羣字載初。范陽人。終於義成軍節度使。

劉禹錫

三鄉驛。伏觀明皇望女兒山詩。裴然有感云。開元天子萬事足。惟惜當時光景促。三鄉陌上望仙山。歸作霓裳羽衣曲。仙花從此在瑤池。三清八景相追隨。天上忽乘白雲去。世間惟有秋風辭。

長慶中。元微之夢得。韋楚客。同會樂天舍。論南朝興廢。各賦金陵懷古詩。劉滿引一盃。飲已。卽成曰。王濬樓船下益州。金陵王氣黯然收。千尋鐵鎖沉江底。一片降幡出石頭。人世幾回傷往事。山形依舊枕江流。而今四海爲家日。故壘蕭蕭蘆荻秋。白公覽詩曰。四人探驪龍。子先獲珠。所餘鱗爪。何用耶。於是罷唱。

詩弔張曲江曰。聖言貴忠恕。至道重觀身。法在何所恨。色傷新爲仇。良時難久恃。陰譎豈無因。寂寞韶陽廟。魂歸不見人。

元和十年。自朗州召至京。戲贈看花君子云。紫陌紅塵拂面來。無人不道看花回。元都觀裏桃千樹。盡是劉郎去後栽。

再遊元都觀絕句。并序云。余正元二十一年。爲屯田員外郎時。此觀未有花。是歲出牧連州。貶朗州司馬。居十年。召至京師。人人皆言。有道士手植仙桃滿觀。如紅霞。遂有前篇。以志一時之事。旋又出牧。今十有四年。復爲主客郎中。重遊元都。蕩然無復一樹。唯兔葵燕麥。動搖春風耳。因再題二十八字。以俟後遊。時大和二年三月也。詩云。百畝庭中半是苔。桃花落盡菜花開。種桃道士歸何處。前度劉郎今獨來。

禹錫嘗對賓友。每吟張博士籍詩云。新酒欲開期好客。衣冠暫脫見閑身。對花木則吟王右丞詩云。興闌啼鳥換。坐久落花多。白二十二好。余秋水詠云。東屯滄海闊。南瀼洞庭寬。余自知不及韋蘇州。春潮帶雨晚來急。野渡無人舟自橫。嘗過洞庭。雖爲一篇思杜員外落句云。去年來洞庭上。白蘋愁殺白頭人。鄙夫之言。有愧於杜公也。楊茂卿校書過華山詩曰。河勢峴崿遠。山形茵蔯秋。此實爲佳句。

贈歌人米嘉榮詩云。唱得梁州意外聲。舊人唯有米嘉榮。近來年少輕前輩。好染髭鬚事後生。

禹錫赴吳臺。楊州大司馬杜公鴻漸。開宴命妓侍酒。禹錫詩曰。高髻雲鬟宮樣粧。春風一曲杜韋娘。司空見慣渾閑事。斷盡蘇州刺史腸。

白樂天任杭州刺史。携數妓還洛陽。後却還錢塘。故禹錫戲答云。其那錢塘蘇小小。憶君淚踏石榴裙。沈存中曰。禹錫霓裳羽衣曲云。三鄉陌上望仙山。歸作霓裳羽衣曲。又王建詩云。聽風聽雨作霓裳。樂天詩注云。開元中。西涼府節度使楊敬述造鄭愚津陽門詩。注云。葉法善嘗引上入月宮。聞仙樂。及上歸。但記其半。遂於笛中寫之。會西涼府都督楊敬述進婆羅門曲。與其聲調相符。遂以月中新聞爲散序。用敬述所進爲其腔。而名霓裳羽衣曲。說各不同。今蒲州逍遙樓楣上。有唐人橫書類梵字。相傳是霓裳譜。字訓不通。莫知是非。或謂今燕部有獻仙音曲。乃其遺聲。然霓裳本謂之道調。法曲今獻仙音。乃小石調耳。未知孰是。

山圍故國周遭在。潮打空城寂寞迴。淮水東邊舊時月。夜深還過女牆來。樂天掉頭苦吟。嘆賞良久。曰。石頭詩云。潮打空城寂寞回。吾知後之詩人。不復措辭矣。（禹錫金陵五題自叙云。）



禹錫與樂天唱和。號劉白唱和集。與裴度唱和。號汝洛集。與令狐楚唱和。號彭陽唱和集。與李德裕唱和。號吳蜀集。

禹錫字夢得。附叔文。擢度支員外郎。人不敢斥其名。號二王。劉柳。憲宗立。禹錫貶連州。未至。斥朗州司馬。作竹枝詞。武元衡初不爲宗元所喜。自中丞下除右庶子。及是執政。禹錫久落魄。乃作問大鈞謫九年等賦。又叙張九齡事爲詩。欲感諷權。久之。召還。宰相欲任南省郎。乃作元都觀看花君子詩。當路不喜。由爲播州。易連州。徙夔州。由和州刺史入爲主客郎中。復作遊元都觀詩。有兔葵燕麥之語。聞者益薄其行。俄分司東都。裴度薦爲集賢學士。度罷。出刺蘇州。徙汝同二州。會昌時。檢校禮部尙書。卒。

禹錫晚年。與白傅友善。詩筆文章。時無在其右者。常與禹錫唱和往來。因集其詩而序之。曰。彭城劉夢得。詩豪者也。其鋒森然。少敢當者。予不量力。往往犯之。夫合應者聲同。交爭者力敵。一往一復。欲罷不能。由是每制一篇。先於視草。視竟則興作。興作則文成。一二年來。日尋筆研。同和贈答。不覺滋多。大和三年春。已前。紙墨所存者。凡一百三十八首。其餘乘興仗醉。率然口號者。不在此數。因而命小姪龜兒。編勒成兩軸。仍寫二本。一付龜兒。一授夢得。小男崑郎。各令收藏。附兩家文集。予頃與元微之唱和頗多。或在人口。嘗戲微之云。僕與足下。二十年來。爲

文友詩敵。幸也。亦不幸也。吟詠情性。播揚名聲。其適遺形。其樂忘老。幸也。然江南士女。誥才子者。多云元白。以子之故。僕不得獨步於吳越間。此亦不幸也。今垂老復遇夢得。非重不幸耶。夢得文之神妙。莫先於詩。若妙與神。則吾豈敢如夢得。雪裏高山頭。白早海中仙。果子生遲。沉舟側畔千帆過。病樹前頭萬木春之句類。真謂神妙矣。在在處處。應有靈物護持。豈兩家子弟祕藏而已。其爲名流許與如此。

故國思如此。若爲天外心。（寄白公句）湖上收宿雨。（句）故人日已遠。窓下麈滿琴。坐對一樽酒。恨多無力斟。暮疎螢色迥。露重月華深。萬境興羣歎。此時情豈任。（無題）禪思何妨在玉琴。真僧不見聽時心。秋堂境寂夜方半。雲去蒼梧湘水深。（聽琴）

右張爲取爲主客圖。

夢得曰。柳八駿韓十八平淮西碑文。左衽右粥。何如我平淮西雅云。仰父俯子。韓碑兼有帽子。使我爲之。便說用兵伐叛矣。夢得曰。韓碑柳雅。余詩爲云。城中晨雞喔喔鳴。城中鼓角聲和平。美愬之入蔡城也。須臾之間。賊無覺者。又落句云。始於元和十二載。四海重見昇平時。以見平淮之年云。

禹錫叙董偃文集云。詩其文章之蘊耶。義得而言喪。故微而難能。境生於象外。故精而寡。

和千里之謬。不容秋毫。非有的然之姿。可使戶曉。必俟知者。然後鼓行於時。自建安距永明。以還。詞人比肩。唱和相發。有以朔風零雨。高禘天下。雖蟬噪鳥鳴。蔚在史策。國朝因之。粲然復興。由篇章以躋貴仕者。相踵而起。

封孟紳

行不由徑。詩云。欲速意何成。康莊欲砥平。天衢皆利往。吾道泰方行。不復由莖徑。無由見蔣生。三條遵廣達。九軌尙安貞。紫陌悠悠去。芳塵步步清。澹臺千載後。公正有遺名。

孟紳。正元十五年高郢士進士第一人。終於太常卿。

陳潤

賦得浦外虹。云。日影化爲虹。彎彎出浦東。一條微雨後。五色片雲中。輪勢隨天度。橋形跨海通。還將飲水處。持送使車雄。

送駱徵君云。野人膺辟命。溪上掩柴扉。黃卷猶將去。青山豈更歸。馬留苔蘚迹。人脫薜蘿衣。他日相思處。天邊望少微。

東都所居寒食下作云。江南寒食早。二月杜鵑鳴。日暖山初綠。春寒雨欲晴。浴蠶看社日。改火待清明。更喜瓜田好。令人憶邵平。

賦得秋河曙耿耿云。曉望秋高夜。微明欲曙河。橋成鵲已去。機罷女應過。月上殊開練。雲行類動波。尋源不可到。耿耿復如何。

潤。大曆間人。終坊州郿城縣令。樂天之外祖也。大夫不感恩。感恩甯有淚。心頭感恩血。一滴染天地。

右張爲取作主客圖。

唐詩紀事卷第三十九終

唐詩紀事



唐詩紀事卷第四十

范傳正

薛存誠

賈島

馬異

張登

包吉

長孫佐輔

李正封

崔謨

張又新

陸復禮

柳公權

陸鴻漸

王季則

王公亮

徐牧

陳存

范傳正

謝真人過舊山云。麾蓋從仙府。笙歌入舊山。水流丹竈缺。雲起草堂關。白鹿行爲衛。青鸞舞自閑。種松鱗未立。移石蘚仍斑。望路烟霞外。迴輿巖岫間。豈唯遼西鶴。空歎令威還。

鮑溶人日陪宣州范中丞傳正與范侍御宴云。人日春風綻早梅。謝家兄弟看花來。吳姬對酒歌千曲。秦語留人洒百杯。絲柳向空初宛轉。玉山看日漸徘徊。流光易去歡難得。莫厭頻頻上此臺。

傳正元和十二年。廉問宣池。遷李白墳於青山之陽。爲銘曰。嵩岳降神。是生輔臣。蓬萊譴

眞斯爲逸人。晉有七賢。唐稱八仙。應彼星象。唯公一焉。晦以麴蘖。暢於文編。萬象奔乎筆端。萬慮泯滅乎樽前。臥必酒甕。行唯酒舡。吟風詠月。席地幕天。但貴適其所適。不知夫所以然而然。至今尙疑其醉在千日。寧審乎壽終百年。謝家山兮李公墓。異代詩流同此路。舊墳卑庫風雨侵。新宅爽塏松柏林。故鄉萬里且無嗣。二女從民永於此。猗歟琢石爲二碑。一藏幽隧一臨歧。岸深谷高變化時。一存一毀名不虧。

傳正爲宣歙觀察。頗事華侈。憲宗知之。代還拜光祿卿。好古性情悍。初自整飭。官益達。用度益奢。傾貲貨市。權貴驩私。公府如家帑。亦幸素有名。不敗云。

薛存誠

暮春自南臺丞。再除給事中。仍是本廳。几榻仗屨。宛然如舊云。再入青瑣闈。忝官誠自非。拂塵驚物在。開戶似僧歸。積草漸無逕。殘花猶灑衣。禁垣偏日近。行坐是恩輝。

盧綸同存誠登栖巖寺云。衰蹇步難前。上山如上天。塵泥來自晚。猿鳥到何先。萬壑應孤磬。百花通一泉。蒼蒼此明月。下界正沉眠。

存誠字資明。河中人。登正元進士第。和易容物。而當官毅然。不可奪。元和末。爲御史中丞。卒。

賈島

字浪仙。范陽人。初爲浮屠。名無本。能詩。獨變格入僻。似矯艷於元白。來洛陽。韓愈教爲文。去浮屠。舉進士。終普州司戶。島久不第。吟病蟬之句。以刺公卿。或奏島與平曾等爲十惡。逐之。詩曰。登蟬飛不得。向我掌中行。折翼猶能薄。酸吟尙極清。露華凝在腹。塵點悞侵睛。黃雀并烏鳥。俱懷害爾情。大中末。授遂州長江簿。初之任。屆東川。守者厚禮之。島獻感恩詩曰。匏革奏終非獨樂。軍城未曉啓重門。何時却入三台貴。此日私知八坐尊。羅綺舞間收雨點。貔貅關外卷雲根。逐遷屬吏隨賓列。撥棹扁舟不忘恩。自長江遷普州司倉。方干自鏡湖寄詩曰。亂山重疊。何路訪先生。豈料多才者。空垂不第名。閑曹猶得醉。薄俸亦勝耕。莫問吟詩苦。年年芳草平。島至老。無子。因啖牛肉。得疾。終于傳舍。

延康吟云。寄居延壽里。爲與延康隣。不愛延康里。愛此里中人。人非十年故。人非九族親。人有不朽語。得之烟山春。

望山詩云。南山三十里。不見隰一句。冒雨時立望。望之如朋親。虬龍一掬波。洗蕩千萬春。日日雨不斷。怨殺望山人。天事不可長。勁風來如奔。陰淫一已掃。浩翠寫國門。長安百萬家。家家張屏新。誰家最好山。我願爲其鄰。



朝飢云。市中有樵山。此舍無朝煙。井底有甘泉。釜中乃空然。我要見白日。雪來塞青天。立聞西牀琴。凍折兩三絃。飢莫詣他門。古人有拙言。

再投李益常侍云。何處初投刺。當時赴尹京。淹留花柳變。然諾肺腸傾。避著蟬移樹。高眠雁過城。人家嵩岳色。公府洛河聲。聯句逢秋盡。嘗茶見月生。新衣裁白紵。思從曲江行。

王建寄烏詩云。盡日吟詩坐忍飢。萬人中覓似君稀。僮眠冷榻朝猶臥。驢放秋田夜不歸。傍暖旋收紅落葉。覺寒重着舊生衣。曲江池畔時時到。爲愛鷓鴣雨裏飛。

烏詩有警句。韓退之喜之。其渡桑乾詩曰。客舍并州三十霜。歸心日夜憶咸陽。如今便渡桑乾水。却望并州是故鄉。

又赴長江道中詩曰。策杖馳山驛。逢人問梓州。長江那日到。行客替生愁。晉公度初立第於街西興化里。鑿池種竹。起臺榭。烏方下第。或以爲執政惡之。故不在選。怨憤題詩曰。破却千家作一池。不栽桃李種薔薇。薔薇花落秋風起。荊棘滿庭君始知。皆惡其不遜。

烏爲僧時。洛陽令不許僧午後出寺。賈有詩云。不如牛與羊。猶得日暮歸。韓愈惜其才。俾反俗應舉。貽其詩云。孟郊死葬北邙山。日月星辰頓覺閑。天恐文章中斷絕。再生賈烏在人間。由是振名。(或曰非退之詩。)

送長安惟鑒法師云。講經春色裏。花繞御床飛。南海幾回渡。舊山臨老歸。觸風香損印。霑雨磬生衣。雲水路迢遞。往來消息稀。

題杜司戶亭子云。牀頭枕是溪中石。井底泉通竹下池。宿客未眠過夜半。獨聞山雨到來時。

題李款幽居云。閑居少鄰並。草徑入荒村。鳥宿池中樹。僧敲月下門。過橋分野色。移石動雲根。暫去還來此。幽期不負言。

哭柏窻和尚云。苦覆石牀新。吾師古幾春。寫留行道影。焚却坐禪身。塔院關松雪。房門鎖隙塵。百嫌雙淚下。不是解空人。（永叔云。焚却坐禪身。乃是燒殺活和尚也。）

哭孟郊云。身死聲名在。多應萬古傳。寡妻無子息。破宅帶林泉。塚近登山道。詩隨過海航。故人相子後。斜日下寒天。普州有岳陽山。烏葬於此。唐安程錡從事。倅岳陽。有詩曰。倚恃才難繼。昂藏貌不恭。騎驢衝太尹。奪卷誤宣宗。馳譽超人前輩。居官下我儂。司倉舊曹署。一見一心忡。

唐末舉子李克恭有詩曰。一一玄微縹緲成。盡吟方更爽神情。宣宗謫去爲閑事。韓愈知來已振名。海底也應搜得淨。月輪常被翫教傾。如何未隔四十載。不遇論量向此生。

夜半長安雨。燈前越客吟。（贈吳處士句）島嶼夏雲起。汀洲芳草深。（句）秋風吹渭水。落葉滿長安。（句）山鍾夜度空江水。汀月寒生古石樓。（句）舊國別多日。故人無少年。（句）右張爲取作主客圖。

李洞過浪仙舊地云。鶴外唐來有口星。長江東注冷滄溟。境搜松雪仙人島。吟歇林泉主簿廳。片月已能臨榜黑。遙天何益抱墳青。年年誰不登高第。未勝騎驢入畫屏。

姚合寄島云。寂寞荒原下。南山只隔籬。家貧惟我並。詩好復誰知。艸色無窮處。虫聲少盡時。朝昏鼓不到。閑臥益相思。

浪仙寄友人云。一日不作詩。心源如廢井。筆硯爲轆轤。吟詠作縈綆。朝來重汲引。依舊得清冷。書贈同懷人。詞中作苦辛。

島赴舉。至京。騎驢賦詩。得僧推月下門之句。欲改推作敲。引手作推敲之勢。未決。不覺衝大尹韓愈。乃具言。愈曰。敲字佳矣。遂並轡論詩。久之。或云。吟落葉滿長安之句。唐突大尹劉栖楚。被繫。一夕放之。

馬異

送皇甫湜赴舉云。馬啼聲特特。去入天子國。借問去是誰。秀才皇甫湜。吞吐一腸文。八音

兼五色。主文有崔李。郁郁爲朝德。青銅鏡必明。朱絲繩必直。稱意太平年。願子長相憶。

貞元旱歲云。赤地炎都寸草無。兩川水沸煮虫魚。定應焦爛無人救。淚落三篇古尙書。

暮春醉中寄李于云。歡異且交親。酒生開瓮春。不須愁犯卯。且乞醉過申。折草爲籌筋。鋪花作錦裯。嬌鬢解言語。留客也慇懃。

異。河南人與盧仝結交。答仝結交詩云。有鳥口南翔。口銜一書札。達我山之維。開緘金玉。煥陸離。乃是盧仝結交詩。此詩峭絕天邊格。力與文星色相射。長河拔作數條絲。太華磨成一拳石。莫嗟獨笑無往還。月中芳桂難追攀。况值亂邦不。平年迴陵到谷如等閑。與君俛首大艱阻。啄長三尺不得語。因君今日形章句。羨獼猴子着衣裳。悲蚯蚓子安翅羽。上天不失察。我爲遼天失所。將吾劍兮切游泥。使良驥兮捕老鼠。昨日脫身卑賤籠。卯星借與老人峯。抱鋤築地芸芝朮。偃蓋參天舊有松。我與松兮保身世。臥居居兮起于于。漱潺湲兮聆嘒嘒。道在其中可終歲。不教辜負堯爲帝。燒我荷衣摧我身。回看天地如砥平。鏗刀剉骨不辭去。卑窮君子今明。俛首辭山心慘惻。白雲雖收戀不得。看雲且擬直須臾。疾風又卷西飛翼。爲報覃懷新結交。死生富貴存後凋。我心不畏朱公散。君意須防劉孝標。以膠投漆苦不早。就中相去萬里道。河水悠悠山之間。無由把袂攄懷抱。全吟文能治口奧。成蘭薰。不知何處清風夕。擬使張華見陸

雲。

張登

招客遊寺云。江城吏散倦春陰。山寺鳴鐘隔雨深。招取遺民赴僧社。竹堂分坐靜看心。  
小雪日戲題絕句云。甲子徒推小雪天。刺梧猶綠槿花然。融和長養無時歇。却是炎洲雨

露偏。

送王主簿遊南海云。平生推久要。留滯共三年。明日東南路。窮荒霧露天。曠懷常寄酒。素業不言錢。道在貧非病。時來醜亦妍。過山乘蠹屐。涉海附縹舡。行矣無爲限。宗門有大賢。

上巳泛舟詩云。令節推元已。天涯喜有期。初筵臨泛地。舊俗祓穰時。枉渚潮新上。殘春日正遲。竹枝遊女曲。桃葉度江詞。風鷁今方退。沙鷗亦未疑。且同山簡醉。倒戴莫褰帷。

劉夢得有楊州春夜與李端公益張侍御登段侍御平仲同會水館對酒聯句詩。登始以巾褐就辟。歷衛佐廷評。登貞元中爲河南士曹。遷殿院爲漳州刺史。坐公累受劾。感疾卒。權載之序其文曰。清河張登。剛潔介特。不趨和從俗。循性屬詞。發爲英華。自江南士椽滿歲計。相表爲殿中侍御史。董賦江南。無何授漳州刺史。居七年。坐公事受劾。吏議侵誣。胸臆約結。感疾不起。君疾卑調細人。白黑太明。矯枉憤厲。往往過正。故其賦有云。鶴必鬪而知斃。龍雖屠而不馴。

又云。賤而榮兮。跌而喪。痛一世之紛淪。皆所以感憤頓挫。放言敝心。兆憂賈禍。常必由之。二十年間。數免希遷。志力相熱。斯亦從古才士之所患也。道雖由己。感於知己。名不加入。成必因人。此登之語也。

包吉

字幼正。潤州人。登進士第。爲諫議大夫。坐善元載。貶嶺南。劉晏奏起爲汴東兩稅使。貞元中。爲詩寄劉長卿云。波瀾噴衆口。藜藿靜吾廬。喪馬思開封。占鵲懶發書。敝其遷謫之狀也。

父融。與賀知章。張若虛。張旭。號吳中四士。

酬于侍郎湖南見寄云。桂嶺千崖斷。湘流一派通。長沙今賈傅。東海舊丁公。章甫經殊俗。離騷繼雅風。金閨文作字。玉匣氣成虹。翰墨時無侶。丹青夙在公。主恩留左掖。人望積南宮。巧拙循名異。浮沉顧位同。九遷歸上略。三已契愚衷。責謝庭中禮。悲寬塞上翁。楚材欣有適。燕石愧無工。山曉重嵐外。林春苦霧中。雪花翻海鶴。波影到江楓。去禮頻逢信。回帆早掛空。避賢方有日。非敢愛微躬。

贈廬山白鶴觀劉尊師云。蒼蒼五老霧中壇。杳杳三山洞裏官。手護崑崙象牙簡。心推霹靂棗枝盤。春飛雪粉加毫潤。曉漱膏瓊冰（去聲）齒寒。漸恨流年筋力少。唯思露冕事星冠。

嶺下臥病寄劉長卿云。唯有貧兼病。能令親愛疎。歲時空放逐。身世付空虛。脛弱秋添絮。頭風曉廢梳。波瀾喧衆口。藜藿靜吾廬。喪馬思開卦。占鴉懶發書。十年江海隔。離恨子知予。

長孫佐輔

擬古詠河邊枯樹云。野人燒枝水洗根。數圍孤樹半心存。應是無機承雨露。却將春色寄苔痕。

別友人云。愁多不忍醒時別。想極還尋靜處行。誰遣同衾又分手。不如行路本無情。

德宗時人。第公輔爲吉州刺史。佐輔往依焉。佐輔有傷故人歌妓云。愁臉無紅衣滿塵。萬家門戶不容身。曾將一笑君前去。誤殺幾多回顧人。右張爲取此詩作主客圖。

南中客舍對雨送故人歸北云。猿聲啾啾雁聲苦。卷簾相對愁不語。幾年客吳君在楚。况送君歸我猶阻。家書作得不忍封。北風吹斷塔前雨。

杭州秋日別故友云。相見又相別。大江秋水深。悲歡一世事。去住兩鄉心。浙瀝籬下葉。淒清階上琴。獨隨孤棹去。何處更同衾。

代別後夢別云。別中還夢別。悲後更生悲。覺夢俱千里。追期難再期。翻思夢裏苦。却恨覺來遲。縱是非眞事。何妨夢會時。

答邊信云。征人去年戍遼水。夜得邊書字盈紙。揮刀就燭裁紅綺。結作同心答千里。君寄邊書書莫絕。妾答同心心自結。同心再解心不離。書字頻看字愁滅。結成一夜和淚封。貯書只在懷袖中。莫如書字固難久。願學同心長可同。

對鏡吟云。憶昔逢君新納聘。青銅鑄出千年鏡。意憐光彩固無瑕。義比恩情永相映。每將鑿面兼鑿心。鑿來不懶情逾深。君非結心空結帶。結處尙新恩已背。開篋覽鏡悲難語。對面相看孟門阻。掩扉徒慙雙鳳飛。懸臺欲效孤鸞口。昔日照來人共許。今朝照罷自生疑。鏡上有塵猶可拂。君恩詎肯無迴時。

山行 事云。日落風颺颺。駟車行遠郊。中心有所悲。苦去穿黃茅。茅中狐兔窠。四面烏鳶巢。鬼火時獨出。人煙不相交。行行近破村。一徑欲還均。迎霜聽蟋蟀。向月看蠨蛸。翁喜客來坐。客來羞廚庖。濁醪誇撥蠟。時口仍新苞。相歡對寒爐。呼兒藝枯梢。性朴頗近古。其言無斗筭。憂歡世上并。歲月途中拋。誰知問津客。空作楊雄嘲。

古宮怨云。窗前好樹名玫瑰。去年花落今年開。無情春色尙識反。君心忽斷何時來。憶昔粧成候仙仗。宮璫玲瓏日新上。拊心却笑西子頰。掩鼻誰憂鄭姬謗。草染文章衣下履。花粘甲乙牀前帳。三千玉兒休自誇。十二金釵獨相向。盛衰傾奪欲何如。嬌愛翻悲逐佞諛。重遠豈能



慙沼鵠。棄前方見泣。鰕魚看籠不記薰。龍腦詠扇空曾禿鼠鬚。始喜類羅新託栢。終傷如薺却  
甘茶。院深獨開還獨閉。鸚鵡驚飛苔覆地。滿箱舊賜前日衣。滴枕新垂夜來淚。恨多開鏡照還  
悲。綠髻青娥尙未衰。莫道新緜長絕比。猶逢故劍會相追。

李正封

洛陽清明日雨霽云。曉日清明天。夜來嵩少雨。千門尙煙火。九陌無塵土。酒綠河橋春。漏  
閑宮殿午。遊人戀芳草。半犯嚴城鼓。

詠露云。霏霏靈液重。雲表無聲落。露樹急玄蟬。灑池淒皓鶴。流塵清遠陌。飛月澄高閣。霄  
潤玉堂簾。曙寒金井索。佳人比珠淚。坐感空綃薄。

唐文皇好詩。大和中賞牡丹。上謂程脩己曰。今京邑人傳牡丹詩。誰爲首出。對曰。中書舍  
人李正封詩。天香夜染衣。國色朝酣酒。時楊妃侍上。曰。粧臺前宜飲以一紫金盞酒。則正封之  
詩見矣。

夏遊招隱寺暴雨晚晴云。竹柏風雨過。蕭疎臺殿涼。石渠瀉奔溜。金刹照頽陽。鶴飛巖煙  
碧。鹿鳴澗草香。山僧引清梵。幡蓋繞迴廊。

禪門寺暮鍾云。篋篋高懸于闐鍾。黃昏發地殷龍宮。遊人憶到嵩山夜。疊閣連樓倚太空。

退之正封從軍。有晚秋鄜城聯句詩。正封云。從軍古云樂。談笑青油幕。燈明夜觀碁。月暗秋城拆。遂爲警策。正封字中護。終監察御史。

崔護

晚雞云。黯黯嚴城罷鼓鼙。數聲相續出寒棲。不嫌驚破紗窗夢。却恐爲奴半夜啼。

山雞舞石鏡云。盧峯開石鏡。人說舞山鷄。物象纖無隱。禽情目自迷。景當煙霧嶽。心喜錦翎齊。宛轉烏呈彩。婆娑鳳欲栖。何言資羽族。在地得天倪。應笑翰名者。終朝飲敗醯。

沈存中云。唐人以詩主人物。故雖小詩。莫不恁揉極工。而後已。所謂句鍛月鍊者。信非虛言。小說護題城南詩。其始曰。去年今日此門中。人面桃花相映紅。人面不知何處去。桃花依舊笑春風。後以其意未全。語未工。改第三句曰。人面祇今何處去。至今所傳有此兩本。惟本事詩作祇今何處。在唐人作詩。大率如此。雖有兩今字。不恤也。取語意爲主耳。後人以其有兩今字。故多行前篇。(筆談)

護舉進士不第。清明獨遊都城南。得村居花木叢萃。叩門久。有女子自門隙問之。對曰。尋春獨行。酒渴求飲。女人啓關。以盂水至。獨倚小桃柯佇立。而意屬殊厚。崔辭起。送至門。如不勝情。而入。後絕不復至。及來歲清明。徑往尋之。門庭如故。而戶扃鎖矣。因題去年今日此門中之

詩於其左扉。

護字殷功。正元十二年登第。終嶺南節度使。

張又新

郡齋三月下旬作云。春事日已歇。池塘曠幽尋。殘紅披獨墜。初綠間淺深。偃仰捲芳褥。顧步愛新陰。謀春未及竟。夏初遽見侵。

三月五日陪裴大夫泛長沙東湖詩云。上已餘風景。芳辰集遠邇。綵舟浮泛蕩。綉轂下娉婷。棲樹迴葱蒨。笙歌轉杳冥。湖光迷翡翠。草色醉蜻蜓。鳥弄桐花日。魚翻穀雨萍。從今留勝會。誰看畫蘭亭。

五月水邊柳詩云。結根挺涯浹。垂影覆清淺。睡臉寒未開。嬾腰晴更軟。搖空條已重。拂水帶方展。似醉煙景凝。如愁月露泫。絲長魚悞恐。枝弱禽驚踐。悵別幾多情。含春任攀攀。

時號又新。張三頭。謂進士狀頭。宏詞勅頭。京兆解頭。又新嘗作廣陵從事。有酒妓。每致情焉。後二十年。罷江南郡。舟道廣陵。適李紳鎮淮南。又新方懼其讎已。而又遇風漂沒。二子紳憫然。復書曰。端溪不讓之辭。恐罔懷怨。荆浦沉淪之事。鄙實憫然。宴遇殊厚。前所謂酒妓者。猶在席。又新以指染酒題盤上。爲詞曰。雲雨分飛二十年。當時求夢不曾眠。今日頭白重相見。還上

襄陽玳瑁筵。李卽命妓歌以送酒。

又新與楊虔州善。楊妻李有德無容。又新求婚於楊。曰得美室足矣。楊曰但與我好。定諸君心。又新旣成婚。殊失望。乃爲詩曰。牡丹一朵直千金。將謂從來色最深。今日滿欄開似雪。一生辜負看花心。（看一作惜）

又新字孔昭。薦之子。附逢吉。罷貶汀州刺史。又附李訓。訓死。復坐貶。終左司郎中。

### 陸復禮

正元八年。宏詞試。中和節。詔賜公卿尺詩云。春仲令初吉。歡娛樂大中。皇恩口百度。寶尺賜羣公。欲使方隅法。還令規矩同。捧觀珍質麗。拜受聖恩崇。如荷丘山重。思酬分寸功。從茲度天地。與國慶無窮。

是歲復禮第一人。李觀裴度次之。

### 柳公權

公權。武宗朝。在內庭。上常怒一宮嬪。久之。旣而復召。謂公權曰。朕怪此人。若得學士一篇。當釋然矣。目御前蜀牋數十幅。授之。公權略不佇思。而成一絕曰。不分前時忤主恩。已甘寂寞守長門。今朝却得君王顧。重入椒房拭淚痕。上大悅。令宮人上前拜謝之。

文宗時充翰林學士。從幸未央宮苑中駐驛。謂公權曰。我有一喜事。邊上衣賜久不及時。今年二月。給春衣訖。公權前奉賀。上曰。可賀。我以詩宮人迫其口進。公權應聲曰。去歲雖無戰。今年未得歸。皇恩何以報。今日得春衣。上悅。激賞之。

文宗夏日與諸學士聯句曰。人皆苦炎熱。我愛夏日長。公權續曰。薰風自南來。殿閣生微涼。五學士屬和。帝獨諷公權兩句。辭清意足。不可多得。乃令公權題於壁上。字方圓五寸。帝視之。嘆曰。鍾王復生。無以加矣。公權字誠懸。卒於太子太保。

陸鴻漸

太子文學陸鴻漸。名羽。其先不知何許人。景陵龍蓋寺僧姓陸。於堤上得初生兒。收育之。遂以陸爲氏。及長。聰俊多聞。學瞻辭逸。恢諧辨捷。性嗜茶。始創煎茶法。至今鬻茶之家。陶爲其像。置於煬器之間。云宜茶足利。至大和中。復州有一老僧云。是陸僧弟子。常諷其歌云。不羨黃金壘。不羨白玉杯。不羨朝入省。不羨暮入臺。唯羨西江水。長向金陵下來。鴻漸又撰茶經三卷。行於代。今爲鴻漸形。因目爲茶神。有售則祭之。無則以釜湯沃之。

皇甫曾送鴻漸採茶相過詩云。千峯待逋客。香茗復叢生。採摘知深處。煙霞羨獨行。幽期山寺遠。野飯石泉清。寂寂然燈夜。相思一聲聲。

吳門有辟疆園。地多怪石。鴻漸翫月詩云。辟疆舊林園。怪石終相向。  
權載之送陸太祝赴湖南幕詩云。不憚征路遙。定緣賓禮重。新知折柳贈。舊侶乘藍送。此  
去嘉句多。楓江接雲夢。（按鴻漸自太子文學徙太常寺太祝。不就職。）

王季則

魚上水云。北陸收寒盡。東風解凍初。冰消通淺溜。氣變躍潛魚。應節似知化。楊髻任所如。  
浮沉非樂藻。泔泝異傳書。綴網時空久。臨川意有餘。爲龍將可望。今日愧才虛。

季則登元和進士第

王公亮

魚上水詩云。春生寒氣減。稍動久潛魚。乍喜東風至。來看曲岸初。出冰朱鬢見。望日錦鱗  
舒。漸覺流澌近。還欣掉尾餘。噉喁情自樂。泔泝意甯疎。儻得隨鱗化。終能上太虛。

公亮登正元進士第。長慶初。上兵書十八卷。自司門郎中爲商州刺史。制云。茂於學。精於  
文。文學之外。有折毫剗鍾之用。自佐戎律。領郡符。持憲爲郎。皆稱厥職。命以爲商州。以爾精敏。  
當自得中。

徐牧

臨淵羨魚詩云。清泚濯纓處。今來喜一臨。慙無下釣處。空有羨魚心。退省時頻改。謀身歲屢沉。鬢成川上媚。網就水甯深。頰尾臨波裏。朱鬢破浪潯。此時儻不漏。江上免行吟。

陳存

穆陵路詩云。西遊匣長劍。日暮湘楚間。歇馬上秋草。逢人問故關。孤村綠澹水。曠野白雲山。方念此中去。何時此路還。

寓居武丁館云。暑雨飄已過。涼颼觸幽衿。虛館無喧塵。綠槐多晝陰。俯視古苔積。仰聆早蟬吟。放卷一長想。閑門千里心。

送劉秀才南歸詩云。烏啼楊柳垂。此別千萬里。古路入商山。春風生灞水。停車落日在。罷酒離人起。蓬戶寄龍沙。送歸情詎已。

存。大曆正元間詩人。

